




清代傳記叢刊·綜錄類⑦  
周駿富輯

# 國朝耆獻類徵初編

(四九)

卷三六〇至  
卷三七〇

(清)李桓輯



明文書局印行

Wesley 1/14

國朝耆獻類徵初編卷三百六十目錄

忠義三十

劉成得 楊伏國等

楊萬年 陳尙賢等

阿爾薩朗

高舉 子堯 李國良等

林朝輔 李榮光

常萬清 余海等

安如峒

陳裕後 白澄清等

西津泰

譚公義 治正華等

諸神保

文光斗

張文貴 彭天亮等

顧世臣 李廷桂等

田占魁 速得貴等

盧應朝 陳國樑等

烏爾恭阿 德成額等

楊秉昭 張錦榮等

豐伸布

增福 愛新等

雙保 齊郎阿等

賈永吉 周禮等

巴哈布 蒙彪等

馮培元 江永輝等



國朝書目考卷之三十一

李真 黃有學等

惠倫

國朝耆獻類徵初編卷三百六十

通奉大夫前署江西巡撫江西布政使司布政使湘陰李桓輯

忠義三十

劉成得

楊伏國等

劉成得甘肅西甯人由行伍於乾隆十九年拔提標中營左哨外委二十年擢中營右哨頭司把總二十四年隨征準噶爾二十五年擢康家寨千總二十八年調提標中營千總三十二年升巴里坤鎮標右營守備三十六年升陝西神木協中軍都司尋調哈密協中軍都司四十一年失察哈密臺站書吏受賄奪職經哈密辦事大臣明琦奏請畱任效力四十三年署巴里坤鎮標右營遊擊

四十九年以效力八年期滿復職五十一年實授中軍遊擊六十年升陝西西安城守營參將嘉慶元年署潼關協副將尋帶兵赴雒南商州連界之月兒灣諸處防堵川楚教匪二年三月楚匪由魯山西竄伏牛山是山縣互豫省南召盧氏等縣西接陝西雒南商南潼關諸處成得率兵偕同州府知府朱勳於雒南雞頭山七盤磨設立總卡擇險堵守四月賊匪屯盧氏縣之瓦窰溝速撲商南之東西捻耳溝卡隘成得聞信率兵星馳堵剿殲擒四百餘人餘賊潰逸成得復進兵追躡賊匪由兩路突出四面合圍成得眾寡不敵身受重傷歿於陣時賊竄掠安康縣陝西固原鎮標後營守備楊伏國隨總兵慶溥分兵迎擊首先前進歿於陣甘肅西甯

鎮標右營千總徐士柏提標後營左哨二司外委把總趙盛揚均力戰陣亡其擊賊於金家山者山東撫標右營守備徐天佑曹州營把總王瑄甘肅大馬營把總張述勳俱以力戰受傷陣亡先後事聞諭曰竄匪由盧氏闖入商南參將劉成得帶兵堵禦受傷陣亡殊爲可惜著加等議卹餘 賜卹如例均 賞雲騎尉世職襲次完時以恩騎尉世襲罔替成得子傑襲伏國子鶴襲士柏子大祥襲盛揚子倫襲天佑子林襲瑄子延恩襲述勳子其興襲伏國甘肅山丹人士柏甘肅綏甯人伏國由行伍隨征金川力戰受傷拔外委洊升千總嘉慶二年檄剿四川達州教匪屢立戰功升是職盛揚天佑俱張掖人瑄山東單縣人述勳甘肅甯州人

右 國史館本傳

楊萬年 陳尙賢等

楊萬年陝西長安人由行伍於乾隆三十八年從征金川歷戰六十九次敘功列超等四十二年拔西甯鎮標右營額外外委四十七年升本標前營把總四十九年隨剿石峯堡逆回擢安西州千總五十九年升西甯鎮標右營守備嘉慶元年十月派赴漢中與安一帶剿捕邪匪旋調赴四川追捕達州邪匪二年四月隨四川總督宜綏等分兵圍剿金峽寺清溪場賊巢萬年偕西甯鎮標右營千總陳尙賢西甯鎮標中營外委祁紹堯陝西大通協左營外委古萬龍率領官兵鄉勇先登木城斫開寨門官兵擁入賊眾抗拒萬年等奮勇衝突皆受重傷歿於陣是年四月擊賊於王家寨



陣亡者甘肅巴燕戎格營額外外委韓成祥先後事 聞奉 旨  
楊萬年陳尙賢祁紹堯古萬龍著加二等議卹萬年紹堯尙賢萬  
龍俱廕雲騎尉襲次完時給予恩騎尉世襲罔替成祥卹如例萬  
年子世茂襲尙賢子性善襲紹堯子洪業襲萬龍子玉林襲尙賢  
紹堯成祥俱甘肅西甯人尙賢由行伍於乾隆五十二年拔甘肅  
西甯鎮標額外外委五十六年補前營外委是年二月隨征廓爾  
喀殺賊三擒賊二敘功列超等五十七年授威遠營把總嘉慶元  
年擢本職

右 國史館本傳

阿爾薩朗

阿爾薩朗蒙古鑲白旗人賴奇忒氏由健銳營前鋒補前鋒校果  
遷至副前鋒參領乾隆三十七年十月赴金川軍營次年七月擢  
烏槍護軍參領四十年五月授正紅旗蒙古副都統自八月十二  
日先後經副將軍明亮派往納木迪克爾瑪什扎古及阿爾古噶  
爾角各寨落攻獲甚多獨古木思得礮寨十餘處官兵直斫礮門  
賊巢掃蕩事 聞 諭交部優敘四十一年正月以阿爾薩朗前  
次攻克達撒谷受傷得 旨賞給緞二匹並 諭將傷痕愈否之  
處卽爲覆奏阿爾薩朗聞 命感奮帶兵攻取甲雜獨松等處最  
有功將軍阿桂卽以入奏得 旨賞給阿爾杭阿巴圖魯名號金

川平圖像於紫光閣 御製贊曰跬步皆山面前萬仞無著足處  
攀騰奮迅遂破扎古既翹且英人中獅子實稱其名五月領兵回  
京十二月授喀什噶爾領隊大臣四十二年七月轉鑲藍旗蒙古  
副都統四十四年十二月充伊犁領隊大臣四十九年正月 諭  
令回京行抵蘭州聞逆回滋事奏赴安甯縣隨同陝甘總督李侍  
堯協剿於六月初二日到陝甘軍營卽迎殺賊匪三百餘名至伏  
羌縣擊斃賊目三人獲賊二十九名縣有雲霧山賊眾據險爲拒  
勢張甚阿爾薩朗率領遊擊德海等奮勇攻撲殺賊二百餘名生  
擒賊首馬玉華餘賊十名獲首級四十是役也阿爾薩朗與提督  
剛塔總兵蘇靈阿等分兵左右兩路功最多躡追至秦安縣屬之

土鼓山賊眾四路憑高乃與都統五岱會合探明路徑設法勦捕旋逐賊至田家山賊依山屯聚官兵分三路副都統圖桑阿等居中左翼三德右翼阿爾薩朗各帶兵八百名奮力仰攻賊卻我兵進奪山梁賊大驚竄進至底店復以兵五百人在北山一路搜獲敗逃餘眾統兵大臣入奏得旨嘉獎七月授鑲紅旗護軍統領時官兵圍石峯堡賊巢安卡挑濠斷其水道大學士公阿桂奏派阿爾薩朗率同侍衛官兵在石峯堡西北一帶嚴防隨以京兵分兩路進勦由堡後西北山直上拋擲火彈擊斃壕內之賊甚多時大兵四面環攻賊窮蹙思竄我師矢石齊發阿爾薩朗等督兵進堡擒殺賊目及餘匪以干計奪獲器械無算事平帶領京兵回京



五十五年調正白旗護軍統領補公中佐領五十六年三月轉正藍旗滿洲副都統五月以前在護軍統領任內失察守庫護軍糾竊銀兩一案 諭降二級留任五十九年六月開復嘉慶元年九月又以揀選護軍參領不公革職留任時楚北邪教擾及豫中都統永保奏請添兵 命阿爾薩朗等帶領健銳火器營勁旅各一千名往豫省交永保調遣十一月與副都統碩雲保等在大江東北滾河一帶督兵兜剿阿爾薩朗復攜步卒渡河結營以防敗走之賊因都司福甯阿疏於防守被賊偷渡滾河向西竄逸疊奉諭旨以阿爾薩朗等俱係特派帶領京兵大員未能會籌妥辦酌量分布本有應得之咎究非總統之人著寬免治罪仍傳旨申飭

二年正月賊首姚之富等分股南竄阿爾薩朗由張家集會同將軍恆瑞永保分路進剿賊復思東竄阿爾薩朗督同翼長七十五等率健銳營滿兵乘勝薄之斃賊目穆玉林等三名餘匪三百餘名生擒十九名又至興隆集彭家岡遇潰匪狂奔率馬兵截擊斃賊六七百人又領烏槍步卒赴迎山岡奮剿賊目三名賊匪四五百人蒙賞大小荷包以示鼓勵又攻賊於杏兒山賊爭棄輜重走阿爾薩朗偵知沿途有伏匪卽圍其村用火箭火彈斃賊千餘名二月帶領滿漢兵二千搜剿東北一路逃竄餘匪擒首逆劉起奏入賞金盒銀絲盒大小荷包復由洛陽店一帶跟剿逸匪於均州於官潭晝夜巡防又繞至唐家店賊恃眾抗拒阿爾薩朗等



分領馬隊入其陣七十五等分步兵爲兩翼左右進攻其殺賊三百餘人事聞賞金盒大小荷包以示鼓勵三月在觀音巖搜殺逸匪又於尙家店緝獲匪徒韓文滔等三人斃十三人又赴小阜街邢家川截剿竄賊四月署工部尙書惠齡奏以鄖陽邊界緊要派阿爾薩朗率舊領滿兵赴鄖西等處截剿慮匪眾向西南與達州邪匪潛相勾結也旋奉諭阿爾薩朗經惠齡派赴三尖山防守復因賊匪擾至鄖陽檄催協剿三尖山距鄖西不遠何以總未趕到延緩之咎實無可辭阿爾薩朗卽領兵至表帶鋪堵截並爲鎮安聲援五月朔日聞西北逸出之賊距鎮安且近率兵進至午峪溝遇賊匪乘馬者二百餘人擊之斃數十人餘眾奔避追殺

二十餘里其地距表帶鋪稍遠卽於王家坪爲營未定賊眾潛出  
自溝乘閒撲犯阿爾薩朗督兵竭力抵禦殺賊多人突中槍傷墜  
馬被戕陣亡奏入 上命交部從優議卹尋議照例承襲騎都尉  
三次襲次完時承襲恩騎尉世襲罔替六年七月陝西巡撫陸有  
仁將曾經戕害阿爾薩朗之首逆馬五首級解京 上命乾清門  
侍衛慶惠赴阿爾薩朗墳塋 賜奠將馬五首級懸挂令家屬觀  
看以抒忠憤子三英特古斯襲騎都尉

右 國史館本傳

國朝文獻備考卷之三十三

高舉

子堯  
李國良等

高舉順天大興人由監生於乾隆四十年捐通判分發湖北四十四年補襄陽府通判四十五年丁繼母憂四十八年服闕仍赴湖北候補五十四年補宜昌府通判六十年署監利縣知縣時教匪滋事檄赴軍營嘉慶元年灌灣腦張正謨股匪迭被官兵剿擊困守巢穴高舉隨總統惠齡等督兵奪獲箝堵卡直逼二道牆燬草棚乘勢進攻生擒首逆張正謨劉洪鐸並賊目聶傑人之子聶渭等四十八名搜獲刀械無算灌灣腦賊巢平奏入 賞戴藍翎以同知升用二年隨惠齡在黃龍堡山口殲王廷詔李全姚之富等股三千餘匪高舉留黃龍堡防守尋以護軍統領阿爾薩朗駐

營表帶堡偵知賊竄陝西鎮安縣城帶兵迎勦追擊三十餘里至王家坪紮營未定賊眾潛由山溝猝出合圍阿爾薩朗被困高舉率子堯及鄉勇頭目九品職銜李國良帶領鄉勇由黃龍堡馳往救護均被戕時華陰縣縣丞王銑承辦軍需赴鎮安縣大賚溝運糧至平化溝遇賊接仗力竭陣亡先後事 聞得 旨高舉李國良從優議卹王銑卹如例均 賞給雲騎尉世職襲次完時以恩騎尉世襲罔替舉子伯文襲銑子韞輝襲銑江蘇陽湖人國良嗣襲籍貫無考

右 國史館本傳



林朝輔 李榮光

林朝輔貴州鎮遠人乾隆庚戌科武進士五十七年選補湖北撫標右營守備嘉慶元年二月從巡撫惠齡追擊聶傑人等賊於蕭家巖朝輔先登殺執旗賊一人兵繼進賊大敗其伏兵在方家大山者來迎救朝輔與守備鄧興相左右擊之適惠齡畢沅所遣副將額勒金保參將許文謨等搜捕栗子山卡嶺衝兩路賊黨者既敗賊而來會遂合兵奪方家大山山梁殺賊數百人生擒向宏明賀直中等傑人等遁入灌灣腦而令其黨拒守於距灌灣腦廿里許之太和山朝輔與鄧興相復從額勒金保等先登焚柵殲賊無算聶傑人竄深衝口鳳凰山既就擒而張正謨率餘眾尙據鳳凰



山時霧雨連日賊乘雨從內山順溝出朝輔與把總朱升鑑等大  
敗之旋又敗之於聶家河四月進攻灌灣腦朝輔從成德惠齡攻  
其左寨之踞蔡家坡者先登奪柵斃賊百餘人成德等狀功上  
聞奉 旨 賞戴花翎五月率兵由雞公山進剿林家灣賊卡奪  
之進攻羅老洞卡擊敗賊之從鳳凰觀山溝潛下抄襲官兵後路  
九月惠齡規取九鼎埡香鑪巖賊卡命朝輔與都司劉朝貴伏兵  
山坳俟賊出毀其柵盡奪之十月率兵斷賊水道朝輔先登遇搆  
石傷惠齡奏 聞奉 旨咨部議敘水道既絕賊不能久守惠齡  
乘賊來奪泉率兵攻之朝輔先登奪柵生擒賊黨龔士綱鄧有木  
鄧大畏等十五人奏入 賞果勇巴圖魯名號以遊擊升用十一

月補授廣東連陽營遊擊十二月從關騰勦中腰賊卡有功二年  
四月調補湖北襄陽城守營遊擊五月從額勒金保攻豬耳寨等  
處中槍陣亡廣西提標前營千總李榮光同時戰歿於陣事聞  
奉旨林朝輔李榮光著加等議卹廕雲騎尉世職襲次完時以  
恩騎尉世襲罔替朝輔子奇尉襲榮光子印襲榮光廣西馬平人

右 國史館本傳

同德堂製藥廠出品

每盒一元

175-024

常萬清 余海等

常萬清甘肅皋蘭人出行伍於乾隆三十八年隨征金川殺賊立功四十二年拔補督標前營額外委四十五年補本標右營外委四十六年擢本標前營把總五十年擢河州鎮標西固營千總五十九年擢涼州鎮標甯遠堡守備嘉慶元年六月派剿湖北邪匪旋赴達州二年五月隨都統德楞泰署廣州將軍明亮分路夾擊火石嶺賊巢萬清偕四川安阜營頭哨千總余海署甘肅西甯鎮標左營左哨頭司把總楊崑甘肅涼州鎮標大靖營把總戴福隨同進兵賊出卡抵禦排列嶺上大兵進至山嶺之半賊匪槍礮木石齊下我兵用黨牌抵住奮勇爭先一擁而上刀斫槍擊斃賊

甚多萬清海崑福皆受重傷歿於陣同時攻剿火石嶺之前分水嶺賊卡者四川敘馬營千總冶正華甘肅永安營額外外委高進保銀海營額外外委張廷迺賊據守卡內滾木擗石紛紛如雨正華等首先躍入斫斃數賊克獲卡座乘勝追剿殲擒無算正華進保廷迺均力戰受傷陣亡事 聞奉 旨常萬清余海楊崑戴福冶正華俱著加等議卹萬清余海崑福均廕雲騎尉襲次完時給子恩騎尉世襲罔替進保廷迺卹如例萬清子法孔襲海子耀瓏襲崑弟崙襲福子文星襲正華子文燦襲海四川平武人由行伍拔四川川北鎮標中營額外外委補本營左哨外委擢安阜營左哨二司把總旋擢本職乾隆六十年派征黔楚逆苗三月隨大軍



解永綏圍克蘭草坪滾牛坡四月攻克蘇麻寨嘉慶元年四月攻  
克結石岡五月克三台山同大兵殲擒逆首石柳鄧及其子石老  
喬苗疆平敘功列超等卽調赴四川軍營崑乾隆己酉科武舉進  
保廷迺皆行伍俱甘肅西甯人福甘肅皋蘭人乾隆壬子科武舉  
正華四川成都人乾隆庚子科武舉五十四年拔永甯營把總六  
十年派剿黔楚逆苗攻克茶陀柳芬八荆桃花諸苗寨奮勇殺賊  
有功嘉慶元年擢本職七月攻克貴魚坡石隆各大寨同大兵殲  
擒逆首石柳鄧屢立戰功苗境平調赴四川軍營

右 國史館本傳



--	--	--	--	--	--	--	--	--	--

安如峒

安如峒四川華陽人由武舉隨營效力於乾隆五十七年授重慶鎮標左營千總六十年四月隨總督福康安攻剿黃瓜寨苗匪屢次力戰有功 賞戴藍翎七月大兵克古哨營山梁其下游爲大烏草河河上下皆立寨拒守如峒沿山坡誘賊都統德楞泰前由朱苗坪渡河合擊之追至長營哨擒獲無算以功遷疊谿營中軍守備十二月大兵進剿石三保吳廷禮石柳鄧等於平隴乘雪分兵攻地良坡如峒備花連布等攻克地良坡對面之高斗山都統額勒登保由樛木營繞至賊後合圍之燬其營柵賊驚潰殲戮無算奏入 賞換花翎嘉慶元年由高斗山進攻擒頭坡等處連克

之奉 旨安如峒善遇有應升缺出卽行升用旋升瀘州營都司  
二年正月隨將軍觀成代辦四川總督英善擊教匪冷倅徐添德  
於建州是時賊踞東鄉縣之曾家山張家觀相爲犄角如峒偕參  
將增順於羅江口立柵防守賊分路來犯如峒督兵禦之殲戮甚  
眾二月賊由查子峽犯磐市鋪隘柵候補副將孫起鵠率兵堵截  
如峒由小道督兵接應生擒賊目楊正潮蕭先惠三月總兵朱射  
斗屯兵於漏月巖冷倅率眾來犯如峒偕副將長春等擊走之時  
賊據金峩寺姚家寨及雞爪嶺設柵抗拒高岡陡峭仰攻不易如  
峒隨總兵艾如文自王家巖繞出嶺北爭上山梁朱射斗由嶺南  
夾攻之燬其柵遂克雞爪嶺乘勝追襲殲斃無算金峩寺賊來援

如峒率兵擊走之六月賊黨孫老五據磨子壩如峒隨權領侍衛  
內大臣德楞泰步行叢莽中殲斃騎馬賊目一名乘勢下壓遇伏  
加峒奮力轉戰身受重傷歿於陣事 聞得 旨著加等議卹並  
賞給雲騎尉世職襲次完時以恩騎尉世襲罔替子定邦襲

右 國史館本傳

同車編成表

10



陳裕後 白澄清等

陳裕後四川鹽源人由行伍於乾隆三十六年隨征金川進攻納頂邊谷衝龍梭坡大寨收復克布什咱力戰受傷又攻克達爾圖俄普甲索山梁奪獲軍器無算前後打仗數十次積功拔行營外委四十八年拔補四川瀘甯營外委五十二年補靖遠營左哨外委五十九年擢四川建昌鎮標中營左哨頭司把總六十年苗匪滋事派赴黔楚進攻秀山標木山黃瓜寨奪獲大烏草河猿猴寨馬鞍山等處奮勇殺賊屢戰有功擢四川馬邊營千總嘉慶二年調赴達州剿捕教匪六月隨都統德楞泰進攻重石子寨自寅至午賊人滾木搗石俱盡我兵奮力進剿裕後爭先殺賊歿於陣同

時河州城守營把總白澄清普安營外委張永清越嶲營外委張  
文倫俱乘勝擊賊陣亡馬邊營額外外委羅應舉受傷病歿事  
聞奉 旨白澄清陳裕後張永清張文倫俱加等議卹並 賞給  
雲騎尉世職襲次完時以恩騎尉世襲罔替應舉卹如例裕後子  
文榮襲澄清子之琳襲永清子仕英襲文倫孫桂林襲澄清甘肅  
洮州人由行伍隨征金川以功拔外委復隨征黔楚逆苗力戰有  
功升是職永清四川雷波廳人由行伍從征金川及西藏以功補  
是職文倫四川西昌人應舉四川新都人

右 國史館本傳

西津泰

西津泰鑲黃旗滿洲人和色里氏由前鋒於乾隆四十八年補前鋒校五十年署前鋒侍衛五十二年從征臺灣逆匪林爽文十二月隨陝甘總督福康安自斗六門進攻水沙連大里杙諸處累戰皆捷 恩賞法爾沙台巴圖魯名號五十三年臺灣平敘功 予世職圖畫後三十功臣於紫光閣 命詞臣爲之贊曰賊匪效敵此怯彼張似茲勇戰果勁孰當馳驟南北迅復村莊有勳必錄附載旂常五十六年擢前鋒侍衛五十七年升護軍參領六十年四月隨征苗匪攻克榔木陀山梁進奪黃瓜山五月燬賊太平山木城五七月擊賊於雷公灘大山賊掘大烏草河阻我師西津泰隨

護軍統領德楞額設疑兵牽賊大兵別由朱苗坪潛濟攻其後賊  
驚擾西津泰亦渡河夾攻殲賊無算八月擊賊於狗腦坡盡奪其  
大小山包殪賊十餘人九月賊渠吳半生遁據高多寨隨雲貴總  
督福康安等進圍之賊窮蹙乞降事 聞得優敘十月連破賊於  
大坡腦得勝山奪城卡三十餘座進克垂藤董羅諸苗寨十一月  
偪鴨保賊寨別賊吳八月平隴來援破擒之得 旨嘉獎十二月  
焚大小天星寨克賊卡十三奉 旨賞白玉扳指大小荷包以示  
獎勵嘉慶元年正月克擒頭坡城卡二月賊率眾自連雲山來犯  
擊走之五月破火麻營山梁深入苗地進克馬鞍山直偪乾州六  
月 上命爲頭等侍衛 賞副都統銜七月隨四川總督和琳由



三岔河進攻平隴連克強虎哨後坡新寨麻里寨請要隘十月隨  
都統額勒登保攻乾溪短兵力戰盡毀其城卡偪賊巢僅四五里  
妻入 上命賞織錦蟒袍料一端進克嚴人坡復 命賞大小荷  
包十一月官兵分道並進西津秦自觀音坡入攻其左賊阻險掘  
深溝列石牆木柵固守我兵囊土填壕火焚其牆柵賊驚竄得  
旨褒賞大兵進據養牛塘賊悉眾守隘乘大霧深入攻拔之十二  
月進奪貴魚坡殺賊大半偵賊巢在石隆率兵繞山右潛進夜三  
鼓槍礮並發陣斃賊首石柳鄧餘黨盡殲奉 旨交部優敘二年  
四月率兵抵達州隨征邪匪分駐羅江口防禦擊賊王三槐於冉  
家埡口進攻金峩寺大破之俘賊一百三十五獲大礮三十六鳥



槍三百雜器械五百餘件 上命賞扳指荷包五月隨四川總督  
宜縣擊賊於花潭斬獲甚多 上命賞玉扳指洋玻璃盒大小荷  
包六月攻克重石子香鑪坪賊巢復 命賞玉扳指嵌松石金盒  
大小荷包進擊安子坪生獲賊目陳明采等二十七人賊退屯精  
忠寺山包爲大兵所困不得竄傾巢犯我師勢張甚西津泰衝入  
賊陣手刃賊十餘賊眾披靡西津泰亦受重傷陣亡事 聞奉  
上諭西津泰殺賊陣亡深爲可惜著咨部照副都統例議卹 恩  
賞騎都尉謙一雲騎尉世職子海深阿襲

右 國史館本傳

譚公義 治正華等

譚公義四川成都人由行伍於乾隆四十四年拔提標前營額外委四十五年補建昌鎮標左營外委四十六年隨征撒拉爾回匪以功擢維州協左營把總尋升前營千總五十二年隨剿臺灣逆匪五十七年隨征廓爾喀俱奮勇有功升成都城守營守備五十八年調越巂營中軍守備嘉慶元年五月檄剿湖北教匪偕施南協副將樊繼祖帶兵馳往咸豐縣馬鬣嶺奮力攻克賊卡駐兵防堵賊迭次糾眾衝突復句結旗鼓寨股匪來攻公義竭力堵擊殲賊甚夥賊潰以功遇有應升之缺升用七月進攻旗鼓寨逼近賊巢燬其木城賊遁追戮無遺奏入 上以公義身受多傷猶奮

勇殺賊 命遇缺卽升二年二月總督福凝分兵攻黃柏山賊巢  
公義帶兵伏山下大兵攀巖越坎而進克頭卡賊繞鷲凸嶺抄襲  
公義發伏擊走之遂合大兵進克卡座三月隨署廣州將軍明亮  
攻克蜈蚣山城卡殲獲殆盡四月隨領侍衛內大臣都統額勒登  
保攻四方臺冒槍石奮上山梁燬其巢殲除餘逆 賞戴花翎六  
月躡追分水嶺越山竄匪殲戮甚眾忽暴雨如注山氣迷漫賊踞  
山設卡滾木擗石公義偕四川敘馬營千總冶正華貴州丹江營  
把總馬德元甘肅永安營額外外委高進保鎮海協額外外委張  
廷迺奮勇仰攻均以力竭受傷歿於陣事 聞得 旨均著加一  
等議卹譚公義冶正華馬德元均 賞給雲騎尉世職襲次完時

以恩騎尉世襲罔替公義子賢佐襲正華子文燦襲德元子珍襲  
進保廷迺照馬兵例加等 賞卹正華四川成都人由武舉授把  
總乾隆六十年隨征黔楚逆苗克入荆桃花等寨嘉慶元年苗境  
平升是職德元四川西昌人進保廷迺俱甘肅西甯人

右 國史館本傳

四庫全書  
卷三百二十一

天



諸神保

諸神保馬佳氏滿洲正紅旗人由護軍校洊升護軍參領乾隆三十七年授四川疊溪營遊擊駐藏期滿遷成都營參將四十九年升督標中軍副將五十四年擢重慶鎮總兵五十六年調浙江黃巖鎮總兵時廓爾喀不靖諸神保呈請赴藏帶兵經協辦大學士孫士毅奏聞得旨嘉獎五十七年將軍福康安派守緘轄一路要口防堵有功賞戴花翎五十八年調松潘鎮總兵旋調建昌鎮總兵六十年出師黔楚檻送首逆吳半生來京嘉慶元年川楚陝三省邪匪滋擾調赴湖北軍營在龍山一帶連次殺賊多名特賞蟒袍一襲五月偕慶溥分勅來鳳邪匪賊抵死抗拒諸神保

帥師從後截擊殲賊無算官兵正在孛卡閒有賊匪千餘前來搶撲我兵用礮轟擊殲執旗賊目二賊大潰復乘勝追殺百餘生擒六人八月攻勦旗鼓寨諸神保督率弁兵生擒首逆田谷敦等焚燬賊巢捷入 上嘉其奮勇 賞喀勒春巴圖魯名號二年四月偕倫布春等在枇杷塘等處截擊殲賊甚多時股匪林之華覃加耀等屯踞大芭葉山以大荒口爲抗守五月領侍衛內大臣額勒登保由豬耳寨分水嶺孛卡進逼賊抵死抗拒諸神保帶兵趕至兩路截殺賊勢披靡追殺二百餘人 賞喜字玉扳指大小荷包賊復乘夜直撲打子臺營卡諸神保密派官兵潛出山坡連環放槍賊不敢近 上嘉之六月分帶兵勇攻破斜嶺木城殄賊無算

賈玉喜字牌閩六月以督兵不力致賊衝開兩卡相率迅逸奉  
旨革職拔去花翎仍留軍營效力尋因林之華等率眾奔逸額勒  
登保派同倫布春等追剿截賊於紅土溪諸神保猝中槍傷墜馬  
陣亡奏入 諭曰諸神保奮力擊賊中槍陣亡自因前此賊從伊  
所管營卡逃竄心知愧勵奮不顧身亦堪憫惻諸神保係革職之  
員例無卹典念其殺賊捐軀著照參將例子卹 賞雲騎尉世職  
孫西郎阿承襲

右 國史館本傳

國朝書目類編卷三十一

三十一

一

文光斗 李根長等

文光斗四川溫江人由武舉隨營效力於乾隆五十三年考補駐  
京提塘期滿籤發廣東補羅定協左營守備嘉慶元年隨征湖南  
苗匪以功擢四川夔州協都司二年閏六月湖北教匪林之華等  
竄赴建始縣之芭葉山緣山疾走將由五家河分竄恩施宣恩兩  
縣光斗隨副都統倫布春等率兵先出五家河至新村餘金壩一  
路截剿都統額勒登保率總兵張廷彥等亦由羅雲巖來會賊遂  
奔紅土溪山嶺額勒登保督兵力剿賊悉眾衝拒適光斗隨倫布  
春等由餘金壩追上紅土溪前山迎擊殲斃賊匪三百餘名會大  
雨至山霧瀰漫賊忽從山後突出我兵兩路合力擊之賊大敗竄



馬河壩山梁至夕雨不止我兵追擊甚力光斗以力戰歿於陣江  
南安慶營守備李根長亦力戰陣亡嗣是七月林之華等復竄踞  
帽子山城口一帶額勒登保督兵追至石柱嶺賊乃退踞腰帶巖  
拒守巖有三層高四五丈至二三十丈不等額勒登保令廣西提  
標右營遊擊楊秉昭等於五鼓帶兵攻下層以繩梯潛接而上遂  
奪之毀房卡殆盡進攻第二層賊蜂擁抗拒秉昭被擗石傷歿於  
陣廣東三江營左營左哨千總張錦榮亦力戰死先後事 聞得  
旨文光斗李根長俱著加等議卹餘 賜卹如例均 賞給雲騎  
尉世職襲次完時以恩騎尉世襲罔替光斗子占鼇襲根長子壩  
襲秉昭子裕龍襲錦榮子殿元襲根長雲南賓川州人乾隆五十

四年武進士授藍翎侍衛期滿以營守備用六十年補是職秉昭  
廣西臨桂人由行伍拔外委洊升是職錦榮廣東連州人

右 國史館本傳

國朝書目考卷之三十三

三十三

張文貴 彭天亮等

張文貴貴州平遠人乾隆四十一年正月由行伍補貴州畢赤營把總四十四年五月拔補本營千總五十八年十月升定廣協右營守備嘉慶二年正月隨征興義狃苗六月大兵攻克卡于河期至普坪坡文貴與貴州石阡營把總彭天亮思南營難廬把總徐光顯署大定協左營把總段啟文黔西協右營外委王元柏遵義協左營外委周紹全俱擊賊歿於陣大兵由普坪坡直抵孛弄進解南籠圍貴州安義鎮標右營把總李春敖偕中營外委張其陞俱擊賊歿於陣同時貴州貴陽城守營外委朱應文擊賊於鎮甯州屬花腳寨永安協右營把總劉應科擊賊於石龍關戛猛寨俱

戰歿先後事 聞議卹文貴等俱廕雲騎尉襲次完時給予恩騎尉世襲罔替文貴子應鍾襲天亮姪大貴襲光顯子應彪襲啟文子遇春襲元柏子朝貴襲紹全子發元襲春敖子發襲其陞子璧襲應文子發科襲應科子朝棟襲天亮貴州安順人光顯貴州石阡人啟文貴州大定武舉元柏貴州黔西人紹全貴州安順人春敖貴州普定人普安籍其陞貴州興義人應文貴州貴陽人應科貴州郎岱人

右 國史館本傳



顧世臣 李廷桂等

顧世臣雲南江川人由武舉隨營效力於乾隆四十九年補順雲營把總五十年升千總六十年二月隨勦黔楚苗匪十月升遵義協右營守備嘉慶二年二月隨勦興義狃苗三月擊賊於下山塘有功閏六月大兵勦賊於九頭山燬克卡隘世臣偕順雲營千總李廷桂外委李應祥歿於陣由九頭山進勦馬鞭田貴州安義鎮標左營把總陳宏典遵義協右營把總詹廷材雲南昭通鎮標右營外委劉國榮俱以擊賊陣亡由馬鞭田進解黃草壩圍貴州下江營千總丹占魁遵義協左營把總毛貴王志德安義鎮標左營外委張士溝大定協右營外委王見下江營外委楊元章俱戰歿

是月貴州鎮遠鎮標右營把總陳坤擊賊於學莊陣亡嗣是七月雲南尋霑營外委毛尙錦擊賊於璋古八月雲南龍陵協左營外委黃喬擊賊於板江寨昭通鎮標右營把總程超擊賊於北鄉俱陣亡九月大兵剿北鄉喇邑打六納東等處餘匪貴州大定協左營候補千總孟懷玉長壩營把總趙廷棟領鄉勇效力武舉楊國珍俱以擊賊歿於陣是年三月大兵剿威遠猓匪雲南督標右營把總段洪英擊賊於飛龍箐普洱鎮標左營把總高以貴擊賊於大蘆山十月雲南鶴麗鎮標右營額外外委曹廷勝擊賊於蠻布山梁俱陣亡先後事 聞均 賜卹如例 賞雲騎尉世職襲次完時以恩騎尉世襲罔替世臣子璽襲廷桂堂弟廷榮襲應祥子

發興襲宏典子瑜襲廷材弟廷樞襲國榮子錦襲占魁子玉璋襲  
貴子元升襲志德弟志學襲士溥子福川襲見子國元襲元章子  
發祥襲坤子繼祖襲尙錦子飛瓏襲喬子呈貴襲超子應甲襲懷  
玉子士魁襲廷棟子登元襲國珍子大中襲洪英子龍標襲以貴  
子萬全襲廷勝照馬兵例 賞卹廷桂貴州平遠州武舉人應祥  
普定人宏典士溥俱興義人廷材志德俱遵義人國榮雲南昭通  
人占魁貴州長寨人貴大定府人遵義籍見大定府人元章湖南  
通道人貴州下江籍坤貴州鎮遠人尙錦雲南武定州人宣威州  
籍喬永北廳人超南甯人思安籍武舉人懷玉貴州大定府武舉  
人廷棟黔西州人國珍大定府人洪英廷勝俱雲南鶴慶州人以

貴景東應人

右 國史館本傳



田占魁 速得貴等

田占魁四川新津人由行伍於乾隆三十六年拔川北鎮標右營外委隨征金川攻克翁古爾壘獲木城一功列超等擢松潘鎮標右營把總三十八年升永甯協右營千總四十年進攻得楞基木斯山梁克之 賞戴藍翎四十四年升靖遠營中軍守備五十二年調赴臺灣率領屯練士兵戰於大力樓斗六門等處林爽文就擒功列超等 賞換花翎凱撤回營五十五年以火藥局不戒於火部議奪職五十六年廓爾喀逆匪滋事占魁隨營效力屢著勞績開復以守備用五十九年補四川維州協右營守備六十年黔楚苗匪滋事占魁率五寨屯兵赴秀山平塊椽木等處屢戰有功



復 賞戴藍翎提貴州大定協左營都司嘉慶二年二月隨剿興  
義狃苗斃賊無算四月赴黃草壩救援奮勇擊賊解其圍閏六月  
進擊馬鞭田歿於陣雲南楚雄協左營額外外委速得貴亦陣亡  
時雲南昭通鎮標左營千總折文舉提標中營把總芮永盛擊賊  
於普坪山撫標右營把總李燦章擊賊於新城貴州永北營把總  
李三元擊賊於黃草壩雲南臨元鎮標左營千總張國偉擊賊於  
水煙坪順雲營右哨外委王保擊賊於柳樹井永昌協左營外委  
楊俊秀擊賊於白老虎廣西營額外外委海闊擊賊於董谷山俱  
死之先是雲南沅江營千總趙聯甲於嘉慶元年隨征威遠裸匪  
奮勇殺賊屢戰受傷二年調剿平羅狃苗復擊賊受傷至是於軍

營傷發身歿先後事 關均 賜卹如例 賞雲騎尉世職襲次  
完時以恩騎尉世襲罔替聯甲廕雲騎尉占魁子有餘襲文舉子  
萬椿襲永盛子振周襲燦章子恩福襲三元子文俊襲國偉子得  
位襲保弟凝襲俊秀子登甲襲聯甲子文炳襲得貴闕照馬兵例  
賞卹得貴雲南楚雄人文舉燦章俱昆明人永盛保俱太和人三  
元貴州八寨人國偉雲南建水人俊秀會澤人闕廣西州人聯甲  
沅江人

右 國史館本傳

國朝文獻備考卷三十三

三

盧應朝 陳國樑等

盧應朝貴州貴陽人乾隆四十二年十月由行伍拔雲南提標右營額外外委四十五年六月補撫標右營外委五十二年九月隨征臺灣逆匪屢戰有功 賞戴藍翎五十四年十月升貴州貴陽營把總十六年七月升本營千總六十年二月隨剿黔楚逆苗在事有功嘉慶元年三月擢雲南提標中營守備二年二月隨剿興義狎苗七月於長衝寨擊賊陣亡同時陣亡者雲南提標右營外委陳國樑永北營外委姚盛勳八月賊擾峒西雲南督標左營把總陳惠左營外委王必貴雲南東川營額外外委張洪勳永昌協左營額外外委楊潮皆擊賊陣亡九月賊復擾馬房寨雲南武定

營□□何崙陣亡時貴州大定協左營把總國正擊賊於托豬黑  
貴州仁懷營外委李登雲擊賊於豈寶峒雲南臨元鎮標中營外  
委楊義德擊賊於牛泥塘皆死之先是馬兵李天受於正月隨剿  
興義狝苗節次奮勇殺賊有功 恩賞六品頂帶並 賞戴藍翎  
至是擊賊於馬房寨力戰陣亡事 聞議卹應朝等俱廕雲騎尉  
襲次完時給予恩騎尉世襲罔替洪勳潮卹如例應朝子錦華襲  
國樑子誥襲盛勳子華襲惠孫恩襲必貴弟必兆襲崙子景壽襲  
正子朝元襲登雲子得倫襲德義子必忠襲天受襲無考國樑雲  
南太和人盛勳雲南永北人惠必貴洪勳俱雲南昆明人潮雲南  
太和人崙雲南昆明人正雲南昆明籍貴州水城廳人登雲貴州



遵義人義德雲南建水人天壽雲南昭通人

右 國史館本傳

同前二書月表子年表

三

烏爾恭阿 德成額等

烏爾恭阿滿洲鑲藍旗人姓西林覺羅駐防西安由防禦委署參領乾隆三十八年隨征金川身歷二十七戰得頭等功牌四十六年隨剿撒拉爾逆回四十九年隨剿石峯堡逆回敘功俱列頭等嘉慶元年隨西安將軍恆瑞赴湖北剿捕邪匪旋調赴四川二年七月賊擾大甯縣大兵由楊橋壩進抵放牛坡遇賊五六百人執旗抗犯烏爾恭阿分領兵勇奮力衝突賊潰乘勢抄截直至田家壩手刃數賊歿於陣是年十月擊賊於廣元縣屬之白巖山陣亡者烏槍護軍校德成額鈕德十二月復擊賊於白巖山陣亡者烏槍藍翎長巴凌阿三年正月擊賊於渠縣屬之靜邊寺陣亡者前

鋒藍翎長愛興阿先後事 聞奉 旨議卹烏爾恭阿德成額鈕  
德巴凌阿愛興阿俱廢雲騎尉襲次完時各給予恩騎尉世襲罔  
替烏爾恭阿子阿木扎布襲德成額子瑚興阿襲鈕德子倭興額  
襲巴凌阿子綳僧額襲愛興阿子克蒙額襲德成額滿洲鑲藍旗  
人姓戴佳鈕德滿洲正白旗人姓白佳巴凌阿滿洲正紅旗人姓  
關佳愛興阿滿洲鑲紅旗人姓納爾吉拉

右 國史館本傳

楊秉昭 張錦榮等

楊秉昭廣西臨桂人由行伍於乾隆四十一年補桂林營外委四十四年擢本營把總五十二年升千總五十六年補提標右營守備嘉慶元年補慶遠協左營都司二年補投提標右營游擊七月隨經略額勒登保剿捕逆匪時賊林之華竄至帽子山城口一帶額勒登保卽督率官兵從帽子山南面繞道攀援上至石柱嶺賊匪驚竄殲斃甚眾仍據險死守額勒登保偵知下麥莊過溪有腰帶崖三層高四五丈至二三十丈不等直接帽子山賊聚眾固守隨分兵駐石柱嶺親自率兵回下麥莊分路度溪飭秉昭孫永清劉瑞等奮擊下腰帶崖秉昭等於五鼓帶兵用木梯繩索接遞密



上賊猝不及防奪其崖焚賊房卡座殆盡卽乘勝進攻第二層賊蜂擁抗拒秉昭遇播石猝擊沒於陣又有原任廣東三江協左營左哨千總張錦榮亦同時陣亡事 聞得 旨楊秉昭張錦榮俱著咨部賜卹均給雲騎尉世職襲次完時各以恩騎尉世襲罔替秉昭子裕龍襲錦榮子殿元襲錦榮廣東連州人

右 國史館本傳

豐伸布

豐伸布蒙古鑲紅旗人唐古忒氏乾隆三十二年由福州駐防馬甲擢前鋒隊長三十九年補驍騎校四十二年授福州防禦四十四年升佐領四十七年遷協領五十二年從征臺灣逆匪林爽文十一月擊賊於二王宮廟賊敗鼠殲百餘名五十三年三月臺灣平偕協領海興阿率駐防兵回營六十年升陝西西安右翼副都統嘉慶元年冬領兵駐興安堵禦湖北教匪二年春移駐商南分防商雒一帶諸要隘三月賊匪攻撲商南之雙樹卡戰卻之賊又從商南之東北山溝徑撲縣城豐伸布率兵勇馳擊直衝賊陣槍礮並發殲賊三百餘名生擒騎賊十四名步賊二十五名獲

馬羸器械無算奉 旨賞戴花翎旋帶滿兵一千名移駐平利一帶防堵大甯竄匪八月賊分擾竹谿竹山諸縣復赴竹谿一帶堵剿奉 旨著巡撫秦承恩與豐伸布併力堵截悉數殲除勿令竄入陝境尋聞賊掠竹谿之手巾店等處逼近縣城豐伸布率兵往剿賊不敢撲城由東路向北奔竄又聞房縣地方另有股匪隨馳赴竹山探躡賊蹤盡力追剿斬獲甚多奉 旨此次楚匪由房縣向竹谿竹山等處奔竄經豐伸布等帶領兵勇堵截殲斃多人不致闖入陝境所辦尙好咨部議敘時賊渠馬五擁眾三千餘人盤踞石槽豐伸布率兵勇二千自竹山進剿偵知迤北關廟河山梁斜通漢口慮賊恃險負固且可旁遁謀先據山梁扼賊十四日冒

雨急進適賊亦搶路上山正與相遇豐伸布輒策馬當先率領兵  
勇施放槍箭奮力齊登賊分兩路來撲我兵亦分投迎擊自己至  
未殲賊千餘名賊恃眾益集愈積愈多短兵相接豐伸布身負重  
傷力戰至暮會天雨甚收軍暫駐山頂傷重旋卒事 聞奉 旨  
豐伸布因兵力單弱致被眾圍攻受傷陣亡殊爲可惜著咨部加  
一等照都統例議卹尋 賜卹如例諡壯勇 恩賞騎都尉兼雲  
騎尉世職六年七月獲首逆馬五梟首級解京 上命侍衛慶惠  
赴豐伸布墳塋賜奠並懸示馬五首級令家屬觀看以紓忠憤豐  
伸布無子姪阿克當阿襲職見任甘肅遊擊

右 國史館本傳





增福 愛新等

增福滿洲鑲白旗人姓赫里特由西安駐防防禦世襲雲騎尉委署參領乾隆四十九年隨征石峯堡逆回屢戰殺賊得功牌一敘功列頭等嘉慶元年隨西安將軍恆瑞勦捕興安漢中邪匪二年八月房縣竹山各處賊匪竄入陝西白河縣之石槽溝窺伺縣城增福與防禦兼恩騎尉委署參領愛新驍騎校委署參領素家保成甯納們泰福榮保隨西安右翼副都統豐伸布帶領滿洲兵趕往截勦至石槽溝迤北之關廟河山梁與賊相遇冒雨搶上山梁迎頭截殺行抵半坡賊分路上山來犯增福等各施槍箭奮勇迎擊殲賊無算旋被賊眾圍困增福等併力衝突皆力竭同歿於陣

事 聞議卹增福愛新素家保成甯納們泰福榮保均廕雲騎尉  
襲次完時各給予恩騎尉世襲罔替增福孫奇徹布襲愛新子定  
官襲素家保子莫爾根布襲成甯子依林圖襲納們泰子吉升襲  
福榮保子艾興阿襲愛新姓伊爾根覺羅素家保姓爾奇特俱滿  
洲鑲白旗人成甯滿洲正紅旗人姓巴雅拉納們泰滿洲正黃旗  
人姓赫錫赫哩福榮保滿洲鑲紅旗人姓瓜勒佳均西安駐防

右 國史館本傳

雙保 齊郎阿等

雙保蒙古鑲白旗人姓烏齊喜特西安駐防由佐領委署營總乾隆三十二年隨征緬甸於普喀滿街及小猛峪等處力戰二十三次旋於刀槍聲地方接戰六晝夜先後殺賊甚多骨受槍傷四十九年隨勦石峯堡逆回嘉慶元年邪匪滋擾興安二年八月楚省房縣竹山各路邪匪竄入白河縣境石槽溝屯聚窺伺雙保偕佐領委署營總齊郎阿伍凌額魁祿清明泰驍騎校委署參領甯善隨西安右翼副都統豐伸布率領滿洲兵馳往截勦至石槽溝迤北之關廟河山梁與賊相遇均冒雨搶上山梁賊眾分路來犯雙保等各施槍箭併力齊進奮勇迎擊殲戮甚眾均力竭歿於陣事

國朝通志卷三十一  
三十一  
聞議卹雙保齊郎阿伍凌額魁祿清明奉甯善俱廕雲騎尉襲次  
完時給子恩騎尉世襲罔替雙保子善福襲齊郎阿子扎郎阿襲  
伍凌額子花里雅遜襲魁祿子阿爾郎阿襲清明泰子吉慶襲甯  
善子巴祿里襲齊郎阿蒙古鑲藍旗人姓卓啟斯伍凌額蒙古正  
紅旗人姓西爾魯特魁祿蒙古正黃旗人姓海玉忒清明泰蒙古  
正白旗人姓托克托羅特甯善蒙古正紅旗人姓哈爾努特均西  
安駐防

右 國史館本傳



賈永吉 周禮等

賈永吉山西汾陽人由武舉於乾隆三十七年捐納營守備四十年補陝西興漢鎮標中營守備旋擢直隸通州協中軍都司四十七年調曹家路都司五十二年升湖北襄陽鎮標左營遊擊嘉慶元年教匪姚之富等從黃龍壩竄至光化縣之老河口都統永保等邀擊之賊潰而北至河南魏家集永保等復督兵追剿又敗之賊竄吳家集西安將軍恆瑞亦督兵趕至偕永保夾擊之賊乃東竄因灘多水淺遂涉河至宋家埠之東面吳家坑總督畢沅檄永吉駐兵宋家埠阻隘固守二年二月永吉駐守襄樊之潘家臺陸良河報恩寺等處賊屢糾眾撲犯永吉悉擊敗之八月總兵王



文雄帶兵駐於保康南漳二縣之要隘五盤山賊東西焚掠牽制我兵文雄分三路夾擊檄永吉由柞峪進守備鄭永泰由辛家坪進永泰遇賊迎擊賊悉眾合圍永泰敗於陣文雄救之賊退追至羊角山山後突出賊匪數千接應文雄奮力擊之賊敗去而賊由柞峪潰奔者永吉復迎頭擊敗之偕署山東長青營千總周禮俱戰歿於陣時賊自襄陽被勦由隨州西竄總兵張文奇督帶兵勇追擊都司銜河南撫標右營守備楊君璽等馳往接應行抵欒川猝遇賊眾五千餘君璽奮力衝突因眾寡不敵身受重傷歿於陣河南撫標左營左哨千總林元臣河北鎮標右營左哨千總張榮標灤池汛千總王玉成千總頂帶河北鎮標左營左哨頭司外委

把總劉天貴俱力戰歿於陣先後事  聞得  旨賈永吉著加一  
等優卹楊君璽照都司例議卹餘  賜卹如例均  賞給雲騎尉  
世職襲次完時以恩騎尉世襲罔替永吉子熊徵襲禮子全榮襲  
君璽子凝德襲元臣子祥林襲榮標子俸襲玉成子濂襲天貴子  
廷禮襲禮山東歷城人君璽山西臨汾人由行伍於乾隆三十八  
年拔外委三十九年游升千總四十九年隨征甘肅石峯堡逆回  
屢戰有功五十四年擢河南撫標右營守備嘉慶元年湖北教匪  
圍襄陽奉檄督兵擊走之奏入  賞加都司銜元臣河南淮州人  
由行伍拔外委於乾隆五十八年擢是職榮標河南杞縣人由武  
舉授把總於乾隆五十九年升是職玉成河南祥符人由行伍拔

外委於乾隆五十二年游升是職天貴河南泗水人由行伍擢把  
總於嘉慶元年隨征湖北當陽屯匪奮勇登城受槍傷 賞千總  
頂帶

右 國史館本傳

巴哈布 蒙彪等

巴哈布倭赫明安氏滿洲鑲白旗人成都駐防由馬甲於乾隆三十六年隨征金川四十年在噶咱普山擊賊有功疊受槍石傷得旨賞銀五十兩升委署前鋒校四十六年隨征甘肅逆回五十二年補領催從征西藏嘉慶元年升驍騎校二年偕四川撫邊營把總蒙彪山西蒲州協外委張得鳳額外外委丁貴年潞澤營外委田增福雲南曲尋協額外外委達忠隨剿四川達州邪匪巴哈布屢有戰功八月賊匪由白楊廟撲犯太平縣城官兵分路擊殺賊逃竄巴哈布奮勇追剿陣亡是月彪於太和鎮陣亡九月得鳳貴年俱於放牛坪陣亡十月增福於鐵瓦寺陣亡忠於盤龍山陣亡



事 聞均 賜卹如例巴哈布彪得鳳增福俱 賞給雲騎尉世職襲次完時給予恩騎尉世襲罔替巴哈布子克星阿襲彪子兆熊襲得鳳子愷襲增福子彪襲彪四川成都人由行伍於乾隆四十年隨征金川四十八年拔補提標左營額外外委四十九年隨征甘肅石峯堡五十五年擢前營外委六十年隨征黔楚殺賊有功嘉慶元年升本職得鳳山西陽曲人由行伍拔補本職貴年山西永濟人由行伍拔補本職增福山西臨汾人由行伍於乾隆四十四年拔補太原鎮標右營額外外委四十六年擢本職忠雲南宣威人由行伍於嘉慶二年拔補本職

右 國史館本傳



馮培元 江永輝等

馮培元甘肅靖遠人由武舉於乾隆四十三年分發陝甘督標以千總用四十五年署安定營右哨把總四十六年隨征撒拉爾逆回獲賊二名四十九年隨剿伏羌雲霧山一帶及底店石峯堡五十二年補授甘肅西甯鎮標右營右哨千總五十六年擢松山營守備五十八年調波羅營中軍守備嘉慶元年檄赴湖北軍營剿捕教匪二年升臨洮營都司嗣以姚之富股匪伏匿襄陽之夾河洲地方埋藏器械潛圖蠢動培元隨巡撫汪新馳赴雙溝就近搜捕擒獲張應朝等三十名奏入 賞戴藍翎旋由箐林口進攻老木園賊匪率眾下於深谿口冉家溝野竹溪等處分路撲犯官兵

營卡其衝撲深谿口一路經培元奮力堵擊殲斃前隊四十餘賊後隊卽行竄回其老木園之樵風洞緊接巢穴提督劉君輔等督率官兵從石磴陡坎曲折而上毀其卡卡內男婦百餘人悉數殲戮忽轎頂山賊匪鳴礮來援培元帶領兵勇卽於樵風洞山梁迎勦賊匪蜂擁而至我兵施放連環槍礮擊退培元攀越嶺谷追擊賊從旁突出猝被矛傷而歿時甘肅玉泉營把總江永輝擊賊於老木園亦死之是年陝西靜甯協右營千總李潤生四川提標右營右哨二司把總毛安國陝西馬營監營額外委賈會擊賊於蓋頂坪俱陣亡先後事 聞得 旨馮培元著加等優卹餘 賜卹如例均 賞給雲騎尉世職襲次完時以恩騎尉世襲罔替培

元子琰襲永輝子芝襲潤生子奇芳襲安國子承烈襲會子希魁  
襲永輝潤生俱甘肅甯夏人安國四川成都人會甘肅武威人

右 國史館本傳

--	--	--	--	--	--	--	--	--	--

李寅 黃有學等

李寅四川成都人由世襲雲騎尉隸督標學習嘉慶元年二月檄  
勦湖北教匪四月二十三日進勦來鳳縣紅巖堡殲戮甚多署四  
川總督孫士毅奏請以應升之缺升用十月隨署四川總督福凝  
成都將軍觀成進攻巴東縣之高店子寅同都司馬建紀帶兵五  
百名從渡口五里外石門坡紮筏過渡繞出賊後奮擊有功二年  
二月調赴四川達州軍營偕州判李師曾等帶領兵勇三百名迎  
勦查子峽賊匪繞道截擊殲四十餘名俘十二名獲槍矛無數閏  
六月偕遊擊愛隆等進攻飛沙嶺戮二十餘名復帶兵勇百名赴  
蜈蚣嶺進攻奪木卡伐樹立城七月觀成檄寅等帶兵勇襲老木



園賊卡戮三十餘人克頭卡八月隨觀成進攻大竹溪壽林口有功復隨提督劉君輔帶兵勇各持口袋黑夜由柏樹巖直攻樵風洞寅等從石磴陡坎曲折而上賊於卡外濠溝寬深處密插竹簳寅令兵勇將口袋載土填塞溝濠首先過濠斫開木卡賊匪聚眾格鬪寅左右衝擊身受矛傷數處候補守備黃有學外委楊元成亦俱奮勇進攻身受矛傷同時陣亡事 聞得 旨俱著加等優卹寅以雲騎尉加一雲騎尉 賞騎都尉世職弟棠襲有學元成均 賞雲騎尉世職襲次完時均以恩騎尉世襲罔替有學子世俊襲元成子朝良襲有學湖北襄陽人元成湖北棗陽人

右 國史館本傳

惠倫

惠倫鑲黃旗滿洲人姓富察氏一等承恩公加 賞一等男奎林子出繼伯父一等誠嘉毅勇公明瑞爲嗣乾隆三十三年由閒散襲世爵四十三年授三等侍衛五十五年擢御前一等待衛尙茶正五十九年授鑲藍旗護軍統領六十年擢奉宸院卿嘉慶二年邪匪滋事 命偕副都統阿哈保率吉林索倫兵三千名並東三省預備進哨兵百餘名赴楚會剿 諭曰川匪擾至湖北南漳邊界明亮德楞泰一時不能趕赴需兵甚急著惠倫卽迅往襄陽一帶詢訪如明亮等已繞至賊前卽可隨同擊剿儻明亮等猶在賊後追逐惠倫等卽會同王文雄帶領官兵堵禦攻圍又 諭曰帶

領東三省官兵之惠倫等以之領兵則有餘以之調度則不足著  
俱聽景安調度以期事權歸一八月官兵追賊至襄陽小河口會  
日暮賊思北竄惠倫隨景安率兵至遏其衝賊首尾不能相顧向  
西南而奔惠倫與阿哈保分頭抄截追殺二十餘里殲賊五百餘  
生擒數十我大兵自荆門宜城星夜進剿惠倫等乘機夾攻賊大  
敗逸入南漳山中奏入奉 旨嘉獎並賞玉扳指大小荷包十二  
日參贊德楞泰聞賊由石廟等處北走恐其直渡樊襄同惠倫等  
於耗子溝禦之遇賊六七千人向前直撲德楞泰與惠倫等兵列  
山巔時提督達音泰射斃二賊賊稍卻惠倫遂率兵下壓會都統  
明亮等自楓樹埡追擊夾攻惠倫等衝進賊隊賊勢披靡斬獲甚

多賊又竄花石嶺明亮德楞泰令總兵長春誘賊下山達音泰設  
伏山腰惠倫亦受檄率馬隊兵俟伏起分投剿殺斃賊五百餘二  
十九日賊竄至黃龍灘欲北犯鄖郡西擾斗河以防守嚴無船可  
渡復折回我兵遇於草甸賊馬步五路蜂至我兵亦分爲五隊惠  
倫等由山麓大路進擊時明亮德楞泰已占山包賊忽於溝內抄  
出上撲營卡被我兵殲戮無算賊敗退別有賊突出接應惠倫等  
奮勇衝擊賊亡命奔逸竄往陳家山梁惠倫等渡澗追剿賊乘山  
霧迷漫翻山圖遁惠倫見有賊指揮知爲首逆馳追至長坪射之  
應弦而倒餘賊競集惠倫復射斃數人猝中槍歿於陣事聞  
諭曰惠倫前經派往軍營打仗殺賊頗爲奮勇茲在長坪地方剿



捕因射賊墮馬正欲趕擒忽中賊槍陣亡惠倫係奎林之子繼與  
明瑞爲嗣明瑞從前亦係陣亡父子效力疆場實爲可憫著交部  
從優議卹仍由廣儲司賞銀三千兩給伊家屬辦理喪事其應襲  
公爵卽著伊子博啟圖承襲俟百日服滿著在御前侍衛上行走  
以示朕軫卹蓋臣至意尋議 恩賞騎都尉加一雲騎尉一等公  
爵子博啟圖兼襲授鑾儀使御前侍衛上行走八年因所管之請  
轎校尉行走脫肩奉 旨退出御前侍衛在乾清門行走兼正紅  
旗漢軍副都統

右 國史館本傳



國朝耆獻類徵初編卷三百六十一目錄

忠義三十一

朱承茂 吳學義等

謝明升 劉明志等

王行儉 張瑛等

馬天奇 李成等

鍾德 白天選等

張持 福德保等

薩德芳 汪榮等

左俊 王進等

張順 秦天位

楊繼曉

利振紀 蘇國瑞

趙猶龍 徐天濟

范楸 楊成白等

胡魁 馬彪等

韓以明 韓連陞

陳天雲 韓成祥

樊模 屈澄志等

陳德奎 陳萬年等

趙大用 馬定元

陳大定 王樽

羅宗禮 衛學純

周斌 曾鴻瀨等

胡慶遠 保元奉等

烏什哈達

馬鍾麒 王名望等

李國賓 李根長

國朝耆獻類徵初編卷三百六十一

通奉大夫前署江西巡撫江西布政使司布政使湘陰李植輯

忠義三十一

朱承茂 吳學義等

朱承茂漢軍鑲白旗人由鑾儀衛整儀尉於乾隆四十三年授河南河北鎮標中營守備五十二年遷廣西柳州城守營都司五十九年升湖北竹山營游擊隨征湖南苗匪守鎮筸鎮有功嘉慶二年三月檄勦湖北教匪總統尙書惠齡以南山股匪分竄羅店勝景山等處必搜勦之使併歸一處乃易於擒獲命副將劉廷基由羅店東至宋河副將關聯陞由易家山往火峪口承茂往大小介

山三路會勦偏賊至温峽口夜擊之賊大潰追至龍鳳溝獲賊朱  
爲成四月賊南竄分爲二一踞孤山衝一踞吳山店惠齡令承茂  
偕廷基爲副將凝德及聯陞聲援偏賊併入吳山店亟攻賊奔潰  
至口石復聚兵擊之擒賊首廖世學五月攻陝西鎮安縣之黃龍  
堡七月攻燕子山承茂皆以力戰功居最九月隨副都統舒亮等  
勦賊於開縣之白崖山天雨霧我兵攀藤附葛直上鴨子坪賊悉  
眾抗拒矛矢雨集承茂身先士卒縱火攻寨賊盡出我兵奮勇殲  
數百人戮其渠賊殊困關承茂力竭歿於陣千總吳學義黃金榜  
外委黃洪沛均死之先是賊屯聚於蒲家山雲南提標中軍守備  
盧應朝四川松潘鎮標中營右哨額外外委張秀隨舒亮由祖師

觀上山攻擊適總兵索賈英阿馳往策應殲擒無算旋因進攻大  
嶺坡應朝秀俱戰歿賊退屯白崖山我兵奮勇追擊廣西提標中  
營守備余德高力戰歿於陣先後事 聞得 旨朱承茂著加等  
議卹餘卹如例均 賞給雲騎尉世職襲次完時以恩騎尉世襲  
罔替承茂子慶陽襲學義姪樹勛襲金榜子玉龍襲洪沛子振桂  
襲秀子豐瑄襲德高于化龍襲學義直隸正定人金榜湖南武陵  
人洪沛湖北江夏人秀四川松潘廳人由行伍游擢是職德高廣  
東高要人由行伍游升是職應朝自有傳

右 國史館本傳





謝明升 劉明志等

謝明升廣東番禺人由行伍拔補撫標左營外委嘉慶元年偕增城營千總劉明志提標後營千總袁得亮順德協右營把總陳士英高州鎮標右營右哨二司把總張祿督標中營外委李永清隨勦湖南苗匪明升奮勇殺賊升右營千總二年湖南平調赴四川軍營在白崖山擊賊與明志得亮同歿於陣是年士英祿永清隨大兵勦捕白鷺山范家山等處賊匪均奮力殺賊受重傷俱歿於陣先後事 聞俱 賞卹如例給雲騎尉世職襲次完時以恩騎尉世襲罔替明升子凌耀襲明志子文龍襲得亮子貴馨襲士英子玉成襲祿子接芳襲永清子攀龍襲明志廣東歸善人由行伍

於乾隆二十九年拔補提標前營外委三十九年升提標右營左  
哨頭司把總四十三年升本職得亮廣東歸善人由行伍於乾隆  
五十二年隨剿臺灣有功拔補提標後營外委五十三年升提標  
後營左哨二司把總五十五年升本職士英廣東新會人由行伍  
於乾隆五十五年拔補順德協左營外委五十九年升本職祿廣  
東茂名人由行伍於乾隆五十二年隨剿臺灣有功拔補提標前  
營外委尋升本職永清廣東高要人由行伍於嘉慶元年拔補本  
職

右 國史館本傳

王行儉 張瑛等

王行儉江蘇溧陽人由舉人於乾隆四十六年大挑以知縣用分發陝西署隴州知州四十八年丁憂回籍五十一年服闋仍赴陝西歷署甘泉褒城縣知縣五十三年補南鄭縣六十年緣事革任嘉慶元年投效軍營二年九月賊匪竄汝河以平利縣防守甚嚴向東南竄擾至白土路營時行儉帶兵勇六百名偕都司趙禧防守聞賊至奮力迎擊賊分股抄至兵勇之後夾攻行儉與禧分禦之殲賊數十人賊四面合圍禧中刀傷歿行儉罵賊不撓身被矛傷十餘處陣亡事 聞 諭曰王行儉前於南鄭縣任內因承審命案不實革職仍在陝省效力該員係已經離任文員能帶兵協



勦罵賊捐軀尤可嘉憫著咨部照知州例給予優卹伊子俟服闋後交部帶領引見先是四月巡撫秦承恩督率弁兵勦捕商州教匪於三條溝預令撫標中軍參將鍾岳在西牛槽防堵西牛槽民人亦習邪教撲岳營岳偕蒲州營都司種英傑擊之賊越山竄投效軍營從九品張瑛直前撲拏騎馬賊目中矛傷陣亡五月楚匪擾至漢陰廳之簡地鋪總兵艾如文抵小龍溝口駐山梁賊分眾撲之兵勇殲戮數十賊賊目以白鴿爲號其眾蜂至長安縣斗門鎮主簿項朝槐先衝入賊陣格殺多匪以馬陷水田受矛傷陣亡是年賊竄入河南葉縣保安驛驛丞張瓌集鄉勇拒之手刃數賊賊圍之益急瓌子履謙奮力救護墜於溝中瓌受刀矛傷三十二



處死之賊陷四川臨水縣城典史章潮先率兵勇堵禦復於劫獄  
時力拒罵賊被剖腹而死先後事 聞得 旨王行儉張瑛項朝  
槐章潮俱加等議卹張瑛照知縣例議卹章潮得 旨伊子俟服  
闋時送部引見均 賞給雲騎尉世職襲次完時以恩騎尉世襲  
罔替行儉子栻襲瑛姪光裕襲朝槐子培襲潮子壽恩襲瑛嗣襲  
無考瑛江蘇上元人朝槐浙江仁和人乾隆五十二年補陝西臨  
潼縣典史六十年升是職瑛安徽婺源人議敘未入流選是職潮  
直隸天津人捐納從九品借補是職

右 國史館本傳

廣東省立第一師範學校  
第一二二二  
三

馬天奇 李成等

馬天奇甘肅固原州人由行伍於乾隆三十二年拔固原城守營額外委三十七年隨征金川補八營外委以屢有戰績擢陝西延綏鎮標中營右哨頭司把總尋遷興漢鎮標左營左哨千總歷署中軍及左營守備三十九年補提標前營守備四十六年隨剿循化逆番於龍尾山等處殲戮無數四十七年調西鳳營中軍守備五十三年擢山西平邢關都司五十九年升湖北襄陽鎮標中營游擊六十年三月隨提督劉君輔剿捕湖南苗匪時苗匪圍永綏距永綏四十里有地曰花園山徑叢雜賊依山勢設立十數寨併力抗拒君輔分三路攻之命天奇由西路之西陽橋截賊之後

游擊三格守備劉瑞由西南擊其旁君輔自督兵擊其前我兵既合賊潰君輔復分兵夜擊賊營大敗之花園前阻二灘水淺可涉賊拒守甚力君輔命天奇佯爲渡河以牽制賊眾而暗具竹筏於水深處命三格劉瑞等梟水攻之遂盡燬花園賊寨四月天奇駐隆圍賊悉眾來攻天奇由山徑過河奪山梁殲戮無算奏入得旨以應升之缺先行升用嘉慶二年十月檄勦湖北教匪時林之華覃家耀股匪由巴東高粱寨敗潰將竄建始巫山縣境與其黨句結天奇隨領侍衛內大臣額勒登保總督福凝追擊之至巫山縣力戰歿於陣先是九月廣西潯州協右營守備李成湖北遠安營千總朱升鎡黃州協把總胡金柱貴州定廣協左營把總楊成

元四川提標左營左哨二司把總張英擊賊於蜈蚣山俱力戰陣  
亡先後事 聞得 旨俱著加等優卹均 賞給雲騎尉世職襲  
次完時以恩騎尉世襲罔替天奇子登魁襲成子申榮襲升鑑子  
仕興襲金柱子文彪襲成元子連級襲英子宗文襲成廣西桂平  
人升鑑湖北江夏人金柱湖北東湖人成元貴州長寨廳人英四  
川成都人

右 國史館本傳





鍾德 白天選等

鍾德江蘇華亭人由行伍於乾隆三十九年拔松江城守營額外委四十年擢提標中營把總四十八年升千總五十四年遷直隸涿州營中軍守備嘉慶元年署忠順營都司隨剿湖北教匪屢立戰功二年十月追剿王三槐羅其清等至巴州賊由恩陽河侵花衝埡犯保甯郡城代辦四川總督宜縣令總兵朱射斗率兵勇防堵賊越山竄黑石灘焚掠偏近蓬州德以宜縣檄隨總兵銜百祥總兵富爾賽倍道疾馳迎截以護軍糧於蓬州之徐家場遇馬步賊數千人奮力進剿殲戮甚眾賊漸潰旋有步隊賊由巴州來援勢復張德轉戰連日身受重傷歿於陣甘肅提標右營千總白

天選康家寨千總周德勝河州鎮標右營把總丁爾表均奮勇殺賊受傷陣亡事 聞得旨鍾德加等議卹餘 賜卹如例均 賞給雲騎尉世職襲次完時以恩騎尉世襲罔替德子錦文襲天選子瑄襲德勝子貴襲爾表子附彭襲天選甘肅固原州人由行伍隨征金川及撒拉爾回匪屢著勞績歷遷是職德勝甘肅皋蘭人爾表甘肅河州人

右 國史館本傳

張持 福德保等

張持漢軍正紅旗人世管佐領乾隆四十年兼印務章京四十八年遷副參領五十一年授廣西撫標右營游擊五十五年升廣東撫標中軍參將五十八年升三江協副將嘉慶元年四月湖北教匪張正謨等踞灌灣腦山嶺持奉檄帶兵赴勦於聶家河駐守大兵冒雨攻克前山賊竄赴河涯持率兵馳往施放槍礮斃數十匪賊不得渡旋大軍分五路攻擊持帶兵由西路進克偏崖卡遂偪賊巢奏入均下部議敘五月復攻天井湖青龍溪鄧家畝諸卡克之 賞戴花翎六月克白家壩卡乘勝奪羅羅洞又攻克深衝腦縣羊腦江家壩諸卡持轉戰五晝夜奪大小卡二十座斬戮甚眾

八月大軍增派兵勇兼以火攻乘夜破其角持由西路進冒煙突  
火奮勇直前殲戮無算灌灣腦賊巢悉平九月隨尙書惠齡擊長  
陽宜昌邊界所屬涼山屯匪克觀音閣轉木巖二卡賊堅守不出  
持隨侍衛關騰伏涼山坪山坳適賊百餘被誘下山突出圍剿殲  
之十月攻水泉山斷賊汲道持隨按察使銜道員先福於山前進  
擊克之十一月偕關騰由九鼎埡攻二天門身冒矢石克賊卡生  
擒賊首涼山平十二月進攻林之華草加耀股匪於黃柏山督兵  
擊對講坪賊卡克之遂會大兵勦涼風臺匪匪悉就獲旋偕游擊  
林朝輔赴楓廂坪之左於雪淺處預埋大礮適賊眾來犯轟擊之  
遂奔楓廂坪並克牛角尖二年五月由黃家村直抵黃柏山大荒



口是山絲互十餘里偏陂仄徑樹木叢雜大軍分兵前進毀卡四座殲賊數百由吳家坡山梁直趨芭蕉山深入二十餘里黃柏山平十一月賊竄赴恩施縣及利川縣等處持首先追擊俘戮幾半嗣因餘匪折向黔江紛竄持於二仙巖遇之縱馬入其隊殲賊三百餘生擒十餘人被傷陣亡是年護軍校福德保明山擊賊於穀城縣張家集驍騎校倭興額擊賊於遠安縣白雲寺委前鋒校伯亮擊賊於林家牌俱死之先後事 聞得 旨副將張持因縱馬搶入賊隊陣亡殊爲可惜著加等議卹 賞給騎都尉世職餘賜卹如例 賞雲騎尉世職襲次完時均以恩騎尉世襲罔替持子毓琳襲騎都尉兼襲世管佐領福德保子固凝阿襲明山子德

恆襲倭興額子察星額襲伯亮子開隆阿襲福德保舒穆祿氏滿洲正黃旗人明山莽魯特氏蒙古鑲白旗人伯亮博爾濟吉特氏蒙古正白旗人倭興額都雅爾氏滿洲鑲白旗人

右 國史館本傳

薩德芳 汪榮等

薩德芳雲南楚雄人乾隆五十七年十一月由武生拔楚雄協額  
外外委嘉慶元年八月補本協左哨外委二年二月隨勦興義狎  
苗屢戰有功 賞千總頂帶十一月於補路寨擊賊陣亡同時陣  
亡者貴州威甯鎮標左營把總汪榮雲南曲尋協左營外委張佩  
雲南楚雄協右哨外委張得貴先是雲南楚雄協左營外委黃有  
貴新營營外委直聖學於十月擊賊東瓜寨雲南永北營額外外  
委吳英擊賊董家莊俱死之十二月賊擾樓家河貴州瀘甯營千  
總張時華雲南提標中營外委馬上剛雲南提標左營外委黃超  
貴州武定營外委李洪業俱擊賊陣亡事 聞議卹德芳等俱給

雲騎尉世職襲次完時給予恩騎尉世襲罔替英卹如例德芳子懋禹襲榮弟涪襲佩子齡祥襲得貴子銜書襲有貴子印襲上剛弟上勇襲超弟遜襲餘襲無考榮雲南昆明人佩雲南文山人得貴雲南開化人有貴雲南太和人聖學雲南元江人英雲南昆明人時華貴州黃平武舉上剛雲南恩安人超雲南昆明人洪業雲南武定人

右 國史館本傳



左俊 王進等

左俊四川西昌人由行伍於乾隆四十六年隨陝甘總督勒爾謹  
勦捕蘭州逆回蘇四十三克之拔爲四川建昌鎮標左營額外外  
委五十年補靖遠營外委五十三年遷四川建昌鎮標左營左哨  
二司把總五十四年調右營把總五十六年升懷遠營千總六十  
年隨征黔楚逆苗嘉慶元年七月湖北教匪田谷敦謝伯榮楊禹  
九謝伯周張萬伯丁寅山覃一祺等據來鳳縣之旗鼓寨俊隨總  
督福凝進勦賊踞高岡架木城周圍掘濠抗守俊隨總兵諸神保  
等力戰先登燬其寨田谷敦等就擒並殲獲其黨二千餘人旗鼓  
寨平奏入 賞戴藍翎十月隨福凝擊賊於長陽縣先登奪柵受



石傷擒斬奪獲無算以功擢四川潼縣營守備二年十月隨福凝  
進攻林之華覃家耀於黃柏山獅子崖時大雪乘賊無備自石板  
頭渡河連克數卡十一月升冕山營都司十二月隨總兵諸神保  
擊賊於令牌山賊百餘人我兵進攻西流溪俊偕都司冶正恩  
奮勇奪萬仞溝遂克西流溪賊卡進攻朱里寨覃家耀據木城內  
築沙土我兵由地道以火攻之木城陷一角俊先登賊併力拒戰  
俊殲戮無數以傷重歿於陣同時戰歿者宜都營把總王進是年  
八月於辛家坪戰歿者千總鄭永泰於報信坡戰歿者襄陽城守  
營把總徐尙年九月於銅鼓包戰歿者襄陽城守營把總邢國章  
先後事 聞得 旨左俊王進俱著加等優卹餘 賜卹如例均

賞給雲騎尉世職襲次完時以恩騎尉世襲罔替俊子恆泰襲進  
子得升襲永泰子宗典襲尙年子士義襲國章子尙傳襲進湖北  
東湖人永泰湖北光化人尙年湖北荊門州人國章湖北鄖陽人

右 國史館本傳



張順 奉天位

張順湖南宜章人由行伍於乾隆三十年拔宜章營外委三十四年擢本營右哨二司外委把總三十五年升本營千總旋調永州鎮標中營千總四十五年遷鎮筸鎮標中營守備五十二年升湖北施南協中營都司五十六年升衛昌營遊擊六十年隨提督劉君輔攻剿保靖縣花園汛旁近諸苗寨君輔令順偕都司陸祖德預備木植渡河搭橋順率兵勇齊執擯牌於水深處晷水先過並撐竹筏飛渡起浮橋出賊不意三面登岸掀開石卡殲戮無算諸苗寨悉平尋調宜昌鎮標右營遊擊嘉慶元年土蠻龍子貴等擒獻逆首石三保順隨劉君輔宣諭策應有功得 旨以應升之缺

卽行升用二年二月檄剿湖北教匪五月都統額勒登保督兵攻  
剿鶴峯巴東建始三州縣連界之芭葉山賊巢分五路深入山梁  
殲賊數百人攻奪賊卡三十餘處悉焚燬之順隨總兵張廷彥由  
亮林子直上大莊進偪分水嶺大壠口賊卡六月大兵攻剿黃家  
村克之燬其卡乘勢進攻二壠口順首先越溝撲卡毀木城數尺  
臂中槍傷奏入 諭曰受傷遊擊張順著額勒登保等存記俟功  
竣再加獎勵七月順隨額勒登保攻克石門巖賊卡至石柱嶺偪  
左營把總秦天位進攻雙脊坪順首先攀援而上克之擒賊目三  
名賊匪墜崖死者甚眾尋升興國營參將十二月額勒登保督攻  
朱里寨賊匪復分兵攻百巖口黃子巖松樹包石嶺干嶺諸賊卡



順偕天位奮勇攻克干嶺寨俱力戰歿於陣事 聞得 旨俱著  
加等議卹均 賞給雲騎尉世職襲次完時以恩騎尉世襲罔替  
順子全賢襲天位子射斗襲天位湖南永順人由武生於乾隆六  
十年募鄉勇剿逆苗攻保城喜陽橋轉戰受傷列敘功於超等尋  
又以攻克那卡坡叢樹坡古丈坪等處及護解軍糧防禦花園汛  
隨剿長潭苗匪屢立戰功拔行營把總補湖北衛昌營外委把總  
嘉慶元年擢是職

右 國史館本傳



楊繼曉

楊繼曉字覺斯四川保甯府廣元縣人以監生入貲授職州同江南蘇州府督糧同知璽第三子出後其世父璧楊故大族世居廣元高城堡嘉慶二年教匪擾秦蜀君歸省母因率鄉人捍賊死之死在其年十二月四日年二十七事 聞議卹入祀昭忠祠如著令君姓十三月而生六歲始能言既長貌魁梧剛直使酒年未壯鬢髯如戟不爲父母所愛獨以氣力伏一鄉初君自父璽安東官所歸所在盜賊如蝟毛起其年九月巴州破君同縣監生何獻瑞貢生楊嘒倡議團練罄家財得千餘人白於縣請給劄爲守禦計縣官不省久之所集士稍稍散去迨十一月晦賊破南江距縣境

長池數十里縣官始蒼黃以劄并銀牌十俾君速出禦賊君嘆喑  
歎曰烏合士一散何可復集然事急矣惟以虛聲撓賊少緩其來  
庶縣官布置可及耳伸紙疾書作高城人自相要約語虛張其數  
投賊營賊果遲疑不進者累日頃之陝賊姚之富齊國謨等數萬  
人穿老林出將至德山木門賊某等數千人亦出將至通坪通坪  
居高城後德山互其脇長池枕其前君謀於眾曰縣官自足禦長  
池前路之賊我等且當後顧其夕漏三下與族人楊冕率眾二百  
出木門之橫石梁遇賊先鋒百餘人力鬪且鬪且行過四家營則  
賊大至勢不可敵乃據險往趨楊啤來濟師賊登山瞭君眾少後  
無繼四面合圍擊之君大呼手刃十餘人力竭見執賊奇其貌執

以至九曲坡欲誘降之君大罵賊恨甚刳君腹空其中而燒之族人楊繼泰楊維世等從君者皆被殺方君之在圍也楊暉以其徒三百人來援至則皆歿凡楊氏一門殲焉者百有餘人云君死十日將軍明亮始抵九曲坡君弟繼昂白其事軍門以聞於朝君無子以再從兄繼遲子監生緒世爲嗣繼遲亦死於難者君死後十八年繼昂等將卜改葬君於九曲坡祠堂之後述君生平爲之傳

外史氏曰余主講真州故督糧同知君方自安東移知甘泉縣話其少子繼昂陷賊事已官吳下令命繼昂以文來質頃之繼昂奉君喪還蜀更名廷賢補諸生以選貢入都重來見余吳下請爲此傳



續曉例得附見 國史其人非待余而傳者惟繼曉死後余亡弟  
呂堰之難僅一年其先事慷慨不見聽察略相同吏狃承平巧媮  
相諉以苟旦夕其貽禍博矣不二十年又有豫東之亂情狀猶前  
日也故不辭而書其事以傳於世俾在位者省焉

右傳王芑孫撰

利振紀 蘇國瑞

利振紀廣東鎮平人由乾隆甲辰科武進士授藍翎侍衛期滿命以都司用請改水師發往試驗不諳水性降一級調用五十七年補湖北撫標左營守備嘉慶元年八月隨侍郎惠齡攻克楚省賊匪擒獲首逆張正謨等奮勇有功 賞戴藍翎二年隨提督慶成馳至黃龍堡山口勦捕姚之富股匪賊見官兵卽由山上放槍分投直下我兵奮勇先登殲賊數百人賊潰退上山腰突有騎馬賊二三百人紛聚攬殺我兵從捷徑繞上山頂下壓賊匪猝不及防被槍中箭懸崖墜死者無算時尙有騎馬賊數百人抵死抗拒振紀等直衝賊隊先殺死騎馬賊目二人生擒二人仍趕入圍中

又手斃十數人以傷重歿於陣是年廣東新塘營千總蘇國瑞亦  
以隨勦川省賊匪同時陣亡事 聞得 旨利振紀蘇國瑞俱著  
咨部議卹均給雲騎尉世職襲次完時各給予恩騎尉世襲罔替  
振紀子光襲國瑞子應更襲國瑞廣東東莞人

右 國史館本傳

趙猶龍 徐天濟等

趙猶龍山西忻州人由武舉隸太原鎮標效力期滿分發直隸於乾隆四十三年拔補武清營千總五十六年升雲南曲尋協左營守備六十年調東川營左軍守備是年四月隨雲貴總督福康安攻勦苗匪吳半生等於大烏草河進至大樹坡選勁旅攻山梁猶龍奮勇爭先冒雨攻撲克其巢賊復糾眾山梁設卡相拒猶龍偕參將巴圖什里都司保德等分路進攻克卡七座嘉慶二年隨勦川楚教匪時齊王氏姚之富等股竄往雲陽萬縣境以官兵分擊不能越卽回竄踞大涼山巔是山雲陽萬縣接壤之地延袤三十餘里賊乘高守險我兵追抵其下不能遽進因分隊繞路擊之

猶龍借把總劉國興千總揚存福冒險先登殲執旗賊目二人各  
路合圍徑進賊四竄無路殲戮殆盡猶龍受傷沒於陣是年甘肅  
兩山口堡把總徐天濟湖北鄖陽鎮標右營右哨二司把總劉建  
雍俱隨營擊賊陣亡先後事 聞得 旨趙猶龍著加二等議卹  
餘 賜卹如例均 賞給雲騎尉世職襲次完時以恩騎尉世襲  
罔替猶龍子經權襲天濟子占鼇襲建雍子岐襲天濟甘肅蘭州  
人建雍湖北竹山人

右 國史館本傳



范楫 楊成白等

范楫山西介休人由俊秀捐納游擊乾隆四十四年以鹽務議敘  
卽用四十八年補四川重慶鎮標中營游擊旋丁父憂五十七年  
揀發四川歷署保甯府右營及順慶營游擊嘉慶元年以署總督  
英善檄偕參將佟貴勦徐添德股匪於東鄉縣麻柳場賊竄至亭  
子堡楫復偕佟貴帶兵追勦奮力截擊賊大潰嗣以賊踞風洞口  
山梁佟貴繞道進勦楫偕重慶鎮標中營右哨二司把總何世雄  
隨後策應轉戰甚力旋派守太平砦賊千餘人來犯楫率武舉李  
遇春等擊卻之二年楫守姚家壩隘口賊因被困日久傾巢撲卡  
楫偕達州守備楊成白固拒賊勢甚熾眾寡不敵俱力戰受重傷

同沒於陣其與林同擊賊於東鄉麻柳場者四川提標右營左哨  
二司把總張大斌川北鎮標右營右哨頭司外委把總張廷襄重  
慶鎮標中營右哨二司把總何世雄武生潘啟先均力戰死之事  
聞得 旨范林楊成白俱著加等議卹餘 賜卹如例均 賞給  
雲騎尉世職襲次完時以恩騎尉世襲罔替林子光昫襲成白子  
占鼇襲世雄子連陞襲大斌子仕仁襲廷襄子家駒襲啟先子國  
忠襲成白貴州安順府人世雄大斌俱四川成都人廷襄四川新  
甯人啟先四川達州人

右 國史館本傳

胡魁 馬彪等

胡魁安徽懷甯人由行伍於乾隆三十三年拔安慶營外委三十七年擢安徽撫標右營左哨頭司外委把總四十三年升潛山營千總四十五年調撫標前營千總四十八年調右營千總五十一年升四川提標前營中軍守備六十年隨剿黔楚苗匪攻洪安寨奪卡有功 賞都司頂帶嘉慶元年五月偕都司何天標等堵截紅崖堡賊匪殲戮最多奏入得 旨以應升之缺補用並 賞荷包一對復攻克旗鼓寨謝家營黃柏山等處有功十二月調回川省由新甯一帶協剿二年署四川重慶鎮標右營都司隨副將長春等攻清溪場金峩寺兩寨分投夾擊擒斬二百餘匪尋以副將

玉柱參將王清弼等率兵自清溪口攻勦姚家寨賊卡魁復隨總  
兵艾如文游擊王威凝都司安如峒等率兵自王家崖繞出雞爪  
嶺之北自上壓下聯絡兩路官兵分投進發殲斃賊匪無數賊三  
面受敵匿卡內以大礮轟擊凡可躡足之處飛擲木石如雨魁等  
鼓勇先登直上卡牆身中數矛死之四川順慶營千總馬彪甘肅  
西甯鎮標前營千總拜登鼉同時俱歿於陣時署總督宜縣分兵  
勦金峩寺清溪場賊巢甘肅西甯鎮標右營守備楊萬年右營左  
哨千總陳尙賢左營外委把總祁紹堯大通協左營左哨額外外  
委古萬龍率兵勇先登木城破卡而入賊匪悉眾抗拒萬年等奮  
力衝突賊仍四面合圍萬年尙賢紹堯萬龍俱受重傷陣亡先後



事 聞得 旨胡魁馬彪拜登鼇俱著加等議卹楊萬年陳尙賢  
祁紹堯古萬龍俱著加二等議卹均 賞給雲騎尉世職襲次完  
時以恩騎尉世襲罔替魁本姓龍子中明襲彪子魁元襲登鼇子  
士貴襲萬年子世茂襲尙賢子性善襲紹堯子洪業襲萬龍子玉  
林襲彪四川巴縣人登鼇陝西鳳翔人萬年陝西長安人由行伍  
隨征金川功列超等拔補外委乾隆五十九年洊升是職尙賢甘  
肅西甯人由行伍拔外委隨征廓爾喀功列超等嘉慶二年洊升  
是職紹堯甘肅西甯人由行伍於嘉慶元年隨剿漢中興安一帶  
教匪以功補是職萬龍甘肅西甯人

右 國史館本傳





韓以明 韓連陞

韓以明貴州貴定人由行伍擢上江協把總歷升左哨千總陝西涼州營守備北川營都司河州鎮標右營游擊乾隆三十六年隨征金川歷戰三十八次額受槍傷列超等得功牌二嘉慶元年四川總督宜縣檄隨陝西提督柯藩勦四川教匪攻克將軍山西路包家埡卡其太平縣之通天觀高家寨南津關三處山勢峻險沿山設卡十八處巨石壘砌壕深丈餘西面官帽山東面哨風梁尤爲險要以明首先衝突自黃泥觜乘機奪得哨風梁大卡身受矛傷殲賊四百餘人二年東鄉縣匪踞縣治於險阨處多設卡隘接引巴州通江眾匪爲窺伺太平之計以明帶兵勇五百名駐白沙

河防禦嚴密太平藉以無虞。○月大兵由多福山蓋頂坪山梁進攻方山坪以明奮勇迎擊殲戮無算燬其巢賊竄青杠渡一帶巴州道路梗塞總兵百祥等督兵抵右埡口併力下壓賊勢。○張我兵撤至尖山坪駐紮賊屯巴州南沿河以明等集眾堵禦賊攻甚亟退保州治巴州無城僅土牆一道賊槍礮並發鄉勇傷之漸多以明鼓勵兵勇衝至河岸格鬪。○日賊分兵從兩旁山徑抄出以明力戰歿於陣。是月四川梁萬營外委韓連陞擊賊於插旗山亦陣亡先後事。聞均。賜卹如例。賞雲騎尉世職襲次完時以恩騎尉世襲罔替以明子志禮襲連陞子柱襲連陞四川成都人。

右 國史館本傳

陳天雲 韓成祥

陳天雲雲南尋甸州人由行伍於乾隆三十八年拔昭通鎮右營額外委四十一年補提標右營外委四十七年擢中營把總五十年升千總五十八年升昭通鎮前營守備六十年黔苗滋事總督福康安檄天雲分兵進剿攻克大坡腦等處嘉慶元年升貴州威甯鎮右營都司並賞健勇巴圖魯名號尋升思南營游擊二年調雲南昭通鎮左營游擊時四川教匪姚之富踞巴州王家寨天雲隨副都統西津泰由鐵丁埡進剿奮上山梁賊不能支復竄至陳家壩我兵由苦草壩等處直擊安子坪生擒賊目陳明彩等二十七名餘匪四竄旋又傾巢而出天雲乘勢衝擊兵勇繼之賊

大潰天雲身受重傷歿於陣先是甘肅巴燕戎格營額外外委韓  
成祥於王家寨擊賊陣亡先後事 聞均 賜卹如例 賞雲騎  
尉世職襲次完時以恩騎尉世襲罔替天雲本童姓子萬選襲成  
祥照馬兵例 賞卹成祥甘肅西甯人

右 國史館本傳



樊模 屈澄志等

樊模四川成都人由行伍於乾隆三十四年隨征緬甸歷戰十三次身受槍傷功列頭等三十六年隨征金川屢立戰功四十一年拔四川督標右營額外外委五十一年補四川督標左營外委五十二年檄勦臺灣逆匪林爽文在事奮勇出力 賞戴藍翎五十三年擢會川營右哨把總五十四年遷順慶營千總嘉慶元年升慶甯營守備二年檄勦楚黔苗匪旋調回本省勦捕教匪隨署廣州將軍明亮署領侍衛內大臣德楞泰督兵攻達州安子坪殲擒甚眾賊潰竄乘勝追擊抵苦草壩賊退踞精忠寺山峯明亮德楞泰分營堵禦模帶兵勇伏於山坡夜半賊由觀音山潛遁模乘夜

撲入賊羣兵勇槍礮齊發殲四百餘人餘匪仍退匿模以受矛傷  
殞命四川建昌鎮標右營左哨頭司把總屈澄志亦死之先是明  
亮等分兵夾擊火石嶺賊巢甘肅甯遠營守備常萬清奮勇上山  
殲賊甚夥身受重傷沒於陣是時四川順慶營額外外委程安國  
分攻天星橋陣亡先後事 聞得 旨樊模常萬清俱著加等議  
卹屈澄志 賜卹如例均 賞給雲騎尉世職襲次完時以恩騎  
尉世襲罔替模子吉年襲萬清子法孔襲澄子元佐襲安國照馬  
兵例 賞卹萬清甘肅皋蘭人由行伍隨征金川於乾隆五十九  
年游升是職澄志四川建昌人安國萬縣人

右 國史館本傳

陳德奎 陳萬年等

陳德奎江蘇通州人由武舉揀選一等乾隆五十一年補漕標駐京提塘五十四年選湖北宜昌鎮標中營守備六十年隨總兵張廷彥勦湖南苗匪於田家岡堵緝不遺餘力與古丈坪信坪河口等處官兵相爲聲援賊自新砦竄保靖時游擊王重品馬愷等由南路直撲上官壩副將慶溥復由北路下官壩進攻德奎帶兵夾擊殲賊甚眾奏入 賞都司銜遇缺卽補嘉慶二年調回湖北勦捕教匪時官兵會合白果坪併力搜勦以馬河壩一山路通恩施宣恩兩縣亟進兵攻之賊四竄我兵晝夜追擊德奎於羊公頭尙書巒長坪等處奮力攻勦殲賊無算力竭沒於陣是年四川懋功

營千總陳萬年會四川把總馬正乾擊賊於椿木營安徽銅陵汛  
把總盛殿元擊賊於五寶山署四川督標左營把總王容昇擊賊  
於紅沙堡俱力戰陣亡先後事 聞得 旨陳德奎著加一等議  
卹餘 賜卹如例均 賞給雲騎尉世職襲次完時以恩騎尉世  
襲罔替德奎子長泰襲萬年子錦龍襲殿元子毓發襲正乾子應  
圖襲容昇子柱襲萬年容昇俱四川成都人殿元安徽懷甯人正  
乾四川華陽人

右 國史館本傳



趙大用 馬定元

趙大用陝西長安人乾隆二十六年武進士揀選二等以營守備用三十二年補山東登州鎮標中營守備三十八年擢貴州天柱營都司四十四年遷山西太原鎮標中軍游擊嘉慶二年湖北教匪滋事竄入川境署總督宜縣檄總兵德齡帶兵截剿大用調赴軍營遇賊於羊耳山賊恃眾抗拒勢甚熾大用奮勇直前手刃多匪力竭沒於陣時四川建昌鎮標右營右哨頭司把總馬定元隨副都統綸布春勦懷抱窩一路賊於半山中設卡抗拒我兵乘夜潛上賊驚潰殲戮甚夥山頂之賊復下撲經我兵轟擊殲賊日二人定元被石擊傷陣亡事 聞均 賜卹如例並 賞給雲騎尉



國朝通志卷之二十一

三十一

世職襲次完時以恩騎尉世襲罔替大用子世芳襲定元子乾應襲定元四川松潘廳人以父漢鳳在金川陣亡廕把總隨營學習嘉慶元年隨征湖北屢立戰功二年補是職

右 國史館本傳

陳大定 王樽

陳大定浙江諸暨人乾隆四十年武進士以營守備用五十年補貴州提標右營守備五十七年擢威甯鎮右營都司六十年四月隨雲貴總督福康安剿捕苗匪石三保偕阿哈保等由峒頭進冒雨夜入克之又隨總兵達音泰擊賊首吳半生於蘇麻寨賊據險抗拒大定等奮勇奪其巢賊竄西梁大定偕遊擊姜敏功等夾擊之燬其寨殲賊甚眾五月攻猿猴寨賊望風遁六月進抵隴河營乘勝追擊賊竄古哨營山梁大定偕副將那丹珠等分路合攻殲數百人十月隨征龍山峒賊匪攻克木城石卡三十餘所尋隨貴州提督花連布帶兵由鴨保山進攻乘風縱火殲賊無算嘉慶元

年擢雲南提標右營遊擊二年隨副都統銜署廣州將軍明亮擊  
勦徐添德股匪於小我城山殲賊目劉學仙林潤及餘匪數百人  
受傷歿於陣山東武定營把總王楫亦死之事 聞均 賜卹如  
例賞給雲騎尉世職襲次完時以恩騎尉世襲罔替大定子三祝  
襲楫子懿洪襲楫山東惠民人

右 國史館本傳

羅宗禮 衛學純

羅宗禮湖南武陵人由行伍於乾隆三十八年出師金川屢立戰功拔衛昌營外委四十年擢常德營把總四十六年升提標右營千總六十年隨征黔楚逆苗於鎮筸攻破賊卡嘉慶二年升湖北襄陽鎮標中營守備時邪匪滋事宗禮隨都統額勒登保總督福凝於歸州對岸之羊荅橋追剿林之華覃家耀股匪賊屯馬胡營山築砦抵禦我兵分路進攻奪其山梁殲賊無算賊由白崖潛遁我兵追擊於馬家山賊四散奔竄爲我兵所偪復於土橋響板溪逸入巴東之高梁砦我兵隨處截殺斬獲甚多附從匪黨幾盡宗禮連日轉戰以創重沒於陣旋又有湖北荆門營千總衛學純隨

總兵馬瑀由黑樓門迎剿羅其清王三槐股匪賊自鍾肯竄至張家崖地勢險仄賊悉眾抗拒我兵施放連環槍礮轟斃多人我兵乘勢撲卡林內突出賊五六百人接應我兵併力截剿賊敗回我兵繞道攻之賊據山巔插石如雨學純猝中石傷陣亡先後事

聞奉 旨羅宗禮衛學純俱著咨部議卹均給雲騎尉世職襲次完時以恩騎尉世襲罔替宗禮子萬興襲學純子宗誥襲學純江西豐城人由武舉於乾隆五十一年揀選千總分發湖北試用五十六年補今職

右 國史館本傳



周斌 曾鴻灝等

周斌雲南恩安人貴州貴定籍由武舉隨營效力於乾隆三十八年擢貴州古州鎮標左營千總四十九年升歸化營守備五十五年調大定協右營守備嘉慶二年隨勦興義狝苗燬阿捧卡砦十一處斌奮勇擊賊沒於陣尋大兵冒雨攻克羊場山梁勦至新店貴州畢赤營把總曾鴻灝雲南開化鎮標中營把總鄧興祖昭通鎮標前營額外外委何君弼貴州上江協額外外委畢連陞清江協額外外委蔣運泰俱以陷陣沒雲南楚雄協額外外委李丕榮以中槍傷亡由新店節次冒雨勦至水煙坪攻克卡隘貴州提標前營難廕把總王心凝黔西協左營外委劉尙質雲南鎮雄營額

外外委徐東昇俱沒於陣廣西馘蘇營把總鄧金保左江鎮標中  
營外委徐明擊賊於那烘隨營效力雲南武生胡國勳擊賊於納  
得籠俱戰沒時夏五月也先是三月賊擾冊亨在籍漕標千總周  
之光守禦死之嗣是六月大兵攻克卡子河進剿普坪坡貴州定  
廣協右營守備張文貴石阡營把總彭天亮思南營難廕把總徐  
光顯署大定協左營把總段啟文黔西協右營外委王元柏遵義  
協左營外委周紹全俱以陷陣沒由普坪坡直抵壩弄進解南籠  
圍貴州安義鎮標右營把總李春敖中營外委張其陞沒於陣貴  
陽城守營外委朱應文擊賊於鎮甯州花腳砦永安協右營把總  
劉應科擊賊於石龍關猛戛砦俱戰沒是年平彝狝苗越黃泥河

疊肆焚掠雲南昭通鎮標右營守備江麟堵禦死之督標左營把  
總馬河圖昭通鎮標中營把總龐得佩曲尋協右營額外外委曾  
繼先擊賊於抹角右營把總楊溥左營外委張昂宇擊賊於董谷  
山右哨把總曾偉擊賊於安籠鋪貴州長壩營把總楊烈外委梁  
國章擊賊於冊亨汛城俱陣亡先後事 聞均 賜卹如例 賞  
雲騎尉世職襲次完時以恩騎尉世襲罔替斌子開志襲鴻灝子  
貴麟襲興祖子中彥襲心凝子登朝襲尙質子槐襲金保子榮昇  
襲之光子慶元襲文貴子應鍾襲天亮姪大貴襲光顯子應彪襲  
啟文子遇春襲元柏子朝貴襲紹全子發元襲春敖子發襲其陞  
子璧襲應文子發科襲應科子朝棟襲麟子應聲襲河圖子朝輔



襲得佩子澤襲溥子培潤襲昂宇子彩襲偉子廷璽襲烈弟奎襲  
國章弟國瑞襲明嗣襲無考君弼連陞運泰丕榮東昇國勳繼先  
均照馬兵例 賞卹鴻灝春敖俱貴州普定人興祖雲南文山武  
舉人嘉慶元年隨勦黔楚苗匪身經三十餘戰克卡砦有功君弼  
昭通府人連陞貴州清平人運泰鎮遠人丕榮雲南楚雄人心凝  
天亮紹全俱貴州安順府人尙質元柏俱黔西州人東昇河圖俱  
雲南昆明人金保廣西上思州人明宣化人國勳雲南師宗人之  
光貴州普定武舉人文貴平遠州人由行伍游擢千總升是職光  
顯石阡府人啟文大定府武舉人其陞國章俱興義人應文烈俱  
貴陽人應科郎岱廳人麟雲南順甯人得佩恩安人繼先昂宇俱

南甯人溥出靖府人偉宣威州人

右 國史館本傳



國朝考績考卷

卷三十一

三十一

胡慶遠 保元奉等

胡慶遠貴州威甯州人由行伍於乾隆五十一年拔威甯鎮標右營外委六十年六月隨征黔楚苗匪十一月擢畢赤營把總尋升威甯鎮標左營千總嘉慶二年隨征興義狃苗屢戰有功升雲南撫標右營守備旋升永安協左營都司嗣以賊踞洞灘慶遠隨剿奮勇攻擊陣亡貴州提標左營把總保元奉亦死之時秋八月也先是二月雲南尋霑營守備崔崑貴州安南營把總李華純擊賊於永甯州力戰陣亡雲南提標左營額外外委沙蒼擊賊於下山塘雲南城守營額外外委劉漢玉擊賊於巴隍壘陣亡四月大兵進剿碧峯山山勢陡險卡砦層疊我兵奮勇登山悉毀之殲戮甚

多貴州提標左營把總高以謙前營把總陳欽安義鎮標中營把  
總李錦俱身受槍傷沒於陣貴州畢赤營把總朱宣揚擊賊於壩  
陽陣亡七月大軍攻洞灑雲南楚雄協右營千總馬有明貴州大  
定協左營把總徐文錦李應隆遵義協把總王士謨俱陣亡賊復  
據安有山梁築柵抗拒我兵繞上力勦貴州大定協右營把總吳  
庚雲徐洪德雲南永昌協左營把總曾玉鶴麗鎮右營外委徐興  
祖武定營右哨外委張秀貴州安順城守營額外外委胡珍隨營  
效力武舉牛占堦俱陣亡先後事 聞均 賜卹如例 賞雲騎  
尉世職襲次完時以恩騎尉世襲罔替慶遠堂弟國柱襲元率子  
椿襲崑子耀祖襲華純子國樑襲以謙子耀先襲欽子貴全襲錦

子德源襲宣揚子擢襲有明子驥襲文錦子占魁襲應隆子占斗  
襲士謨子瑤襲庚雲子玠襲洪德子廷傑襲玉子耀光襲秀子星  
燦襲占媚子嗣宗襲興祖嗣襲無考蒼漢玉珍俱照馬兵例 賜  
卹元奉錦俱貴州興義人崑漢玉興祖占媚俱雲南昆明人崑由  
武舉洊升千總隨剿黔楚苗匪屢著勞績升是職華純貴州安南  
人蒼玉俱雲南太和人以謙宣揚珍俱貴州安順府人欽普定人  
有明雲南楚雄人文錦應隆俱貴州大定府人士謨庚雲俱貴筑  
人洪德平遠州人秀雲南武定州人

右 國史館本傳





烏什哈達

烏什哈達滿洲正黃旗人伊爾根覺羅氏住吉林乾隆十九年由  
開散授前鋒二十七年派防伊犁二十八年授前鋒藍翎長二十  
九年擢前鋒校三十一年隨征緬甸三十三年以軍功 賞法福  
哩巴圖魯名號授三等侍衛三十五年隨征金川三十六年攻克  
巴朗拉西面山梁卡座三十七年二月將已占山峯被賊奪去旋  
復帶兵占踞並將卡賊全行勦洗奏入 上以其功過足以相抵  
宥之三月偕攻資哩賊砦克之 命予議敘七月擢二等侍衛旋  
授正白旗蒙古副都統三十八年攻克昔嶺大礮得 旨嘉獎三  
十九年攻克羅博瓦山礮卡 賞荷包燧囊四十年屢於雅瑪朋

特並瓦喇占等處奪柵立功四十一年奏凱 予騎都尉加一雲  
騎尉世職並 賜銀緞旋授和闐領隊大臣四十六年向欽差理  
藩院右侍郎復興告三品銜和闐辦事大臣德風私動玉石錢文  
修理衙署等款德風亦告烏什哈達收受阿奇木伯克皮張多款  
上命工部尙書綽克托暨復興鞠之旋奏德風以烏什哈達東三  
省人意存輕視遇公務有意飭駁不假辭色以致烏什哈達不能  
隱忍訐以洩忿德風私動錢文屬實照例擬罪烏什哈達私受皮  
張皆以物抵給並非勒取惟訐款實少誣多應革職發烏什邊卡  
侍衛上效力下軍機大臣議行四十九年復授頭等侍衛虎槍營  
營長五十一年授健銳營翼長出師臺灣與普爾普由茅港勦洗

諸羅至臺灣之屯聚逆匪奮勇勦殺府縣之路賴以通得 旨賞  
還法福哩巴圖魯名號五十三年由水路擒獲賊首莊大田奉  
旨官兵直抵瑯嶠時烏什哈達帶領水師兵丁順風連檣而至四  
面合圍水陸並進俾莊大田得以卽時擒獲勇往可嘉烏什哈達  
著交部查照功牌議給世職凱旋後圖像後三十功臣於紫光閣  
命詞臣爲之贊尋授吉林副都統復調齊齊哈爾副都統又調熊  
岳副都統五十六年調鑲紅旗蒙古副都統五十九年 召見奏  
廓爾喀軍務不實 諭曰烏什哈達前在廓爾喀軍前並未奮勉  
藉稱在前修路跌傷福康安因其無用置於後隊朕所深知乃今  
日召見時伊轉以爲有功巧飾奏對實屬不堪烏什哈達著革職

發往伊犁當差以爲巧佞者戒嘉慶元年釋回至河南請赴楚省  
軍營效力得 旨俞允 賞頭等待衛卽隨副都統銜鄂輝勦辦  
襄陽撲城之匪殲斃甚多餘皆退竄奉 旨議敘復隨勦鍾祥賊  
夥有功 賞大小荷包二年二月派駐守城西岸適有賊七八百  
人在古河口側探水遂率兵勇力勦傷斃過半餘皆退逃旋派防  
四川石碛廳九月率副將達桑阿等由申溪一路往攻白崖山賊  
將頭層木卡攻克逆匪撲水死者五百餘名三年正月逆首王三  
槐等在梁山墊江一帶滋擾復由臨江寺夥聚渠口白崖山暗與  
會合擁眾過江王三槐亦至其時有匪船數十停泊岸上疾呼船  
中之賊應聲卽登蜂擁不下數千烏什哈達不顧兵力單弱卽出



迎禦勅力竭陣亡事 聞 命咨部加等優卹 子輕車都尉世  
職長子圖爾弼善襲

右 國史館本傳



國朝詩林卷之八

七

四

馬鍾麒 王名望等

馬鍾麒甘肅靈臺人乾隆五十二年武進士授廣東潮州鎮標左營守備六十年升陝西邠州營都司嘉慶元年署馬營監營游擊二年陝省教匪竄沔縣一帶將軍宗室恆瑞等檄鍾麒帶撒拉爾回兵協勦並令改換鄉勇旗號前進相遇於桑樹灣賊果認爲本處鄉勇蜂擁直撲我兵四路兜擊賊潰斬獲無算鍾麒功最著賞戴花翎三年正月賊竄川境攻營山縣勢甚熾鍾麒隨恆瑞帶兵往援總兵富爾賽自城內夾攻賊恃眾抗拒經官兵分三路施放槍礮擊斃多名復短刃相接鍾麒首先衝入賊隊手刃多匪以受傷沒於陣直隸沿河口都司王名望亦以受傷陣亡嗣是十月

將軍德楞泰勦營山縣之箕山賊匪抵小箕山戮二百餘匪三路  
並進陝西河州鎮標中軍游擊趙永成首先衝入木柵拋擲火彈  
燬其卡賊猶併力相持永成以中槍陣亡直隸提標前營右哨千  
總劉泰隨恆瑞合勦於營山縣之陳家壩力戰陣亡先後事 聞  
得 旨馬鍾麒王名望著加等議卹餘 賜卹如例均 賞雲騎  
尉世職襲次完時以恩騎尉世襲罔替鍾麒子世勳襲名望子炯  
襲泰子廷柱襲名望湖南零陵人由廣西提標行伍拔外委擢後  
營把總升隆林營守備旋升是職泰直隸清苑人永成自有傳

右 國史館本傳

李國賓 李根長

李國賓字用賓號觀亭昆明人由行伍歷官騰越鎮中軍守備出師四川達州奮勇殺賊陣亡奉 旨賜葬祭 恩卹世襲恩騎尉弟國章丁酉舉人有俊才官湖南卒於桑植縣任

右演繫小傳師範撰

李根長

李根長賓川州人由藍翎侍衛授安慶江防營守備白蓮教之亂調赴河南勦賊恃勇深入賊已披靡回視主將受圍回騎救之馬蹶爲所戕事聞 詔護喪歸蔭一子雲騎尉世襲

右演繫小傳師範撰





國朝耆獻類徵初編卷三百六十二目錄

忠義三十二

王銑

白廷英

宋延清 趙健等

丁有成

安正綱

李昌

馬得等

保興

文奎

王國棟

張文魁等

果勒明阿

福祿等

哲庫

靈海等

魏攀舉

秦恆等

王溶

田啟華等

趙成龍

劉忠孝等

邱于明

馬廷宣

陳占舉

王照遠

郭煊

胡希照等

趙宗濬

林中甫等

石鼎臣

郭明宗等

王宗祐

張奇等

岱德

唐文高

吳玉貴等

珠爾杭阿

誇德等

姜敏功

李占魁等

趙永成

四庫全書  
卷之三十三

王垂重 楊炳文等

左觀淵 陸維基

補錄

楊堂 梁崇 李培秀

國朝耆獻類徵初編卷三百六十二

通奉大夫前署江西巡撫江西布政使司布政使湘陰李桓輯

忠義三十二

王銑

王君名銑字礪可常州武進人七世祖章明巡視京營御史崇禎十七年死闖寇難諡曰節愍子之柯以父蔭授錦衣衛指揮僉事其弟之栻官兵部職方司主事出爲金衢監軍道 大清兵破義烏不屈死後 賜諡曰忠節君則指揮僉事後也幼讀書慕宋明道先生程子爲人自名曰景顥補府學生繼入國子監乃改今名君九試於鄉不得舉後以四庫館臚錄勞得縣丞發陝西權署數

縣主簿典史十餘年始咨補華陰縣丞在官不二年而陝西有教  
匪之亂初教匪起於湖北始僅數百人勢微矣 朝廷命總統將  
軍督撫諸大官帥兵討賊計其功當旦夕就居無何乃蔓延入川  
陝數省騷動汜數年然後殲滅淨盡云君官華陰大吏調守山陽豐  
陽峇君則糾聚義勇八百餘人勉以忠義且教之戰法不一年其  
兵皆可用嘉慶二年賊大隊犯陝一由盧氏入雒南一由鄖陽入  
武關關中大震是時山陽知縣高肇普請調君同守縣城君得檄  
卽由豐陽入縣城預爲死守計而以所糾義勇隨大營聽調用義  
勇遇賊頗爭先出死力值將帥非其人遂盡殲焉君聞爲建祠山  
陽南關勒文誌名姓哭而奠之觀者皆泣下明年君有運餉之役

始賊既退君且歸華陰大吏又調赴洵陽理撫卹事知縣某者貪  
酷吏也私約與君分振項君駭然曰此何時君安忍言此某恨甚  
思中君卽薦君以是役二月十三日君運餉宿鎮安廟溝驟聞賊  
首高均德率眾至兵役懼勸君逃君怒叱曰死吾分也逃何爲明  
日黎明君護餉出山溝後路突有二賊率眾躍馬來直顛君墜地  
賊亦下馬持君手意殆欲君降君奮罵曰我運餉縣丞王銑也汝  
等負國家爲叛逆行且誅屠無噍類卽奮左手拔刀斫賊賊大  
怒摔君投坡下叢刺之中五十餘槍剖腹割耳鼻死從役李金亦  
同死焉死後七日知縣蔡瀾獲其屍漢中府知府趙洵視含殮事  
聞 敕賜蔭卹視他陣亡者有加君祖綸宣學廩生父承恩不仕



子韞輝今襲雲騎尉

贊曰君家世居常州奔牛鎮自節愍忠節兩公皆殉明難而君又以死事繼之人皆謂奔牛王氏忠臣家也雖然兩公值國破君亡死何足怪今天下方享太平教匪之起鼠竊狗盜安足置齒牙閒而顧使清貞強幹之材用不得施糜身於盜手傷已釀賊禍者誰與不盡君才而置諸死地者又誰與或曰君之生也其父蓋夜見節愍公而君幼夢賦詩已有壯士忠魂之語然則士之死於國事者其亦天實爲之而初無關於人事也邪嗚呼是則予所不知也已

右家傳管同撰

陝西華陰縣丞王銑字麗可武進人明御史忠烈公章後也李自成陷京師忠烈公服朝服罵賊死兵部主事金忠節公鉉亦死御河其後湖廣巡按劉忠毅公熙祚死衡州端禮門世稱武進三忠麗可白皙弱而文以四庫館膳錄監生授華陰縣丞居官貧甚又嘗以介不台上官嘉慶三年白蓮教往來擾湖北四川陝西三省官軍次第收捕賊蔓延不可驟滅行臺省督餉軍銀甚急麗可承檄餉經略勒保營祖之日祀忠烈公泣已而謂人曰吾此行死矣吾甯能效他人苟且耶二月十三日行至雒南廟溝坡坡迤高二里所麗可已北下坡而家人吳連押後隊踰坡脊未下背望賊高均德大隊雜遯至坡南探騎二縱轡馳上吳連大呼賊來速下馬

避麗可回望不應吳連復大呼而賊探騎已至坡脊吳連下馬叩  
首賊不顧馳下左右夾麗可絕馳去幾一里復勒騎馳回一騎以  
矛別麗可破面墜馬一騎就刺臂及脇五創皆洞過而死年五十  
九二騎馳會大隊下坡營平地雷賊五人卓帳守麗可尸旣一日  
無議贖者拔刀殘之而去又二日吳連求得尸凡創五十餘以禮  
殮行臺省上奏 賜祭葬于襲雲騎尉其時經略額勒登保禽高  
均德送京師伏誅西市

右書事惲敬撰

## 白廷英

白君諱廷英字嶽鍾始祖貞與平人前明漢中教授遂家洋之仙里村再傳分支西山父諱銓業儒早卒母傅氏年二十一守節撫孤君甫二歲既長師事族祖竹澳先生讀書通大義後率妻子耕作養母中年家漸饒七十後復閱舊書不倦數爲鄉人排難解紛而無所取建宗祠延師訓里中子弟曰子弟可不求名不可不率教也纂族約家法意巖巖不苟乾隆乙卯冬君年六十八縣庭舉鄉飲酒之典君雖力辭未與鄉人咸謂君之齒德固無媿也是時湖北教匪縱橫嘉慶丁巳臘月之末由蜀渡漢江而北約十餘萬蹂躪終南之南近山幾無完村明年戊午春督鄉人築村後之張



家寨以避寇氛二月二十四日賊陷城東雍家寨使人馳覘之歸報狀君熟視已寨曰吾寨庶幾免乎厥後賊數萬突從東來鄉人望風股慄多不敢居寨上寨上人不二三百賊急攻槍矢雨下君戒寨上人堅守而賊眾大呼曰逃爲善否且屠眾莫固志丁壯悉由寨西墜去賊蟻附而登君知不免大罵遂遇害君之次子筐君頭負去賊逐之筐倒頭落山下從弟廷才佐君守寨族弟廷揚亦抗不屈俱戕且焚之明日舉家號哭求君尸尸焦爛不可識以右手駢指辨得之頭不可得諸子號呼禱祈山靈得於谷底次子婦李氏同日刺死又殺其二孫寨之將陷也有健者以石碎賊之腦立死或曰君之媼黨張清或曰君之從孫德助之從子文翠被脅



不降至寨西廟埡子縛梧桐下刳其腹梧桐由是立枯守寨死者八十餘人時四月七日也鄉人哭君之死如喪其至親時年七十有五四子二女長女縣學廩生王作舟之母也一適李氏孫八人曾孫九人

論曰君之愛護鄉里出於惻怛真誠其設施捍禦之具雖未詳知其志固仁人義士也事之不濟眾寡懸絕孰復忍以必完必勝責哉澤滅木之君子獨立而不懼上六過涉滅頂雖凶不可咎君之謂矣嗚呼首築張家寨者白君白君兄弟子孫之死若此邑人得知之者以其外孫王作舟能敘錄其事也吾曾刪之上於郡侯將列郡志矣雍家寨名甚著民之被屠戮者數倍於張家寨焚尸之

國朝書目類考卷之三十三  
三  
慘穢聞數里建議築寨者何人其姓名吾弗聞也度亦素有實行  
嘉譽之人不然孰倚貧人敗類薄夫鄙夫與之同生死乎雍家溝  
之東南十餘里間有袁高二生者吾門人也獨不聞古之君子表  
微乎吾將屬其訪而質瑣言之吾當效鳧繹先生確苦之文以敘  
其事續上之郡侯嚴公焉

右傳岳震川撰

宋延清 趙健等

宋延清山東招遠人乾隆四十六年武進士授藍翎侍衛五十年  
揀發雲貴以都司用五十三年補貴州威甯鎮標右營都司五十  
六年遷水城營遊擊六十年二月隨雲貴總督福康安勦黔楚逆  
苗六月以功 賞戴花翎七月隨貴州安籠鎮總兵花連布進攻  
古哨營苗寨克之八月隨福康安攻古丈坪殲賊甚多燬上下苗  
寨十月隨領侍衛內大臣都統額勒登保攻龍角峒克苗寨二十  
餘處進攻鴨保山率健卒奮勇爭先奪木城石卡三十餘座遂分  
兵夾擊山寨是夜朔風大作延清帶兵攀越而上拋擲火彈火挾  
風勢竹木著火皆飛克十三寨殲戮無算十一月克鴨保山大寨

奏入下部議敘嘉慶元年六月由全壁嶺進抵乾州攻廖貢坡馬鞍山諸寨並沿途四十八寨殲獲賊目多名 賞躋勇巴圖魯名號十一月攻鎮平縣屬貴魚坡身冒矢石克二十餘卡二年二月進勦定牛等寨轉戰晝夜燬寨極多論功擢雲南東川營參將三月隨雲貴總督勒保勦貴州狝苗由黃果樹攻關嶺大兵分爲兩翼延清帶兵由左邊龍抓樹深溝小路抄截其後克之四月由永甯州馳解新城之圍五月進攻碧峯山燬寨二十三處生擒賊目多人七月擢貴州大定協副將八月大兵平洞洒當丈等巢生擒渠魁殲戮甚眾延清尤著勞績奏入 賞青玉喜字扳指大小荷包等件十月勦興義縣北鄉餘匪攻克豈寶峒移師擊壩溝壘等



處乘夜雨奪山梁燬石牆殲擒殆盡十一月進勦上下羅障一帶  
次第接捕苗境肅清下部議敘三年二月隨四川總督勒保勦捕  
教匪時賊竄通江縣草壩場延清由豆家營立馬坡襲其後至董  
谿口乘勢下壓短兵相接殲三百餘名俘八十餘名三月由香鑪  
山白河場日行百餘里繞道前勦行抵插旗山適總兵百祥與寶  
竹寺股匪相持延清隔河夾擊賊竄回白山寺分隊趨永興場窺  
渠縣並伏於石梯坎延清率兵躡追總兵保興繼之輪番衝突賊  
猶相持不退總兵富成大隊適至遂合兵盡力勦擊賊折回向李  
家山延清馳抵大元山梁首先衝入賊隊殲戮甚夥餘匪潰延清  
乘勝追勦至楊家壩身中槍傷歿於陣甘肅清水營把總趙健亦



死之甘肅甘州城守營把總署撫標前營千總羅一忠甘州鎮標  
右營把總拜國棟提標中營外委田印仕於柳林堡戰歿事聞  
得旨宋延清著加等議卹賞騎都尉世職餘賜卹如例  
賞雲騎尉世職襲次完時均以恩騎尉世襲罔替延清子振榮襲  
健子鵬麟襲一忠子鎮國襲國棟弟國泰襲印仕子大年襲一忠  
印仕俱甘肅張掖人國棟健俱甯夏人一忠國棟俱由行伍游擢  
是職印仕健俱由行伍拔是職

右 國史館本傳

丁有成 安正綱

丁有成湖南鳳凰廳人由行伍於乾隆三十七年隨征金川有功拔均房營外委擢澧州營把總遷襄陽鎮標中營千總四十年攻克勒烏圍轉經樓木城以功最 賞戴藍翎擢永綏協左營守備遷陝西建安堡都司四十九年勦捕石峯堡回匪遷甯夏鎮標前營遊擊 賞換花翎尋升山東曹州營參將嘉慶元年隨勦四川教匪戰甚力 賞健勇巴圖魯名號升直隸通州協副將擊賊於達州乘夜逐北殲戮無算賊竄吳家集北通豫境其南阻大江將軍宗室恆瑞都統永保設計分兵夾攻之永保偕提督慶成在南恆瑞偕副都統碩雲保率有成等在北乘風雪急攻賊竄踞梓山

之王家城距梓山二十餘里慶成率兵攻克之進攻紅土岡賊南  
走遊擊穆克登布追之遇伏圍數重有成兵至夾攻之穆克登布  
潰圍出賊大敗賊首劉起樂張富國遁二年三月林之華覃加耀  
股匪窺河南境之天台山有成於東北口擊走之十月復閒道擊  
賊於陝西洵陽縣追逐其後擒殺甚眾三年三月賊羅其清等出  
猴子坡有成擊卻之賊竄孫家梁有成隨慶成自右攻之賊依林  
爲蔽槍石交下有成力戰歿於陣先是山西偏關營外委安正綱  
追賊至司渡河死之先後專 聞均 賜卹如例 賞雲騎尉世  
職襲次完時以恩騎尉世襲罔替有成子玉衡襲正綱子倬襲正  
綱山西平魯人由行伍拔是職

右 國史館本傳

國史館本傳 卷之三十一 十一

海軍大臣官房 海軍部 第二三三二二

ノ



李昌 馬得等

李昌甘肅平番人由行伍於乾隆三十七年隨征金川歷三十八戰受刀矛傷各一功列頭等得功牌六三十八年拔甘州城守營外委三十九年擢甯朔堡把總四十一年遷提標前營千總四十八年升督標後營守備五十三年擢黎園堡都司五十九年升陝西鞏昌營遊擊嘉慶元年川楚教匪滋事蔓延陝省隨總督宜縣率兵勦捕時賊屯興安府城南北兩境其南爲安嶺其北爲將軍山我兵先於城南賊巢分路進擊昌帶兵三百名由王家山進克之殲千餘人與攻克羊毛子堰遊擊韓嘉業之兵合進偪安嶺大寨直抵木城拋擲火彈煙燄四起賊眾數千悉成煨燼逸出者擒

斬無遺奏入下部議敘尋分攻城北賊巢昌偕都司韓大烈帶兵五百名由東路黑虎塘進克之殲二百餘人與大兵合攻將軍山大寨斷其汲道用大礮轟開石城並斃賊首二名餘匪就擒城南北兩境悉平宜縣以昌在事尤爲奮勇奏請獎勵 命以應升之缺升用二年正月隨宜縣進擊洞汝兩河賊匪合攻五作雲巢燬木城殲獲首逆 賞戴花翎三月合勦川省巴州金峽寺賊匪昌隨參將瑪靈阿帶兵五百名由馬伏山之大團包峯後奪其卡遂夜渡清谿口克姚家壩以遏賊之門戶奏入 賞在事諸臣大小荷包昌與焉旋進攻金峽寺隨總兵索費英阿率兵從馬耳峯攀崖而下伏棋盤石賊寨左側合兵夾攻克之復偕總兵艾如文克

雞爪嶺蝙蝠洞殲戮無算七月升甘肅蘭州城守營參將三年二月川匪竄陝西南鄭縣昌隨宜縣勦擊於長寨盡殲之進抵青石關賊仍遁回川境三月宜縣令昌率兵五百名偕州判薛因勉率鄉勇二千人馳赴興安府之兩河關截擊適賊眾千餘自東竄至昌奮力進攻殲戮甚眾賊目楊英中矛死因勉分兵追勦餘匪忽阮正通股匪從洵河突至昌率兵五百鄉勇一千迎擊殲三百餘人轉戰五時陝甘督標中軍把總馬得戰歿昌身受矛傷猶縱馬深入我兵勇氣倍增復殲六百餘人賊向麻葉坪遁昌以傷重回營殞命時西鄉縣一帶亦爲賊擾直隸永甯路千總劉炯隨將軍明亮勦捕受傷陣亡先後事 聞 諭曰參將李昌以少擊眾轉

戰五時被賊矛傷後猶復縱馬深入先後殺賊九百餘人旋因傷重殞命實堪憫惜著照總兵例議卹並查明伊子俟服闋後送部引見候朕加恩得炯 賜卹如例昌 賞騎都尉世職得炯 賞雲騎尉世職襲次完時均以恩騎尉世襲罔替昌子世勳襲得子義福襲炯子玉成襲得甘肅皋蘭人炯直隸萬全人由行伍洊升是職

右 國史館本傳



保興

保興鑲白旗滿洲人承吉氏由烏槍護軍隊長於乾隆三十二年從征緬甸三十四年補烏槍護軍校三十八年隨征金川三十九年補放湖北荊州駐防佐領旋轉副護軍參領四十一年凱旋回京四十三年補放護軍參領旋補本旗新營房營總四十四年揀發陝甘以副將用四十五年投陝西神木協副將是年丁憂回旗四十六年由本旗帶領引見奉 旨馳驛前往甘肅征剿撒拉爾逆回是年逆回平題署陝西河州協副將四十七年補授陝西西安將軍標中軍副將五十一年擢直隸宣化鎮總兵五十二年調陝西興漢鎮總兵五十六年調河州鎮總兵嘉慶二年九月署理



陝甘總督英善檄帶河州涼州兵一千由鞏昌白馬關一路直赴漢中西鄉等處迎勦邪匪十月由廣元一路入川過其北竄十一月會同總兵朱射斗由南部一路進勦至營山殺賊多名賊退至羅家壩黃渡河一帶屯紮十二月進至小垵口地方殲賊數百名生擒十一名餘賊由天池山竄往鄰水縣其時逆匪王三槐竄至望溪路通廣安合州保興帶兵迎截該匪等從大竹一路奔竄復分股搶廣安州屬大梁城並另股從觀音場一路直趨州城保興趕赴分股勦殺殲賊四百餘人生擒二十五名餘匪潰賊復圍攻鄰水縣城該縣楊爲龍相持兩晝夜保興援兵至併力迎敵斃賊五百餘名圍解奉 旨賞玉喜字拔指大小荷包嗣因鄰水板橋

場行抵天華山據之賊匪往上直撲官兵分投禦勦殲戮三四百  
人生擒苟文宰等三十七名遂連勦風門鋪角山茶店于諸處賊  
匪殲斃甚眾因由墊江一路馳赴梁山三年正月由廣福場進抵  
彈子壩迎勦賊匪曾柳我兵槍箭並發當斃賊首曾柳並匪黨三  
百二十餘名生擒賊目三名餘匪二百五十一名奉 旨賞玉喜  
字拔指大小荷包二月王三槐等匪由三匯口等處奔竄保興於  
大鼻梁固軍壩山梁等處勦殺八百餘名內有執旗賊目三名樊  
大珩任元第劉志德並生擒賊匪八十三名奉 旨賞戴花翎三  
月王三槐等匪經官兵痛勦折向龍鳳壩一帶保興帶兵從倒水  
進發抵龍鳳壩值匪眾數千屯聚我兵施放槍礮斃賊八百餘名

賊竄巴州鎮龍關至白沙場滋擾達州所屬之江陵溪官兵於雲  
頂山抵江陵溪沿途殲獲甚多從插旗山追至石梯坎遇賊接仗  
連奪卡五座殺賊五百餘名該處山徑紛歧兼之風雨驟至賊匪  
攢集攻撲出卡壓擊保興猝被鏢槍陣亡奉 上諭總兵保興身  
先士卒禦賊陣亡實爲可憫著加恩照提督例議卹 賞給騎都  
尉又一雲騎尉世職于六十五承襲見任本旗印務參領

右 國史館本傳

文奎

文奎滿洲鑲白旗人瓜爾佳氏由前鋒於乾隆四十年補藍翎長  
四十一年補前鋒校四十八年擢委前鋒章京五十二年任四川  
維州營都司五十九年升維州營遊擊嘉慶元年授廣東新會營  
參將三年隨四川總督勒保勦辦邪匪三月王三槐徐添德冉文  
儔等屯踞達州渠縣境內大兵邀擊於蚊蟲溪賊眾退聚白山寺  
阻河負險分股直趨永興場窺伺渠縣又潛匿石梯坎等處謀阻  
官兵追截勒保飭文奎隨總兵保興由插旗山馳禦追擊進至石  
梯坎遇賊接仗連奪賊卡五座殺賊五百餘名俄賊大隊攢集是  
時風雨驟至石梯坎山徑紛岐賊眾乘勢蜂擁負固抗拒適後隊



官兵繼至輪番衝擊而賊匪愈聚愈多相持不退總兵保興猝被  
鏢槍陣亡文奎奮不顧身衝冒矢石併力截擊身被數創遂歿於  
陣事 聞得 旨文奎著咨部加等議卹廕雲騎尉世職襲次完  
時給恩騎尉世襲罔替子廣音保承襲

右 國史館本傳



王國棟 張文魁等

王國棟直隸萬全人由行伍於乾隆三十三年辦理屯田以奮勉  
列頭等保送把總三十四年補深井堡把總四十年遷靖安堡千  
總四十八年升陝西延安營守備五十二年遷甘肅永昌協中軍  
都司六十年擢俄卜嶺營遊擊嘉慶三年正月川匪王三槐徐添  
德等將竄入陝境總督勒保統兵分道截剿國棟隨總兵保興由  
觀音崖小路邀擊遇賊於固軍壩山梁分兩翼下壓剿戮無數賊  
復由山溝繞至半山國棟等迎擊之殲三百餘人俘賊目一奏入  
賞戴花翎三月賊踞達州渠縣接壤之白山寺阻河負險將窺渠  
縣並分黨伏石梯坎以防官兵追截勒保先遣保興由插旗山擊

石梯坎自率大兵偕國棟等渡河乘夜霧雨驟集密遣人於上游  
虛轟大礮大兵自沙溪灣結筏潛渡國棟等奮躍登岸奪白山寺  
對山遂襲賊營大克之防河羣匪聞聲竄集我兵往來盪擊殲戮  
無算國棟受傷陣亡貴州安義營千總張文魁同時戰歿其擊賊  
於石梯坎者直隸宣化營都司黎志誠等奪五卡殲五百餘人賊  
忽大隊攢集山徑岐雜風雨驟至志誠以眾寡不敵力戰死援兵  
至賊乃遁大兵分三路進剿陝西隆德營守備張潔隨勒保由中  
路抵板橋殲三百餘匪乘夜追至土城埡賊分五股拒戰其一股  
自右直撲大營潔奮勇迎擊中槍陣亡是年四川城守營外委周  
仁擊賊於達州臨江寺陣亡先後事 聞得 旨王國棟黎志誠

張潔張文魁俱著加等議卹周仁 賜卹如例均 賞雲騎尉世職襲次完時以恩騎尉世襲罔替國棟子登科襲志誠子幼未襲潔子百朋襲文魁子鉅襲仁子文泰襲志誠貴州都勻人由行伍拔外委乾隆五十八年洊升直隸赤城堡都司調是職潔甘肅涼州府人由武舉補把總嘉慶二年洊升是職文魁貴州遵義府人由難廕補安義營把總嘉慶二年升是職仁四川華陽人

右 國史館本傳

175-206

VI

175-206

果勒明阿 福祿等

果勒明阿佟佳氏滿洲鑲白旗人荊州駐防游升協領嘉慶元年  
湖北林之華股匪擾長陽縣果勒明阿奉檄防堵三年川匪劉廷  
棟竄楚境直趨當陽官兵敗之楊家港折東而竄果勒明阿隨副  
都統海興阿截勦於縣屬之河溶殲數百人賊復竄荆門州官軍  
迎擊於石牌以眾寡不敵果勒明阿偕佐領福祿阿爾薩蘭防禦  
薩哈布滿棟阿俱歿於陣同時綠營死事者湖北宜昌鎮標前營  
外委賈士元衛昌營外委李盛敏湖南長沙協把總王大順俱力  
戰陣亡賊之敗於楊家港也協領富清佐領達齊納防禦四德皆  
陷陣先登中槍戰歿先後事 聞果勒明阿得 旨加等議卹



賞騎都尉世職餘 賜卹如例 賞雲騎尉世職襲次完時均以  
恩騎尉世襲罔替果勒明阿子添成襲福祿子堂古那襲阿爾薩  
蘭孫順福襲薩哈布子蘇番襲滿棟阿子特屯襲富清子法寶襲  
達齊納子鳳在襲四德子尙保襲士元子占麟襲盛敏子文桂襲  
大順子道雄襲福祿滿洲鑲黃旗人達齊納鑲藍旗人俱瓜爾佳  
氏阿爾薩蘭賽密勒氏正黃旗人薩哈布正藍旗人赫舍里氏滿  
棟阿伊拉里氏四德元扎喇氏鑲藍旗人富清富察氏正紅旗人  
盛敏恩施人士元江陵人大順湖南巴陵人俱田行伍補是職

右 國史館本傳

哲庫 靈海等

哲庫額爾格濟氏滿洲鑲黃旗人荆州駐防由驍騎校於嘉慶三年偕荆州驍騎校靈海阿勒濟善湖北宜昌鎮後營把總王大凱施南協標左營把總劉鳳宜昌鎮標左營外委陳元衛昌營外委余開國等檄赴軍營協剿邪匪三月逆首張漢潮股匪由四川巫山竄入湖北哲庫等隨副都統海興阿帶兵二千餘名在荆門州屬之石牌地方遇賊接戰賊眾二萬餘人分路抄圍哲庫等奮勇衝殺因眾寡不敵同歿於陣事 聞均 賜卹如例 予雲騎尉世職哲庫子音登額襲靈海子多托禮襲阿勒濟善子哈豐阿襲大凱子基泰襲鳳子受爵襲元子珍舉襲靈海赫舍里氏滿洲鑲

藍旗人阿勒濟善伊爾根覺羅氏滿洲正紅旗人大凱湖北東湖  
人由行伍於乾隆五十三年拔補宜昌鎮標外委五十九年擢本  
職鳳湖北興山縣人由行伍於乾隆五十二年拔補興國營外委  
嘉慶元年擢本職元開國俱東湖人由行伍拔補本職

右 國史館本傳

魏攀舉 秦恆等

魏攀舉四川廣元人乾隆四十五年武進士授藍翎侍衛期滿揀發雲南補永昌協都司五十九年隨剿湖南苗匪有功升撫標遊擊 賞戴花翎旋檄剿四川教匪嘉慶二年升永北營參將 賞勁勇巴圖魯名號隨總督宜縣等剿土寺坪一帶賊巢時賊匪窺伺達州潛出四千餘人分三路直抵鐵丁埡頭卡攀舉鼓勵兵勇併力堵禦賊猶恃眾力戰會副都統銜西津秦督兵助剿攀舉出卡夾擊乘勢追奔賊大潰斬獲甚多賊屯白巖山將襲官兵營卡攀舉偕參將姜敏功擊走之戮二三百人受矛傷賊分股衝突西山坪一帶營卡攀舉奮勇擊走之三年二月迎擊東峪溝賊殲戮



尤眾生擒賊目馮雲美及餘黨百二十八人四月大兵攻千佛巖  
卡賊負嶠抗拒木石如雨攀舉鼓勇先登手刃數十人力竭歿於  
陣雲南大理城守營守備秦恆貴州提標前營把總卓應瑞遵義  
協把總蔣應禮均死之事 聞得 旨俱著加等議卹 賞雲騎  
尉世職襲次完時以恩騎尉世襲罔替舉子國藩襲恆子世鼎  
襲應瑞子振先襲應禮無嗣繼姪維容襲恆貴州施秉人應瑞普  
定人應禮鎮遠人

右 國史館本傳



王溶 田啟華等

王溶漢軍鑲紅旗人由馬甲於乾隆三十年補領催三十六年擢  
鑾儀衛整儀尉三十七年授雲南城守營守備四十一年調取來  
京襲恩騎尉世管佐領四十四年補印務章京五十年擢副參領  
五十一年授山東萊州營參將嘉慶元年署膠州協副將檄勦四  
川教匪三年二月總督勒保追擊王三槐徐添德等股匪賊四竄  
將入陝境溶隨總兵保興等於固軍壩白沙河諸處奮力進攻斬  
獲甚多奏入 賞戴花翎四月賊大隊折向儀隴縣之茨菇頂高  
家山將與孫家梁股匪羅其清合溶隨總兵富爾賽等邀截於官  
子場時總兵觀祥等亦於窩堂廟斷孫家梁之策應賊眾撲營我

兵兩面夾擊戮斃無算賊退屯馬鞍山溶領兵奮勇仰攻復戮賊千餘餘匪乘夜遁溶以傷重陣亡山東武定營守備田啟華亦死之事 聞得 旨均加等議卹 賞雲騎尉世職襲次完時以恩騎尉世襲罔替溶子延齡襲啟華子兆棠襲啟華湖北江夏人由乾隆五十二年武進士選補是職

右 國史館本傳

趙成龍 劉忠孝等

趙成龍四川成都人由行伍於乾隆三十二年隨征緬甸三十六年調征金川均歷戰殺賊四十一年拔四川冕山營外委四月補靖遠營把總五十年升提標中營千總五十八年調敘馬營千總六十年派赴貴州剿捕逆苗屢立戰功嘉慶元年擢成都城守營中軍守備二年苗疆平調回本省剿捕達州邪匪三年五月賊眾屯踞孫家梁與儀隴後路賊匪句合從清風寺白果壩擾及儀隴糧臺成龍偕山東曹州營把總劉忠孝臺莊營把總任殿槃隨總兵朱射斗副將關聯陞帶領兵勇由馬鞍場清風寺抵新寺場分路攻勦我兵兩路會合併力截殺殲斃多名忠孝歿於陣賊因西

安將軍恆瑞駐兵磨盤寨斷其歸路退屯青岡坪成龍殿榮率兵奮勇仰攻連撲數次未能搶上均力戰陣亡先是雲南新甯營把總蕭在雲於太平縣一帶殺賊受傷旋病歿先後事 聞奉 旨趙成龍劉忠孝任殿榮俱著加等議卹在雲卹如例成龍忠孝殿榮均廕雲騎尉襲次完時給恩騎尉世襲罔替在雲廕七品監生成龍子繼長襲忠孝子銘襲殿榮子中瑞襲在雲子國樑襲忠孝山東高唐人殿榮山東滋陽人在雲雲南建水人

右 國史館本傳



邱于明 馬廷宣

邱于明貴州普定人由行伍於乾隆四十三年拔提標前營外委四十四年拔左營把總五十一年遷前營千總五十二年調兵征臺灣六十年剿黔楚逆苗于明俱隨行陣嘉慶元年擢鎮遠鎮標左營守備三年隨剿四川邪匪五月賊首王三槐徐添德等爲官兵所截往來奔突而開州坪賊匪林亮功等復傾巢下山竄入梁萬交界之陳家場總督勒保檄諸將弁率兵馳赴梁山由分水嶺一路分擊二十三日進抵三溪口賊眾蜂擁至于明隨參將舒靈保等痛剿之自辰至午殲賊八百餘賊仍退屯葛藤山于明轉戰數日以創重歿於陣時又有陝省賊匪龍紹周王正潮等由巴州



竄至儀隴之雙路場尙書惠齡等率兵突擊賊退走又殲之於楊柳寨賊匪羅其清前來接應至梁中寨爲我兵所扼斬獲無數而甘肅提標前營把總馬廷宣亦以殺賊陣亡前後事 聞奉 旨 邸于明馬廷宣俱著咨部加等議卹廕雲騎尉世職襲次完時給予恩騎尉世襲罔替于明子洪義襲廷宣子俊襲廷宣甘肅固原州人由行伍於乾隆五十年拔提標後營額外外委五十一年補左營外委五十四年遷今職

右 國史館本傳

陳占舉 王照遠

陳占舉貴州貴筑人乾隆五十八年由行伍拔撫標左營外委六十年拔右營把總嘉慶二年升貴陽營千總旋升雲南開化鎮標右營守備值邪匪滋事隨總督勒保四川軍營勦捕三年五月賊匪林亮功由開州坪至梁萬交界之陳家場一帶奔竄勒保派總兵七十五等帶兵跟蹤進並派參將舒靈保等馳赴梁山會同知縣方積抽撥鄉勇由分水嶺迎擊進抵三溪口值賊匪蜂至我兵併力迎擊自辰至午撲壓十餘次殺賊八百餘人槍斃騎馬賊目二人賊眾潰竄占舉奮勇殺賊受傷陣亡同時山東梁山營東平汛把總王照遠隨湖北軍營勦賊值冉文儔股匪屯踞李華寺山

梁與羅其清賊巢互相聲援尙書惠齡將軍恆瑞帶兵由窩堂廟進據九節梁賊匪見我兵逼近於任家寨老木埡山梁添設賊卡以爲賊巢門戶惠齡令總兵朱射斗穆維進取老木埡山梁親率副將關聯陞等攻撲任家寨山梁賊眾分投抗拒勢甚兇悍我兵奮勇仰攻不避艱險照遠首先跳入賊卡手刃數賊中槍陣亡先後事 聞奉 旨陳占舉王照遠均著咨部加等議卹俱廕雲騎尉世職襲次完時給予恩騎尉世襲罔替占舉子士蛟襲照遠子玉璞襲照遠山東滋陽人

右 國史館本傳

郭煊 胡希照等

郭煊江南銅山人由行伍於乾隆三十五年拔提標後營外委三十六年拔補左營把總三十八年拔補松江城守營千總四十六年升直隸紫荆關營中軍守備五十八年升廣西平樂協左營中軍都司六十年升雲南普洱鎮標中營遊擊嘉慶三年川省教匪滋事調赴軍營六月賊匪林亮功等一股自開州坪竄至葛藤山之後我兵分路進剿互相犄角賊屢次攻撲蝦蟆石荊竹園等處營卡均經堵截殲戮甚眾二十六日賊從鳳凰山溝內奪路思竄煊隨參將舒靈保帶兵下壓賊往來衝突並不稍退署梁山縣知縣方積聞之率鄉勇馳應合攻自辰至未斃賊五百餘人適有被



擄逃回鄉勇林貴到營稱見在賊匪係白巖山五營總元帥林定相爲林亮功胞姪方積隨派兵直撲賊營賊立時慌亂昏夜中殲斃不可勝計二十七日各路官兵同時並進賊抵死守禦我兵與相持竟日至黃昏時風雨驟至賊冒雨而逸焯以傷重陣亡是時貴州平遠協右營守備胡希照雲南鶴麗鎮標左營千總嚴正雲南左營把總杜耀先同歿於陣事 聞奉 旨郭焯胡希照嚴正杜耀先照例議卹均廕雲騎尉世職襲次完時給予恩騎尉世襲罔替焯長子坤遠襲希照無子胞姪鳳林襲正無子胞弟恭襲耀先子祥襲希照貴州銅仁人正雲南昆明人乾隆四十五年武舉耀先雲南太和人



右 國史館本傳

國史館本傳

四



趙宗濬 林中南等

趙宗濬漢軍正紅旗人乾隆三十一年武進士三十六年補鑿儀衛整儀尉三十九年遷治儀正四十一年投直隸懷來路都司四十八年升四川重慶鎮標右營遊擊五十四年升提標中軍參將五十五年調會川營參將嘉慶二年隨陝甘總督宜縣勦捕教匪於達州後路蟲蟲谿守護糧臺賊連次攻撲宗濬等督率兵勇及站夫堵禦戮二百餘名生擒尹文柄等二十一名下部議敘尋以羅其清冉文儔股匪屯永興場宗濬帶兵由蟲蟲谿進剿殲戮無數三年五月林亮功股匪自開州坪竄至葛藤山後將從鳳凰山溝內奪路奔竄宗濬奮勇馳堵六月追至陳家場賊眾抗拒宗濬

以力戰歿於陣雲南騰越鎮標中營守備李國賓貴州大定協右營把總林中南均死之事 聞得 旨趙宗濬著加等議卹餘賜卹如例均 賞雲騎尉世職襲次完時以恩騎尉世襲罔替宗濬子鏞襲國賓子岱襲中南子燦錦襲國賓雲南昆明人由行伍於乾隆三十四年拔督標前營外委三十六年補劍川營右司把總四十七年遷騰越鎮標中營千總五十七年擢是職中南貴州大定人由行伍於乾隆三十七年拔大定協左營額外外委三十八年補右營外委五十一年擢是職

右 國史館本傳

石鼎臣 郭明宗等

石鼎臣雲南昆明人由武生於乾隆癸卯科中式武舉五十四年  
七月拔補雲南昭通鎮標前營右哨千總六十年四月楚苗滋事  
雲貴總督福康安四川總督和琳督兵分剿竹子山等處苗匪六  
七千人我兵四面圍攻剿戮不可勝計鼎臣奮勇爭先不辭勞瘁  
奏入 賞戴藍翎嘉慶二年六月補武定營守備閏六月以楚省  
邪匪入川我兵搜剿殲戮甚眾惟太平城口之賊爲兵勇所堵竄  
至開縣之温湯井距縣城甚近德楞泰令鼎臣帶兵五百名赴開  
縣防守賊遂潰九月升補劍川營都司三年七月蘭芽場新起邪  
匪勾結滋事四川總督勒保督兵分剿獲賊首洪道人餘賊殲戮



無算鼎臣隨同打仗奮勇直前因歿於陣時山西殺虎協左營都司郭明宗貴州提標前營守備李連發貴州遵義協左營千總吳興開同擊賊陣亡事 聞奉 旨石鼎臣著咨部加等議卹餘卹如例均廕雲騎尉世職襲次完時給予恩騎尉世襲罔替石鼎臣無子弟竊臣襲郭明宗子得勝襲李連發子嘉善襲吳興開子昌襲明宗四川松潘廳人連發雲南昆明人興開雲南會澤人

右 國史館本傳

王宗祐 張奇等

王宗祐四川西昌人父呈瑞官守備隨征緬甸死節 賞宗祐以  
千總用乾隆四十五年補南坪營千總五十三年升貴州鎮遠鎮  
標守備五十九年調清江協右營守備六十年隨剿黔楚逆苗所  
至克捷屢解城圍攀崖越嶺力戰功最 賞戴藍翎遷雲南劍川  
營都司嘉慶二年升貴州思南營遊擊嘉慶三年六月隨剿川省  
王三槐徐添德林亮功股匪亮功竄鳳凰山我兵乘勝追襲宗祐  
偕參將舒靈保都司郭煊率眾扼其前賊勢困蹙三路兵奮擊斬  
獲甚眾七月賊首弁姓洪姓者與王三槐徐添德句結踞蘭芽場  
路徑叢歧係大甯太平東鄉地界與亮功所竄相近宗祐隨將軍

舒亮等分路掩擊至向家坪後葉溝殲戮無算餘匪退踞安樂坪地勢險峻四面皆山築寨卡守禦甚嚴其山之西南爲將軍梁東北爲芝麻嶺我兵分道進攻左右犄角宗祐率兵勇攀附而上連克三寨賊兩翼踞險設伏矢石雨集宗祐奮勇奪隘歿於陣外委陳國樑亦以力戰死冉文儔高均德股匪復屯達州之大神山理藩院尙書惠齡等督兵進剿直隸順德營把總張奇乘夜先登北面山梁燬其巢殲數百人賊恃眾鏖戰張奇力竭死之先後事聞得 旨王宗祐張奇著加等議卹餘 賜卹如例均 賞雲騎尉世職襲次完時以恩騎尉世襲罔替宗祐子振基襲國樑子誥襲奇弟珍襲國樑雲南太和人奇直隸邢臺人

右 國史館本傳

按王公已附見忠義二十一其父呈瑞  
誅中嗣得 國史本傳謹依殉時編此





岱德

岱德布爾察氏鑲黃旗滿洲人由烏槍護軍於乾隆三十二年從征緬甸以功洊升護軍參領四十七年揀發貴州以副將用五十年補大定協副將五十二年調銅仁協副將時臺灣逆匪林爽文滋事九月雲貴總督富綱奏令統兵赴閩會剿十二月從將軍福康安由北路進攻大里杙賊巢五十三年首逆林爽文就擒敘功賞戴花翎二月由南路進剿殲賊於水底蕨獲賊渠莊大田臺灣全境蕩平 賞給法洪阿巴圖魯名號五十七年因病奏請回旗調理五十八年五月 命在頭等待衛上行走是月授浙江黃巖鎮總兵六十年四月具奏出洋會哨情形用清字繕摺 諭曰向

來滿洲人員擢任提鎮凡遇尋常事件自應用清字具奏若如海洋盜匪及會哨等事關係緊要伊等清字多屬平常如用清字繕奏轉致聲敘不清嗣後各省滿洲提鎮除地方雨水收成照例事  
件仍用清字外其餘有關海洋及出洋會哨等事俱用漢字繕寫  
庶聲敘較爲明晰不致牽混七月浙江巡撫吉慶奏參黃巖遊擊  
古杜署象山協副將劉大勳等會同巡洋兵丁被盜拒傷淹斃岱  
德職司統轄不能整飭奉 旨交部嚴議八月吉慶復以岱德不  
諳水師奏參 命解任回京尋補烏槍護軍參領嘉慶元年從征  
四川邪匪二年十一月大兵剿捕王三槐羅其清等賊股於渠縣  
達州境有白巖山之賊攻撲金風觀營卡岱德偕知府朱爾漢督

兵禦之賊傾巢而出我兵與戰自午至酉殺賊三四百名岱德朱爾漢身先士卒各手刃數賊同受石傷 上嘉其出力 諭以應升之缺升用三年九月從四川總督勒保攻剿東鄉白號首逆冷添祿於祖師觀受傷陣亡事 聞 命咨部加等議卹 予雲騎尉世職子托雲布襲雲騎尉由三等侍衛揀發雲貴委用都司托精阿藍翎侍衛

右 國史館本傳

DATE	DESCRIPTION	AMOUNT	CHECK NO.	ACCOUNT NO.	BALANCE

175-236

唐文高 吳玉貴等

唐文高貴州鎮遠人由行伍於乾隆五十三年拔鎮遠鎮標左營外委五十八年擢右營把總六十年二月遷思南營千總六月升古州鎮標右營守備七月雲貴總督福康安檄勦湖南苗匪隨都統額勒登保攻古峭營山梁率兵奮勇先登戮五六百名十月攻克摩手寨首逆吳半生由鴉保寨至高多寨糾苗眾抗拒文高等率滿漢屯土官兵分路競進直抵寨前四面圍攻吳半生勢蹙帶同苗夥二名詣軍前自行投首奏入下部議敘嘉慶三年四川冷添祿股匪竄擾雲陽萬縣一帶屯踞祖師觀總督勒保率弁兵由梨樹坪進攻其卡文高首先躍入木柵手刃數賊兵勇繼之拋擲



火彈燬草棚十餘間戮三百餘匪生擒嚴士玉等二十三名直偪  
祖師觀寨滾木擡石抗拒甚力我兵衝撲十餘次殲戮無數其山  
坡以積雨險滑官兵自下仰攻艱於登陟文高腹中槍傷陣亡嗣  
是廣西桂林營遊擊吳玉貴隨甘肅提督達三泰攻祖師觀由老  
鶴背進遇伏玉貴以救護達三泰力戰陣亡四川提標把總陳泰綏  
靖營把總何連陞甘肅廣武營外委劉習志亦於老鶴背擊賊陣  
亡先後事 聞得 旨唐文高吳玉貴俱著加等優卹餘 賜卹  
如例均 賞雲騎尉世職襲次完時以恩騎尉世襲罔替文高子  
臣勳襲玉貴子發科襲泰子金柱襲連陞子定國襲習志子玉襲  
玉貴定番人由行伍洊升千總乾隆五十年擢威甯鎮標右營守

備五十八年升廣西富賀營都司嘉慶元年升是職泰四川縣竹  
人連陞松潘廳人習志甘肅中衛人

右 國史館本傳

廣東省立第一師範學校

四四四

珠爾杭阿 誇德等

珠爾杭阿薩爾圖氏蒙古鑲紅旗人任駐防荊州驍騎校嘉慶二  
年隨征湖北教匪三年九月賊首張漢潮屯聚白林灣副都統銜  
明亮將軍興肇率兵分路堵剿斃賊四百餘人賊奔潰提督愛星  
阿等率馬隊扼山口夾擊之又斃賊二百餘生擒三十餘名珠爾  
杭阿力戰歿於陣十月尙書惠齡將軍恆瑞等攻羅其清股匪於  
營山縣之箕山破其巢賊退踞大鵬山我兵四面進逼搶上馬鬣  
礮奪賊卡三座委官誇德恩特和默蒙果勒首越卡牆拋火彈燬  
賊柵委官富昌阿乘勢斫開木柵我兵擁入殲賊三百餘人誇德  
恩特和默蒙果勒富昌阿同時中槍石陣亡事 聞均 賜卹如

例珠爾杭阿廕雲騎尉世職子定成襲餘卹如例誇德瓜爾佳氏  
吉林滿洲正紅旗人恩特和默巴雅拉氏伯都訥滿洲鑲藍旗人  
蒙果勒希特和哩氏伯都訥滿洲鑲黃旗人均於嘉慶二年由領  
催隨剿四川教匪屢戰奮勇署行營委官富昌阿瓜爾佳氏阿勒  
楚喀滿洲鑲白旗人由馬甲隨剿川匪署行營委官

右 國史館本傳



姜敏功 李占魁等

姜敏功四川敘永廳人寄籍涪州由武生拔奉甯營額外外委補  
松潘鎮標右營外委擢重慶鎮標左營把總隨剿甘肅石峯堡逆  
回功列超等升建昌鎮標會川營千總五十一年隨征臺灣 賞  
戴藍翎並以擒獲首逆林爽文莊大田加四等功牌五十七年升  
督標右營守備五十八年升軍標左營都司 賞換花翎六十年  
總督和琳檄隨雲貴總督福康安剿苗匪於嗅腦大新寨敏功先  
登石城奪之擢雲貴督標右營遊擊五月福康安以苗匪吳半生  
踞蘇麻寨分四路進攻敏功隨總兵達音泰侍衛定西爾等由構  
皮寨進既奪賊柵賊伏發敏功等潛出賊右奮擊之殲戮無算會

各路兵集戰益力吳半生竄烏草河又竄高多寨九月敏功隨都統額勒登保等圍克之奏入 賞嫺勇巴圖魯名號銀百兩擢貴州丹江營參將十月隨福康安攻苗匪吳隴登於龍角峒有功十一月進攻鴨保山右之上下天星寨十二月乘雪進至地良坡敏功奪柵殲賊無算嘉慶元年六月隨和琳攻克得鋒山全壁嶺二年正月隨總督宜縣擊川楚教匪於官帽山奪柵有功三月隨署廣州將軍明亮等攻賊於金峨寺五月宜縣守羅江口敏功爲伏兵截賊後擒斬甚眾七月隨提督穆克登阿擊賊於雲陽開縣之交界八月擊賊於蒲家山皆著勞績三年七月總督勒保檄敏功擊林亮功股匪於水田壩等處賊潰十月亮功焚掠岳池縣之大

谿口敏功偕總兵劉君輔富森布等邀擊之賊竄合州之楊家崖  
敏功衝堅追擊歿於陣是年四川瀘州營千總李占魁擊賊於母  
閒橋重慶鎮標中營外委田應龍擊賊於永興場四川永甯營外  
委廖懷瑛擊賊於母千碛俱陣亡先後事 聞均 賜卹如例  
賞雲騎尉世職襲次完時以恩騎尉世襲罔替敏功子熙儒襲占  
魁子應富襲應龍子福襲懷瑛子銓襲占魁四川成都人應龍  
懷瑛俱巴縣人

右 國史館本傳

1955  
1956  
1957  
1958  
1959  
1960  
1961  
1962  
1963  
1964  
1965  
1966  
1967  
1968  
1969  
1970  
1971  
1972  
1973  
1974  
1975  
1976  
1977  
1978  
1979  
1980  
1981  
1982  
1983  
1984  
1985  
1986  
1987  
1988  
1989  
1990  
1991  
1992  
1993  
1994  
1995  
1996  
1997  
1998  
1999  
2000  
2001  
2002  
2003  
2004  
2005  
2006  
2007  
2008  
2009  
2010  
2011  
2012  
2013  
2014  
2015  
2016  
2017  
2018  
2019  
2020  
2021  
2022  
2023  
2024  
2025  
2026  
2027  
2028  
2029  
2030  
2031  
2032  
2033  
2034  
2035  
2036  
2037  
2038  
2039  
2040  
2041  
2042  
2043  
2044  
2045  
2046  
2047  
2048  
2049  
2050

A. 100

## 趙永成

趙永成甘肅固原州人由行伍於乾隆三十八年補陝西慶陽營外委三十九年擢靖遠協把總四十年擢關山營千總五十年調秦安縣千總五十四年擢四川小河營守備嘉慶元年遷懋功營都司二年隨征川省邪匪十月賊自豐溪敗後欲由雞心嶺竄入大甯將軍明亮帶兵追勦永成隨往遇賊於黑虎廟官兵設伏以待賊至官兵左右夾攻殲斃多名賊潰遁官兵分路截勦斃賊五六千人永成以轉戰受傷奏入 命以應升之缺升用三年三月擢陝西河州鎮標中軍遊擊十月隨將軍德楞泰攻勦箕山賊匪官兵三路進發抵小箕山賊見官兵並進遂悉眾迎拒官兵槍箭



齊發斃賊二百餘人永成等首先突入賊卡木柵拋擲火彈將賊柵卡全行燒燬煙燄四起賊猶抵死相持永成以中槍歿於陣事聞得旨著咨部議卹廕雲騎尉世職襲次完時給恩騎尉世襲罔替子相襲

右 國史館本傳

王垂重 楊炳文等

王垂重山東諸城人由監生捐輸議敘縣丞改府經歷分發四川試用乾隆五十七年大兵征廓爾喀垂重奉檄運西藏拉里臺餉管理西藏仁進里站務尋補潼川府經歷五十八年署冕甯縣知縣五十九年以辦理驛站有功議敘六十年二月署黔江縣閏二月署汶川縣嘉慶元年川陝楚三省用兵湖北教匪擾來鳳咸豐縣境垂重於川陝交界率領鄉勇防堵甚力 諭曰咸豐接壤黔江難保無賊匪闖入該署知縣王垂重如能嚴密堵禦奮勉出力著查明具奏該員如係佐貳署理縣事卽著以知縣升補如本係知縣卽以同知通判酌量升用以示鼓勵旋升同知三年二月署

忠州知州十月賊首林亮功王光祖等爲總兵劉君輔副將富森布所敗竄忠州垂重率紳士鄉勇邀擊於齊家河截賊眾爲兩段首尾不相顧戮五百餘人乘勝追勦至胡家壩賊眾抵禦垂重受傷陣亡是年羅其清股匪屯孫家梁西安將軍宗室恆瑞由鯉魚嘴進勦其附近之石峒溝猴子坡林深箐密江津縣典史楊炳文攀援直上撲開賊卡受傷陣亡王三槐股匪由渠縣達州交界之楊家壩一路焚掠撲永興場糧臺蒼谿縣典史楊堂率團勇守禦眾寡不敵被戕劉廷棟股匪竄湖北荆門州署州同李晨建陽鎮巡檢金廷勳率勇堵禦力戰陣亡先後事 聞得 旨王垂重楊炳文楊堂李晨著加等議卹金廷勳 賜卹如例均 賞雲騎尉

世職襲次完時以恩騎尉世襲罔替垂重子安欽襲炳文子廷瓚  
襲堂子鳳孫襲晨子昌基襲廷勳子堯棟襲炳文順天宛平人由  
供事議敘未入流選是職堂廣東嘉應州人捐納吏目借補是職  
晨英德人由拔貢就職州判署是職廷勳浙江平湖人

右 國史館本傳

西曆一千九百零九年八月二十二日

第



左觀瀾

子承蔭  
陸維基

左觀瀾江西永新人由舉人於乾隆六十年大挑一等以知縣分發陝西試用尋署西安府五郎廳通判嘉慶二年補安定縣知縣仍署通判事時川陝教匪滋事王三槐尤桀驁蔓延觀瀾以五郎無城難守捐貲勸建土城團練義勇爲禦賊計三年正月賊擾五郎撲城觀瀾督率鄉勇擊退之五月賊又至觀瀾復擊走之十月王三槐股匪糾眾偪城觀瀾以礮轟擊礮裂觀瀾受傷死其子承蔭誓殺賊報讐赴軍營練勇勦捕嗣於四年勦徐添德股匪於沙溝口力戰死之欽差尙書那彥成巡撫台布自大峪口進兵行抵五郎見城堞完固詢係觀瀾所築並查悉其父子死事狀因奏言

觀瀾在五郎三年居官清正深得民心始則捐貲築城悉力拒守繼又親圍鄉勇扼要禦賊茲父子均歿於王事情尤可憫請照陣亡例 賜卹用昭激勸 諭曰左觀瀾因親自點放礮位礮炸致殞卽與陣亡無異且伊長子亦因帶領鄉勇打仗陣亡殊爲可憫俱著咨部照陣亡例子卹並查詢左觀瀾是否另有子嗣卽行奏明再行加恩照例給予世職時醴泉縣知縣陸維基承辦軍需保護臺站賊犯縣境維基禦之力戰陣亡事一聞亦得 旨賜卹均賞雲騎尉世職襲次完時以恩騎尉世襲罔替觀瀾孫德裕襲維基子錚襲維基順天大興人

右 國史館本傳

左公緒泉以嘉慶三年守城擊賊沒越二十六年道光癸未其孫  
德裕來京屬某銘其墓某於公癸卯同年與厥昆觀海相友善不  
敢辭嘉公以死勤事亦樂爲之志公諱觀濶緒泉其字一字畫舫  
卅居吉安永新宋以來代有偉人曾祖沛川祖紹源父曰玉藻母  
氏龍生子二長觀海官上思州知州次卽公繼母尹氏于一觀濤  
太學生公離襁褓而母卒五歲入塾性聰穎十一學爲文下筆驚  
長老弱冠補弟子員每歲科試與兄觀海迭冠其曹乾隆癸卯中  
副車丙午與兄同雋於鄉乙卯大挑以知縣用陝西值教匪滋擾  
奉檄署西安府五卽關通判以地當川陝扼要賊必爭不可無城  
郭旣募鄉勇訓練卽牒大府願捐廉雇役築土城躬督版鍤民踊

躍趨工半月竣事三日而賊至度不可攻宵遁公悉精銳啟城追之斬獲甚眾會撫軍遣千總某以兵駐關南二十里營山上請公悉調鄉勇赴營壯聲勢公從之數日賊突出別道薄城城守不滿百人公亟請千總赴援不至賊眾圍之數千守者恟懼公召子承蔭等勵之皆泣對曰願從死乃分督兵勇乘城夜多然炬東老弱齊聲呼譟賊不知虛實遂引去明日將軍德楞泰明亮至詢守狀皆驚歎制軍撤千總別遣守備率兵駐城中聽公節制於是城守益堅公時集民講約激以忠義眾咸樂爲用嘉慶二年以勞資補安定知縣西安府啟撫軍曰五卽關要地左令去賊必來撫軍悟立遣人止公始賊聞公去果悉眾至見公立城上咸錯愕公遙語



曰若輩迫飢寒耳何遂爲賊今若歸順吾言於撫軍貸若死能殺渠魁獻且得重賞賊相顧色動渠亟揮眾退次日二百餘人詣城降公納之守備曰詐也盍今夜殲焉公以殺降不祥且虛實未可知乃庭集二百餘人諭之曰若等紿吾城應賊吾重失信故納汝並不汝殺今計安出欲終從賊聽若歸皆稽首曰民等鄰農也公保此地民如護嬰兒故鄰民決計歸命惟後至六人者從賊久不知其降意公曰若曹自別之曰其裏衣有識各自解衣六人者色變不敢解因擒斬之賊旋大至公投六首城外賊大駭遁去後復以計誘殺賊數百三年秋賊首阮正統王三槐焚掠秦中公日夜訓厲士卒昇大礮城上十月二十五日賊偪城公督兵力禦手發



國朝通志卷之三十一  
礮轟若巨雷斃賊無算而公亦以礮裂傷顱負痛解所佩刀付長  
子承蔭勉以殺賊報國昇歸署召守備至屬以守事亟遣人聞  
道請代勿令我子成服勿聲張益登陴嚴禦以疑賊不數日撫軍  
益兵當至賊去矣言訖卒守備如所戒後二日兵至賊果退承蔭  
遵遺命率鄉勇泣叩軍門願殺賊復讐制軍那彥成哀且壯之俾  
隨撫軍方維甸營連衝鋒敗賊四年十月十四日躡賊沙溝口與  
賊渠徐添德遇轉戰力竭陣沒沒時猶手父佩刀不可拔事聞  
議卹加級贈公如陣亡例贈承蔭雲騎尉竝入祀昭忠祠又給長  
孫德裕雲騎尉世職公至性過人事父及繼母俱以孝稱與昆季  
悌友備至在官時民有兄弟爭財者公既訓飭之適兄上思州書

至有云季弟來署而吾與弟遙隔數千里風雨聯牀何時踐約並引坡公世世爲兄弟之句公捧書泣下付訟者兄弟令閱訟者感悔泣謝去其以德導民類如是生於乾隆庚午六月初十日至卒時年五十配周氏子四長承蔭次承芳其次承茂承芝俱出繼孫男八以某年月日葬某承蔭耐焉銘曰

南潭義嗣左鼎裔孫家承孝友才備武文關扼五郡川陝之門崇墉壁立勁旅新屯障比睢陽勇竝鬼軍長鯨屢翦封豕狂奔礮轟手發鐵炸顧門命垂呼吸策畫頻煩虎牙馳召霧雲待援桓桓令嗣泣額帥轅願先士卒誓雪讐冤子殉父難臣報君恩忠貞卞壺激裂平原偉矣先生義薄天雲科名無愧史冊留芬聖朝卹

陸祀典常存戡戡豐碑鬱鬱高墳永安毅魄垂裕後昆

右墓誌銘辛從益撰

國朝耆獻類徵初編卷三百六十二補錄

忠義三十二

楊堂 梁崇 李培秀

仁廟受政之初 國家承平百五十年矣海宇乂安累世不知兵革一旦白蓮教起漢中蒼黃蹂躪流毒川陝盡西南之兵力效死用命乃克蕩平於是 詔錄殉難諸臣一命之吏罔弗褒卹吾州得三人焉曰四川蒼溪縣典史楊堂曰陝西咸陽縣典史梁崇曰陝西試用典史李培秀楊堂按察使仲興孫也嘉慶三年教匪王三槐擾蜀大軍追剿急亡命四竄堂守永興場士卒譁曰賊至矣則皆欲走堂手劍叱曰賊未至而棄糧法當死孰若守糧而死也

賊至死之明年大軍駐鎮安勦張漢朝梁崇率鄉勇勦鳳凰背賊散解囚回省至孝義應遇賊崇釋囚蔣文芳等七人曰若曹於法當死然死於賊則枉吾不忍也可速去毋從賊余義不可逃死其所矣賊至被執不屈死其明年李培秀從大軍挽粟至四川大甯縣與賊遇盡委輜重於河遺其僕曰速報大營賊不得糧必掠東郊截而擊之可盡覆也吾死不及見矣大軍果破賊訊俘言培秀死時賊不得糧被二十一創云事聞並祀昭忠祠世襲如例初崇所釋囚七人皆歸就獄報崇死事狀曰吾不負梁公也至是七人皆赦

右合傳吳蘭修撰



國朝耆獻類徵初卷三百六十三目錄

忠義三十三

靳文銓 徐德建等

達三泰

劉正麒 楊國名

張永成 李光等

張耀 鄧國祥等

段逢春 蔣芳等

徐得 趙復興等

馬滿海 丁學詩

馬天德 王耀等

岑現佩 劉宗

王宏信 辭烈

葉炳銓 胡永盛等

善福 巴延察等

何之璞 陳紹先等

張齡霞 張用章等

李文蔚 馬龍圖

張東林 高英等

富森

折飛熊 何勝華

崔大成 王璟

孫大猷 陳凡等

丁洪 趙祥

關聯陞

董凝川 程運棟等

劉忠魁 馬應舉等

國朝耆獻類徵初編卷三百六十三

通奉大夫前署江西巡撫江西布政使司布政使湘陰李桓輯

忠義三十三

靳文銓 徐德建等

靳文銓四川成都人由行伍於乾隆五十一年拔提標右營額外  
外委五十三年隨征西藏擢前營把總五十四年遷峩邊營右哨  
千總六十年檄剿黔楚苗匪抵秀山盤獲奸細龍六官董老四二  
名奉 旨以守備升用嘉慶元年四月隨剿楚匪擊賊於石梁子  
奮勇有功以應升之缺升用五月賊厚集匪黨將奪馬鬣嶺我兵  
竭力抵禦適文銓於蘇家堡附近巡查聞信卽帶兵往援戮賊無

算功最得 旨以遊擊超補十二月進攻確窩坪賊卡山勢陡削  
文銓率兵奮上山坡刀矛並舉賊匪四潰二年正月黃柏山股匪  
恃險負隅文銓分投攻撲二月由西流谿進攻賊卡甫至半坡匪  
眾抗拒甚力文銓率兵踰濠溝向上仰攻直逼其卡痛殲之四月  
進攻光頭山之半嶺賊巢分帶木梯藉勢騰越文銓首先突入連  
斫數賊卡牆立時摧陷我兵悉力截擊戮斃甚多 賞壯勇巴圖  
魯名號五月由黃家村直攻大堖口賊卡其地縣長十有餘里偏  
坡仄徑樹木叢雜我兵攀援而進文銓鼓勇爭先頭帶石傷甚重  
三年十一月於王家寨奮力擊賊中槍陣亡先是十月山東德州  
營外委徐德建四川提標左營外委張占鼇擊賊於大鵬寨陣亡

先後事 聞均 賜卹如例 賞雲騎尉世職襲次完時以恩騎尉世襲罔替文銓子履泰襲德建子世祿襲占鼇子萬春襲德建山東臨清州人占鼇四川成都人

右 國史館本傳





達三泰

達三泰滿洲鑲黃旗人呢瑪奇氏原名達音泰因與族叔祖同名於嘉慶三年奏改今名乾隆四十年補烏槍藍翎長四十六年擢護軍校四十七年委署烏槍章京四十九年六月授烏槍副護軍參領尋論從征石峯堡功畱甘肅以參將用十二月補陝西循化營參將五十二年擢甘肅永固營副將五十四年署西甯鎮總兵五十六年廓爾喀侵後藏兩廣總督福康安調往丹噶爾口外安臺隨奏畱軍營效力五十七年三月檄赴布魯克巴部五月回後藏從大兵連戰瑪噶爾轄爾甲幫杏皆克捷復濟隴官寨奪熱索橋直抵色達木賊境進拔協布魯克瑪寨卡奉 旨賞戴花翎六

月從參贊海蘭察兩行箐谷中數晝夜遇賊於博爾東拉山短兵力戰賊潰遁盡燬其碉寨又敗賊伏兵於瑪木拉追擊至雍雅捷聞 賞常勇巴圖魯名號七月敗賊於噶勒拉山進攻堆補木奪帕朗古大橋五十八年七月凱旋授四川松潘鎮總兵六十年二月黔楚逆苗竄入酉陽州達三秦領屯土兵邀截之連敗爆木山石花諸寨三月偕總兵花連布領兵解永綏圍焚近城苗寨五五月從雲貴總督福康安進勦拔賊寨六十木城卡四十嘉慶元年六月從都統額勒登保護軍統領德楞額泰擊賊於馬鞍山克復乾州分勦附近各苗寨九月攻賊巢於蒼茅坳與德楞額泰合兵夾擊克黃十坡等大小城卡六乘勝進擊賊槍矛雨急仍力戰捷 聞

上特賜蟒袍獎之 諭額勒登保曰達三泰於奪獲黃土坡卡後復帶兵向前策應右手小指帶傷殊爲繫念此時諒已平復著遇便覆奏尋攻崖人坡大壩角諸寨十月焚平隴賊巢擊破莽車孟水衝諸援賊十一月攻剛息衝馬頭山餘錦坡諸卡十二月從德楞泰攻賊於貴魚坡後山二年正月自永綏撤兵從德楞泰剿逆匪王三槐徐添德於達州三月抵楊柳坪軍營屢敗賊卡六月矢斃執旗賊目二徐添德遁走七月逆匪齊王氏姚之富擾宜昌暨夔州屬達三泰自歸州趨巴東借侍衛溫春援剿八月從德楞泰剿襄陽小河口復於耗子溝發二矢斃其賊首又敗賊於均州九月敗賊於竹谿之水坪等處 上以賊蔓延久諭令分剿命明亮



德楞泰專辦齊姚二首逆時安康賊已與齊王氏等合竄南漢十一月達三秦自龍華山抵漢中與都統德楞泰分道截剿十二月復剿賊於五郎廟及黃柏埡三年正月進攻二郎壩等處三月敗賊首於蓮花池齊王氏姚之富皆投崖死餘黨盡殲捷聞

上懋賞有差尋從剿高均德於山陽之大鹿寺五月又攻賊冉文儔等於大神山達三秦手刃賊二殺賊目一設伏誘斬賊千四百有奇七月進剿靜邊寺獲賊首禹斯珍又殲賊四千有奇九月破箕山賊羅其清等十月授甘肅提督合剿大鵬寨諸賊總督勒保檄赴川東協剿冷添祿十一月擊克手把崖卡十二月與總兵百祥參將薛大烈分兵從魚鱗口躡險上撲賊卡焚木城斬賊三百因



賊據魚鱗口橫梁移卡進攻達三秦越溝奮擊遇伏中矛傷陣亡  
事聞賞卹如例諡壯節恩賞騎都尉加一雲騎尉子呢瑪  
善原任湖北鄖陽鎮總兵次子那瑪善六品廕生任大理寺寺丞  
右 國史館本傳



劉正麒 楊國名

劉正麒湖南衡陽縣人由行伍於乾隆五十五年八月拔補湖南澧州營外委六十年十一月擢湖廣提標前營右哨把總嘉慶元年正月遷湖廣提標右營千總二年閏六月遷湖北鄖陽協右營守備三年七月西安副都統觀成等勦捕邪匪於夔州一路安設營卡分投堵禦正麒隨同打仗奮勇出力奉 旨賞戴藍翎十二月邪匪林亮功等於川東川北地方往來奔竄分合無常每於忠州墊江大竹鄰水諸處邊界滋擾總兵劉君輔等帶領官兵節次於墊江屬之板子山長壽屬之雲臺寺等處跟蹤追擊殺賊百餘名不等正麒隨劉君輔等一路打仗奮勇爭先擒戮甚多賊潰遁

正麒以受傷歿於陣時四川提標中營把總楊國名亦隨劉君輔等帶兵追剿賊匪至鄧都縣屬之實稻場節次打仗奮勇出力斃賊多名賊潰遁國名以受傷歿於陣先後事 聞得 旨劉正麒楊國名俱著咨部議卹均廕雲騎尉世職襲次完時各給恩騎尉世襲罔替正麒子清承襲國名子淮承襲國名四川成都人由難廕於乾隆四十八年分營學習五十三年出師巴勒布五十五年補提標中營把總五十六年出師廓爾喀嘉慶元年隨征湖北邪匪屢立戰功

右 國史館本傳

張永成 李光等

張永成廣東番禺人由行伍於乾隆三十九年拔撫標左營外委四十年擢把總四十七年升千總五十五年遷黃岡協右營守備嘉慶元年升潮州城守營都司檄征四川教匪三年王三槐徐添德等由茶尖壩屯龍鳳埡經官兵圍剿向巴州鎮龍關分竄與冉文儔等合擾達州永成隨總兵保興副將達桑阿分路追擊之復竄蟲谿谿其地西接營山南連渠縣東卽達州中界巴河進則涉淺而渡退則憑山而守又分股屯趙家場我兵亦分路馳擊並率馬隊突歷上游令後隊步兵排列河岸賊被戮及淹斃無算對岸賊匪來接應者復萬餘人保興等兩路官兵於雲頂山會合馳抵



江陵谿接仗進抵插旗山復與寶竹寺一路官兵隔河夾擊賊不能支縱火燬民房乘煙燄四起將與蟲蟲谿賊合永成偕達桑阿連日堵禦轟斃甚夥永成以奮勇力戰陣亡時鄖西股匪亦由甘溝一帶竄遁湖北鄖陽鎮標千總李光隨總兵路超吉取道進截抵槐樹溝遇賊前隊分路合剿賊勢蹙猶併力抗拒光以衝入賊隊陣亡先後事 聞均賜卹如例 賞雲騎尉世職襲次完時以恩騎尉世襲罔替永成子仁襲光子起秀襲光湖北東湖人由行伍歷升是職

右 國史館本傳

張耀 鄧國祥等

張耀廣東新會人由行伍於乾隆五十一年拔補新會營外委五十六年升把總五十九年升順德協左營千總嘉慶元年偕順德協右營千總鄧國祥新會營把總楊兆德南雄協左營把總羅定貴提標前營外委賴英四川永甯營外委李進江西武甯營額外委潘蛟廣東撫標左營額外委袁高檄赴湖南協剿苗匪奮勇有功二年湖南平調赴四川軍營三年在插旗山擊賊耀國祥進蛟高同歿於陣是年兆德在太平礮陣亡定貴在青觀山擊賊受槍傷旋歿英在石梯坎陣亡事 聞均 賜卹如例耀國祥兆德定貴英進 賞雲騎尉世職耀子朝獲襲國祥子朝棟襲兆德

子應熊襲定貴子廷槐襲英子有盛襲進子世俊襲國祥新會人  
由行伍於乾隆五十四年拔補新會營外委五十六年升把總五  
十九年升本職兆德廣東大埔人由行伍遞拔本職定貴廣東歸  
善人由行伍於嘉慶元年拔補惠州協左營外委二年升本職英  
歸善人由行伍於乾隆五十二年拔補本職進四川永甯人由行  
伍於乾隆五十五年拔補本職蛟江西武甯人由行伍於乾隆五  
十二年拔補本職高廣東南海人由行伍於嘉慶元年拔補本職

右 國史館本傳

段逢春 蔣芳等

段逢春山東滋陽人由行伍於乾隆二十七年拔梁山營外委三十  
十五年擢范縣營把總三十六年遷德州營千總五十三年升守  
備嘉慶三年擢山西太原鎮標右營都司尋升陝西略陽營遊擊  
隨尙書惠齡剿川北教匪時冉文儔股匪於通江之麻壩寨恃險  
拒守逢春率兵偪寨西門賊於山上放槍擲石逢春奮力斫木城  
直入刃數賊官兵悉前進短兵相接殲戮二百匪逢春受傷陣亡  
山東武定營外委蔣芳高塘營外委李大盈均死之先後事 聞  
得 旨段逢春蔣芳李大盈著加等議卹均 賞雲騎尉世職襲  
次完時以恩騎尉世襲罔替逢春子華封襲芳無子姪奉亭襲大

盈子幼未娶芳山東惠民人由行伍於乾隆四十年拔武定營額  
外外委五十二年補是職大盈高唐州人由行伍於乾隆五十四  
年拔是職

右 國史館本傳



徐得 趙復興等

徐得甘肅固原州人由行伍於乾隆三十六年隨征金川力戰紀功拔陝西西安軍標右營額外外委四十六年隨剿甘肅逆匪有功擢提標中營外委四十九年遷把總五十一年升千總嘉慶元年擢督標右營中軍守備調陝甘固原提標前營守備隨剿湖北教匪由陝西山陽縣之泥河口進攻雞關寨孤山力戰七晝夜殲戮無算時將軍明亮於澧川鋪至茶庵橋八里內連立四營爲合攻胡家寨之計賊來攻營擊走之胡家寨居山岡下明亮令副將九十等渡谿河奪山岡居高臨下以擊之賊奔歸寨寨北半里許黃金廟樹林叢密前參將傅成明遇伏處也得以明亮檄偕守備

陳之壯侍衛丑保墨新率兵搜勦悉殲之奏入 賞戴藍翎二年  
於張家集堵禦屢戰有功升西安軍標中營都司三年隨將軍宗  
室恆瑞追勦孫家梁羅其清股匪相遇於雙山子率兵奮擊賊退  
乘勝前進賊復有來接應者得力禦之賊踞山巔得先登以受重  
傷歿於陣是月賊黨張添文李全攻掠藍田都統德楞泰副都統  
銜額勒登保擊走之又竄秦嶺將軍興肇總兵柯藩合兵進勦至  
庫峪大軍撲上山梁賊大潰昌平營千總趙復興率兵勇下山擊  
之賊乘霧於溝內設伏拒敵復興力戰死是年山西得勝路把總  
馬勁擊賊於五通寺陣亡先後事 聞得 旨徐得趙復興俱加  
等議卹馬勁 賜卹如例均 賞雲騎尉世職襲次完時以恩騎

尉世襲罔替得子登科襲復興子國寶襲勁子起鳳襲復興順天  
密雲人勁山西大同人

右 國史館本傳

四庫全書卷之四十一

十一

--	--	--	--	--	--	--	--	--	--

馬滿海 丁學詩

馬滿海甘肅固原州人由行伍於乾隆三十七年隨征金川屢有  
斬獲功列超等四十六年隨征撒拉爾逆回奮勇受傷拔固原鎮  
標中營額外外委四十九年隨勦石峯堡逆回以功補外委五十  
一年擢把總五十三年遷右營千總嘉慶元年隨勦湖北教匪委  
署陝西波羅營中軍守備時署廣州將軍明亮等率兵勦孝感縣  
之胡家寨賊巢滿海偕副將百祥駐紮對河澗川鋪賊來撲營滿  
海身先奮擊賊渡河遁越日賊復來犯滿海併力齊擊斬戮多名  
遂克其寨以功實授波羅營守備二年正月隨署工部尙書惠齡  
等擊談家岡賊匪分兩翼陟山岡左右夾擊乘勝追勦轉戰十餘



里追至吉兒山殲戮無算 上以馬滿海爭先用命賞戴藍翎八月隨陝甘總督宜縣督兵攻克田家壩山梁追奔數十里殲斃多名賊竄陝西漢中府西南一帶滿海隨西安將軍宗室恆瑞馳擊繞沔縣之桑樹灣併力進攻賊大潰戮三千餘名奏入 賞鼓勇巴圖魯名號三年仍隨恆瑞入川於石版埡擊敗賊目羅其清偕陝西西甯鎮標千總丁學詩率領兵勇追殲賊匪二三百人轉戰踰時俱以力竭歿於陣事 聞得 旨馬滿海著加等議卹丁學詩賜卹如例均廕雲騎尉世職襲次完時以恩騎尉世襲罔替滿海子述科襲學詩子永成襲學詩甘肅皋蘭人由行伍拔秦州西河汛外委乾隆五十三年戊葉爾羌五十六年擢岷州營把總嘉

慶元年隨勅四川達州教匪三年以功升是職

右 國史館本傳

國朝通志卷之二十一  
三十一  
三十一

馬天德 王耀等

馬天德陝西西安府人由西安出旗漢軍外郎改補綠營乾隆四十五年拔興漢鎮標左營外委四十六年擢把總五十一年遷陝安鎮標中營千總六十年升陝甘固原提標左營守備嘉慶三年四川教匪擾達州渠縣一帶踞巖峯灘永興場苦竹寺諸處首逆王三槐冉文偉等屯黑馬山觀音巖天德隨總督勒保等分道進剿賊設伏山溝意圖抄襲我兵馳赴牛毛山擊散之遂克占磨子谿對面山梁殲戮甚眾賊退守黑馬山各路官兵依隊進發副將海常先登大兵繼之殲賊目二匪黨七百餘人生擒羅克玉等一百三十四人悉斬之餘匪走觀音巖天德以力戰死涼州鎮標中

營守備王耀同歿於陣甘肅苦水堡把總李瑤擊賊於山坎中亦  
 以創重陣亡先後事 閔均 賜卹如例 賞雲騎尉世職襲次  
 完時以恩騎尉世襲罔替天德子永圖襲耀子應熊襲瑤子維秀  
 襲耀甘肅安西州人由行伍拔橋灣營外委擢肅州鎮標中營把  
 總遷右營千總乾隆五十七年升是職瑤甘肅涼州府人由難廕  
 把總於嘉慶二年補是職

右 國史館本傳



岑現佩 劉宗

岑現佩廣東德慶州人由行伍於乾隆五十七年拔廣西潯州協左營外委五十九年擢把總嘉慶元年擢千總二年擢貴州提標右營守備赴四川軍營隨總督勒保勦捕教匪三年賊首王三槐糾眾由黑馬山觀音巖分竄林剛寺岳家寺等處現佩隨總兵百祥等分路進勦賊於闕智坡隘口設卡死守山路危峻我兵奮力仰攻未克勒保令分兵裹糧乘夜覓路合擊之自率大隊由正路進發現佩從往甫登山賊據險抗拒我兵不避矢石鼓勇直進至山半賊又起兩旁溝中伏出潛襲我兵我兵槍箭並發殲賊甚夥現佩首率眾衝入賊隊受傷陣亡同時有雲南武定營把總劉宗

隨副將海常至黑馬山勦賊我兵鏖戰甚力斃賊目二匪黨七百餘生擒羅克玉等一百三十四人悉斬之宗以創重歿於陣先後事 聞奉 旨岑現佩劉宗俱咨部議卹均廕雲騎尉世職襲次完時各給恩騎尉世襲罔替現佩子德寶襲宗子正美襲宗雲南南甯人由行伍於乾隆四十年拔雲南武定營外委五十一年擢今職

右 國史館本傳

王宏信 詳列

王宏信正黃旗包衣人由行伍於乾隆三十七年拔直隸河屯協右營外委四十一年升入溝營千總四十八年調河屯協左營千總五十七年擢貴州水城營守備嘉慶二年三月總督勒保勦辦關嶺苗匪令宏信偕遊擊宋延清雙林等分兩翼繞道齊上關嶺戮匪千餘六月進擊南籠至水煙坪隨總兵張玉龍等伏兵山下其夜大兵乘雨上山攻賊柵伏兵並起賊大潰宏信偕都司安定邦率兵勇首先攻入悉殲之南籠圍解 賞勵勇巴圖魯名號七月升古州鎮標右營都司八月勒保督兵抵洞灑宏信隨副將施縉等五路進攻王囊仙賊城城牆高厚官兵四面毀之賊不能抵

禦囊仙於屋內然火藥將自焚宏信飛身上城率弁兵冒火擒之  
燬其巢洞灑悉平九月至巴林宏信偕都司田朝貴等選兵練多  
帶火彈由四旁樹林躡尋山嶺攀繞而上抵山梁賊見兩旁火發  
冒死衝出宏信奮勇追擊生擒穿黃馬褂賊王抱羊與其黨九十  
二人十一月擢上江協右營遊擊三年隨將軍富成等分兵兜擊  
蓋茶寺賊匪偪至石垣子攀援而上戮斃甚多宏信偕陝西固原  
提標中營外委薛烈於上坡時中槍死之事 聞得 旨俱加等  
議卹 賞雲騎尉世職襲次完時以恩騎尉世襲罔替宏信子政  
襲烈子天得襲烈陝西固原州人

右 國史館本傳



葉炳銓 胡永盛等

葉炳銓江蘇華亭人由行伍於乾隆三十四年拔江南提標中營外委三十五年擢把總三十七年遷松江城守營千總四十八年升蘇州城守營守備五十三年遷江西興國營都司五十九年升陝西興漢鎮標中軍遊擊嘉慶二年防守洵陽屬之閭河口時楚匪被剿竄至洵陽分遣百餘人至閭河口南岸水淺處窺渡炳銓率兵眾擊走之遂渡江追擊戮四十餘人擒獲二人三年總兵慶溥截剿西鄉三花灘竄匪樊人傑龍紹周等殲戮甚眾餘匪遁忽有賊匪萬餘人由西鄉井泉子竄頂甲山羅家溝等處炳銓隨慶溥率兵千餘人馳往堵禦賊匪數路合圍炳銓帶兵分擊殲戮無



數賊猶恃眾拒戰炳銓奮勇衝擊歿於陣時雲南昭通鎮標左營  
把總胡永盛擊賊於青關山山西汾州營把總郭守方擊賊於松  
柳溝俱力戰陣亡先後事 聞均 賜卹如例 賞雲騎尉世職  
襲次完時以恩騎尉世襲罔替炳銓子奎光襲永盛子遇春襲守  
方子鎮國襲永盛雲南恩安人守方山西徐溝人

右 國史館本傳

善福 巴延察等

善福滿洲正紅旗人姓孟武勒吉乾隆五十三年十一月由世襲三等輕車都尉授副護軍參領嘉慶元年揀發河南以遊擊試用三年委署衛輝營參將隨河南巡撫景安勦捕湖北邪匪追至荆門州白雲山駐營賊夜半潛來撲營善福擊退之次晨賊擁二萬餘眾直犯山梁善福率兵從上而下奮勇壓擊斃賊甚多時參將張霞舉從外進攻內外夾擊又殲戮無算善福身受槍傷歿於陣先是元年十月三等侍衛巴延察隨營攻擊荆襄賊卡打仗陣亡二年三月烏槍護軍校達林泰於河南裕州魯山界內之樂家莊地方擊賊陣亡先後事 聞奉 旨善福著加等議卹巴延察達

林泰議卹如例均廕雲騎尉善福應得雲騎尉與原襲三等輕車都尉併襲二等輕車都尉子慶昌襲巴延察子達蘭泰襲達林泰子官昌襲巴延察黑龍江滿洲正黃旗人姓鄂拉由駐京親軍於乾隆五十七年授藍翎侍衛嘉慶元年派勦湖北邪匪七月以功擢本職達林泰滿洲鑲白旗人姓富察

右 國史館本傳

何之璞 陳紹先等

何之璞河南扶溝人乾隆四十九年武進士三等侍衛選貴州永安營都司嘉慶元年升上江協右營遊擊時湖南鎮筵逆苗滋事踞貴魚坡之璞由大頂坡繞石隆山梁截擊有功二年二月貴州狝苗滋事隨總兵張玉龍帶黔兵七百有奇策應南籠菁深山險苗匪沿途連結抗拒之璞率兵衝擊殲戮數百燬柵二十餘座三月進攻廖箕菁安姑一帶賊竄排沙口山梁我兵夾擊之會天雨乘夜追奔殲無算四月偕參將趙得功等攻碧峯山寨燬其巢會總督勒保以山勢險峻難以仰攻密令將弁伏山麓適數千匪下竄遇伏之璞乘勢夾攻賊大潰苗目梁廷松等七人就擒是月



之璞復偕副將宋延清等冒霧雨進剿羊場山克之六月賊屯阿  
捧八月攻角洞之璞以勒保檄率兵潛伏洞外賊不覺縱火焚洞  
殲之阿捧賊亦潰旋率兵進攻卡子河克之十一月隨總兵施縉  
進剿補路大破之並破壩郁嶧峒諸寨先後擒賊目黃成隴等千  
三百四十餘名斬馘尤眾自捧鮓至黃草壩一帶悉平奏入下部  
議敘之璞擢撫標中軍參將四年隨勒保剿捕四川教匪適冷添  
祿股匪竄梁山忠州交界地方之璞由忠州襲之遇賊戰死甘肅  
峽邊營把總陳紹先同歿於陣時冷添祿等扼險負嶠四川城守  
營守備王大勇先於三年九月經總督勒保令由右路攻山與千  
總羅思舉等夾擊殲獲多名又於十月我兵設伏山麓勒保令大



勇帶鄉勇偽爲賊匪距大營數十里放槍礮以誘之賊匪五六百人果吶喊而下殲斃甚眾至是年正月隨經略額勒登保擊賊於石門口姚家巖等處抵忠州偕貴州安順城守營守備張維紀力戰受傷陣亡事 聞均 賜卹如例 賞雲騎尉世職襲次完時以恩騎尉世襲罔替之璞子國寶襲紹先子繼宗襲大勇子傳宣襲維紀子統承襲紹先四川西昌人大勇湖南邵陽人由鄉勇於乾隆六十年隨征苗匪屢戰紀功給六品頂帶 賞戴藍翎嘉慶元年擢把總二年隨剿達州以功升貴州城守營千總三年以生擒賊首王三槐將弁均優敘升是職維紀貴州興義人由武舉授安順鎮標右營千總嘉慶二年升是職

右 國史館本傳

張齡霞 張用章等

張齡霞山東臨邑人由武舉效力期滿補萊州營把總遷登州營千總擢山西大同鎮標守備嘉慶二年隨剿陝西教匪三年賊黨由四川入西鄉境將犯紫陽總督宜縣恐賊過紫陽或由滔河平利趨湖北或折入商雒出河南以總兵柯藩守紫陽兵少令總兵慶溥率將弁往助賊屢來犯擊卻之賊竄回四川太平縣田壩河旋出攻土地嶺齡霞率兵堵擊賊不能進首逆李樹樊人傑阮正澧等復來攻大營慶溥偕遊擊額爾畢濟呼守備溫春合擊之殲戮無算四年賊率萬餘人復來攻土地嶺齡霞擊卻之敗而復合齡霞轉戰力竭歿於陣山西八角營把總張用章平魯路把總劉

欽鎮邊堡把總龐有倉得勝路外委李環陝西宜君營把總蘇升  
外委馬榮均死之時伍金柱股匪竄擾西鄉西路河南河北鎮標  
左營中軍守備劉耀德隨經略額勒登保等追剿至曹家壩遇賊  
奮擊殲數十人賊退回海子壩我兵乘勝窮追遇伏前後受攻耀  
德以傷重陣亡山西得勝路把總張錦富擊賊於偏巖礮亦陣亡  
先後事 聞均 賜卹如例 賞雲騎尉世職襲次完時以恩騎  
尉世襲罔替齡霞子清安襲用章子嶼襲鉞子安國襲有倉子鳳  
襲環子春芳襲升子聯芳襲榮姪永年襲耀德子錫方襲錦富子  
灝襲用章耀德俱山西代州人耀德由武舉效力期滿授河南襄  
城營把總乾隆五十五年遷南陽鎮標右營千總嘉慶二年升是

職銖有倉錦富俱大同人環高陽人升陝西長安人榮甯羌州人

右 國史館本傳



國朝文獻通考卷之三十三

三十三

李文蔚 馬龍圖

李文蔚廣西臨桂人乾隆三十七年武進士以守備用三十八年選陝西撫標右營中軍守備四十五年遷漁渡路都司旋調漢中府城守營中軍都司五十二年擢烏魯木齊提標左營遊擊五十六年升甘肅沙州營參將尋調烏魯木齊提標中營參將嘉慶元年二月檄赴陝西協勦教匪十一月陝甘總督宜縣等分路攻鎮安縣古廟嶺賊巢文蔚率兵五百擊胡家灣大小卡座克之進攻高廟山文蔚首先踰溝而上督兵仰攻殲戮無算時安嶺眾匪全集文蔚率兵從旁衝入賊驚潰盡奪其附近卡座卽進逼安嶺拋擲火彈煙燄四起燔其眾遂克高廟山大卡安嶺平下部議敘二

年正月汝河股匪竄洞河併入紫陽縣五作雲賊巢五峯環列四面險峻前洞河左汝河右大道河後斑鳩關雷打石中藏小山外壘石城內立木柵賊守甚堅文蔚隨總兵索費英阿襲其後數日不克適大雨雪乘雪潛赴頭卡督兵躍上併力合攻克之遂乘勝連克四卡悉殲之翌日會各路兵攻五作雲大寨文蔚率兵燬其木城殲首逆紫陽境悉平旋出斑鳩關至四川太平縣境搜捕餘匪並勦通天觀高家寨南津關三處屯匪身受多傷 賞戴花翎 二月東鄉縣股匪踞張家觀分布各股於周家河梁家崖與巴州通江各股相接應窺伺太平文蔚領兵五百駐白沙河防禦三月升甘肅哈密協副將五月楚匪竄陝西商州宜縣以文蔚本係回

人檄帶撒拉爾回兵赴勦六月提督柯藩以賊竄西鄉縣之九元關毗連川省檄文蔚率回兵前往堵截賊復回竄文蔚尾追入楚九月花果園股匪西竄文蔚隨署廣州將軍明亮追勦至黃龍岡賊向東南折回與大兵遇文蔚偕總兵達音泰率屯土官兵由王家場山梁衝擊賊圍占山梁勢甚剽悍文蔚率兵豫登山頂奮力迎勦追至九鋪灣楊溝口大敗之十一月隨總兵穆騰額追捕樹河口逸匪由三谿子至魚峒子於積雪中尋蹤而往賊自山溝突出我兵分路殲擊餘匪遁追至織子坪適副都統賽冲阿追兵亦至合兵共擊殲戮甚眾三年正月管帶撒拉爾回兵歸籍播種五月率兵五百駐甘肅兩當縣防堵適陝西鳳縣賊匪竄兩當之楊



家店宜縣加派兵勇四百交文蔚堵截六月賊竄兩當之劉官店  
文蔚馳往擊退之卽駐劉官店以爲甘省聲援奏入 諭曰李文  
蔚督率兵勇截回竄匪未令肆擾甘肅尙爲奮勇著交部議敘九  
月移兵沔縣防堵要隘十月賊由四川廣元縣寬灘竄至流沙坡  
歇子臺滋擾文蔚借索費英阿擊走之十二月紫陽縣賊眾衝突  
大營甚急文蔚帶兵千名赴紫陽與總兵慶溥合堵四年正月賊  
竄魚渡壩文蔚擊退之卽移營黑虎廟賊竄回鎮安經參將韓嘉  
業擊退轉向洞汝河又經文蔚在黑虎廟截住遂合嘉業之兵迎  
擊之賊大潰文蔚復繞捷徑從旁衝擊由上界嶺竟夜窮追七十  
餘里殲百餘匪二月賊屯王黑壩文蔚帶兵六百馳赴馬鬣嶺堵



守隘口以顧南路賊果南竄尙家壩文蔚迎堵賊蜂至官兵首尾  
莫應文蔚奮不顧身與賊力戰斬戮無數至夜半賊來益眾文蔚  
身受重傷力竭歿於陣是年甘肅肅州城守營千總馬龍圖擊賊  
於毛埡子陣亡先後事 聞得 旨李文蔚加等優卹照總兵例  
賞騎都尉世職龍圖 賜卹如例 賞雲騎尉世職襲次完時均  
以恩騎尉世襲罔替文蔚子錫齡襲龍圖子良襲龍圖甘肅皋蘭  
人

右 國史館本傳

四庫全書  
目錄  
卷之三十一

三

張東林 高英等

張東林河南祥符人乾隆四十五年武進士以營守備用五十九年補陝西撫標左營守備嘉慶元年檄剿紫陽縣一帶教匪二年四月攻金峩寺清谿場賊巢時大霧瀾漫清谿場之賊襲清谿口營盤經提督柯藩等截擊金峩寺賊眾撲中山頭大卡東林督率兵勇竭力堵禦賊恃其眾不即引退會總兵達音泰等帶兵助剿賊大潰東林乘勢追擊殲二百餘名擒張順等二十三人奪器械甚眾八月擢甘肅涇州營都司十月賊竄巴州之南背山踞險屯集復從元山場小路越山焚掠是處下連江口爲糧臺重地東林以總督宜縣檄偕糧員余廷勳督率兵勇扼險截禦賊分撲江口

附近之孤山坪龍潭谿兩處營卡東林偕余廷勳擊走之三年擢陝西西安鎮標左營遊擊四年賊由十四道河竄關坵子直趨江岸距紫陽甚近大兵加意防守賊知有備南竄尙家壩東林與副將李文蔚偵知之率兵由馬鬣嶺迎截賊蜂至我兵奮力剿擊殲賊無算夜半賊來益眾東林身受重傷力竭陣亡是年正月洪水營把總高英於廟子壩擊賊陣亡二月候補把總袁璋於進口關擊賊陣亡先後事 聞 賜卹如例 賞雲騎尉世職襲次完時以恩騎尉世襲罔替東林子元順襲英子登先襲璋子士俊襲英甘肅張掖人璋陝西咸甯人

右 國史館本傳

富森

富森伊爾根覺羅氏滿洲鑲白旗人由前鋒於乾隆二十九年補藍翎長三十一年遷護軍校三十八年擢副護軍參領四十二年兼公中佐領四十三年升護軍參領四十五年授司鑰長從征緬甸功列超等四十七年發往四川以副將用四十八年補軍標中軍副將四十九年隨大學士阿桂剿甘肅石峯堡回匪屢立戰功旋以領隊大臣噶塔布等帶兵搜捕竄匪有赴軍前投順者卽傳鄉約親戚保領安插阿桂以噶塔布等所辦不知事體輕重檄富森偕雲南騰越鎮總兵許世亨往捕之悉數就獲五十一年署建昌鎮總兵五十五年署川北鎮總兵五十八年署松潘鎮總兵嘉



慶二年檄勦達州教匪遇賊於長壽縣境殲二百餘人俘三十八人賞大小荷包三年正月大兵擊王三槐股匪於開縣富森偕陝西河州鎮總兵保興領兵接應陣於臨江市遏賊北竄之路二月畱防新甯永興場賊自達州奔開縣復奔萬縣踞安樂坪總督勒保節次督兵克其卡偵知巖洞門之右有徑可陟率將佐由此進攻殲七八百人餘匪竄至山後大兵四面圍剿擊斃無算賊渠王三槐就擒械送京師富森在事有功賞戴花翎並下部議敘四年徐添德冷添祿股匪被勦竄墊江富森偕雲南劍州營都司折飛熊追擊賊伏於林中伺官兵至蜂擁四出我兵槍箭並施殲七百餘人生擒百六十人正鏖戰間突有賊眾橫截富森中鉅創

猶鼓勇殺賊復受槍傷歿於陣飛熊亦受刃傷死之事 聞 賜  
卹如例 賞雲騎尉世職襲次完時以恩騎尉世襲罔替富森子  
積拉明阿襲飛熊自有傳

右 國史館本傳

--	--	--	--	--	--	--	--	--	--

折飛熊 何勝華

折飛熊雲南昆明人乾隆四十九年武進士嘉慶元年投效黔省軍營二年四月豆温鄉等處苗匪侵擾飛熊偕弁兵逐之生擒賊眾殲斃頗多賊有稱山達名目者數人亦被擊死又有悔罪自投諸寨總兵扎郎阿稱其功八月雲貴總督勒保洗蕩洞灑賊巢擒首逆王囊仙韋七綰鬚等先是洞灑屯聚萬人山勢危峻且路滑不可上乃分五路進兵扎郎阿率將弁爲一路飛熊復與焉十一月補貴州都勻協中軍守備三年九月升雲南劍川營都司四年二月邪匪徐添德冷添祿經官兵於童家場諸處截剿之後情急狂奔從墊江分竄飛熊偕副將富森追擊殿其軍遇賊突出被刃

傷歿於陣是時隨剿教匪冉文儔於麻壩寨陣亡者有夔州右營  
守備何勝華其死事與飛熊同先後事 聞奉 旨折飛熊何勝  
華均著咨部議卹俱廕雲騎尉世職襲次完時給予恩騎尉世襲  
罔替飛熊子占春襲勝華子瑚襲勝華四川永甯人由行伍於乾  
隆四十七年拔補永甯營額外外委四十八年補峽邊營外委五  
十四年補馬邊營把總五十八年補普安營千總嘉慶二年擢今  
職

右 國史館本傳



崔大成 王璟

崔大成貴州安化人由行伍於乾隆三十九年出師金川奪礪奮  
勇屢得功牌四十年攻克基木斯丹當噶給行營外委四十四年  
拔貴州丹江協左營外委五十一年拔左營把總五十七年拔左  
營千總六十年正月黔省苗匪滋事大成隨總督福康安剿賊永  
綏戰甚力奉 旨賞戴藍翎六月升吉州鎮左營守備嘉慶三年  
升平遠協左營都司四年二月派征川省邪匪時徐添德冷添祿  
股匪屢次滋擾大成隨經略勒保截剿賊彼此聯合裹脅愈眾我  
兵併力夾攻自牛廠坡周家場亮風埡諸處直至沙平關殲戮無  
算生擒楊千友等百餘人賊到處被擊遂驚竄從墊江鄰水界分

路而逸大成每戰必與殊奮勇以創重歿於陣是年正月貴州威甯鎮右營千總王璟亦擊賊黃成寨陣亡先後事 聞得 旨崔大成王璟俱著咨部議卹均廕雲騎尉世職襲次完時各給恩騎尉世襲罔替大成子國泰襲璟子登雲襲璟貴州貴陽人以父應科曾任把總出師金川陣亡難廕歷拔今職

右 國史館本傳

孫大猷 陳凡等

孫大猷雲南文山人由行伍於乾隆二十六年拔開化鎮標右營外委三十一年隨征猛興整欠等處奮勇紀功三十二年擢左營把總三十六年遷右營千總三十九年隨征金川歷戰奮勇四十年升曲尋協右營守備四十八年升督標中軍中營都司五十二年升左營遊擊六十年隨剿黔楚逆苗奮勇有功嘉慶二年升貴州台拱營參將 賞戴花翎旋升清江協副將三年三月四川總督勒保調貴州兵五千名赴川以大猷老成勇往統領之五月大兵剿辦王三槐等股匪時賊有踞華陽山內者大猷偕遊擊哈三泰等各帶兵勇於觀音巖涼風垭等處嚴密布置以備折竄四年

三月賊匪蕭占國約同張長庚由閬中折回於觀音橋西橋寺一帶屯踞大兵由黃土牆進擊行十數里賊扼山包五處迎拒我兵分三路直上克山包兩處戮四百餘名賊退屯後面山梁大猷首先衝上中槍陣亡貴州黔西營守備陳凡亦死之事聞均 賜卹如例 賞雲騎尉世職襲次完時以恩騎尉世襲罔替大猷子承彥襲凡子敬修襲凡貴州安義人由行伍洊升是職

右 國史館本傳

丁洪 趙祥

丁洪雲南南甯人由行伍於乾隆四十八年拔曲靖協左營額外  
外委五十二年補外委五十四年拔把總五十八年遷千總嘉慶  
三年擢貴州鎮遠鎮標左營守備四年三月隨征川省教匪時蕭  
占國張長庚兩股由閬中折回營山潛踞觀音橋西橋寺一帶欲  
躡襲我師洪隨參贊額勒登保於初四日五鼓從黃土牆相機迎  
剿賊占據山包我兵分三路擊之追至石峨山賊復踞險抵禦而  
先所遣川北鎮總兵朱射斗由雞喉寨旁路抄出兩面夾擊殲戮  
甚眾賊大隊爲我兵偏上譚家山山後皆懸崖峭壁無路奔竄賊  
旣據絕地我兵乘夜急攻短兵接戰賊大潰斬獲不可勝計首逆



蕭占國張長庚皆斃洪轉戰數日歿於陣同時有雲南昭通鎮標  
前營守備趙祥亦隨額勒登保擊賊首冷添祿於廣安州屬之城  
頭堰斃之復擊賊符曰明等於茶坪壩賊擁眾方欲渡石筍河祥  
等三面併攻蹙至河沿殲賊八百餘人淹溺者無算祥受傷陣亡  
先後事 聞得 旨丁洪趙祥均咨部議卹廕雲騎尉世職襲次  
完時給予恩騎尉世襲罔替洪子永忠襲祥子天章襲祥雲南昆  
明人由乾隆五十三年武舉於五十九年拔補楚雄協左哨千總  
嘉慶元年擢今職

右 國史館本傳

關聯陞

關聯陞四川成都人由行伍於乾隆三十三年拔提標中營外委三十六年隨征小金川屢著勞績擢馬邊營把總三十九年進攻喇木以擒賊首功升千總四十一年升漳臘營中軍守備八月隨征噶拉依歷戰五十餘次四十六年隨征甘肅逆回皆有功升維州協都司四十九年復隨剿甘肅逆回有功 賞戴藍翎五十一年升松潘鎮標遊擊五十二年 賞換花翎六十年隨征湖南苗匪擒賊黨龍老二等降逆首吳半生擢山西老營參將嘉慶元年攻克平隴寨擒賊首石三保升蒲州協副將旋復獲石柳鄧父子下部議敘二年隨都統惠齡擊湖北易家山賊匪擒劉順等五十

餘人調赴四川勦通江縣匪擒賊首趙學感張正潮駐金子梁賊不敢渡漢江三年正月破李華寺賊寨擒其黨張萬等百餘人三月進抵環子山擊賊之焚掠達州者六月隨惠齡勦龍紹周王正潮於龍口寨有功七月勦冉文偉高均德於石坡擒獲無算旋破香安坪賊寨八月攻克鳳凰寺九月由觀音坪攻克紫陽寨十一月克大鵬寨擒其黨楊正富鄧朝陽等十二月至白埡子蔡家梁擒賊首羅其清等進攻馬鞍山殲戮甚眾四年正月攻麻壩寨擒冉文偉之子冉添受及苟文玉等二月攻彭家山賊巢殲戮無算四月進攻楊家山聯陞先登受矛傷猶躍馬入陣力戰陣亡事聞得 旨照總兵例議卹 賞騎都尉世職襲次完時以恩騎尉

世襲岡替子瑞襲

右 國史館本傳

國朝皇朝實錄切要卷之三十三之三十三

三十三

廣東通志卷之六

三



董凝川 程運棟等

董凝川直隸永甯人由武舉於乾隆四十八年選貴州鎮遠鎮標中營守備五十三年升湖北襄陽鎮標前營都司六十年五月隨副都統福凝剿四堵坪苗匪以偏師捩其後大敗之六月賊擾高村福凝檄凝川往援行至毛坪見賊攻卡甚急分兵設伏躬先衝擊賊驚潰伏發斬獲殆盡奏入 上優獎之擢湖南永州鎮標右營遊擊偕都司伍爾卿額剿濫泥苗匪克之餘匪奪民船欲遁凝川以大礮轟擊淹斃無遺嘉慶元年二月擊賊於辛女谿有功五月賊踞旗鼓寨謀撲來鳳縣卡座凝川從近鳳山下擊卻之 賞戴花翎九月福凝擊剿馬山逆苗賊糧盡率眾掠田禾凝川奮勇

攻擊首逆李登敖就擒頭目宗文錫等率眾降獲輜重器械無算  
出被掠男婦四千有奇以功升湖北興國營參將十一月教匪林  
之華覃加耀踞黃柏山高嶺頭各要隘福凝檄總兵諸神保等由  
石板頭渡河擣賊巢凝川隨總兵慶溥等迎擊賊大潰克復高嶺  
頭山梁十二月隨慶溥攻金竹坪白楊坪有功二年正月由天池  
口襲雷家坳逆賊遇黃柏山匪窺伺河道將乘間脫逃凝川截擊  
之殲其黨三百人二月慶溥攻王家灣凝川偕守備周言昇等分  
兵夾擊克之林之華遣其黨數百人襲守備李光晟營凝川往援  
殲執旗賊目一人餘匪遁 賞健勇巴圖魯名號三年正月隨副  
都統額勒登保進剿終報山副都統綸布春攻其北副都統成德

攻其南提督文圖攻其東爲犄角之勢凝川偕都司張廷楷等自西入奮勇上山奪其隘我兵魚貫而上併力攻擊擒首逆覃加耀頭目張正潮解京伏法三月劉成棟股匪由巫山關入巴東援馬良坪程谿山等處凝川率兵截擊賊不敢過四月駐白雲山賊眾分兩路撲營凝川偕候補副將廣福等分擊之賊大潰竄石門老虎溝復追擊之戮百餘匪五月張漢潮股匪攻荊門州城畱其半踞石橋巡撫景安檄凝川偕廣福等倍道往援大敗之漢潮遁擊石橋眾匪由皮家集南竄景安設伏禦之凝川復抄至後港遇賊爭渡以礮轟退賊竄丁家集遇伏狂奔合兵追斬數十里俘獲甚眾四年四月張添倫股匪撲鬧楊坪邊隘總督倭什布率凝川等

赴援兵至而坪已破凝川衝其後隊斬獲無算賊由龍王埡撲竹  
谿縣城倭什布率遊擊曹星等迎截適凝川追兵至併力攻之賊  
稍退次日復戰相拒甚力凝川以礮擊斃賊目傑子賊眾潰乘勢  
追擊大敗之下部議敘倭什布以張添倫勢必東竄先令凝川伏  
於潘口十轉山親領大隊進剿賊果至與凝川等前後合攻之賊  
大敗得 旨優獎五月高均德股匪竄伺雲路溝邊隘凝川偕遊  
擊姚國棟擊敗之賊奔至梓桐埡凝川偕都司劉應世由峩坪迎  
截殲二百餘名餘匪潰凝川見有騎馬賊目二名追益力至梓桐  
埡樹林中賊棄馬遁凝川密令弁兵圍住山腰躬率數十弁兵下  
馬追入深林賊復併隊轉鬪凝川中矛傷仍手刃十餘人斃騎馬



賊一名力竭歿於陣河南南陽鎮標右營千總程運棟亦死之時賊奔梓桐堽陳州營外委劉永修被戕事 聞得 旨董凝川下馬擊賊至被戕害似此忠勇之臣不得承受國恩閱之不禁墮淚著加等賜卹該員如有子嗣年已及歲卽奏明送部帶領引見或董凝川尙有老親胡季堂卽當酌量賙濟著倭什布卽將董凝川之子及家屬妥爲送歸直隸原籍以示嘉勵忠藎之意程運棟劉永修 賜卹如例均 賞雲騎尉世職襲次完時以恩騎尉世襲罔替凝川子官保襲運棟子國恩襲永修子元音襲運棟河南祥符人永修商邱人

右 國史館本傳



國朝平定縣志卷之四

四

--	--	--	--	--	--	--	--	--	--

劉忠魁馬應舉等

劉忠魁四川成都人由行伍於乾隆五十三年隨征巴勒布以功拔行營外委五十六年隨征廓爾喀受刀槍傷 賞戴藍翎給千總頂帶補阜和協額外外委五十八年遷松潘鎮標中營外委調秦甯營外委六十年隨勦黔楚逆苗克葫蘆口桿子坳滾牛坡等處以擒賊首龍老二功升阜和協左營把總調秦甯營把總嘉慶元年率大小金川屯土弁兵擊貴道坪結石岡納貢山等處賊匪以功升懷遠營千總署越巂營守備二年九月偕奉節令周景福擊川楚教匪於樓子壩擒首逆謝紹武王廷獻等二十餘十月奉節南岸平奏入 命以都司用三年正月隨將軍觀成提督劉君

輔等圍陳崇德股匪於老木園受石傷二月進攻馬桑谿有功五月隨觀成劉君輔攻老木園破其柵陳崇德殲焉並擒其黨數十人忠魁與守備虎正林均受重傷奏入 諭曰劉忠魁虎正林遇相當缺出酌量升授以示鼓勵旋補廣東羅定協右營都司 賞換花翎復攻竹園坪寨受傷四年賊犯夔州忠魁率弁兵迎擊殲戮無算至十五里長嶺岡力戰陣亡四川潼縣營千總馬應舉甘肅提標前營把總薛積善貴德營外委白天祿均死之先是山東臺莊營外委張振基兗州鎮標右營外委臯士傑擊賊於大石板戰歿事 聞均 賜卹如例 賞雲騎尉世職襲次完時以恩騎尉世襲罔替忠魁子興泰襲應舉子明德襲積善弟積瑞襲天祿

子廷佐襲振基子廷柱襲士傑子煥魁襲應舉四川成都人積善  
天祿俱甘肅武威人振基山東滋陽人士傑定陶人

右 國史館本傳

國朝文獻通考卷之三十四

三十四



國朝耆獻類徵初編卷三百六十四目錄

忠義三十四

朱映堂 邢光周

富珠隆阿 劉揮等

馬成龍

汪兆鼎

馬愷 張兆興等

孫餘慶 徐秋魁

李正勇 賈慶檀等

朱天貴 吳鴻泰

德齡

盧陳謨 徐恩

阿克東阿 廖榮等

安祿

王清弼

李錫命 鐵鼎

鄭振貴 王國相等

何振剛 王百齡

陳選 伍英揚等

韓嘉業 高騰蛟

麻允光 傅世雄等

梁煥 王來用等

陳騰龍 王文章等

夏鈞 吳經國

吳漣 梁興等

楊虎 保德

忠義三十四目錄

國朝三才集卷之三十一

程上德 梁揚光等

楊洪新 張登鼇等

劉耀德 張錦富等

蘇維龍 趙世德

國朝耆獻類徵初編卷三百六十四

通奉大夫前署江西巡撫江西布政使司布政使湘陰李桓輯

忠義三十四

朱映堂 邢光周

朱映堂四川華陽人由行伍於乾隆五十五年補四川巫山營外  
委五十六年擢提標左營把總六十年升阜和協右營千總嘉慶  
三年遷綏靖營守備四年川省邪匪滋事五月映堂隨提督七十  
五勦辦卜三聘一股賊匪卜三聘與陝西平利竄回餘匪勾結不  
時窺伺夔州屢經官兵挫劔兩路賊勢窮蹙欲圖東竄七十五恐  
其闖入楚疆督率兵勇悉力奮擊於寶塔蓮花池一帶分投堵截

賊恃險抗拒時又值陰雨映堂往來衝突奮勇直前殲賊無算生擒十餘名賊愈集愈眾映堂匹馬獨進手刃多賊以受傷歿於陣其時有四川綏甯左營把總邢光周亦隨七十五帶兵於王家坪攔禦卜三聘一股賊匪因首先搶入賊隊力戰陣亡同時事聞得旨朱映堂邢光周俱著咨部議卹均廕雲騎尉世職襲次完時各給恩騎尉世襲罔替映堂子幼未襲光周子佩襲光周四川西昌人由行伍出師廓爾喀署行營外委於乾隆五十九年補會川營外委嘉慶元年二月出師黔楚屢立戰功十二月調征川省邪匪三年以功擢今職

右 國史館本傳

富珠隆阿 劉揮等

富珠隆阿西爾努忒氏蒙古鑲紅旗人由護軍擢驍騎校乾隆五  
十一年授陝西平羅營守備五十六年遷甘肅硤口營都司嘉慶  
三年擢蘆塘營遊擊四年川省教匪張映祥闖入甘肅分竄涼州  
署布政使司廣厚與涼州鎮總兵吉蘭泰敗之於新寺鎮賊走甯  
遠縣時富珠隆阿防守西和禮縣界廣厚檄令閒道抄截富珠隆  
阿遂偕甘州城守營守備劉揮護俄卜嶺營遊擊馬成龍等率兵  
八百馳赴之行至什川鎮與賊遇劉揮鼓勇先進中矛陣亡富珠  
隆阿等督兵繼進悉力迎擊斬馘百餘賊不退且後隊盡至官軍  
奮力搏戰眾寡不敵相持久之富珠隆阿見勢急恐所攜鉛藥爲



賊所得遂然之羸斃數十人富珠隆阿馬成龍與甘標右營千總徐忠涼州鎮標左營把總楊華安遠營土門堡額額外委范士賢甘州城守營額額外委于化林等俱陣歿賊復由桃花山西竄直趨鞏昌府署甘標中營千總朱廷貴洪水營額額外委吳愷率兵於通渭之安遠地方躡賊後隊殲數十名均死之事 聞均 賜卹如例 賞雲騎尉世職襲次完時以恩騎尉世襲罔替富珠隆阿子德楞額襲揮子繼忠襲忠子聯捷襲華子天德襲廷貴子應魁襲士賢化林愷俱照馬兵例 賞卹揮直隸慶雲人由乾隆五十八年武進士游升是職忠廷貴化林俱甘肅張掖人化林由行伍游升是職忠廷貴俱以父難廕授是職華士賢俱武威人愷皋

蘭人馬成龍別有傳

右 國史館本傳

國朝詩集卷之三十三

三

馬成龍

馬成龍甘肅張掖縣人由行伍於乾隆四十年拔補硤口營額外  
外委旋調肅州城守營額外外委四十五年補洪水營外委尋授  
西甯鎮標循化營把總五十四年升河州鎮標左營千總嘉慶二  
年補涼州鎮紅城堡守備三年五月護俄卜嶺營游擊隨師剿捕  
教匪四年五月督兵進抵什川鎮適賊眾自甯遠竄至成龍悉力  
迎擊殲賊百餘人嗣賊匪大夥匯集拌死衝突我兵直前追殺復  
轟斃四五十人成龍力竭而歿事 聞議卹廕雲騎尉襲次完時  
給予恩騎尉世襲罔替孫廷魁襲

右 國史館本傳

國朝詩林卷之三

四



汪兆鼎

君姓汪氏兆鼎諱子元其字先世自徽州之歙縣遷武進祖化龍官紹興府同知父炎國子監生君生而穎異神采奕然嘗屢應南北鄉試不售乾隆三十八年充四庫館臚錄期滿發直隸以縣丞用補冀州之棗強與同官多齟齬以事去職家居十四年生計日窘復赴四川軍營投效未卽錄用會同郡朱向隆爲達州巡檢有解餉之役知君可倚邀與偕往至東鄉縣之太平石岸口猝遇賊向隆言將乞助鄉勇先馳去眾謂君非蜀中官盍亟避弗應乃各奔散君獨守餉罵賊遂遇害時嘉慶四年六月六日也方教匪之起也身有統兵之責臨陣卻走聞賊來故歧其塗巧避於數十百

里外者不知凡幾君略無官守其勢又孤萬無自全之理而攫鋒蹈刃曾弗少顧彼其心豈有所冀倖於其閒哉徒以義之所激若不得不出於此而已君死年五十三配莊氏張氏張氏聞君死狀慟哭七晝夜而卒子曰仲慶張所生

論曰子元少時翩翩美風度與人交煦嫗可親一旦臨變所成就卓卓如是賢者固不可測哉且匪特子元難及迺其妻亦節烈女也顧皆格於事例不能一荷旌卹傷已子故追而紀之俟史氏之采焉

右別傳趙懷玉撰

馬愷 張兆與等

馬愷四川閬中人由行伍於乾隆三十八年隨征金川功最超補青雲營千總四十年遷瀘甯營守備四十四年升督標中營都司四十九年擢浙江處州鎮標右營游擊五十二年調湖北宜昌鎮標左營游擊六十年三月楚苗滋事總督福康安勦之於新砦賊踞西南北三路山梁愷隨總兵張廷彥自東南繞道夾攻賊大潰遂由新砦進攻上官壩越險奮擊不避矢石賊披靡墜崖下者無算燬其砦四月賊襲花園游擊王重品往勦被圍愷隨廷彥赴援內外合擊戰甚力嗣以大軍進偪平隴分駐擺頭衝賊屢出窺伺愷隨方應變多有斬獲嘉慶四年調勦湖北教匪李淑徐添德等

分竄至巴東縣羅坪勢復合愷隨總兵王凱迎擊之殲戮甚眾賊益蜂擁而至愷見事急鼓勇直前往來衝突傷劇猶力戰不屈沒於陣署湖北宜昌鎮標游擊張兆興手刃數賊中槍墜巖亦死之時賊竄竹谿縣河南撫標右營千總孫餘慶隨副將孫清元等扼之於西溝賊先以二千人撲卡敗走復合萬餘匪攻圍並漫山衝突我兵破圍擊之追至黃泥塌賊復分五股來奪山梁我兵奮勇迎勦餘慶偕嵩縣把總徐秋魁均以首先衝入賊隊被戕先後事聞均賜卹如例 賞雲騎尉世職襲次完時以恩騎尉世襲罔替愷子調元襲兆興子金印襲餘慶子蔭棠襲秋魁子榮柱襲兆興湖南沅陵人由武舉拔岳州水師營千總洊升江西鄱湖營都



司旋署是職餘慶秋魁俱河南祥符人餘慶由行伍拔撫標右營外委嘉慶元年隨勦湖北教匪以功擢把總三年升左營千總四年調是職秋魁由武舉隨勦湖北教匪歷戰有功授是職

右 國史館本傳



Table with 10 columns and 1 row. The table is mostly empty, with some faint markings in the rightmost column.

--	--	--	--	--	--	--	--	--	--

孫餘慶

徐秋魁

孫餘慶河南祥符人由行伍於乾隆五十三年拔撫標左營額外委五十六年補右營外委嘉慶元年隨征湖北教匪屢戰有功二年升右營把總以剿捕息縣賊匪功三年升左營千總四年調右營千總六月川省大股賊匪竄入楚境竹谿餘慶隨副將孫清元等扼之於西溝賊先以眾二千餘撲擾卡座爲官兵所敗復合眾萬餘來犯以數千人攻圍營卡與官軍相持餘乘閒漫山奔突清元率弁兵破圍衝擊賊敗潰前奔追至黃泥塢賊復分五股來奪山梁官兵迎剿鏖戰逾時賊始敗退餘慶偕嵩縣把總徐秋魁奮不顧身均以首先衝入賊隊爲賊所戕事聞俱賜卹如例

廕雲騎尉世職餘慶子蔭棠襲秋魁子榮柱襲秋魁河南祥符人  
由武舉投營效力嘉慶元年隨征湖北教匪於陽家塢三黃鎮草  
店諸處連次剿賊多所斬獲二年正月隨總兵王文雄擊賊首姚  
之富於禹山擒殺甚眾尋追剿至杏兒山襲破賊巢獲其婦女輜  
重復連戰於四里店羅曲灣及剿捕息縣浙川賊匪皆在事有功  
歷補本職

右 國史館本傳

李正勇 賈慶檀

李正勇廣東長樂人乾隆三十四年武進士授藍翎侍衛四十年  
選山東壽樂營都司四十七年擢直隸天津鎮標中營游擊五十  
二年調督標前營游擊五十八年升湖南臨武營參將嘉慶二年  
隨勦湖北教匪四年防守竹谿時陝西平利縣股匪由白土關竄  
黃土坡窺竹谿西面距關堦四十餘里山徑歧雜正勇率兵勇設  
卡嚴防賊潛由山溝撲卡正勇奮力迎勦戮十餘人賊少退逾時  
賊蜂至正勇仍悉力捍禦賊忽分一隊繞出卡座之側徑趨東面  
山梁正勇亟令把總陳永年潘正玉禦敵自帶兵抄賊隊之前匹  
馬衝擊手刃數賊力竭陣亡時河南王祿營守備賈慶檀隨湖廣

總督倭什布赴竹谿縣東堵勦從九里岡下壓賊直前迎拒官兵先以大礮轟擊繼用進步連環并力夾攻戮二百餘人賊退踞對面山梁慶檀首先騰躍而上衝入賊隊以受重傷沒於陣先後事聞得旨陣亡參將李正勇可惜之至著照副將例議卹賈慶檀騎卹如例均賞雲騎尉世職襲次完時以恩騎尉世襲罔替正勇子幼未襲慶檀子爲凝襲慶檀直隸永清人由武舉充補提塘五十五年擢是職

右 國史館本傳



朱天貴 吳鴻泰

朱天貴甘肅高臺人由行伍於乾隆四十三年拔高臺營額外外委四十五年補外委四十八年擢毛目城堡把總五十年升踴實營千總六十年擢蘭州城守營守備嘉慶元年陝省教匪踞守洞汝二河天貴隨游擊王相龍率兵四百由紫陽縣小米谿進攻逼近擊以礮賊猶抗拒天貴力戰殲戮百餘遂克其寨生擒百餘匪賊勢蹙自焚其巢相龍率天貴等冒火撲勦復生擒四百餘人三年擢橋灣營都司四年正月李樹樊人傑龍紹周股匪竄西鄉之漁渡壩天貴隨參將李逢春游擊洪德等由六道河左山溝進副將韓加業李文蔚由右山溝進與賊遇力擊之殲二百餘人四月

升陝西陝安鎮標中營游擊七月張漢潮徐添德高蘭英股匪竄  
安康縣之金家山大肆焚掠總兵慶溥令天貴偕都司張世儒等  
率兵七百躡蹤至金家山督同鄉勇追入箐林賊分兩隊出踞山  
梁天貴首先迎戰戮斃甚眾時大雨相持一晝夜次日賊復襲我  
軍擊走之竄入老林天貴追入林內連刃數賊遇伏陣亡時四川  
督標千總吳鴻泰擊賊於新安場亦死之事 聞得 旨朱天貴  
追賊入林連殺數賊遇伏被戕甚爲可惜著加等議卹吳鴻泰  
賜卹如例均 賞雲騎尉世職襲次完時以恩騎尉世襲罔替天  
貴無嗣姪連襲鴻泰子文高襲鴻泰四川郫縣人

右 國史館本傳

德齡

德齡納喇氏滿洲鑲白旗人由拜唐阿遷變儀衛整儀尉乾隆四十一年升治儀正旋擢雲麾使晉冠軍使五十二年授直隸通州協副將五十五年調山永協副將五十八年擢山西太原鎮總兵嘉慶元年奉檄調赴楚省協剿邪匪五月由水臺前進殺賊甚眾又馳剿施南棗陽等處進撲張家壩賊寨俱有斬獲六月奉旨總兵德齡焚擊賊營身先士卒尙爲奮勇著賞戴花翎七月赴龍門山防守旋赴馬家集呂堰驛潯河等處搜剿十二月賊由老河口奔竄德齡設伏以待斃賊百餘人是年賞青玉扳指大小荷包等件二年二月追捕宋河匪眾又赴三河店遏賊竄逸之路復



由桐柏山邊界繞出黃陂縣之河口遇賊接仗擒獲賊目吳湘等二十餘人賊由確山奔伏牛山時都統巴克坦布提督慶成等分路截剿德齡隨慶成等督率馬兵撲上山梁賊卽分竄適巴克坦布領步隊迎截往來衝殺殲賊五百餘人四月敗賊於趙家衝又敗賊於長岡嶺收復鄖西縣又敗賊於西山溝生擒賊目張齊李德等賊由竹峪關竄入川境閏六月德齡隨慶成等擊賊於南天峒火燄壩白巖峒諸處旋奉檄駐夔州九月進攻羊耳山斃賊數十人十一月追賊於石埡子又追之於馬家壩又追之於鐵瓦寺屢獲勝仗是年 賞玉扳指大小荷包等件三年正月追賊於回龍場賊眾全集遇援兵至德齡潰圍而出轉戰殺賊賊始退走四

月奉檄會同革任將軍觀成等擊賊於老木園適觀成等已督兵  
焚毀賊巢老木園之賊全數撲滅德齡撤兵回勦鐵瓦寺餘匪七  
月赴巴州酒店埡堵禦殺賊百餘人生擒傅朝綱等十餘人四年  
八月追勦張金魁賊眾於岳溪場安家山等處均有斬獲追至萬  
縣之陳家場德齡躍登山梁殲賊百餘聞後隊游擊盧陳謨陣亡  
德齡卽馳馬回戰奮力殺賊猝遇矛傷歿於陣 賜卹如例 恩  
賞騎都尉世職孫文玉襲

右 國史館本傳



--	--	--	--	--	--	--	--	--	--

盧陳謨 徐恩

盧陳謨雲南鶴慶州人由行伍於乾隆三十三年拔鶴麗鎮標右營右哨二司外委三十四年拔左營左哨頭司把總三十八年遷右營千總四十六年遷雲貴督標中軍守備五十二年遷騰越鎮標右營都司五十六年遷臨元鎮標中營游擊嘉慶四年派征邪匪八月賊入川境官兵自杜家坪青岡嶺兩處擊散楊開甲齊家營之賊將王登廷一股截回復由竹峪關追勦賊行蹤詭祕遇兵卽竄旋與鮮大川等合屯獅子岡而廣元餘賊以與張金魁股匪合陳謨隨總兵德齡進勦於岳溪場安家山兩處接仗均有斬獲追至萬縣之陳家場分路進攻勦上山梁殲賊百餘溝內伏賊潛

出衝我兵後隊陳謨力戰陣亡旋又有維州協左營千總徐恩隨  
總兵朱射斗勦高二馬五股匪賊自平頭坡敗後我兵追至中坪  
賊乘夜撲營爲我兵擊退分路竄烏龍溪我兵奮力追躡至中茅  
壩斃賊甚多賊潰遁恩以受傷歿於陣先後奉 旨盧陳  
謨徐恩著各卹賜卹俱廕雲騎尉世職襲次完時給予恩騎尉世  
襲罔替陳謨子文忠襲恩子應瑄襲恩四川華陽人由行伍歷拔  
瀘州營外委督標左營把總隨征甘肅逆回廓爾喀黔楚苗匪屢  
立戰功嘉慶四年遷今職以功 賞戴藍翎

右 國史館本傳

阿克東阿 廖榮等

阿克東阿瑪佳氏滿洲鑲黃旗人由前鋒授前鋒校遷四川崇化營守備升南坪營都司嘉慶元年擢崇化營游擊二年隨征陝西教匪時賊由興安竄恆口阿克東阿率兵赴漢陰堵禦三年賊竄湖北荊州府漢江南岸娘娘山焚掠阿克東阿以精兵二百名堵守賊馬步萬餘人分四隊撲江岸阿克東阿率兵勇迎擊殲戮千餘賊東竄復合二千人自柳林鋪過江繞出我兵之後直偪大營我兵面背受敵阿克東阿奮勇衝擊射殪執旗賊三人身受重傷四年六月率川兵追剿略陽縣竄匪八月甘肅賊首楊開甲張金魁糾黨千餘人將由川省竄楚境阿克東阿帶兵追擊於板橋口

楊柏河永興場殲百餘人獲胡長觀等八十餘人賊遁去遂率兵  
赴西鄉縣駐守行抵太平縣界牌猝遇賊匪衝出偕川北鎮標右  
營把總廖榮力戰歿於陣時廣東白塔營都司來興於虞關擊賊  
陣亡陝西鞏昌營游擊常明擊賊於雲陽縣地方力戰陣亡直隸  
督標後營游擊全亮擊賊於甘肅階州老柏樹地方仰攻山梁中  
槍陣亡先後事 聞均 賜卹如例 賞雲騎尉世職襲次完時  
以恩騎尉世襲罔替阿克東阿子花尙阿襲榮子洪宗襲來興子  
經文布襲常明子五十四襲全亮子綳興額襲榮四川成都人來  
興富察氏滿洲鑲黃旗人常明赫舍里氏正黃旗人由閒散游升  
三等侍衛乾隆五十六年授陝西舊洮營都司嘉慶元年升是職



全亮 河坦氏蒙古鑲黃旗人由護軍校擢驍騎校乾隆五十四年授直隸宣化鎮都司五十七年調武清營都司嘉慶元年升是職

右 國史館本傳

此書不與他書同類

天  
下  
第  
一  
書

安祿

安祿鑲黃旗滿洲人多拉爾氏父海蘭察一等超勇公自有傳乾隆四十九年七月安祿以父海蘭察勦甘肅逆回奮勇殺賊擢授二等待衛在乾清門行走 賜騎都尉世職卽以安祿襲五十年安祿出師西藏屢立戰功五十七年 賞哈什巴圖魯名號五十八年承襲一等超勇公嘉慶元年擢乾清門頭等待衛四年七月川省邪匪滋事安祿解餉到川經略勒保派隨都統額勒登保進剿時徐添德股匪竄柘木壩爲我兵所敗遁入馬板灘石窩場額勒登保追至雞公梁乘夜分兵截擊安祿偕格布慎等爲左翼天將明賊結隊而來安祿等從山旁衝出賊眾亂向城隍廟奔逸適

右翼楊遇春伏起前後抄殺數十里殲斃甚多生擒三百餘名八月王登廷股匪屯杜家坪額勒登保率兵進剿安祿等從之由上下壓賊不能禦死者四五百人餘竄西鄉之魚渡壩我兵追擊之首逆王登明率眾先逃至青龍坪與齊家營股匪合額勒登保分三路擊之賊上青岡嶺安祿等鼓勇競登賊大敗退奔土丫子山梁十月賊首鮮大川苟文明等欲窺開縣安祿與總兵朱射斗合勦賊不敢東竄十一月偕射斗遇賊於枯草坪霧雨中搶上汪家山殲賊百六十餘墮崖斃者無算安祿見賊數十奔下山溝僅率五六人奮力勦殺賊潰散尙乘馬緊蹶其後林中突出數賊安祿猝中矛傷歿於陣事 聞得 旨賞內庫銀一千兩卹如例 予諡

壯毅 加賞騎都尉世職 諭曰此等教匪不過么膺草竊之徒  
凡茲鄉勇皆係良民因與莠民打仗致有傷亡已覺可憫卽綠營  
兵丁亦係良民充伍豈可任其殺傷若我入旗及盛京吉林黑龍  
江兵最爲勁旅儻因失利致爲奸民所戕尤爲可惜況且帶兵官  
員爲國宣力致被戕害甚至如惠倫安祿皆屬五等之封亦因勦  
此奸民歿於行陣更爲萬分不值朕每思及五內含悲且惠倫安  
祿二人伊父奎林海蘭察均係宿將素有威名今伊二人以輕進  
捐軀不但深堪軫惜並恐教匪等因此啟其輕視之心甚至流傳  
外藩以名將之子不能殲此匪徒而轉爲所害損傷國威尤有關  
係著額勒登保及各路帶兵大臣嗣後派兵勦賊總須將滿洲及



國朝通志卷之三十一  
東三省官兵自爲一隊毋得零星派撥與綠營兵攙雜並進使我  
精兵勁旅蓄養銳氣於應行奮勇時令其併力直前及鋒而用則  
弓馬馳驟皆其所長以之剿此烏合亂民自必所向披靡各路帶  
兵大臣皆當一體遵照安祿子恩特賀莫扎拉芬由閒散承襲一  
等超勇公兼襲騎都尉旋部議騎都尉又加騎都尉應爲三等輕  
車都尉奉 旨以弟安成襲六年十月恩特賀莫扎拉芬病卒安  
成兼襲一等超勇公見頭等待衛乾清門行走

右 國史館本傳

王清弼

王清弼直隸雄縣人乾隆四十年武進士以營守備用補陝西漢鳳營守備四十二年調甘肅瑪納斯協右營守備四十六年升白塔川營都司五十二年擢陝甘固原提標左營游擊嘉慶元年三月湖北鄖縣教匪王全禮兄弟與其師徐良踞泥河口之孤山將掠白河洵陽以攻鄖西提督柯藩檄清弼督兵攻其旁寨乘雨仰擊殲擒四百餘人進攻孤山先斷汲道以誘其出戰眾兵復蛇行循牆而進燬其寨賊大潰獲王全禮等四十六人泥河口平四月升甘肅平羅營參將二年二月隨總督宜縣侍衛明興由老君洞襲曾家山有功三月偕副將玉柱等自清谿口擊姚家寨六月賊

之竄四川者至秋波梁清弼偕游擊王威凝擊走之閏六月羅其清冉文儔等踞方山坪分路犯營我軍預設伏大敗之七月賊伏兵於朱射斗營旁拔鹿角爭進清弼乘夜率兵擊卻之九月總督宜縣以方山坪險峻必先得蓋頂坪多福山兩寨方可進攻遂率總兵索費英阿藩司楊揆至方山坪周歷營卡復以氈帽山地勢尤高奪之更有建瓴之勢令總兵楊秀等攻氈帽山知州劉清偕百祥等攻多福山知州常發祥偕朱射斗攻蓋頂坪兵既合賊見多福山已陷遂大潰清弼與朱射斗亟攻之奪其寨楊秀等亦已奪氈帽山越數日遂克方山坪十月羅其清等與王三槐合擾巴州宜縣檄清弼與知州劉清等繞道援之三年升貴州大定協副

將時賊首洪道人胡秀方等起蘭芽場總督勒保率清弼及參將  
薛大烈等攻其東門關由箐林小徑克其寨賊眾潰洪道人胡秀  
方等就擒奪牛馬器械無算四年五月賊包正洪竄消水灣經略  
額勒登保飭清弼馳擊之七月包正洪由雞鳴寺向東南竄清弼  
偕朱射斗及參將張文貴分三路圍之大破賊眾包正洪死奏入  
賞齊喇巴圖魯名號十二月賊冉添元王登廷與麻柳灣賊合額  
勒登保分兵截擊之賊拒戰甚力清弼力戰歿於陣事 聞 賜  
卹如例 賞雲騎尉世職襲次完時以恩騎尉世襲罔替子丕承  
襲

右 國史館本傳





李錫命 鐵鼎

李錫命順天東安人乾隆四十九年一甲二名武進士授二等待衛行走期滿以游擊用嘉慶元年補廣東潮州鎮標中營游擊隨署廣州將軍明亮平定苗匪石柳鄧有功 賞備勇巴圖魯名號二年五月隨領侍衛內大臣額勒登保勦川匪林之華等於大瓠口賊踞險投石錫命裹創力攻奮勇不避七月升兩廣督標後營參將十月追賊至堡子嶺羅塘灣賊糾眾抗拒錫命偕各弁首先攻擊殲戮無算三年九月隨副都統德楞泰追襲賊匪樊人傑等攻郭家廟廖家塢等寨燬其巢時箕山賊匪突至錫命偕各路併力合擊大敗之十一月追勦羅其清股匪於官山至巴河賊不能

支竄老鴉城屯踞錫命偕總兵朱射斗副將許文謨等分道堵剿賊蒼黃四竄羅其清挈弟羅其書潛匿於蔡家梁下溝會大軍至錫命偕副都統賽冲阿等從蔡家梁夾擊痛殲之擒羅其清兄弟檻送京師伏法四年四月升羅定協副將十二月追勦再添元股匪於蒼谿縣之隆山界由高坡子八字口繞道扼賊北竄之路賊果由八字口遁追擊三十餘里賊竄向貓兒埡我兵扼青字埡山梁截其去路賊至不能奪時貓兒埡山梁已爲大兵所破賊進退無據復撲青字埡分其眾爲二一趨山前一由山後錫命等猝不及防短兵相接錫命手刃數十匪力盡死之廣東連陽營守備鐵鼎亦陣亡事 聞均 賜卹如例 賞雲騎尉世職襲次完時以

思騎尉世襲罔替錫命次子慶隆襲鼎弟鐸襲鼎陝西長安人由  
武進士選是職

右 國史館本傳

東洋文庫蔵書目録

三

鄭振貴 王國相

鄭振貴廣東歸善人由行伍於乾隆五十五年拔提標右營外委五十八年擢前營把總六十年升右營千總嘉慶二年升羅定協左營守備三年川省教匪擾夔州首逆羅其清負嵎踞險糾眾二萬餘各股藉其聲勢結寨相依大兵設伏於箕山下誘其下山分路進剿殲戮無算賊竄定汎寺山梁屯紮振貴隨副都統銜德榜泰竭力兜擊身受多傷殲五百餘人生擒二百四十餘人盡奪山梁地賊大潰四年二月振貴生擒首逆羅其清 賞戴藍翎十月升貴州平遠協左營都司十二月冉添元王登廷股匪與麻柳灣之匪合被剿竄奔我兵分三路追捕至貓兒埡賊奔山梁與我軍



相持忽分股繞至山後突入營盤下趨青字堦口振貴隨額勒登保奮力追擊晝夜不辭勞瘁歿於陣是月四川慶甯營千總王國相擊賊於高子堦陣亡先後事 聞均 賜卹如例 賞雲騎尉世職襲次完時以恩騎尉世襲罔替振貴無嗣弟恩貴襲國相子基襲國相四川成都人

右 國史館本傳

何振剛 王百齡

何振剛廣東番禺縣人由行伍於乾隆四十九年十月拔補撫標右營外委五十五年四月拔補右營把總旋拔千總嘉慶二年七月擢廣東提標中營守備四年十月升廣西平樂協中軍都司時邪匪滋事振剛隨經略額勒登保進剿十二月賊首冉添元王登廷與麻柳灣之賊竄合官兵奮力攻擊賊分股折奔貓兒埡時提督楊遇春奪其山梁與賊接仗額勒登保亦帶兵馳至賊屢次仰撲經官兵擊退而分股賊匪又復直撲青字埡官兵迎擊之際賊匪繞至山後自上而下直趨埡口與官兵短刃相接殲賊甚多官兵亦有損傷退上玉皇觀山梁賊見青字埡官兵已退乘夜撲攻

於昏黑中官兵併力剿殺四更時方行擊散殲斃賊一百十名生擒八十餘名黎明賊始由白廟塢遁去振剛以力戰歿於陣守備王百齡同時力戰陣亡事 聞得 旨何振剛王百齡俱著議卹事下兵部 賞卹如例議給雲騎尉世職襲次完時各給恩騎尉世襲罔替振剛子廣進襲百齡貴州普定縣人由武生中式武舉乾隆六十年赴銅仁小竹山軍營嘉慶二年調征興義狃苗拔提標右營把總三年調征川省邪匪擢千總旋以功 賞戴藍翎補臺拱營守備百齡長子春承襲

右 國史館本傳

陳選 伍英揚等

陳選雲南昆明人由武舉隨營效力期滿以把總用嘉慶元年正月補開化鎮標右營把總十一月遷貴州提標前營千總二年升雲南維西協右營守備以隨剿苗匪有功 賞戴藍翎三年升貴州威甯鎮標右營都司四年升雲南昭通鎮標中軍遊擊隨經略額勒登保剿四川教匪時冉添元王登廷等股竄蒼溪縣一帶與麻柳灣之賊合爲我兵所擊復分奔貓兒壩提督楊遇春克其山梁額勒登保率選等亦馳至賊屢次仰撲皆擊走之嗣以賊犯我兵所駐之青字壩力與相持賊繞至山後突入鍋帳隊內自上而下直趨壩口我兵前後受敵退保玉皇觀賊遂乘夜併攻額勒登

保一路鏖戰竟夜賊由白廟塢遁殲百餘匪擒獲甚眾選以力戰  
歿於陣廣東羅定協左營守備伍英揚亦死之事 聞均 賜卹  
如例 賞雲騎尉世職襲次完時以恩騎尉世襲罔替選子萬春  
襲英揚子志雄襲英揚廣東歸善人由行伍於乾隆五十六年拔  
廣東提標後營外委隨征軍營擢三江口協把總那扶營千總嘉  
慶四年升是職

右 國史館本傳



韓嘉業 高騰蛟

韓嘉業甘肅武威人乾隆三十七年由行伍隨攻小金川功列超等三十八年隨勦大金川屢戰奮勇三十九年拔涼州鎮標後營外委四十年四月隨攻木思工噶克右首山峯下木通木柵等寨並克獲了口木城石礮功列超等五月升中營把總隨攻噶爾丹喇嘛寺諸處屢克其寨八月掘地取道攻勒烏圍轉經樓烏寨落木城進克舍齊雍中喇嘛寺圍噶拉依賊巢殲戮甚多四十一年噶拉依巢平擒酋首索諾木功列超等升洪水營千總凱旋調涼州鎮標中營千總四十八年升陝西木瓜園堡守備赴部引見以功加六等選靖甯協中軍都司六十年遷陝甘督標前營游擊

嘉慶元年四川教匪滋事陝西興安府屬壤相接乘機蠢動聚眾五六千踞安嶺爲巢穴憑高恃險立木城分五營四哨又於嶺前高廟山設立大卡形勢陡峻陝甘總督宜縣分數路擊之嘉業率兵五百由羊毛子堰進克其卡殲斃甚多時游擊海洪阿率兵撲高廟山大卡踰溝而上嘉業復會合游擊李昌擊克之進偪安嶺大寨分遣將卒潛至木城旁拋擲火彈煙燄四起賊驚潰因乘勢取大卡擒戮無遺 賞戴花翎三年升甘肅蘭州城守營參將率兵於各路防守爲諸將策應四年正月李樹之股匪二千餘人由黃安壩竄入平利縣之朝溝嘉業率兵由木竹垵進殲數十人擒萬正祿等八人賊越山遁嘉業追出斑鳩嶺時李文蔚率兵在黑

虎廟賊不敢出洞汝河遂由六道河權河奔竄會總兵慶溥兵出  
權河循六道河之左嘉業偕文蔚由六道河之右兩路並進越山  
窮追殲獲二百餘名嘉業又追至廟子壩斃百餘名賊遁入川境  
是月升哈密協副將十二月賊匪由川界老林潛行至漢中之城  
固遂入南鄭時嘉業巡江防守聞之亟率兵前駐法慈院堵其北  
竄賊奔麻柳鋪將就淺涉嘉陵江而沔縣賊三四千人由阜川偏  
近官莊陝甘總督松筠令嘉業偕直隸龍門路守備麻允光等率  
兵勇九百餘擇要迎擊賊全數出輒喇子嘉業馳馬首先衝入兵  
勇繼之賊分爲兩翼繞馬家嶺自上壓下四面合圍嘉業力戰突  
擊馬蹶墜地立起引弓發矢中其執旗者一賊以矛直刺嘉業甘

肅西甯鎮標把總高騰蛟從旁以矛格之遂殺賊而羣賊競進嘉業仍力戰中矛仆遂死騰蛟以身蔽其上亦死允光亦戰歿事

聞得 旨韓嘉業加二等照提督例議卹 予謚武烈 賞騎都尉兼一雲騎尉世職子憲祖襲嘉慶七年嘉業之兄自昌亦陣亡命與嘉業共建一祠致祭 賜名雙烈高騰蛟 命加二等照守備例 賜卹廕雲騎尉世職襲次完時給予恩騎尉世襲罔替子自立襲騰蛟甘肅肅州人麻允光別有傳

右 國史館本傳

嘉慶四年十二月二十三日哈密協副將韓公勦賊陣亡於沔縣大帥以狀聞 天子震悼 敕贈提督軍門振威將軍謚武烈又



降 制賞騎都尉兼一雲騎尉承襲 賜祭葬 御製碑文竝  
敕大吏於本邑立雙烈祠令有司春秋享祀雙烈者其兄自昌亦  
以莊浪副將戰歿於整屋縣故 皇上軫念捐軀 特恩建祠以  
旌勛庸竝 諭將子若姪送部引見所以寵卹者至矣公名嘉業  
字健庵甘肅涼州府武威縣人父增壽官涼標千總出征金川公  
方幼會逆酋猖獗 朝廷濟師公念父甚乃益年爲兵荷戈而往  
屯營於察木多跡其父營違四十里乃於黑夜奔至父所父駭曰  
汝焉得離伍來此罪犯不赦急脫皮衣衣之俾速回未幾官軍潰  
父殲焉公痛甚急欲報仇時大帥募士誦賊消息他人皆逡巡公  
卽承命往得實以報官軍獲勝卽拔補經制外委屢戰有功中礮



益奮升洪水營千總石峯堡逆回之變橫刀虔劉功冠諸軍歷遷  
蘭州城守營參將方是時教匪倡亂蔓延楚蜀陝甘諸省公隨制  
府宜縣率師入蜀征討衝鋒陷陳不避矢石復自蜀來陝攻城野  
戰屢著伐多蒙 恩賜法福哩巴圖魯名號升哈密副將既而松  
宮保筠節制陝甘公隨營爲翼長操守廉潔公事恪勤而尤愛惜  
士卒訓練有方松制府以爲能倚如左右手嘉慶四年十月賊侵  
掠兩當徽縣秦階二州擾及略陽制軍自漢中移軍西剿十二月  
望軍抵沔縣賊氛甚熾制府欲兵臨八都山以遏其勢公諫曰兵  
法知彼知己百戰百勝今賊眾盈萬我兵不滿千輕進恐損威當  
厚集兵力一鼓殲之制府以爲然急調肅州索鎮兵合剿二十二

日突有賊數千自縣南阜川來鋒銳甚焚掠煙火漲天百姓奔迸  
警報還至城南五里許羅家營被蹂躪尤慘制府遣公迎敵時無  
兵城中有養傷兵數百公選五百人率以往至羅家營據山梁置  
陳次日賊分兩路至僞元帥康二麻子者尤驍果健鬪公曰當滅  
此而朝食耳諸弁勸曰賊眾我寡勢不敵宜早退公曰將軍死綏  
有尺進無寸退且我退賊偪沔城如百姓何如制軍何敢有再言  
退亂軍心者斬以徇遂挺矛匹馬入陳殺戮甚多而瘡痍之士不  
任干戈爲賊眾所蹙遂潰公方關弓射賊中之而馬忽蹶把總馬  
騰蛟牽馬至勸公乘公曰爾速去吾死此矣遂被害騰蛟以身蔽  
公亦死之制府聞大慟適王提督軍來援賊解去制軍回漢中飭

沔縣知縣馬允剛覓公屍二十五日得之身被七創面色如生昇  
過定軍山諸葛丞相墓前忽重不能舉夫役禱之乃行噫異矣方  
公之歿也母陳太夫人稟遣三子建功赴軍前效力大吏奏聞  
天子憫其兄弟偕亡賞建功千總職俾侍養仍賜帑金三百  
兩爲太夫人羞膳費洎五年康二麻子被擒上令鑿割將首級  
置至祠中地方官致祭以慰忠魂其爲聖主靈傷也如此公狀  
貌雄傑接人則和藹可親行軍有律秋毫無犯死之日沔民感之  
咸雨泣立祠以祀年五十有二昆弟三人兄自昌弟建功妻姚氏  
子二奉先振先

前史氏曰議者或咎公提數百疲卒見主客不敵不早全師而退

爲失持重之道夫勝負呼吸豈在眾寡旣臨鋒鏑忽而卻走是疆  
場無效命之人而巽懦鄙夫反得藉口量力以脫身矣公之所不  
爲也憶澍十一歲時謁公於里第所以獎許之者甚至今秋髮種  
種無所樹立而公之偉功大節銘鐘鼎而書旂常光日星而亙河  
嶽 聖恩優渥寵及子孫追維曩昔不禁慷慨係之

右傳張澍撰

國朝不丹家系家系圖卷三十五

三十一



麻允光 傳世雄等

麻允光廣西臨桂人由武生中式乾隆四十二年舉人揀選分發湖南補撫標千總五十七年遷直隸宣化鎮龍門路葛峪堡守備嘉慶元年委正定代防四年五月調赴川陝軍營十二月四川教匪爲經略額勒登保贊德楞泰所追剿匿於川陝交界老林者有數股提督王文雄率兵往來堵截賊約有萬人由老林入南鄭境通江賊乘勢與相應旣而老林賊分爲二一向西趨一以牽制王文雄之兵遂由沔縣之阜川竄略陽境欲渡嘉陵江闌入甘肅略陽鄉勇隄拒之賊乃由麻柳鋪遁旋由阜川偏官莊距沔三十餘里允光以陝甘總督松筠檄令隨副將韓嘉業往拒之相

持一晝夜賊眾悉出甑峒于分兩翼繞後山自上而下鄉勇後隊  
忽衝潰允光力戰歿於陣永昌協土門堡守備傅世雄肅州鎮標  
左營把總馬興禮直隸王家坪馬峪汛把總馬雲龍武舉成文錦  
劉元勳均死之事 聞得 旨守備麻允光傅世雄把總馬興禮  
馬雲龍成文錦劉元勳著咨部賜卹均廕雲騎尉世職襲次完時  
給予恩騎尉世襲罔替允光子國慶襲世雄子邦隆襲興禮子清  
襲雲龍姪貴秀襲文錦弟文繡襲元勳弟鴻勳襲世雄甘肅皋蘭  
人興禮甘肅蘭州人雲龍直隸正定人文錦甘肅肅州人元勳陝  
西長安人

右 國史館本傳

梁煥 王來用等

梁煥貴州清江廳人由行伍於乾隆三十一年拔清江協左營外委三十三年擢把總三十八年升千總四十年升湖南鎮筵鎮標右營守備四十七年擢湖北施南協中軍都司五十一年以失察屬員捏報到任日期褫職五十五年八月恭祝 萬壽經壇十月引 見得 旨著以守備用五十六年補山東登州鎮標右營守備嘉慶二年擢文登營都司四年正月隨提督王文雄督兵分剿陝西南路股匪於魯家壩毛堽河殲戮無算七月再添元股匪由紫陽縣竄回塔壩河繞至景家坪因官兵追擊遁入林箐王文雄率煥帶兵勇於林口悉力堵剿賊由東首衝逸我兵乘勝追擊賊

大潰八月王文雄分三路勦緝逆煥由石門子進殲戮多名十月  
西鄉縣王三槐餘黨陀姓等三股東西奔竄王文雄帶兵進勦嗣  
以老鷹崖大梁又有三千餘匪王文雄分兵夾擊之煥由北面仰  
攻賊眾披靡大潰是月署甘肅提標右營遊擊十二月王文雄自  
西鄉鍾家溝追至高家嶺令煥由高垵子迎擊賊退至梅子壩煥  
率弁兵窮追遇伏前後受攻遂歿於陣河南陳州營都司王來用  
南陽鎮標右營千總沈得榮左營千總李隨龍亦死之是年廣東  
督標中營外委穆志雄擊賊於康家河戰歿先後事 聞均 賜  
卹如例 賞雲騎尉世職襲次完時以恩騎尉世襲罔替煥子鍾  
林襲來用子章襲得榮子承勳襲隨龍子占元襲志雄子廷彪襲

來用山西朔州人得榮河南南陽人隨龍祥符人志雄廣東高要  
人由行伍擢是職

右 國史館本傳



世系三  
月  
庚  
子  
年  
一  
月  
三  
日

三三

陳騰龍 王文章等

陳騰龍雲南昆明人由武舉於嘉慶二年補曲尋協右營千總隨征湖南苗匪時賊屯洞洒大兵分道進攻騰龍偕副將那麟泰等隨總督勒保爲策應尋遷臨元鎮標右營守備三年正月隨勦四川教匪王三槐徐添德等股窺開縣境梁山萬縣賊亦蜂起時大兵雲集騰龍帶領鄉勇隨總兵百祥等由龍灣橋黃茅嶺正路進發賊恃眾抗拒我兵槍礮並施殲戮甚夥追奔五十餘里旋升左營都司九月首逆王三槐就獲騰龍與有功 賞戴花翎四年包正洪股匪於蚊蟲谿渡河總兵楊遇春百祥副將穆克登額分三路夾擊騰龍隨百祥追至南山坪賊結隊方行我兵三路並到合

力奮勦越山梁七殲二百餘人俘百三十五人轉戰數日騰龍受傷陣亡時貴州鎮遠鎮標右營守備王文章隨將軍富成勦賊死之雲南臨元鎮標右營外委薛鳳元擊賊於陳家場亦陣亡先後事 聞均 賜卹如例 賞雲騎尉世職襲次完時以恩騎尉世襲罔替騰龍子鶴齡襲文章子先沒孫應召襲鳳元子鼎襲文章山東掖縣人由行伍拔登州鎮標中營外委擢把總遷卽墨營于總乾隆五十六年升是職鳳元雲南建水人

右 國史館本傳

夏鈞 吳經國

夏鈞漢軍正白旗人由馬甲於乾隆四十一年補整儀尉四十二年補治儀正五十年補雲麾使五十四年補公中佐領五十六年承襲世管佐領旋襲三等輕車都尉五十八年授雲南景蒙營游擊嘉慶元年出師威遠剿捕猓匪二年隨征興義狃苗均立戰功四年川省邪匪滋事鈞隨經略額勒登保攻剿徐添德股賊匪師次城隍塢賊匪竄聚後槽我兵兩路分擊總兵楊遇春由桑樹坪前進額勒登保自率將弁由渡口截剿兵勇繞上後槽時對面山梁賊匪勢欲下山過溝直犯我兵值官兵繞至溝內將賊匪衝斷我兵齊聲下壓賊大潰自相踐蹋死者百餘人時山上之賊欲下

山接應我兵用礮轟擊賊多人乘勝搶上山梁追過大山數重殲賊甚夥鈞躍馬緊追猝被矛傷陣亡時都司吳經國守西路雙泉子卡盜賊首樊人傑等自西鄉竄至清水河經國力戰沒於陣先後事 聞得 旨夏鈞吳經國均著議卹事下兵部 賞卹如例議給雲騎尉世職襲次完時給子恩騎尉世襲罔替鈞子音登額襲經國湖南武陵人由行伍拔提標右營外委歷拔左營千總四十二年升江西南贛鎮標右營守備五十五年擢山東壽樂營都司嘉慶三年三月勦捕陝省邪匪以功 賞戴藍翎經國子懷仁承襲

右 國史館本傳



吳漣 采興等

吳漣甘肅皋蘭人由行伍於乾隆五十年拔陝甘督標左營外委五十一年擢前營把總五十四年升千總五十七年升甘肅西甯鎮標前營守備嘉慶二年正月隨勦川省教匪奮勇有功 賞戴藍翎以應升之缺升用六月升岔口營都司七月進攻方山坪駐走馬嶺山梁賊於營卡附近潛伏我兵偵知之追羣匪蜂起漣率兵迎擊乘夜轉戰賊大潰十二月署甯夏鎮標左營游擊四年陝匪西竄華陽是地爲四達之區巡撫永保虞其滋蔓督兵堵勦甫抵華陽賊分股排列以待不下數千人我兵扼山梁賊卽直前衝撲漣率兵迎擊士卒皆力戰漣馳入賊隊奮勇勦戮以力竭沒於

陣署甘肅蘭州城守營守備梁興甘肅固原城守營守備周鏞甘肅西北截堡外委徐見得廣武營外委張簡均死之事 聞均賜卹如例 賞雲騎尉世職龔次完時以恩騎尉世龔罔替漣子士蒞龔興子鳳鳴龔鏞子曰簞龔見得子天祿龔簡子起鵬龔興見得俱甘肅張掖人鏞甯夏人簡甯朔人

右 國史館本傳

楊虎 保德

楊虎四川成都人寄籍茂州由行伍於乾隆三十六年隨征金川有功四十年拔冕山營外委四十一年擢茂州營把總四十六年隨勦甘肅逆回屢著勞績升綏靖營千總五十四年升甘肅甘州城守營守備嘉慶二年教匪胡知和廖明萬季九萬等踞陝西紫陽縣境拒守汝洞二河總督宜縣巡撫秦承恩提督柯藩分兵進勦連破之賊遂聚於五作雲其地居萬山中四面陡崖賊築城抗拒虎偕都司白印斗千總馬龍候補千總張宗詒等率兵冒矢石攻之木城垂破賊猶困守越日燬木城克之知和明萬九萬遁墜水死紫陽境平得旨守備楊虎等各以應升之缺升用旋升金

塔寺協中軍都司三年復於雲陽開縣等處勦賊有功升俄卜嶺  
營游擊四年張漢湖股匪由五郎將西竄虎隨署巡撫永保追襲  
至終南山之華陽賊踞山分隊迎敵虎偕副將馬兆瑞參將富靈  
保橫擊之賊退竄老林山將踰山而逸虎復偕都統銜穆克登布  
協領西林布追入林內遇伏虎力戰沒於陣是年陝西洮岷協把  
總保德隨將軍宗室恆瑞擊賊於甘肅兩當縣城外賊潰德受傷  
陣亡先後事 得 旨楊虎著交部議卹保德照千總議卹均  
賞雲騎尉世職襲次完時以恩騎尉世襲罔替虎子進忠襲德子  
我春襲德甘肅甯朝人由行伍於嘉慶元年隨征湖北教匪有功  
擢甯夏鎮標左營外委二年給行營千總頂帶擢是職

右 國史館本傳

國史館本傳

三



國朝通志卷之六十四

三

程上德 梁揚光等

程上德廣東清遠人由行伍拔外委擢南雄協左營把總嘉慶元年二月隨勦湖北教匪六月克梁山奮勇有功 賞戴藍翎二年三月克四方臺敘功加一等六月克大垭口石卡木城斬馘甚夥升三江協左營千總四年調赴四川軍營擊賊於雲臺山偕廣東督標後營把總梁揚光外委譚福肇同沒於陣是年順德協左營千總許振超擊賊於白巖洞右營千總胡興茂擊賊於新正鋪提標中營把總崔聖傳擊賊於中軍壩貴州威甯鎮標右營千總王璟廣東肇慶協把總張誠惠州協右營外委許朝鳳擊賊於黃成砦肇慶協左營外委宋辛養擊賊於清水砦提標前營外委李萬

銓擊賊於鷹背場俱陣亡先後事 聞均 賜卹如例 賞雲騎尉世職襲次完時以恩騎尉世襲罔替上德子雄亮襲揚光子恩培襲福肇弟福慶襲振超子朝鍾襲聖傳弟盛富襲璟子登雲襲誠子尙義襲朝鳳弟朝升襲辛養子喜貴襲興茂萬銓嗣襲無考揚光興茂聖傳俱廣東南海人揚光由武生隨剿湖南教匪拔行營外委嘉慶二年升是職四年調赴四川隨參贊大臣額勒登保殲蕭占國張長庚冷添祿各股賊匪 賞五品頂帶綽克托巴圖魯名號興茂由行伍拔惠州協外委嘉慶三年洊升是職聖傳由行伍於嘉慶二年拔提標後營外委洊升是職福肇辛養俱高要人福肇由行伍於乾隆五十三年隨征安南著有戰績拔是職辛

養由行伍拔是職振超增城人由行伍拔新塘營外委於乾隆六十年游升是職璟貴州貴陽人以父應科官把總陣亡廕游升是職誠雲南昆明人由行伍於嘉慶三年游升是職朝鳳萬銓俱廣東歸善人俱由行伍拔是職

右 國史館本傳





楊洪新 張登龍等

楊洪新貴州遵義人由行伍於乾隆三十七年三月拔提標前營外委五月擢安龍鎮標左營把總三十八年遷大定協左營千總四十七年升定廣協右營守備五十三年升直隸新雄營都司五十九年升湖北竹谿營游擊嘉慶二年七月四川教匪竄大甯縣寶塔地方隨將軍觀成提督劉君輔堵禦面受矛傷八月進攻大竹谿九月隨劉君輔攻樵風洞奪其卡進撲轎頂山十月偕協領蘇勒芳阿冒雪帶兵殲大竹谿卡匪二十餘人十一月隨觀成等克轎頂山十二月偕游擊朱進廷堵剿長嶺等處三年正月隨劉君輔撲土地垵卡縱火殲賊多名二月賊竄青杠垵截擊之四月

借朱進廷等五路牽綴賊勢擊殲龍谿馬鬣嶺等處潰匪甚夥四年參贊大臣額勒登保率劉君輔等勦徐添德股匪添德遁洪新隨劉君輔等由墊江縣一面兜截連日轉戰於達州之麻柳場陣亡陝西延綏鎮標把總張登鼇亦死之時雲南昭通鎮標前營守備趙祥擊賊於廣安州之茶坪壩受傷陣亡四川順慶營千總虎正江擊賊於太平縣亦沒於陣先後事 聞均 賜卹如例 賞雲騎尉世職襲次完時以恩騎尉世襲罔替洪新子浩襲登鼇子玉樹襲祥子天章襲正江子得林襲登鼇陝西榆林人祥雲南昆明人由武舉拔補楚雄協左哨千總嘉慶元年升是職正江四川成都人由行伍拔外委節次隨征升是職

右 國史館本傳

國朝實錄續編

卷三十五 忠義三十四

三

同書不月表作不第

三

劉耀德 張錦富等

劉耀德山西代州人由乾隆丁酉科武舉人隨營效力期滿五十二年拔河南襄城營把總五十五年拔南陽鎮右營千總嘉慶二年升河北鎮左營中軍守備四年伍金柱等股匪在陝省之西路滋擾耀德隨經略額勒登保參贊德楞泰追剿先經總兵王文雄自西鄉之鍾家溝趕至高家嶺耀德等率同兵勇千餘由高塹子迎擊至曹家壩遇賊匪紛來奮力衝擊殲賊數十人賊匪退回海子壩我兵仍乘勝窮追突遇賊伏前後受攻王文雄馳回策應從南面山梁槍礮壓下內外夾擊斃賊七百餘名重圍始解耀德受重傷陣亡是年山西得勝路把總張錦富在陝西偏巖礮擊賊先



是三年山西汾洲營北總郭守方在松柳溝擊賊俱陣亡先後事  
聞得 旨劉耀德張錦富郭守方俱著各部議卹均廕雲騎尉世  
職襲次完時各給恩騎尉世襲罔替耀德子錫方襲錦富子灝襲  
守方子鎮國襲錦富山西大同人守方山西徐溝人

右 國史館本傳

蘇維龍 趙世德

蘇維龍甘肅固原州人由行伍於乾隆三十八年拔提標左營外委擢前營把總遷後營千總升陝西延綏鎮標左營守備嘉慶元年擢保安營都司二年隨征四川達州教匪燬鷹背觜巢乘勢追勦賊眾潰首匪陳有才就擒嗣以賊由太平縣青花谿撲陝西西鄉縣秋波梁維龍率兵迎勦多所斬獲賊復竄西鄉界三花灘維龍嚴兵防禦賊遂卻三年正月升陝安鎮標左營游擊是時賊馬步數千人竄南鄭褒城維龍率精兵四百設伏宗家營賊方肆焚掠維龍奮力衝出截擊後隊官兵適至面背夾攻殲戮無算九月張漢潮股匪由漢江西竄維龍據鄭家壩堵守賊不敢進四年漢

潮竄甘肅徽縣唐藏時維龍以署副將率兵督餉聞賊至分兵勇  
七百人迎擊奮力轉戰殲戮甚夥賊悉眾迎敵四面合圍維龍戰  
益急馬中流矢斃猶步行格鬪身受二十餘創罵賊不絕口被割  
舌而死山西蒲州協把總趙世德亦同時被害事 聞得 旨蘇  
維龍係綠營將領能如此盡忠用命較之退縮避賊者何啻天淵  
實爲可嘉可憫著加恩照參將例賜卹趙世德 賜卹如例均  
賞雲騎尉世職襲次完時以恩騎尉世襲罔替維龍子進功襲世  
德子凝襲世德山西臨汾人

右 國史館本傳

國朝耆獻類徵初編卷三百六十五目錄

忠義三十五

全亮

葉布冲阿等

佟世徵

齊默慎

黃定一

常明

三家保

伊蘭泰

王君佐

馬濤

孟魁等

朱射斗

羅定國

劉大成等

母之恭

劉應魁等

那全

金福等

李大發

汪有昂等

玉舒

張位中

冉斌等

施縉

楊正明

陳永年等

吳澗俊

朱廷柱等

百順

黃金柱等

王凱

庚音額

廣亮

李生瑞

楊開第

王永清

張成等

四庫全書  
卷一百一十五  
禮記注疏  
卷一百一十五



國朝耆獻類徵初編卷三百六十五

通奉大夫前署江西巡撫江西布政使司布政使湘陰李桓輯  
忠義三十五

全亮 葉布沖阿等

全亮蒙古鑲黃旗人杭阿坦氏由烏槍護軍於乾隆四十八年擢  
驍騎校五十四年授直隸宣化鎮都司五十七年調武清營都司  
嘉慶元年擢督標後營游擊四年川省賊匪張漢潮在階文一帶  
往來游奕全亮隨將軍恆瑞追剿至老柏樹地方由中路進攻賊  
匪搶占山梁恃險抗拒槍石雨下我兵不避艱險奮力仰攻賊匪  
力不能支從山後遁走尋追殺二十餘里斃賊六百餘名擒獲二

百十三名餘匪直向東北長壩一帶奔竄全亮首先帶兵上山中槍沒於陣先是二年護軍校葉布沖阿在陝西進口關擊賊陣亡烏槍護軍校德克登布在四川白巖山擊賊陣亡六年前鋒校崇福在湖北隨營擊賊陣亡先後事 聞得 旨全亮葉布沖阿德克登布崇福俱著咨部議卹均廕雲騎尉世職襲次完時各給恩騎尉世襲罔替全亮子綳僧額襲葉布沖阿子衮布多爾濟襲德克登布子哈明阿襲崇福子烏爾慶阿襲葉布沖阿滿洲正白旗人德克登布滿洲鑲紅旗人崇福滿洲正黃旗人

右 國史館本傳

## 佟世徵

佟世徵漢軍正藍旗人由馬甲於乾隆三十六年補鑾儀衛整儀尉洵升公中佐領選授陝西興漢鎮標游擊升甘肅提標參將調甘州城守營參將擢直隸大名協副將丁憂服滿補山東沂州營副將嘉慶二年正月檄勦川陝教匪時劉起榮股匪由紅土岡南竄至都司衙其地及水臺新店鋪魏家集皆新野鄧州之南路也三尖山李官橋皆入浙川內鄉之要路也世徵以尙書惠齡檄分堵都司衙之附近薛家集石橋泰山廟等地賊旣敗於水臺新店鋪奪路遁世徵等合兵掩捕俘戮甚夥六月攻冉文儔股匪於李華寺寺左孫家坪右梁家園皆有賊屯集相爲犄角惠齡帥諸將

三路進攻克其巢並李華寺山下深溝賊伏世徵等悉殲之三年  
文儔踞達州之大神山其香安坪土門埡皆出入路徑也世徵攻  
之克其砦四年張子聰股匪竄屯黃土壩世徵隨額勒登保馳至  
黃金坪追及賊隊賊方鴟張我兵人人奮勇大敗之逐北二十餘  
里世徵力戰創甚沒於陣事 聞 賜卹如例 賞雲騎尉世職  
襲次完時以恩騎尉世襲罔替子雙慶襲

右 國史館本傳



齊默慎 黃定一

齊默慎奇莫斯氏蒙古鑲紅旗人由官學生考取膳錄議敘筆帖式乾隆四十四年補理藩院筆帖式五十三年發往甘肅以知縣用五十六年補宜禾縣知縣五十八年丁憂回旗服闋仍在理藩院行走六十年授陝西畱壩廳同知嘉慶元年檄赴軍營二年勦四川太平縣等處教匪有功 賞戴藍翎四年張漢潮股匪被官兵追擊越山逃竄兩晝夜奔四百餘里至畱壩廳之通天觀是廳向無城池齊默慎在署辦事司獄黃定一協同彈壓猝聞賊至齊默慎將印信先付家人令赴軍營呈繳偕定一併力抵禦力竭同沒於陣事 聞 諭曰被賊戕害之畱壩同知齊默慎司獄黃定



一深可嘉憫均著照陣亡例議卹尋 賜卹如例 賞雲騎尉世職襲次完時以恩騎尉世襲罔替齊默慎姪玉秀襲定一弟志斌襲定一順天宛平人

右 國史館本傳

常明 三家保

常明滿洲正黃旗人赫舍里氏由間散於乾隆二十二年挑補前鋒四十年補護軍校四十三年補藍翎侍衛四十八年升三等侍衛五十六年授陝西舊洮營都司嘉慶元年升陝西鞏昌營游擊四年川省賊匪徐添德等滋事常明隨總督勒保由高家壩追剿至蒼溪之煙峯樓一帶地方賊匪正在焚掠間我兵奮力迎擊斃賊四百餘名生擒傅懷玉等二十四名餘匪奔竄嗣因張添倫等股匪復從雲陽地方會合賊匪聚有數股維時兵力甚單復抽帶兵勇二千七百餘名星夜馳赴往來截剿常明沒於陣五年高唐營游擊三家保在湖北遠安縣擊賊陣亡先後事 聞得 旨常

明三家保俱著咨部議卹均廕雲騎尉世職襲次完時各給恩騎尉世襲罔替常明子五十四襲三家保子塔思哈襲三家保滿洲鑲藍旗人

右 國史館本傳

伊蘭泰 王君佐

伊蘭泰富察氏滿洲正黃旗人由前鋒於乾隆二十五年補藍翎長三十五年遷前鋒校三十七年擢委前鋒參領三十九年授直隸廣昌營都司隨征金川有功四十七年遷雲南東川營游擊五十四年升參將嘉慶四年調赴提督七十五軍營協勦川陝楚教匪時七十五駐四川大甯縣之寶塔路堵勦張子聰股匪聞賊匪辛聰由陝之鎮平竄楚境之馬鞍山遂率總兵李紹祖與楚省官兵夾擊爾伊蘭泰駐一梳泉紅池壩等處防截張子聰黨之竄楚者五年正月隨七十五躡賊匪張子聰至馬鞍山之郎家洞分兵進擊賊拒戰甚力伊蘭泰躍馬入賊隊受矛傷陣亡是年世襲佐

領王君佐擊賊於辛口嶺死之先後事 聞均 賜卹如例 賞  
雲騎尉世職襲次完時以恩騎尉世襲罔替伊爾泰孫特克慎襲  
君佐子成襲君佐盛京漢軍正紅旗人

右 國史館本傳



馬濤 孟魁等

馬濤雲南太和人由行伍於乾隆二十九年隨征猛互被槍傷三十五年拔補提標左營外委三十七年升龍陵營左哨把總四十年調補右營把總四十九年升左營千總五十八年升昭通鎮左營守備六十年二月隨剿貴州銅仁苗匪在事有功嘉慶二年調赴四川協剿教匪四年升廣東和平營都司五年正月隨參贊大臣德楞泰剿賊至西鄉遇伍金柱股匪分督官軍奮勇進擊追奔二十餘里至陝西境茶爾山殺賊三百餘人濤受傷陣亡是年十月大軍防剿伍逆餘匪會川省諸賊爲大兵剿急折竄陝境盡入西鄉護理巡撫慶成令副將海洪阿督率將弁堵剿與賊遇於馬

家灣慶戰逾時以眾寡不敵戰死甘肅西甯鎮後營外委孟魁李騰龍左營外委李洪友永安營後營外委潘如桂俱歿於陣先後事 聞均 賜卹如例廕雲騎尉世職濤子灑襲魁弟璧襲騰龍子義承襲洪友子有忠襲如桂子福襲海洪阿別有傳魁騰龍洪友如桂俱甘肅西甯人均由行伍歷本職如桂於乾隆三十六年隨征金川屢戰被傷騰龍於四十六年隨剿循化回匪四十九年剿靖遠逆回魁洪友於乾隆五十六年隨征廓爾喀俱般賊有功

右 國史館本傳

朱射斗

余署令都勻之秋諸生陶虞楷乞路牒往胝弟病於川營初冬歸  
經貴陽謁寓館而謝問川事曰賊不難平矣貴州有朱公以虎將  
名於川賊爲膽寒今陣亡賊眾白日驚見馳馬突擊譟呼朱判官  
來自相竄殺川人感其忠益團義勇佐諸將殄賊賊不難平矣余  
太息曰嗚呼此朱氏孤乞銘之辭所稱三月十四日顯靈梓潼其  
後再三顯於江油之中壩與薄刀梁者得子說益信其孤匪誣其  
父而忠臣義士死不朽也記二十年前公起兩金川戰功任吾楚  
施南協都司晉襄陽營游擊兵畏民懷埒聲羊杜調遷西粵碑有  
去思越十年爲湖南鎮筵鎮總兵控撫苗夷有功於楚甚鉅今川

楚不靖而二邦相辱齒公之威略交賴以安不幸受害於賊川人無不呱呱如嬰兒失其母焉余爲楚人其何能不悲公諱射斗字文光輝亭其號先世爲山西洪洞縣人始祖明進士鼎鍊曾大父諱鴻應至黔家於貴筑大父諱繼昌爲諸生考任荔波營把總諱成林以公貴皆 誥封武顯將軍荔波公有良子三公其次也少讀書慨然懷班仲升之志投筆入行伍乾隆三十二年從征緬甸拔補經制外委嗣效能大小金川克寨卡奪碉樓 賞戴藍翎累功至參將再轉而爲總兵歷鎮單普洱福甯調補四川川北鎮計二十餘年中引 見者三渥承 殊寵黔楚苗蠢動奉調帶兵攻克沙都黃瓜等寨嘉慶元年護解首逆石三保入都 陛見 優



賜蟒衣二年春克平隴殲其渠石柳鄧苗疆平 賜幹勇巴圖魯  
名號旋撤湖南師回勦達州邪匪攻卡寨收復東鄉四年正月賊  
魁冉文儔授首二月連除賊黨二支旋奉 命以包正洪一股交  
公專勦自夏四月至秋七月往來梁萬墊江大竹鄰水閒身嬰矢  
石裏創數十戰卒殲包匪醜無孑遺於是 天子益慰注公賜騎  
都尉世職且有相機助勦別股之 命矣公既承 命會參贊德  
楞泰痛勦賊於入石坪又逐自巫山賊竄楚北又擊賊於界嶺賊  
竄陝西預度張添倫一股必由楚竄回巫奉乃令撤兵至則賊果  
自歸州焚掠夔門公與提督七公首尾夾擊賊眾窮潰未旬日聞  
陝賊復回應檄赴勦大破之通江追擊於竹峪關又破之德漢城



追擊於朱家壩經略額公以賊憚公甚指定奏明搜剿通南一路今年正月額公赴陝甘剿賊公奉檄調以其月之十五日由南江至達州而賊已過嘉陵江遂自順慶渡河迎剿賊竄西充迫逐之賊先夜遁督官兵鄉勇尾及追殺三十餘里斃其眾四五百人生擒百餘人拔出難民六七百人乘勝前進至高院場賊眾分奔上山公督兵陟躡忽兩溝賊來七八千人左坳又突出千餘人衝斷隊伍公左右盪突遇坎墜馬躍而上賊已近身猶奮力殺賊竟遇害 天子聞奏震悼 詔依提督咨部議卹川人痛公齋志捐軀皆感泣曰嗟夫朱公保障吾川之東北馬足殆徧賊怖呼判官所至賊望風披靡前後全活老幼男女不下數萬今顧爾耶樞回保

甯沿途哭奠舟車爲壘士庶遞相牽挽以至郡城先是梁竹諸邑  
醱金建生祠歿後朝暮走祭詫談靈異祝賊速殄以竟公志陶生  
所經而見聞者也昔睢陽云生不能報國恩死當爲厲鬼以殺賊  
乃於今見之矣公年五十有八元配王夫人繼娶夫人張氏有男  
一人女三人男襲世職 恩蔭入監讀書十一齡樹也卜本年十  
月二十八日曆公太慈橋先塋以行述徵余銘備言公平生孝友  
睦嫻敦詩說禮之實不贅誌誌其勳節之舉舉者銘曰

卅餘寒暑忠報 國毅魂爲雄尙殺賊取義成仁此其則

右墓誌銘張錫穀撰

公姓朱諱射斗字文光先世居山西洪洞曾祖鴻應徙貴州貴筑

家焉祖繼昌諸生父成林貴州荔波營把總皆以公貴 贈武顯將軍荔波歿兄弟三人奉母歸貴筑公就傅讀書復棄學入營伍以孝養且自樵采以佐甘旨乾隆三十二年以安順府提標後營從征緬甸功拔外委從征小金川大金川古噶密拉噶等處屢立戰功歷官川北平遠協把總貴州新添營千總 賞戴藍翎荔波營守備湖北施南協都司襄陽鎮右營游擊廣西賓州營參將貴州平遠協副將 賞戴花翎公沈毅果決臨陣敢戰自初隨征卽爲阿文成公所識拔計金川平經大小一百八十八戰身帶九傷殺賊無算斂礮樓十二所器械無算領積功劄十三次傷賞銀百六十兩五十年 簡授湖南鎮筵鎮總兵調雲南普洱鎮爲極邊

要隘民苗雜處私販偷越最爲邊害公按時巡察撫綏得宜民無  
越畔五十七年從征廓爾喀冬奉 旨補授福建福甯鎮總兵明  
年調四川川北鎮六十年征苗攻黨槽三家廟多斬獲克龍角峒  
北面山梁嘉慶元年克火麻營大山克黃土坡 賞蟒袍一襲又  
克平隴破貴魚坡斷首逆巢穴石隆寨要路梟首逆石柳鄧 賞  
幹勇巴圖魯名號明年苗疆平撤師回川北達州邪匪王三槐滋  
事冉文儔羅其清蕭占國張長庚包正洪卜三聘張添倫辛聰張  
世龍等先後應之川東擾亂官兵四擊賊眾分竄自達州巴州儀  
隴大竹鄰水開萬通江南江諸縣大爲賊窟公既回川北先破王  
三槐於金峩寺得 旨議敘既焚金峩賊巢進克茨菇梁商成寨



殲賊盈萬轉戰至黃家山山後三槐中槍遁破重石香鑪坪迎擊  
秋波梁竄匪擊退巴州賊屯領兵守保甯先是圍勦方山坪首逆  
冉文儔羅其清未獲而方山坪卽保甯所轄也奉 嚴旨責以奮  
勉立功三槐竄望溪邀擊之擒苟文宰等三十七名復馳擊三槐  
徐添德風門鋪角山茶店殺賊四百餘人得 旨褒獎明年偕副  
將穆克登布擊羅其清於儀隴雙路場追擊之四十餘里殺賊千  
餘人復擊退濟川橋賊擒張碎簾等九人斬首五百餘級賊圍儀  
隴馳應之賊潰進攻其清大鵬寨擒楊正富等三百餘人明年破  
冉文儔麻壩寨槍殺之蕭占國張長庚亦俱殄得 旨議敘包正  
洪踞鄰水公督兵自萬縣馳赴賊屯戰康家坪趙家場擒李有龍



孫成追逐之至閬縣九龍山擒馬官成至厚葉溝擒莫以才復及  
之小毛坪賊踞山公鼓兵直上正洪被槍死賊大潰得 旨褒獎  
賜騎都尉世職卜三聘踞三石坪破之張添倫辛聰竄湖北巴東  
已復竄房縣遇竄匪高二馬五公率兵迎擊斃百餘人高二馬五  
潛襲我營擊卻之擒潘受榮等時公感冒風寒病幾危以兵授提  
督七十五就醫夔州甫浹旬陝西竄回各賊滋擾通江南江經略  
額公檄公勦捕公力疾馳往大破之通江追擊至竹峪關復破之  
德漢城追擊至朱家壩賊望風遁由是經略奏公分勦通南明年  
張世龍屯聚草廟公領眾截殺多所斬獲而經略將赴陝西復調  
公至達州與總督魁倫會勦公從南江雷音鋪至達州賊乘隙自

定遠潛渡嘉陵江官兵自順慶渡河迎截賊走西充文井場比追及賊已夜遁公急馳十餘里及賊後隊追戰越三十餘里殺賊四百五百年生擒百餘人乘勝追至蓬溪高院場賊分奔上山公督兵直上突有賊七八千人來拒眾寡不敵公猶手刃十餘人遇坎墜馬歿於陣事 聞照提督例議卹 賜二等輕車都尉世職子樹承襲蔭戶部主事 子祭葬七年陝西獲戕公者賊目李自剛上命磔之設公靈致祭復傳首祭於公墓八年入祀昭忠祠 賜諡勇烈公自乾隆三十二年隨征至授命之日凡三十四年初受高宗純皇帝恩遇由行伍拔擢至副將又專闕五省每入 覲以老臣目之於請賀 萬壽聖節奉有汝舊人也不必來之 諭

皇上御極復蒙 異數錫賚便蕃凡有微功必邀 甄錄公感  
兩朝知遇臨陣奮勇賊畏之有朱虎之號雖被創嬰疾一聞賊卽  
抽戈而起嘗慨然曰某受 恩深重卽效命疆場尙不足以仰報  
萬一其感奮如此其在軍恩威兼濟軍容整飭訓練有方民不騷  
擾士皆用命尤軫卹難民拯濟者不下萬人公死兵民皆流涕賊  
旣退營卒倉卒收公骸歸葬遺其左足明日川民於戰處得之別  
葬於潼川府鳳凰山仙人掌子樹欲奉足歸葬川民哀畱之遂別  
爲基建祠思祀之弗能歸也

右傳阮元撰





羅定國 劉大成等

羅定國浙江黃巖人五世祖璫於順治十八年率兵萬餘獻銅山城投誠授右都督世襲三等男爵定國於乾隆四十五年承襲隸督標學習期滿引見得旨發往閩浙以參將用四十九年署水師營閩安協副將緣事鑄級五十二年選四川提標前營都司五十九年署川北潼縣營游擊嘉慶元年川陝楚教匪不靖侍郎英善檄定國截擊東鄉賊冷倖於萬鍾谿賊旋踞豐城場定國擊之有功二年賊匪羅其清冉文儔踞巴州方山坪互爲應援英善檄定國攻克之尋文儔將竄擾江陵谿白山場及江口糧臺且與王三槐等約會於尖山坪定國偕副將雷仁知州劉清夾擊之賊



大潰三年正月升廣東廉州營游擊三月赴儀隴鯉魚背軍營隨  
西安將軍宗室恆瑞進剿克李華寺孫家坪箕山等處八月擒賊  
目龔文玉十一月擊賊於青觀山有功四年正月擊賊於麻壩砦  
先登奪柵五月攻譚家河受石傷以功升廣西全州營參將六月  
隨總兵朱射斗擊斃賊目包正洪 賞戴花翎五年正月升廣西  
義甯協副將正月擊賊於文井場賊竄追至高院場賊踞山上定  
國登山擊之遇伏力戰沒於陣貴州歸化營守備劉大成都勻協  
千總陳鎮國把總胡佩四川建昌鎮標右營外委曾玉柱均死之  
事 聞俱 賜卹如例 賞雲騎尉世職襲次完時以恩騎尉世  
襲罔替定國子燦如襲大成子必龍襲鎮國子德善襲佩子龍泉

襲玉柱子殿元襲犬成貴州開泰人鎮國平遠人佩歸化人玉柱  
四川閬中人

右 國史館本傳

廣東省立第一中學

十四

母之恭 劉應魁等

母之恭四川松潘廳人由行伍於乾隆三十六年隨征金川殺賊受傷拔南坪營額外委旋擢建昌鎮標中營外委五十年遷中營把總隨征臺灣五十三年隨征巴勒布著有勞績五十六年升松潘鎮標右營千總六十年隨征黔楚苗匪歷戰奮勇 賞戴藍翎升瀘甯營守備嘉慶三年檄勦四川教匪於新甯縣普安場馳擊王三槐徐添德等股匪殲戮多名復勦於三匯口大鼻梁等處尋在東鄉縣之桃花坪奮力殺賊又於豐城場連夜攻勦身受重傷五年隨總兵朱射斗阿哈保於文井場勦餘匪躡其後隊追北三十餘里沿途殲三四百人生擒百餘人並救被脅難民六七百

人乘勝至高院場賊大隊奔踞山上預伏千餘人於山坳我兵方  
登山賊數千人蜂擁而下我兵旋退伏賊從山坳出衝斷隊伍之  
碁力戰沒於陣四川提標右營把總劉應魁亦被害時徐添德股  
匪分竄馬鞍山一帶總兵明亮擊之抵斑竹園遇賊騎數百自密  
林撲出我兵奮勇轟擊殲戮無算江西撫標右營把總張天祥力  
戰沒於陣其竄擾西茵鄉三百餘騎甘肅布政使廣厚令甘州城  
守營外委徐士伏瓦家堡外委姚鳳等繞後山掩擊戮二十餘匪  
突有步賊四百餘人從前山迎拒我兵奮勇衝擊戮賊目及八九  
十匪士伏鳳均受傷陣亡賊竄煙墩集明亮等分三面截擊俘賊  
甚夥湖南撫標右營把總鍾名諒湖北遠安營外委劉正秀俱沒



於陣先後事 聞均 賜卹如例 賞雲騎尉世職襲次完時以  
恩騎尉世襲罔替之恭子毓蘭襲應魁子喜襲天祥子廷松襲士  
伏弟士元襲鳳子國寶襲名諒子尙元襲正秀弟正新襲應魁四  
川閬中人由行伍於嘉慶二年拔外委四年隨勦教匪疊次力戰  
受傷升是職天祥江西南昌人由行伍擢是職士伏甘肅河州  
人嘉慶二年帶撒拉爾士兵勦賊開縣等處受槍傷三年調赴白  
馬關協勦鳳西甯人乾隆四十年隨征金川四十六年隨征循化  
逆回屢戰有功名諒湖南善化人正秀湖北東湖人俱由行伍擢  
是職

右 國史館本傳

國朝詩林卷之三

三

那全 金福等

那全納喇氏滿洲鑲黃旗人駐防荊州嘉慶二年以協領隨征陝西教匪五年二月從總兵多爾濟扎布勦張漢潮股匪於三岔河賊敗退官軍乘勝殺賊二百餘名餘匪分路繞出山溝直撲後隊將爲夾攻之計我兵奮勇衝突又斃賊百餘時值昏黑官兵不諳路徑左右受敵那全力戰沒於陣荊州駐防佐領金福防禦勝柱倭克濟納驍騎校拴柱薩勒夯阿南山前鋒藍翎委官佛爾果布俱同時陣亡事 聞均 賜卹如例 賞雲騎尉世職襲次完時以恩騎尉世襲罔替那全孫星安泰襲金福子續住襲勝柱子吉勒章阿襲倭克濟納子良玉襲拴柱子納蒙額襲薩勒夯阿子祖

德襲南山子豐伸布襲佛爾果布子玉恆襲金福威古特氏滿洲  
正黃旗人勝柱哈爾武克氏蒙古正白旗人倭克濟納瓜爾佳氏  
滿洲鑲黃旗人拴柱黃佳氏滿洲鑲藍旗人薩勒芬阿瓜爾佳氏  
滿洲鑲紅旗人南山他塔喇氏滿洲鑲白旗人佛爾果布王佳氏  
滿洲正白旗人

右 國史館本傳

李大發 汪有崑等

李大發貴州普定人出行伍於乾隆四十七年拔提標前營左哨外委五年擢左營左哨把總五十六年升右營左哨千總五十九年擢雲南曲尋協左營守備嘉慶五年三月隨勦四川教匪以成都將軍阿迪斯檄帶兵二百名守大甯之夜又巖八月徐萬富股匪竄大甯之羊橋壩游擊蔡天章馳堵王家河賊至戰不利退守山梁時大發以總兵檄駐守兩河口營聞敗率兵二百餘赴援適賊大隊直竄大甯大發奮勇擊之殲十餘名賊併力合攻大發左右衝突身受重傷猶手刃數賊力竭陣亡雲南鶴麗鎮標左營外委汪有崑中營左哨外委楊元宗右哨外委唐榮俱死之是年十



二月楊開甲股匪竄廣元縣貴州鎮遠鎮標左營守備張君泰隨提督七十五由覽石窖截賊西竄遇於三谿寺雪霧交作君泰首先衝擊賊敗奔右山梁復下壓君泰殲戮數名力竭沒於陣先後事聞均賜卹如例賞雲騎尉世職襲次完時以恩騎尉世襲罔替大發子天申襲有昆子廷英襲元宗子琪襲榮子福龍襲君泰子紹基襲有昆元宗俱雲南鶴慶州人榮永北廳人君泰貴州貴筑人由行伍拔撫標額外委乾隆六十年隨征黔楚嘉慶元年補外委以征小竹山賊匪功升把總以征興義苗匪大小數十戰燬苗砦三十處給五品頂帶三年隨征川匪升上江協右營千總四年升是職

右 國史館本傳

國史館本傳

一

175-470

175-470

玉舒

玉舒滿洲正白旗人伊爾根覺羅氏由烏槍護軍於乾隆四十八年拔藍翎長五十三年拔護軍校嘉慶元年授空銜花翎二年授委護軍參領時川陝楚邪匪滋事玉舒奉派出師赴陝效用五年三月隨副都統岱森保提督楊遇春等擊賊於西和是時張添倫等匪由秦州高橋折竄徽縣之麻沿河紅渠鋪偷踰白水江旋竄踞兩當縣之二郎壩壩係深溝兩面樹林叢雜賊攢集溝內我兵分兩隊先據左右山梁岱森保率玉舒等由溝內直入擊之賊不知兩面已有官兵亦直上分占山包左右山梁官兵迎擊之賊仍奔入溝內玉舒隨岱森保率兵衝擊賊一面抵拒一面狂奔官兵

合力追剿殲賊目李魁斃二百餘人生擒一百七十三人玉舒益奮勇衝入賊隊力戰陣亡事 聞得 旨委護軍參領玉舒著咨部議卹 賞雲騎尉世職襲次完時給予恩騎尉世襲罔替子拴住襲

右 國史館本傳



張位中 冉斌等

張位中江蘇上海人乾隆五十四年進士以知縣卽用五十五年  
選雲南元謀縣引 見調四川射洪縣五十七年署三台縣嘉慶  
二年署大竹縣時四川教匪屢徧縣境位中令糧戶結砦練勇設  
卡親率兵勇出境迎擊殲戮多名三年賊屯縣境橫互五六十里  
徧近城池位中與教諭馮灼文率兵勇堵截戮賊無算賊踞離城  
數里之賀家莊邱家壩將攻縣城我兵由迴龍場擊其後出其不  
意遂驚潰分路追擊賊退匿黃泥壩月華坪等處五年賊又竄縣  
境位中率兵勇於離城八里之東嶽廟截勦殲數十人位中自射  
騎馬賊一人以賊鋒至身受矛傷力竭陣亡四川懷遠營千總冉

斌達州營外委王耀龍俱死之事 聞均 賜卹如例 賞雲騎

尉世職襲次完時以恩騎尉世襲罔替位中子惇誼襲斌子廣壽

襲耀龍子儀襲耀龍四川圍中人乾隆三十二年隨征緬甸有功

五十一年拔鎮標右營額外外委五十六年補是職斌四川營山

人

右 國史館本傳

張君位中字立人江蘇上海縣人乾隆五十四年進士改知縣歷

署四川射洪遂甯中江所至與民敦禮義重廉恥民以此樂之嘉

慶二年調署大竹是時白蓮教擾川北由營山竄渠縣與大竹近

君調練鄉勇為堵截計十月遇於礮洞門殺賊三生擒三割首級

三十一年賊犯石埭口殺賊八賊趨柑子鋪率官兵禦之殺賊一  
再遇河灘殺賊三十三賊窺觀音橋鄉勇夾擊斃賊甚眾薄暮雨  
甚乃逸既而賊犯天華山君會官兵擊之殺二百餘生擒三首級  
二十六賊竄鄰水君分路截之殺賊八十騎賊一賊勢眾君堅立  
木砦設滾木礮石以禦十二月賊由興仁王家二場竄入境君禦  
之殺賊三百賊分在鄰水者萬餘至鄉勇不能禦退保周家場賊  
焚大安壩君馳禦之殺二十餘生擒賊易文祥次日遇七碑石及  
大安壩斃賊五十餘賊屯周家場縱火將遁擊之斃二百餘復分  
領首繞賊後夾擊賊潰由鎖石橋攻各卡木石擊斃五十餘乃退  
君分率鄉勇追勦殺賊五騎賊三三年正月賊徐添德擾運道與

張瓏登合遂圍城焚南北西三門君率縣丞熊泗教諭馮灼外委王耀龍分門奮擊復縋鄉勇出城斃賊甚多騎賊十餘戴花翎者中槍落馬爲賊眾挾去又傷賊一皆曰雷元帥也次日圍益急復殺賊百適副都統至圍乃解四月賊王三槐由達州至墩子河分兩隊君鼓鄉勇截殺越二日賊又分五隊君亦分鄉勇爲五殺賊二十又獲執大旗賊目掌號賊目各一明日復集斃賊三十餘生擒三而鄉勇殲賊於石橋鋪者亦獲首級十二五月賊撲柑子鋪斃百餘徐添德等乃復由堡子埡趨城君率鄉勇迎擊生擒四再遇躡水橋領首等槍矛並舉斃賊百餘賊潰北遁七月賊竄月漢坪分隊至雙河及楊通廟而陝賊阮正隆張漢潮闌入川與冉文



僑合踞大神山將渡河君沿岸堵禦八月賊攻義門關趨李家場  
擊卻之賊越山鄉勇黃瑄殺騎賊一團練首周發遠殺賊十餘獲  
白旗一賊乃東南分竄九月媽媽場殲賊五十賊由土地埡向磔  
門洞縱火兵勇各路奮擊殲七十餘十月徐添德等偪茅峯埡竄  
入永興場槍斃十餘賊分隊從波漩河至石橋鋪復殺二十餘賊  
乃由鎖石橋潛至木魚池遇伏殺賊三十餘各團領復斃四十餘  
騎賊一其撲石門口等隘者乃不能踰賊趨鄰水追擊之殺賊八  
十一月賊王光祖四出焚掠去城僅十里鄉勇併力衝擊斃五十  
三生擒二君告諭居民無不奮勉殺賊二百餘十二月賊攻月城  
若斃賊無算而堡子埡亦殺賊三十二賊徐添德乃由渠縣趨磔



門洞軍功張岱等殺六十餘賊欲爲久持計因縱火焚其巢殺二百餘乃退四年正月賊擾烏木灘薄城君約鄉勇三路進剿以白布印義勝字注名姓其上賊望氣懾由黃泥塢遁去追殺二十餘次日復殺執旗賊一旗書黃將軍字又獲賊日文添富林萬氏磔之賊越李家埡山鄉勇出其背斃二十餘八日徐添德從渠縣闌入圍城三月賊王登廷挾眾出山殺賊四是役也賊自斃及墜澗死者四十餘生擒一拔出男婦三百餘四月賊眾由蟲蟲溪渡達河鄉勇斃之槍斃賊四賊由涼風埡周家場連結擊卻之五月賊包正洪與王光祖合約萬五千人往來靡定六月竄東嶽廟去城甚近官兵殺騎賊三七月賊張子聰包正洪黨復至擊殺賊九騎

賊二由鄰水而遁自是連月堵禦民力凋瘵君設振三月活九萬餘口釐定規約一歸遠方被脅男婦資糧護送一被脅歸業者補入保甲一歸業者分別給與籽種一散給口糧責砦長約保一被圍之戶遺產清查居民由是帖然五年正月賊由墊江擾龍門砦殺賊四十賊或聚或散跡頗詭祕三月賊二千窺永興場及山梁砦直趨東流橋去城十里勢益張十四日大隊由新甯竄入境與徐萬富合君率官兵進禦十五日旦君率外委王耀龍至城外東嶽廟與賊相拒君鼓眾進戰殺賊數十賊眾鄉勇不能支君馬上發四矢斃騎賊一傷賊二賊冒矢合圍一賊以矛衝入君拔腰刀擊之賊傷眾賊爭進君力竭死之左巨指爲矛所折身被八創外

委王耀龍及家丁差役皆死先一日廟中地忽生一蓮光采甚耀  
人以爲君之祥也是日賊屯王家壩至十九日乃遁然城所以不  
破者君之功也大吏上其事奉 旨禦賊陣亡之大竹縣知縣張  
位中交部議卹君當縣多事時興利除弊籌畫無遺勸里甲互團  
練諭鄉村修砦遇警則親督戰死事者捐俸撫卹平居勸民息訟  
耕作以裕其食著萬竹居詩一卷父秦源生員祖成舉人曾祖麟  
子一惇誼襲雲騎尉

論曰君生沃土貌清臞書生也乃馬上殺賊衛民存城得死所偉  
矣哉

右傳阮元撰

施縉

施縉陝西定邊人由行伍於乾隆三十三年隨征緬匪三十七年  
拔督標右營把總四十三年遷左營千總五十一年升雲南廣南  
營守備五十二年調督標左營守備五十三年因安南內訌赴軍  
營候用五十六年擢督標中營都司六十年隨征黔楚苗匪閏二  
月大兵進攻大新砦石城縉偕都司姜敏功冒矢石援巖樹而上  
克之三月隨總兵珠隆阿等由上老虎巖進剿斃賊甚眾 賞戴  
花翎四月雲南總督福康安督兵攻竹子山縉護糧赴永綏遇賊  
奮力擊退 賞毅勇巴圖魯名號尋擢昭通鎮標左營游擊五月  
隨侍衛富蘭等由清水塘進攻賊首吳半生於蘇麻砦半生奔西



梁縉又借侍衛定西西甯等分兵抄入焚賊砦六月大兵駐大烏  
草河縉隨福康安率川黔兵攻克沙兜等處苗砦七月隨領侍衛  
內大臣額勒登保由盤黨南山梁進攻吳半生於雷公灘賊竄伏  
古峭營山梁復進擊斃賊六百餘八月隨提督花連布攻狗腦坡  
燬其砦十月賊首吳半生窮蹙乞降十一月從大軍攻克大坡腦  
德勝山等處大小木城石卡三十餘十二月隨福康安由地良坡  
進兵奪高斗山梁乘勝撲入苗砦獲賊目廖老慕隴老西餘黨四  
十人嘉慶元年正月大兵將由平隴收復乾州縉從護軍統領德  
榜泰分路進攻二月擢湖南桂陽營參將十二月隨雲貴總督勒  
保會剿湖北黃柏山邪匪二年仍隨大軍剿貴州狝苗三月由黃



巢山克關嶺四月隨勒保攻克巴隴壘險要苗卡進偪永甯克下  
山塘賊砦遂解新城圍五月縉借總兵張玉龍等分兵兩翼進克  
望城坡及碧峯山賊砦是月授雲貴督標中軍副將率兵攻羊腸  
山勦至新店生擒賊首梁阿站等經勒保奏入 諭曰副將施縉  
著勒保查明如果始終奮勉出力卽行咨部議敘六月隨勒保攻  
克水煙坪隘卡旋借按察使常明等設伏八角洞坡進攻阿捧燬  
賊砦十一生擒二十五人殲斃甚眾大兵進至卡子河縉攻克納  
賴坡雞灣砦閏六月攻普坪抵壩弄於五孔橋南渡水立解南籠  
圍進攻九頭山擒僞將軍陸寶貴焚賊巢克馬鞭田山梁七月赴  
普磨四路兜勦生擒韋七給鬢之妻賀阿妹等七人圍阿召山梁

李景砦八月那蜡比咱等處賊苗來援遇縉伏兵盡殲焉奏入得旨嘉獎之授雲南臨元鎮總兵大兵進攻安有大砦縉與布政使常明率兵勇攀藤葛上克山梁擒賊目賀阿豆吳阿降 優詔褒之九月縉借總兵扎郎阿等五路進兵隨勒保洗洞灑賊巢大兵擒韋七絡鬚報捷奏入縉與 優賞十一月隨勒保搜勦上下羅障等處直達關嶺前後破苗砦二十餘擒賊千二百三十餘調貴州安義鎮總兵十二月縉借總兵七格等搜勦各路生擒賊目僞光仙王老三僞軍師吳發徵等及餘賊四百十二人乘勝擊壩郁峭峒諸砦擒賊千三百四十餘自捧鮮至黃草壩賊皆淨盡別有松林紅巖逆苗糾石門坎香鑪箐等處賊眾負固抗拒縉率兵截

擊從山梁下壓賊大潰生擒賊目九焚砦十九 諭曰總兵施縉  
帶兵督策搜勦立將苗砦全數焚燒斬獲生擒不計其數實屬奮  
勉施縉著交部從優議敘三年隨雲貴總督鄂輝進勦雨薛巖師  
趙屯諸苗砦克賊巢五十斬級三千生擒千一百餘縉自攻克望  
城坡後累戰皆捷邀 恩賚者八 命部臣敘功者二優敘者一  
五年二月以川省邪教匪滋事貴州護理巡撫常明奏縉老成諳  
練久歷行閒可令統黔兵入川協勦 諭曰施縉前經勦辦狝苗  
最爲奮勇今帶領黔兵兵將熟識應令其自爲一隊不可分其兵  
力尋賊匪西竄 諭曰見在川西軍務情形著重施縉雖素稱奮  
勇但川省情形恐未熟悉勒保在川有年又與施縉相識添此生



力黔兵勦辦自更得力著勒保卽星速馳赴川西催集黔省兵丁  
會同德楞泰施縉將川西各股賊匪痛加殲戮以期勦除淨盡又  
諭曰帶兵各員內如施縉甫由貴州赴川於該處地利情形未能  
諳悉自當與李紹祖俱聽德楞泰節制三月縉率黔兵行抵潼川  
取道劍州武連與大兵會合是時嘉陵江西面賊在劍州踞石門  
砦仍由百靈廟橫出滋擾參贊德楞泰令縉率黔兵在潼川遏其  
西走時賊已竄過潼川 諭曰此時勒保已由金山驛馳赴中江  
施縉所帶黔兵就近早至潼川勒保卽可督同施縉上緊勦辦此  
股竄過潼河賊匪施縉係向隨勒保帶兵之人新到黔兵又皆係  
生力以之勦辦自更得手尋由潼川赴龔家口扼要路賊分出梅

子堽廣福堰焚掠村民縉隨總督魁倫提督勒保由大雙墩取道  
台擊殲賊百三十餘時藍號賊數百人偕白號賊南竄餘與青號  
線號賊合仍由原路折竄躡淺渡河縉追斬千餘我兵渡河復斃  
賊三百餘生擒百三十五人四月甘肅竄匪偪近龍安縉隨勒保  
由西充南部保甯境內追勦於盤龍驛漩河口殲賊三百餘匪眾  
奔趨保甯縉偕副都統阿哈保率兵追至黃連堽殺賊二百餘生  
擒二百三十五人嗣德楞泰馳赴開封廟擊賊偵知白號藍號諸  
匪竄合江口趣縉偕阿哈保等馳往截擊值賊匪分四路搶渡嘉  
陵江縉等亦分四路進擊大敗之 諭曰施縉所帶貴州新調官  
兵六千名自到川後屢次打仗得勝見在嘉陵江以西業就肅清



施縉著交部議敘是時高二馬五等股賊欲與藍白號賊合屯竹子山縉隨勒保往勦我兵登山賊不敢拒併力由山南衝下先是勒保以龍安西北兩面俱通番地分軍爲三親統一軍進自番境東北一軍由西北一軍由南以期三面兜勦南路一軍縉所率也縉甫抵山南見賊眾下壓縉卽督兵迎擊奮力急戰射殪賊目二賊冒死抗拒來益眾縉猝受矛傷陣亡事 聞 諭曰施縉身歷戎行素爲奮勇今被傷陣亡實堪憫惜勒保以伊與施縉在苗疆其事協力成功今因其臨陣捐軀憤不欲生自屬情所難已而終失此驍將朕之軫惻有非筆墨所能宣者勒保甯可不細思耶施縉著加等照提督銜賜卹並著勒保查明該員子嗣奏明俟服闋

後送部引見再行加恩勒保此時務應振作士氣上緊兜圍將高  
二馬五二賊或擒或戮以祭施緡忠魂尋議卹如例 恩給騎都  
尉兼一雲騎尉世職襲次完時給子恩騎尉世襲罔替子登科襲  
騎都尉官直隸提標前營游擊占科襲雲騎尉官陝西鹽茶營都  
司孫鵬襲騎都尉賜襲雲騎尉

右 國史館本傳

國朝書目考卷之三十三

三

楊正明 陳永年等

楊正明貴州黃平州人由行伍於嘉慶二年拔丹江營外委二年  
隨總督勒保征苗匪於安有山梁擒獲賊目韋抱賢查起秀得  
旨以千總補用三年四月補貴陽營千總六月遷四川崇化營守  
備四年五月隨將軍富成勦陝西教匪由齊家梁帶兵一千五百  
名進攻不避矢石賊皆遁十月張漢潮股匪竄張家坪一路正明  
隨副都統銜明亮將軍興肇率兵進勦殲二百餘名獲男婦八十  
四口並生擒首逆李潮奪器械無算 賞都司銜遇缺卽補五年  
二月經略額勒登保等奏龍山鎮汪家山秀金山等處連次勦賊  
實在出力之員共三十五人正明與焉 賞戴花翎四月賊竄甘

肅踞卡狼砦參贊大臣那彥成督兵由坳子山晝夜兼程進冰雪  
滿地泥深沒踝賊已先渡文縣河踞河北高山迎拒我兵渡河登  
岸衣履霑溼人人奮勇所向無前遂分兵三路正明由西首上攻  
賊乘高下壓我兵不爲之動戮執旗賊目多人復合兵追擊殲一  
千三百餘名並僞副帥李大旺簡正文楊開貴等奪刀矛虜馬甚  
夥卡狼砦遂平此次正明在前衝擊戮賊尤多以單騎出隊窮追  
身被三矛沒於陣是月宜昌鎮標左營千總陳永年汪世瑛擊賊  
於馬營陣亡是年直隸正定鎮標右營把總王百忍追賊於伏羌  
縣陝西西安軍標右營把總王民外委黃榮直隸龍固營把總魏  
曰連蔚州路把總閃美玉黃山營把總劉忠擊賊於伏羌之牛蹏



鎮陝西河州城守營千總馬旺擊賊於西園鄉俱陣亡先後事  
聞 諭曰都司銜守備楊正明單騎追賊三被子傷陣亡殊爲可  
惜著加等照都司銜子卹餘 賜卹如例均 賞雲騎尉世職襲  
次完時以恩騎尉世襲罔替正明無嗣弟正元襲永年子秉元襲  
世瑛子長庚襲百忍子廷統襲民弟明德襲榮子秀襲曰連子之  
珠襲美玉子逢時襲忠子殿元襲旺子喜元襲永年世瑛俱湖北  
東湖人永年由武舉補是職世瑛由行伍洊升是職百忍直隸行  
唐縣人由武舉補把總嘉慶元年隨征楚匪奮勇有功升是職民  
榮俱陝西長安人民由行伍隨征甘肅逆回屢著戰績拔是職曰  
連直隸正定人美玉宣化人忠清苑人俱由行伍洊擢是職旺甘

肅河州人由行伍隨征撒拉爾逆回拔循化營外委擢把總嘉慶二年隨剿陝匪著有戰績四年升是職

右 國史館本傳

吳瀄俊 宋廷柱等

吳瀄俊四川南川人由武生隸重慶鎮標左營爲兵乾隆六十年  
二月拔外委十二月擢把總嘉慶二年正月升千總七月署江南  
安慶營右軍守備四年七月湖北教匪滋事檄赴軍營隨總督倭  
什布擊竹谿縣之西溝八月賊踞歇馬河分軍爲三一由大路拒  
官兵一由谿河旁出抄官兵後一伏林中伺便夾攻官兵亦分路  
擊之瀄俊以副將孫清元檄領兵襲谿河殲二百餘匪九月截勦  
高龍寺賊匪敗之旋隨大兵進勦馬良坪功最受槍傷 賞戴花  
翎十一月進勦徐家壩賊殊死戰瀄俊首先衝入殲騎馬賊一人  
大兵繼進戮斃無算五年二月進攻馬盤山賊潰三月賊匪突至

白虎嶺官兵奮力仰攻賊拒益力矢石並下涓俊奮勇先登殲數  
人大兵乘勢追勦戮五百餘名生擒九十五人四月賊竄霧渡河  
涓俊冒雨力戰擊走之閏四月賊將北竄入陝涓俊率兵截之遇  
於七里溝首先迎擊短兵接戰戮馬步賊十餘人力竭沒於陣是  
年四月四川永甯營千總宋廷柱擊賊於環子山山東沂州營千  
總嚴中安擊賊於劉家壩俱陣亡先後事 聞均 賜卹如例  
賞雲騎尉世職襲次完時以恩騎尉世襲罔替涓俊子陽超襲廷  
柱無子弟廷棟襲中安子澍襲廷柱四川成都人中安山東滋陽  
人

右 國史館本傳



百順 黃金桂等

百順把岳忒氏蒙古正黃旗人任駐防荊州佐領嘉慶五年閏四月四川青號賊匪徐添德徐添壽等股匪擾至楚北由南漳峽口坪一帶東奔荊州富陽遠安大道總兵明亮湖北巡撫倭什布率兵分道追勦調荊州滿洲營馬隊官兵七十名派百順管領由均州趕赴大營行抵南漳馬家營去大營三十里突遇騎賊七八百人步賊數千人百順以兵少被困往來衝擊力竭陣亡明亮聞報令總兵王凱率湖南九谿營千總黃金桂澧州營右哨千總彭奉湖北宜昌鎮標右營把總徐正科左營外委甯光耀等馳援賊分隊攻撲凱等歷過四道山梁忽密林內突出馬步賊數百人蜂擁



國朝書局刻本  
卷之五十五  
三  
圍襄凱受矛傷陣亡金桂等同時陷入賊隊戰沒事 聞均 賜  
卹如例廕雲騎尉世職襲次完時以恩騎尉世襲罔替百順弟百  
興襲金桂子廷選襲奉子士定襲正科子大順襲光耀弟光祖襲  
王凱自有傳金桂湖南武陵人奉澧州人正科光耀湖北東湖人  
俱由行伍歷本職奉於乾隆三十六年隨征金川六十年調勦苗  
匪並在事有功

右 國史館本傳

王凱

王凱貴州貴筑人乾隆三十八年由行伍隨征金川有功拔補平遠協外委三十九年正月由駱駝溝進攻馬奈山梁又攻克孟格里絨布砦等處四月升四川建武營把總七月抵北路宜喜軍營攻克達爾圖山梁下部議敘尋升雲南昭通鎮標中營千總時小金川平移師大金川四十年七月攻克達斯拉木砦殲賊目一名八月攻克扎烏古險要礮卡十二月攻克達撒谷山梁殺賊奮勇賞戴藍翎四十一年正月遷山東武定營中軍守備二月隨大軍攻克噶拉依賊巢復下部優敘四十八年五月升湖北道士汛營都司五十二年遷衛昌營游擊 賞換花翎五十五年升湖南桂

陽營參將五十九年遷江南安慶營副將六十年擢浙江定海鎮  
總兵 諭曰定海鎮專駐海洋緝捕事宜最關緊要王凱著卽赴  
新任督率將弁於各要隘海口實力巡查務期洋面肅清以副委  
任不必來京陛見嘉慶二年四月巡撫玉德奏王凱不慣乘舟又  
無籌策難勝總兵之任奉 旨王凱係貴州人由陸路出身念其  
曾有勞績著卽馳往南籠交勒保畱於軍營帶兵酌量委用以副  
任使是年閏六月抵南籠軍營隨雲貴總督勒保由北鄉花江一  
帶征勦狃苗十月補貴州都勻協副將三年四月授湖北宜昌鎮  
總兵五月抵白浪軍營赴鄖縣堵勦邪匪適均州賊敗走黃龍灘  
凱迎擊之大兵自後夾攻殲斃八百餘人是年冬股匪張漢潮率

賊竄五郎分駐郎西巴東防賊折竄並爲南北兩路軍營策應凱  
防守嚴密自是至明年七月川東之賊不得闌入楚境四年八月  
賊由湘泗嶺窺房縣凱擊敗之五年正月賊由王家山竄房境凱  
又擊敗之三月馳赴宜昌敗賊於東湖賊聚竄匿深山乃密探賊  
蹤與總兵孫清元互爲犄角遇賊則併力夾擊多有斬獲閏四月  
偵知賊眾來窺北峯寺等處督同副將佛甯守備汪鉉亮周長泰  
擊之斃賊三十人擒賊目一人時青號賊徐添德等裹脅較多悍  
鷙誘詐爲諸賊最乘襄陽兵單四散焚掠經官兵勦敗遂奔當陽  
遠安竄踞馬鞍山官兵四面圍攻凱由左山梁抄上殲斃甚眾賊  
走馬家營凱率佛甯等分三路擊之賊亦分馬步兩翼拒敵復分



步賊截我兵後路凱力戰賊稍卻佛甯烏爾卿額擊散兩翼賊匪  
衝過四道山梁凱馳馬前進突有伏賊五百餘自樹林中逸出悉  
眾來犯凱手弓斃三賊猝中矛傷死之事 聞得 旨總兵王凱  
在軍營數年甚爲出力今臨陣捐軀深堪軫惜著加恩照提督例  
賜卹尋 賜祭葬 予諡勇壯 賞騎都尉兼一雲騎尉世職子  
國華襲次國瑞嘉慶元年二品廕生見官工部候補主事

右 國史館本傳



庚音額 廣亮

庚音額鈕祜祿氏滿洲正白旗人乾隆二十六年襲騎都尉四十年充三等侍衛四十一年隨征金川累戰有功四十六年遷二等侍衛五十九年授山西東路營參將嘉慶四年檄勦陝西教匪五年高戴二姓賊擾略陽縣屬之金池院等處時總兵扎勒杭阿在何家崖防堵聞信卽率庚音額及陝西西安鎮標中營都司李生瑞山西平遠營守備楊開第等帶兵馳赴遇賊於糧馬臺之木瓜橋官兵僅數百人賊愈集愈多庚音額奮勇迎擊受傷陣亡是年賊匪竄鎮安縣之五峪溝焚民房防守之游擊廣亮率兵出擊賊從五峪溝迎拒廣亮被圍力戰手刃二賊受傷陣亡先後事

均 賜卹如例 賞雲騎尉世職襲次完時以恩騎尉世襲罔替  
庚音額子蘇楞泰襲廣亮子如山襲廣亮赫舍里氏滿洲鑲黃旗  
人由親軍翎長於乾隆四十四年遷親軍校四十六年擢三等侍  
衛五十七年授陝西西安營都司嘉慶二年升是職

右 國史館本傳

李生瑞 楊開第

李生瑞陝西西安人由漢軍領催出旗撥綠營隸籍西安乾隆四十六年六月拔補陝西白土營經制外委五十七年正月拔補興漢鎮中營把總嘉慶元年九月拔補本營千總二年二月升西安軍標左軍守備三年九月升中營都司四年九月隨總督松筠督辦團勇堵禦賊匪時賊匪楊開甲張士龍等因經略額勒登保督兵痛勦窮蹙北竄欲入陝生瑞隨松筠馳至漢中守禦甯羌州之鐵鎖關毛埡子麥子坪及南鄭縣之大小壩關蒼坪各卡隘賊目鮮大川阮正隆等屢次攻撲各卡生瑞率義勇奮力擊退五年六月額勒登保會諸路兵勦賊於棧西老林山勢險峭生瑞隨總兵

扎勒杭阿當賊西面賊故欲東竄額勒登保乃檄諸路兵裹糧從老林東爬羅搜捕賊始併力西竄及官兵遇賊於木瓜橋奮勇鏖戰賊集益眾生瑞隨扎勒杭阿參將庚音額俱死之同日陣亡者山西平垣營守備楊開第事 聞得 旨李生瑞楊開第咨部議卹均廕雲騎尉世職襲次完時給恩騎尉世襲罔替生瑞子建業襲開第子廷彪襲開第直隸涿州人

右 國史館本傳

王永清 張成等

王永清山西靈邱人由武舉效力督標於嘉慶二年補新平路千  
總三年偕水泉營把總張成平魯營把總蒯漢基歸化營把總董  
瑞偏關營把總師舉隨勦陝西邪匪五年在糧馬臺擊賊奮勇爭  
先殺獲甚夥力竭陣沒成漢基均於五年在法寶山陣亡瑞舉均  
於五年在西鄉縣陣亡事 聞俱 賜卹如例 賞雲騎尉世職  
永清子珍襲成子攀龍襲漢基子世平襲瑞子世恆襲舉子維藩  
襲成大同人由行伍於乾隆五十九年拔補平魯營外委嘉慶四  
年升本職漢基山西左雲人由行伍於乾隆五十年拔補平魯營  
外委五十八年升本職瑞大同人由行伍於乾隆四十三年拔補



國朝三才人考卷之三十三

三十一

懷仁營外委四十九年升本職舉大同人由行伍於嘉慶元年拔  
補大同鎮標右營外委三年升本職

右 國史館本傳

國朝耆獻類徵初編卷三百六十六目錄

忠義三十六

王文雄

鮑桂

高懋等

景坤

孫佑等

富勒渾

花尙阿

六達色

張應宗等

楊大貴

陳俊等

富成

姚士華

鄧文元等

李紹祖

沈慶春

蘇殿魁等

保洪玉

馬凌雲等

陳得欽

閻臣等

海洪阿

穆克登布等

哈國瓏

梁俊士等

徐萬甯

金克俊

張君泰

周仁

國朝文獻類考卷八

--	--	--	--	--	--	--	--	--	--

國朝耆獻類徵初編卷三百六十六

通奉大夫前署江西巡撫江西布政使司布政使湘陰李桓輯

忠義三十六

王文雄

王文雄貴州玉屏縣人由行伍於乾隆三十二年隨大兵征緬甸三十七年隨征金川拔清江協外委三十八年升上江協把總尋升撫標右營千總三十九年擢朗洞營守備四十年攻木思工噶山碉率兵先登槍丸穿脛骨不退 賞戴藍翎尋擢湖北施南協中軍都司四十一年金川平大軍凱旋 賜宴於紫光閣 賞緞六端銀四十兩四十八年擢山東兗州鎮標中軍遊擊 賞戴花

翎五十三年擢臺莊營參將五十七年擢直隸通州協副將嘉慶元年調赴湖北軍營勦捕邪匪四月隨提督慶成攻劉家集於白河對岸誘賊渡河旋偕遊擊穆克登布奮擊斬獲甚多攻棗陽之梁家岡又攻張家壩破賊營二十五 賞法福禮巴圖魯名號八月賊圍鍾祥敗之追至雙溝殺賊千餘十月擢河南南陽鎮總兵十一月攻草店賊巢不克乃以兵夜襲破其營殲四千人生擒二百餘十二月賊分竄河南 命以兵二千回境堵禦二年正月敗賊於禹山二月又敗之於鄧家河境內悉平三月湖北襄陽竄賊焚保安驛文雄由信陽羅山追勦至裕州四里店值官兵與戰從旁攻入賊遁閏六月息縣奸民張雲路假稱邪教聚眾滋擾文雄



馳往擒治之悉就獲七月 命率所屬兵千餘赴襄陽時賊首姚之富等由興山奔房縣分竄保康界內近徧南漳文雄駐軍五盤山扼其衝要八月賊又焚掠白虎頭峽口等處馳往殺數十人移營峽口俄又有川賊從遠安竄南漳之鹿坪來告者急率兵迎擊遣襄陽遊擊賈永吉攻柞峪南陽都司范從志副之守備鄭永泰攻辛家坪守備吳鎮州同俞克振副之文雄親至報信坡攻其大隊賊敗走追至羊角山賊復拒戰部將射中其魁乃潰追殺十餘里斬首五級獲其器械馬羸無算賊又僞以數百人迎敵潛糾眾從東小路趨南漳城文雄偵知密遣兵設伏百步梯以火攻之墜崖死者千計九月以兵二千赴陝西河南界中禦賊且防興安江

岸三年正月賊首高均德糾賊婦齊王氏擾關中文雄往來督戰  
皆克捷賊不敢東窺豫境二月首逆李金張添文擾郿縣整屋文  
雄以兵迎擊賊馬隊焚焦家鎮擊斃數十人復有大隊賊自林中  
出文雄奮力截擊火器連發殲賊五百生擒三十餘乃西遁亟整  
兵追襲行數里至圪子村遇賊萬餘猝至文雄令兵勇張兩翼賊  
亦左右來拒戰爲火器所擊退旋分四路撲我師又敗之遂悉眾  
列十數隊馬步聯絡圍數重文雄爲圓陣外向擊之賊不敢近又  
騎賊千餘來躡營令籐牌軍大呼奮躍而出賊馬驚返奔乘勝追  
殺槍殪賊目王正奇遂大潰陝西巡撫秦承恩錄文雄功入奏先  
是焦家鎮捷聞時 命賞提督銜至是 諭曰王文雄所帶兵勇

不滿二千當賊數倍之眾接仗五次殲賊二千餘人實堪嘉獎所  
有固原提督一缺著王文雄補授以示獎勵三月追至伊家衝殺  
賊八百餘賊目三餘分竄翔峪澧峪進攻之翔峪賊敗竄澧峪皆  
殲焉五月敗高逆於盤屋六月敗賊首阮正通於南鄭七月賊張  
漢潮等於南鄭東北竄文雄冒雨疾馳兩晝夜至廉冰塢及之賊  
據山隘山下皆稻水深徑狹見官兵至輒連騎下壓文雄列礮隊  
仰擊賊傷亡者眾分馬步隊潛從左右翼截我兵後我兵三路擊  
敗之殲賊千餘八月阮逆等七千人竄西鄉西流河據銅廠山梁  
設伏文雄遣州判張聖祐外委王廷英破其伏自攻中堅斃千四  
百生擒張金等八十三人四年正月陝甘總督宜縣所屬兵命

文雄與西安將軍恆瑞分領之專勦陝境竄匪 諭曰嗣後有川  
匪闖入陝境往來自如者惟伊二人是問總之邪匪必不可赦良  
民必不可誅勦撫兼施方爲正辦惟應恪遵指示認真堵勦上報  
皇考委任之恩下救黎民倒懸之苦此我君臣所當共勉者也尋  
賊賊於魯家壩毛垵河駐兵老魚壩 諭曰王文雄在老魚壩駐  
守藉口防賊其實觀望逗遛又蹈積習此時宜縣秦承恩將離任  
王文雄務須幫同恆瑞認真堵勦儻再涉遷延則軍法具在毋謂  
寬典可以屢邀也四月恭逢 覃恩 誥授振威將軍七月設伏  
倒水洞賊目苟文明等首逆冉添元竄沙田壩文雄令守備劉  
耀德等赴箭桿山勦捕督兵繼進大敗之追至景家坪殲賊百賊



奔皮貨鋪又大敗之四川賊首龍紹周竄入黛池壩欲與冉逆爲  
應文雄於貫子山扼之不得入其自東南至者僞稱齊家營粹與  
文雄兵遇亦被殲二千餘 上嘉之九月黃號賊伍義蘭藍號賊  
曾六兒據老鷹崖文雄分兵三路躡險上殲賊千餘生擒李智花  
等百五十人餘竄金竹溝冒雨追擊敗之賊遁入川又敗逆賊王  
三槐之餘黨於牛頭山十月滅首樊仁傑唐大信等竄西鄉境內  
肆擾文雄以一旅之師四出抵禦嘔血數次力疾督師仍多斬獲  
上溫諭慰勞之十二月黃號等賊復自四川奔入陝境文雄令遊  
擊梁煥等擊之自鞏會家壩竄賊甫追及而梁煥兵遇伏幾殆文  
雄救之殲賊七百解其圍疾復作 諭曰王文雄帶兵力戰兼以



焦急血疾復作實堪憐憫可在後營略加調養既而賊之匿川陝  
界中老林者潛伐樹開道越山竄南鄭分眾由沔縣走略陽欲渡  
嘉陵界 諭曰王文雄堵禦不嚴以致賊匪分股奔竄將入甘境  
本應治以疎縱之罪姑念王文雄所帶兵勇本屬無多且平日尙  
屬黽勉見又患吐血病證是以暫行寬宥松筠可將此旨傳諭王  
文雄令其倍加奮勉協同心力堵剿務將此等竄匪速行剿盡或  
截回川省以期立功自贖儻再有疎縱必將王文雄按律治罪五  
年三月 命聽陝西巡撫台布調遣四月賊自甘肅竄回文雄敗  
之於洋縣 諭曰王文雄係本省提督久未見伊奏報打仗殺賊  
亦不知在何處駐守此次推斃數十人並未痛加殲戮而聲敘情

節亦不明晰該提督不過借此一奏塞責又可安坐軍營稽延時日尙未除從前疲玩積習若不思奮勉出力仍前懈玩必將伊從重治罪五月敗賊楊開甲等於土門關六月唐逆竄西鄉節草大祥等煽據險分屯文雄分兵三路夜抵賊巢賊臥未起攻之連破其營追剿三十餘里生擒馬振川等百餘人 諭曰川省竄匪由紫陽闖入西鄉該提督分路進擊乘賊匪酣睡猝不及防之時攻破賊卡斃賊數百名所辦深爲可嘉王文雄著交部議敘該提督當倍加感奮趕緊剿辦所有西鄉一帶堵剿事務卽專交王文雄辦理若能使川北賊匪不致乘閒闖入將來尙可邀恩王文雄見任提督本有奏事之責此後得有勝仗如距經略軍營不遠自可

報明額勒登保具奏備自爲一路相距經略軍營較遠當卽自行具奏不必轉咨台布也七月騰龍逆於魏家寨是時唐逆與之糾合文雄在黑山萬曲灣火石埡山王廟等處屢敗之賊竄四川之太平未幾甘肅高二馬五及戴家營賊竄入西鄉堰口窺縣城擊敗之追斬賊百生擒林德義等八十人二十四日偵賊倚法寶山潛屯夜令都司哈國瓏自喬家店副將鮑桂等自索羅觀親率都司鄭飛龍守備孫佑自中路進擊賊擲石抗我師文雄身先士卒奮力仰攻突有騎賊從溝中出截我後山上賊由索羅觀閒道出撲鮑桂兵文雄急救之賊遂乘勢悉眾下山鏖戰至午未少卻賊急圍文雄左右衝擊以眾寡不敵被創十餘處猶力戰賊刀矛蟻



集斷其左臂墜馬下伏地向北呼曰不能出力仰報 君恩矣遂  
卒 上覽台布奏批曰垂淚覽之復 諭曰該提督自到軍營以  
來打仗殺賊甚爲出力今追截高二等股匪復身先士卒直前奮  
擊因前調粵兵未到而原帶之兵日久不無疲乏以致眾寡不敵  
殺賊陣亡深爲可惜著加恩賞三等子爵卽令伊子承襲應得卹  
典該部察例具奏並著台布派員將王文雄靈柩沿途照料送往  
貴州原籍以示軫卹因思王文雄尙有老母年逾八旬在原籍居  
住猝聞伊子陣亡之信老懷倍益難堪念之尤深憫惻著傳諭琅  
玕如伊母在省城居住卽親自前往面傳恩旨優加存問用藩庫  
銀一千兩給伊母爲伊子治喪若在玉屏縣原籍卽著派同知一

員齎銀前往並將卹賞恩旨傳知伊母再王文雄見有應襲世職  
著琅玕查明王文雄見有幾子先行具奏其應行承襲之子俟服  
闋後再行給咨送部引見並著琅玕隨時賙卹伊母以示恩注六  
年二月 諭曰據長麟奏拏獲前此戕害王文雄之賊目馬應祥  
一名移送陸有仁覆審著陸有仁將該犯審訊明確辦理後割取  
首級書王文雄牌位將首級致祭以慰忠魂而伸眾憤仍將首級  
裝入木籠派人解往貴州王文雄原籍並行文琅玕傳諭王文雄  
之母告以此賊目馬應祥從前戕害伊子今被擒本欲生解貴州  
寸磔祭奠因路途遙遠恐有疎虞是以卽在陝省寸磔已於該處  
設伊子牌位致祭茲特將馬應祥首級解往令伊家自行致祭不



獨可慰王文雄之靈並可洩伊母悲憤也四月 賜祭葬如例  
命入祀昭忠祠 予諡壯節應得子爵承襲十二次子開雲以員  
外郎襲九年補授戶部山東司員外郎見任掌山西道監察御史

右 國史館本傳

公王氏諱文雄字殿宣貴州玉屏人以行伍起家歷官固原提督  
誥授振威將軍晉贈建威將軍自曾祖以下皆封贈如其官七歲  
知讀書十二通五經性高邁伉爽偶應童子試列前茅轉苦之竟  
棄去乾隆丁亥公年十九時緬酋蠢動大學士傅忠勇公經略滇  
南道由玉屏公慨然曰懷鉛握槧此小儒事大丈夫當爲班超傅  
介子立功萬里外迺子身獨騎至軍前聞賊至則慷慨請戰大帥

奇之命隨所部至老官屯攻柵寨克沙河徇漢塔持短兵斫賊營  
掀其木城磔其石與賊搏賊股慄明年駐永昌赴龍陵忙市又明  
年駐野牛壩復征老官屯八戰八捷緬甸平大帥入薦以親老謝  
退習兵家言一年餘若有所得壬辰四月金川土司反公復出隸  
阿喀木雅軍營攻舊南山梁三戰三捷大學士溫公大奇之以功  
註冊隸清江協癸巳正月隨副都統額公進征大金川之控喀二  
月隨參贊海公進攻昔嶺三月撲碉奪嶺矢石傷股不退攻益力  
遂克之十月進兵小金川由東路攻資里南北山梁阿喀木雅木  
蘭埔大鞞路頂宗明郭宗美諾諸界鐵其營殲其酋剗酋長首懸  
於竿負之而趨所獲牛馬器械無算公之從軍金川也終日荷戈

予帕袴鞞四出搜賊士卒非笑之將弁亦未之奇也大將軍章佳  
文成公召見與語大奇之親執卮酒以賜曰若好男子飲此出殺  
賊取首級歸復飲若連進三大卮呼而出一時得十數首級以  
獻且索飲文成取巨觥與其飲大醉公得受知於文成益感奮甲  
午正月連攻喇穆山梁二月攻登古羅博瓦六月攻色溯普累功  
補朗洞右營守備乙未正月攻空薩爾山梁賊眾叫譟大小搏戰  
三日夜乃克之四月攻木思工噶右山峯石礮城地屬賊藪縣巖  
背面多蒙茸密箐仰眎絕壁千丈封狐跳舞其上下臨惡礮蝮蛇  
綦綦然吞人血有聲當是時兵不滿千且食盡士卒大怖公一呼  
而進曰此吾效命之時也攀條緣木直躋其巔手刃數賊藥箭雨

下鉛丸雲集公戰益奮眾士憤激各揮短刀冒矢石直前以一當百大破碉城大將軍上其事拜藍翎之 賜是年冬克科布曲山梁進擊索隆古又克刺烏喇進攻格隆古則朗噶了口亦克之遂由雍中喇嘛寺直入噶喇伊巢奏入擢湖北施南協中軍都司丙申二月克噶喇伊索納木擒大小頭目金川平 王師凱還三月隨章佳文成公入 覲 高宗純皇帝駐蹕良鄉行郊勞禮 命文武百官皆以戎服見 賜宴紫光閣論功行賞五月公 陛辭出都之施南任旋調永順累署常德保靖九溪遊擊癸卯六月授山東兗州鎮中營遊擊拜花翎之 賜戊申四月擢臺莊營參將壬子四月擢直隸通州協副將嘉慶丙辰春正月 今上嗣位奉 恩



詔蔭一子是時白蓮教起賊勢張甚四月公赴湖北勦賊抵軍營三十餘日大小之戰二十五 天子特賜法福禮巴圖魯名號賚以銀七月攻青潭至紅土山先設伏兵於山坳賊遁走伏兵突出左右縱擊賊偵知領兵者乃金川猛將王將軍也各錯愕不知所爲八月進兵鍾祥縣破賊於襄陽之雙溝擢河南南陽鎮總兵官冬十一月進攻草店不克佯退夜二鼓風雪大作公趣甲士銜枚疾行乘賊酣睡奪其營二十餘俘其魁餘賊羅拜乞免死不敢反公威名大著賊相與語曰黑夜劫營怕王總兵丁巳春湖北襄陽竄賊焚保安驛公由信陽確山追至裕州六月奸民張雲路擾息縣討平之遂自息縣赴鄧州領所部馳往襄陽協勦議由南漳進



兵時麾下兵僅千人賊眾累萬部將恐戰不利勸守南漳且請濟  
師公曰楚地官民思藉我兵爲保障今賊至不擊人困不救上負  
廟堂簡任之重下失士女企望之心況賊人遠來宜乘其乏若遷  
延時日則彼勢日滋我軍益餒將奈何且賊眾烏合易與耳何懼  
爲乃分兵三隊遣襄陽遊擊賈永吉往攻柞峪南陽都司范從志  
副之守備鄭永泰往攻辛家坪守備吳鎮州同僉克振副之公自  
以一軍赴報信坡其大隊賊潰散部將射之中其渠奪其兵械童  
穉婦女被掠者錄其姓氏招戚屬遣之歸民間扶攜老少感泣之  
聲震數十里九月以兵二千赴陝禦賊戊午賊帥李金擾郿縣蓋  
屋公提兵出遇賊於途且戰且行一日夜至蓋屋西之焦家鎮迺

陳兵於武廟前分爲兩翼賊左右來拒兵乍合賊退分爲四路我軍擊之賊又列爲十隊我軍圍之賊又變爲圓陣皆殊死戰不可破公躍馬大笑曰賊亦知有兵法乎賊亦笑而應曰誠如公言公宜速避公用火器中過山鳥猝擊之賊驟退忽有執矛百人突前挑戰部下欲出公急止之俄而賊大至煙霾之中膝行伏地希潛入壘公覺之殲殺數百人賊退休於樹下是役也將士平日會食至日中昃裏創吮血力疲腹餒火藥鉛丸殆盡賊將復戰士卒惶懼公下令曰敢有譁言亂軍心者斬敢有左右易處亂行列者斬衆皆肅然迺遣敢死者飛調軍火東西衝突賊稍稍散堡砦之民數十百戶各具牛酒饋餉軍士得食氣復壯調軍火者亦至公令

饋食之人於廟後林樹叢雜間蹴踘揚塵爲疑兵頃刻塵埃蔽天  
賊馬隊突來公令精兵躍出斫賊馬足賊馬驚駭賊眾大亂我師  
乘風縱擊吼聲如雷流血成澗餘賊遠颺西安解嚴由是西安士  
民建生祠於武廟之側塑公像而奉祀焉奏 聞擢授固原提督  
恩賞金玉文綺己未七月賊將龍紹周入黨池壩公扼之於貫子  
山賊不得入其自東南至者僞稱齊家營猝與戰殲賊二千餘人  
九月生擒李智花於老鷹巖逐王三槐之黨於牛領山十月僞將  
單樊人傑唐大信等竄合西鄉公引兵出嘔血數升力疾督師  
天子慰勞甚至庚申四月賊自甘肅竄回敗之於洋縣野貓溝五  
月敗賊於黨洋灘六月敗賊於節草壩大祥壩是時甘肅賊戴家



營賊俱竄西鄉堰口七月二十四日賊聚西鄉之法寶山楊家河公以所部分爲三路都司哈國瓏率鄉勇馬隊由喬家店攻其西副將鮑桂都司景坤高懋率弁兵由索羅觀擊其東公自率都司鄧飛龍守備孫佑等擣其中並策應東西二路計欲一戰盡滅之賊據山頂礮石下擊兵不得上賊馬隊從溝中潛出繞截後路其東山賊匪亦從索羅觀繞下衝突東路公見賊圍鮑桂急馳救之賊悉眾下山圍繞數重公與鏖戰自晨至晡賊圍益急公身被十餘創矢石蝟集斬斷左臂傷重落馬伏地北向呼曰吾不能仰報皇上矣遂卒時年五十有二同日殉難者總兵銜副將鮑桂都司景坤高懋守備孫佑田有十千總把總外委二十九人事聞

上震悼輟朝 命卹死事之臣自提鎮下各予渥典給銀爲公治喪 子祭葬入祀昭忠祠謚壯節子開雲世襲三等子爵以二品廕生官部曹擢御史出知順德府事有聲

盛大士曰昔人言文士不得私爲達官立傳唐宋名臣有家傳乃其子孫故舊未諳文體者爲之非義法也李習之集有東川節度使盧坦傳望溪疑其以史彙誤入然則傳可漫作邪開州何先生壯節姻屬爲余述壯節事甚詳且以年譜屬爲傳以歸其子太守君余以文律辭不獲命乃用習之作盧坦傳例備史氏采擇云

右家傳盛大士撰

自嘉慶丙辰春楚匪滋事當事者過於持重遂至蔓延三省用兵



十載方至殄滅其中殉難者提臣爲王公文雄花公連布富公成  
穆公克登額鎮臣則諸公神保朱公射斗袁公國璜何公元卿施  
公縉德公光凝公德扎公爾杭阿李公紹祖其中死尤烈者以王  
穆花三將爲最王公貴州人由行伍游至通州協副將率直隸兵  
往援鄖陽時陝撫爲秦公承恩性懦弱不知兵事賊遂猖獗挺入  
陝境至盤屋秦惟閉城獨守日夕哭泣目皆腫公倉卒率直兵繞  
道擊之陝境保全公之力也事 聞秦受上賞公累擊賊賊皆畏  
之恨切骨庚申秋於棧道中猝遇賊賊覘知公兵力單弱乃四出  
紛擊公轉戰竟日路旣險峻糧復斷絕遂爲賊擒公噴血痛罵賊  
首曰此手戮吾三十二頭目之人不可令其速死汝吾憤乃支解

竟日賊既退軍士於草中尋遺骸惟餘一臂而已諸大將死節慘  
者莫公若也事 聞 上震悼賜世襲一等子其嗣開雲以世蔭  
任臺諫建白有聲今出爲順德太守

右錄宗室昭棟撰

鮑桂 高祖等

鮑桂漢軍正紅旗人高祖承先以功 賞二等輕車都尉世職桂由閒散於乾隆三十二年承襲五十八年兼公中佐領五十九年授山西甯武營參將嘉慶三年六月陝省教匪被剿由武關分竄出沒棧道閒時桂檄赴軍營隨提督王文雄捕之殲斃甚多八月進攻張漢潮股匪於南鄭之廉冰塢賊由山梁蠶擁下拒我兵以大礮轟斃數百人賊分馬步兩隊將襲我後桂偕參將鍾岳回剿斬獲無算餘眾越山遁復偕侍衛特崧額披剿林箐餘匪十月檄守鎮口子隘賊大至桂悉力抵禦會援兵亦集相與夾擊殲賊六百餘匪逸四年冉添元股匪竄至景家坪桂隨文雄剿之賊披

靡乘勝追擊殲戮殆盡五年升陝西潼關協副將時高二馬五等  
踞西鄉之法寶山文雄分三路進兵桂出其東由索羅觀進賊固  
拒有馬隊從溝中出截文雄之後山頭賊亦下撲桂營桂奮勇鏖  
戰不少卻傷重殞於陣山東壽樂營都司高懋臺莊營右哨把總  
蔣奉書俱以是役力戰死時四川懋功協千總游金階擊賊於西  
鄉亦陣亡先後事 聞均 賜卹如例 賞雲騎尉世職襲次完  
時以恩騎尉世襲罔替桂子方炳襲懋子濟美襲奉書子肇慶襲  
金階子官雲襲懋廣東博羅人由行伍游拔永靖營千總乾隆五  
十七年升山東泰安營守備嘉慶五年遷是職奉書山東惠民人  
由武生於乾隆五十九年拔武定營額外外委嘉慶元年補青城

汛外委二年赴陝省軍營五年升是職金階四川郫縣人

右 國史館本傳



國朝三百年史卷之三十三

四

景坤 孫佑等

景坤陝西長安人出行伍於乾隆三十七年隨征金川四十六年隨勦撒拉爾逆回拔提標前營額外外委旋補外委四十八年擢蓋厘營把總四十九年遷關山汛千總五十七年升下馬關守備嘉慶元年湖北教匪擾漢江南北二岸屯大米谿深溝高壘以自固總兵索賈英阿勦之預探其路徑曲折率遊擊哈三泰蕭福祿從大堰溝入坤隨遊擊王相龍自小米谿進賊分兵以禦勢不支我兵多有斬獲乘勢合擊賊縱火自焚其寨我兵冒火直入殲賊無算賊遁入皋山遂圍之斷其汲道賊大蹙悉擒之二年升甘肅威遠營都司五年四月提督王文雄防守槐樹關甫駐營會甘省

竄匪自野貓溝來文雄率坤等迎擊戮十數名生擒吳士舉等八名六月隨王文雄擊西鄉竄匪克大祥壩二處賊旋遁後股復入踞之文雄率河南汝甯營守備孫佑回勦副將鮑桂率坤由索羅觀進賊自山溝繞出官兵之後以大隊專攻桂營文雄知事急直前衝突弁兵奮力繼之賊稍退俄頃復大至文雄死之坤佑及山東壽樂營千總彭繼魯均歿於陣事 聞均 賜卹如例 賞雲騎尉世職襲次完時以恩騎尉世襲罔替坤子福明襲佑子宗謙襲繼魯子恩露襲佑甘肅固原州人繼魯山東滋陽人文雄自有傳

右 國史館本傳

富勒渾 花尙阿

富勒渾滿洲正白旗人瓜爾佳氏由烏槍護軍校於乾隆六十年委署烏槍護軍參領嘉慶五年二月補副烏槍營護軍參領閏四月發往湖北以參將補用隨領隊大臣明亮勦辦青號賊匪七月賊匪竄赴鄖縣總兵孫清元追勦至分水嶺賊由文峪河竄往陝西白河縣境因遇官兵截勦仍由鄖縣鮑家店黃龍灘花果園等處回竄時明亮繞道截殺行抵房縣富勒渾隨湖南沅州協副將佛凝率檄帶兵馳往防堵行至花果園遇賊接仗斃賊三百餘人次日後股賊眾繼至佛凝力戰陣亡富勒渾奮勇勦殺復殲賊數十人賊拒戰益力富勒渾身受重傷遂歿於陣時湖北候補都司

花尙阿與富勒渾併力轉戰同時陣亡事 聞得 旨富勒渾花  
尙阿著照例議卹均廕雲騎尉世職襲次完時各給恩騎尉世襲  
罔替富勒渾子希蘭都襲花尙阿子烏爾袞保襲花尙阿梅楞氏  
滿洲正黃旗人

右 國史館本傳



六達色

張應宗等

六達色富察氏滿洲鑲黃旗人乾隆五十八年由副前鋒校補前鋒校嘉慶四年擢湖北督標左營守備隨剿教匪五年七月賊匪竄至鄖縣花果園六達色偕湖南九谿營千總張應宗提標中營千總陳大勇江西南安營把總伍思勝南鎮標右營把總劉元章撫標右營把總劉定選湖北蘄州營把總吳金魁提標右營把總彭國藩前往剿捕適湖南沅州協副將佛凝因房縣兵單率兵防堵中途遇賊殲敵甚夥翌日賊勢益眾佛凝力竭歿於陣六達色等皆死之事 聞均 賜卹如例 賞雲騎尉世職六達色子巴克新布襲應宗子清瑜襲大勇子義倫襲思勝子上元襲元章

子和茂襲定選子文鴻襲金魁子定元襲國藩子紹發襲應宗湖  
南永順人由行伍歷升本職大勇武陵人由行伍拔提標左營外  
委乾隆五十五年補右營把總六十年升補本職思勝江西贛縣  
人嘉慶元年由行伍拔袁州營外委隨征湖北教匪屢著勞績三  
年升本職元章贛縣人嘉慶元年由行伍拔南贛鎮標左營外委  
五年補本職定選大庾人由行伍於嘉慶元年隨勦教匪有功拔  
甯都營外委五年升補本職金魁國藩俱湖北江夏人金魁由行  
伍歷遷本職國藩由武舉學習期滿補本職

右 國史館本傳

楊大貴 陳俊等

楊大貴湖南澧州人由行伍拔澧州營外委乾隆六十年擢鎮筵鎮標左哨後司把總嘉慶二年隨剿湖北教匪五年閏四月升千總七月賊匪由陝竄鄖縣花果園沅州協副將佛凝率大貴等前往房縣防堵中途遇賊力戰陣亡大貴偕撫標右營把總陳俊澧州營左哨外委傅正朝江西鉛山營外委周廷棟廣信營外委陳廷珂湖北漢陽營外委哈天貴黃州協外委楊定志興國營外委成千里道士汛營外委鄒元熊均歿於陣事 聞均 賜卹如例 詔賞雲騎尉世職襲次完時以恩騎尉世襲罔替大貴子鳳麟襲俊孫王伯襲正朝子世清襲廷棟子文祥襲廷珂子家杰襲天貴

子心欲襲定志弟承輦襲千里子祚應襲元熊子觀光襲俊湖南  
武陵人由行伍擢是職正朝澧州人由行伍隨征苗匪嘉慶三年  
隨勦湖北教匪五年拔是職廷棟江西都昌人由行伍隨征教匪  
二年追擊賊婦齊王氏紀功給行營外委頂帶五年補是職廷珂  
宜春人天貴湖北江夏人定志千里俱與國州人元熊黃岡人俱  
由行伍拔是職佛凝六達色自有傳

右 國史館本傳

按福凝公俟得  
國史本傳再行補錄



富成

富成鎮藍旗滿洲人姓什莫勒由馬甲挑補健銳營前鋒乾隆二十七年五月隨將軍明珠出師金川三十一年補護軍校三十六年委署護軍參領五月隨將軍溫福赴大小金川打仗有功三十七年遷火器營總四十年授廣西梧州協副將四十一年調直隸大名協副將四十六年擢山西大同鎮總兵四十八年以所屬弁兵縱偷馬賊入口降巡捕營遊擊四十九年授南營參將五十七年授中營副將五十八年擢山東兗州鎮總兵嘉慶元年命統兵由楚省入豫境剿邪匪四月偕景安會奏先將鄧州邊界魏家集賊掃除趨呂堰驛進剿七月進攻紅土賊施放進步連環槍直



衝賊隊拋擲火彈擒賊首黃玉貴奏入 賞玉扳指大小荷包

諭遇有提督缺出卽行升用八月勦鍾祥境內賊鄧家岡逆匪撲營截殺之九月由香園南線板一路追勦斃賊無算尋以永保奏請添給山東直隸兵二千名吉林健銳馬兵五百名赴豫協勦

命交富成督率調撥二年正月率山東弁兵分路進攻吳家集時惠齡在槐樹岡督兵鏖戰富成聞槍礮之聲帶兵截擊賊見兩路官兵圍勦奪路亂竄我兵隨勢擊殺死者七八百人又於吳家店掩獲執旗賊首三名賊夥四五百人賊首姚之富率賊二千餘人竄向西北富成帶兵夾擊生擒二百餘人獲劉起榮解京均奏入上嘉之三月夜戰温峽口斃賊三百餘人生擒五十九名時楚北

逸匪竄陝境宜縣奏調富成帶領甯夏西甯肅州兵二千並回民  
二千赴西安勦禦六月抵大涼山下官兵分爲五路賊匪四面受  
圍富成等督兵鼓勇齊登斃賊一千餘又擒李天德等四十餘人  
奏入得 旨著賞玉扳指大小荷包嗣於雙河口青莊坪放牛坡  
大石川諸處均殺賊有功十月擢江南提督是月 命領兵三千  
赴漢中甯羌堵勦巴達北竄之賊時賊所竄處離漢江不遠佯引  
官兵入山逸至江邊偷渡富成於沿江一帶山內繞其後兜擊之  
斃賊二千餘人生擒四百名奏入 諭曰富成激勵官兵繞出賊  
後出力可嘉又於雙河塘三郎鋪銅錢壩地方扼截分勦屢得  
賞玉喜字牌玉喜字扳指青玉扳指金盒銀絲盒玉鼻烟壺大小

荷包有差三年正月賊擾蜀境富成帶兵抵達州分路截剿城賴以全復由新甯一路疏通運道並截賊北竄二月馳赴寶山關迎頭兜剿又於木竹坪白山寺諸處相機截擊殲獲甚多三月

上以川省剿辦賊匪富成最爲奮勇擢授成都將軍尋帶兵抵磨子溪涉水過渡分頭截剿賊匪屯聚老木園 命馳往督辦四月由渠縣赴大竹一帶追剿殲賊無算生擒一百餘名五月彭家溝賊匪徐添德一股與王三槐接應 命將此股新起賊眾全數撲滅卽專摺具奏尋於老鷹場觀音巖蓮花庵等處各斃賊一二千名首逆徐添德遁入長壽距林亮功竄處不遠 上責成富成奮勇截擊不令竄合儻再任輾轉奔逃惟伊等是問尋以軍營領兵大

員辦理延玩各股聚集一處不知設法攻圍富成在川北勦賊日久並未擒一首逆奉 旨嚴飭十二月督勦徐添德一股斃賊二千名生擒二百名又於清涼寺殲賊五百名四年正月 諭曰富成等務於春令一律勦辦完竣息玩逾限惟按軍律從事富成旋繞蒼溪相機勦辦張映祥一股復赴廣元兜勦一切軍糧備極充溢時 上拱宸侯爲經略大臣奏曰富成一踏賊眾兵單不能得力張映祥一股闖入陝境經富成擊之於毛堽山賊分路奔竄在略陽階州一帶雖與恆瑞兩路夾攻兵力尙覺不敷數月以來未能痛勦致蔓延甘境事 聞 諭曰勒保等卽將富成帶兵以來貽誤情節嚴行奏參尋以富成領兵勦賊迎擊繞道未與接仗且



所帶鄉勇經過甯羌岷州等處頗有騷擾列款奏參六月得旨  
奪職交刑部治罪富成先於黃家坪大水溝黨家坪蔣家山等處  
連次接戰奮勇殺賊奏入 諭曰富成著加恩免其治罪作爲披  
甲留營效力嗣在鎮安堵剿於七里堖石泉溝等處接戰有獲五  
年二月守五郎四月仍堵鎮安六月隨長麟追剿再學勝等股斃  
賊二百餘名生擒四十五名七月在徽縣之架子山與賊接仗自  
日中持至更餘賊眾全力撲壓不能抵禦馬蹶滾山受矛傷陣亡  
事 聞 諭曰富成本係成都將軍因剿張映祥惟事尾追尙係  
軍營通弊乃竟落馬陣亡殊爲可惜著加恩照副將陣亡例賜卹  
應得世職卽著查明伊子承襲 賜入祀昭忠祠子普亮襲雲騎



尉兼三等待衛

右 國史館本傳

1941

1941

姚士華 鄧文元等

姚士華湖北江夏人由行伍於乾隆三十九年拔施南協外委四十年正月遷湖南鎮筵鎮標左營把總十一月升湖北衛昌營右哨千總五十六年擢施南協右營守備六十年湖南逆苗滋擾永順踞山梁大兵分路進剿士華率兵自東南繞出夾擊之深入賊寨賊竄尋復聚眾踞險士華隨總兵張廷彥由保靖南亟攻之戮賊無算焚其巢嘉慶二年四月湖北教匪踞黃柏山高築卡牆縣五十餘里士華隨廷彥乘夜攻擊奮勇騰越直上四方臺燬其巢賊大潰追戮殆盡 賞戴藍翎七月賊踞白魚寨設卡排列士華率兵力擊奪第一卡殲百餘人餘卡以次悉平十二月逆匪覃加

耀等竄踞朱里寨我兵進至山側賊恃險抗拒矢石如雨士華受  
石傷四年以功升湖廣督標中軍都司五年正月升雲南景蒙營  
遊擊八月賊由西山楓香溝石觀子溝一帶旁竄我兵左右迎擊  
會日暮將達溝口賊踞險迎拒士華乘夜力攻賊稍退縱火追襲  
力竭陣亡湖北鄖陽協右營守備鄧文元四川疊谿營千總張大  
陞均死之事 聞均 賜卹如例 賞雲騎尉世職襲次完時以  
恩騎尉世襲罔替士華子金榜襲文元子瑞雲襲大陞子蔚川襲  
文元湖北襄陽人大陞四川華陽人

右 國史館本傳

李紹祖

李紹祖順天大興人乾隆四十五年武進士授三等侍衛鑾儀衛行走五十一年投山東武定營遊擊五十六年遷德州營參將尋擢臨清協副將嘉慶元年調赴湖北軍營隨將軍恆瑞擊賊於襄陽屢獲勝仗 賞戴花翎二年八月大兵敗賊於田家壩賊退走大甯縣山梁恆瑞率李紹祖等自右山抄截追殺三十餘里殲斃無算十月擊賊於金子地方斬數百人三年四月擢甘肅巴里坤鎮總兵仍畱軍營六月隨尙書惠齡擊賊梁家園奪獲大旗三刀矛器械百餘七月攻奪打石坡賊卡進攻香安坪時惠齡恆瑞合兵奪卡突有賊二股自三板場金家場鼓譟而來李紹祖等分投



迎勦遇援兵至四面夾擊斃賊六百人生擒百餘人九月擊賊插旗山從賊寨之右併力追殺蹙之於古戰坪又蹙之於鳳凰山十月二月攻克青觀山時賊冉文儔竄踞箕山多設木城以拒我兵而大鍾寨馬鞍山皆其巢窟惠齡率李紹祖等擊之克馬鞍山斃賊千人四年四月隨參贊大臣德楞泰擊賊於王家壩又擊之於川壩子九月偕提督七十五擊賊樊人傑於開縣又擊之於臨江市賊退走馬鞍山五年正月紹祖追擊之斃賊六十人二月自大甬取道順慶迎擊鹽亭南部各路竄匪時德楞泰敗賊於張材壩進攻白家壩需兵策應紹祖奉檄由金山馳驛赴賊竄箐林口夜撲紹祖營紹祖奮力擊退之賊又遣謀詭稱難民投德楞泰營云賊

已遁入雁門壩其箐林口餘匪無多由此而進直抵雁門壩賊眾可悉殲也德楞泰知其詐令爲鄉導率紹祖等掩擊之箐林口之賊大敗紹祖所乘馬中槍斃乃步行力戰殲賊百餘人復由洛陽橋進攻包家溝又擊之於火石埡俱有斬獲賊渠冉添元就擒紹祖身歷行閒衝鋒克敵 優詔褒敘三月奉 旨川西賊已潰散李紹祖卽帶騎兵赴陝勦辦西和竄匪尋經略額勒登保奏川西之賊節經德楞泰痛勦應乘勝速淨川北川東餘孽未可分其兵力李紹祖所領騎兵請仍畱川省 從之時賊張子聰等自新店子敗竄坡石岡德楞泰率紹祖等取道中江繞出賊前賊踞黃鹿山我兵仰擊之殲斃七百人擒六百餘人追至朱家坪復斃四

百人生擒二百餘人賊竄潼河以東四月調四川松潘鎮總兵旋  
調廣東高廉鎮總兵仍畱軍營是月擊賊於達州又擊之於楓香  
埡賊適由萬寶白銀二山經過我兵分三路擊之紹祖自土主河  
截勦奪獲旗幟器械無算五月擊賊劉朝選於七孔溪山我兵設  
伏於山巔賊由高山場過溝奔至半山我兵突出擊之賊大潰餘  
匪竄大竹紹祖率兵追擊之六月師次高橋聞賊張子聰竄近卽  
馳至石橋鋪襲之斃六十人生擒二十人師次大竹縣聞賊苟文  
明等竄近紹祖擊之於堰塘灣又追之於鄒家灣賊夜劫紹祖營  
連撲五次紹祖徹夜拒敗之斃五十三人八月黃號賊徐萬富由  
大甯竄擾房縣紹祖奉檄追勦敗之於兩河口賊竄木瓜鋪偪近

遠安縣城紹祖移營牛鹿坡以遏賊路賊分股一撲縣城一撲紹祖營紹祖悉力抵禦賊遁走紹祖匹馬追之猝遇伏賊中矛陣亡事聞諭曰李紹祖年來在川省剿賊最爲奮勉茲由川赴楚剿辦竄匪匹馬向前遇伏捐軀深爲可惜著加恩照提督例議卹尋賜祭葬予諡果壯賞騎都尉兼雲騎尉世職襲次完時給子恩騎尉世襲罔替子霖襲

右 國史館本傳

シシノノモノニシテ

VII

175-562



沈慶春 蘇叙魁等

沈慶春陝西富平人乾隆五十四年武進士以營守備用五十五年補山東范縣營守備嘉慶二年隨尙書惠齡勦四川教匪於淡家岡杏兒山克之 賞戴藍翎三年升臨清營都司六月署武定營遊擊四年署廣東欽州營參將五年隨參贊大臣德楞泰追勦關耳梁股匪賊竄伏火石埡一帶山後我兵分三路進慶春由洛陽橋進攻包家溝殲戮甚眾嗣以張子聰股匪渡江踞劍州石門寨大兵分路進攻慶春隨總兵李紹祖由李家坪直抵寨下賊悉力抗拒我兵奮擊生擒賊匪獲軍械無算賊由南部鹽亭奔竄渡潼河踞蓬谿縣新店子德楞泰分兵追擊慶春由右山梁萬福橋

抄截賊蒼黃奔潰復踞打銅埡我兵奮力仰攻克之尋隨李紹祖率兵赴楚協剿追至遠安縣兩河口賊竄木瓜鋪偏近縣城紹祖移營牛鹿坡以扼之賊分隊襲營慶春偕臨清營千總蘇殿魁梁山營把總劉振邦率兵奮擊戮賊多名復入賊隊併力轉戰身受重傷俱歿於陣時徐添德添壽股匪擾至楚北山南漳縣峽口坪一帶竄當陽遠安大道荊州駐防馬隊行抵南漳馬家營遇賊被圍湖南九谿營千總黃金桂澧州營右哨千總彭奉湖北宜昌鎮標右營把總徐正科左營外委甯光耀隨總兵王凱馳救賊分隊前迎我兵奮勇進擊越四道山梁突出馬步數百匪蠢擁圍裹金桂等陷陣戰歿先後事 聞均 賜卹如例 賞雲騎尉世職襲

次完時以恩騎尉世襲罔替慶春子尙志襲殿魁子輝萬襲振邦  
子璧山襲金桂子廷選襲奉子士定襲正科子大順襲光耀弟光  
祖襲殿魁正邦俱山東滋陽縣人金桂湖南武陵人俱由行伍游  
升是職奉澧州人隨征金川及苗匪俱有功由行伍游升是職正  
科光耀俱湖北東湖人俱由行伍拔是職

右 國史館本傳

西華大書局代印  
三三三三三三

三

保洪玉 馬凌雲等

保洪玉貴州遵義人由行伍於乾隆四十八年拔提標額外外委四十九年補中營左哨外委五十二年升左營右哨把總五十五年遷長壩營千總嘉慶二年九月黔匪王囊仙屯聚洞洒洪玉隨副將施縉等分路進剿連克賊卡攻其巢石城甚力賊然火藥將自焚我兵奮力登城生擒王囊仙殲戮甚眾時七綵鬚踞當丈大里聞洞洒巢破守益堅我兵復併力仰攻賊乘夜自焚其巢洪玉偕把總楊國仁冒火先登生擒七綵鬚並殲戮無算洞洒當丈賊巢俱平奏入得 旨以守備卽用三年補歸化營中軍守備四年擢雲南大理城守營都司五年九月湯思蛟股匪竄匿川省南壩



場洪玉偕平越營守備陳得欽隨總督勒保分兵進剿遇賊於豐城寨轉戰甚力追戮四百餘名俘百餘名湯思蛟率眾從後路繞出洪玉猝被矛傷得欽力竭俱歿於陣是月雲南昭通鎮標中營把總馬凌雲擊賊於牛鹿坡雲南提標右營把總劉存德擊賊於渡口巖俱陣亡先後事 聞均 賜卹如例 賞雲騎尉世職襲次完時以恩騎尉世襲罔替洪玉之子林襲凌雲姪占魁襲存德子國安襲凌雲雲南新平人存德太和人得欽自有傳

右 國史館本傳

陳得欽 閩臣

陳得欽貴州興義人由行伍於乾隆四十年隨征金川積功補貴州定廣協左營外委四十四年調右營五十四年擢左營把總五十八年升千總六十年隨剿逆苗累戰皆捷焚礮砦生擒賊十餘嘉慶五年以隨征川匪功補平越營守備九月湯思蛟股匪度向瑤等竄匿川省南壩場得欽隨總督勒保進剿行抵豐城寨遇賊於山溝下我兵衝擊之賊奔竄我兵追斃賊四百餘名生擒郝長壽等一百十二名適賊匪湯思蛟從後路衝我兵得欽力戰歿於陣先是元年山東兗州鎮標中營把總閩臣在賈家梁擊賊陣亡先後事 聞得 旨陳得欽閩臣俱著咨部議卹均廕雲騎尉世

職襲次完時各給恩騎尉世襲罔替得欽子燮堂襲臣子福興襲  
臣山東嶧縣人

右 國史館本傳

海洪阿 穆克登布等

海洪阿章佳氏滿洲鑲藍旗人由前鋒於乾隆三十二年隨征緬甸三十四年攻新街及老官屯力戰有功三十五年擢藍翎長三十八年進攻雜拉功列超等升副前鋒校三十九年隨征金川四十年升前鋒校隨營奮勇出力屢得功牌四十四年升委前鋒參領四十九年隨征甘肅逆回五十年遷陝西西安鎮標中軍都司五十五年升甘肅大靖營遊擊嘉慶元年隨征川陝楚教匪時賊竄陝西之興安府南踞牛蹠鋪古廟嶺北踞將軍山而以距府東南三十里之安嶺爲巢穴提督柯藩檄海洪阿攻古廟嶺先登奪卡又乘霧奪唐家壩寨進攻將軍山克之殲擒甚眾總督宜綏等

上其功 賞戴花翎二年攻賊於菜麻坪花犁岡等處升西安城守營參將三年二月攻石板壩賊寨並接剿蓋屋西南鄉逸賊十一月援西鄉縣擊退賊眾四年張漢潮股匪竄棧道東海洪阿自斜峪關截擊之賊折回西北海洪阿又於湯峪庫峪及大峪子午峪扼卡嚴堵五年二月賊匪竄黃龍鋪海洪阿由鄖西縣小路迎擊殲之十月升甘肅洮岷協副將借山西甯武營守備穆克登布等由西鄉東路擊賊於馬家灣殲斃偽元帥朱朝閣賊勢已蹙突有賊眾從後應援海洪阿身先兵勇奮力衝擊以眾寡不敵受傷陣亡穆克登布亦力戰死西甯鎮標後營外委孟魁李騰龍左營外委李洪友來安營後營外委潘如桂俱死之事 聞均 賜卹



如例 賞雲騎尉世職襲次完時以恩騎尉世襲罔替海洪阿無嗣給其妻半俸穆克登布子文忠襲魁弟璧襲騰龍子義承襲洪友子有忠襲如桂子福襲穆克登布伊爾根覺羅氏滿洲正黃旗人魁騰龍洪友如桂俱甘肅西甯人魁洪友於乾隆五十六年隨征廓爾喀騰龍於乾隆四十六年四十九年隨剿循化靖遠回匪如桂於乾隆三十六年隨征金川俱殺賊有功由行伍游升是職

右 國史館本傳

三十三

三十三

哈國瓏 梁俊士等

哈國瓏江蘇江甯人由武舉分發河南以營千總用補許州營千總嘉慶元年隨剿湖北教匪以功升汝甯營中軍守備二年隨提督王文雄追剿於南漳縣之羊角山殲戮甚眾奪獲軍械無算超等紀功 賞升銜以應升之缺升補三年阮正通股匪竄踞黃官嶺國瓏以陝西巡撫秦承恩檄分路衝擊克之四年進剿張漢潮股匪奮勇出力升山東文登營都司仍留總理大營翼長事務五年三月唐大信股匪由四川竄紫陽關闖入陝西西鄉縣界國瓏隨王文雄迎擊賊退踞節草壩等處我兵分路擊走之六月賊踞萬曲灣國瓏偕都司楊光時設伏於黑山乘勢下擊賊潰七月廿

肅戴家營股匪被勦由沔縣竄西鄉堰口國瓏以王文雄檄迎擊之賊退旋踞法寶山梁國瓏復率兵勇由喬家店擊走之文雄以國瓏隨營辦理軍務盡心竭力奏聞升甘肅涼州鎮標右營遊擊十一月賊由竹谿竄棗樹嶺山勢高峻負嵎抗拒國瓏隨經略額勒登保分路進攻戮斃甚眾復馳入賊隊猝受矛傷歿於陣先是甘肅深溝堡把總梁俊士白塔川營把總馬金玉肅州鎮標中營把總徐保壽巴暖三川營把總趙仁廉山西朔平營額外外委趙富典俱於馬家灣擊賊陣亡先後事聞均賜卹如例賞雲騎尉世職襲次完時以恩騎尉世襲罔替國瓏子光緒襲俊士子樞襲金玉子得功襲保壽子夢堯襲仁廉子光祖襲富典子喜

襄俊士金玉保壽俱甘肅西甯人仁廉碾伯人富典山西右玉人

右 國史館本傳



國朝書目考卷之九

四

徐萬甯

徐萬甯山東濟甯州人由行伍於乾隆二十七年拔河標右營外  
委三十二年升中營把總三十六年升右營千總四十四年擢貴  
州撫標右營守備四十六年署普安營都司五十一年以病去職  
五十二年病痊揀發福建是年赴臺灣軍營題補建甯鎮標中營  
守備歷署本標中營左營遊擊六十年升陝西建甯堡都司嘉慶  
二年署黃浦營遊擊四年五月隨提督慶成總兵胡定泰剿捕鄂  
匪於鎮安石泉等處皆有功五年十一月冉添元樊人傑等餘匪  
由紫陽竄入石泉之銅車壩時定泰先至白沔峽截瓦脊溝以遏  
賊路慶成亦親率弁兵於是夜三更馳往策應賊在大紅石乘月

偷渡我兵轟槍礮擊之賊始退復潛繞上游十餘里搶渡北岸衝  
突防江兵卡萬甯所領兵僅二百餘而賊眾甚夥奮力抵禦歿於  
陣事 聞得 旨徐萬甯著咨部議卹廕雲騎尉世職襲次完時  
給予恩騎尉世襲罔替子聖麟襲

右 國史館本傳

金克俊

金克俊順天大興人由舉人大挑一等以知縣用分發湖北嘉慶元年署長陽縣時教匪滋事檄赴軍營三年署房縣四年李淑股匪由羊家河竄房縣西南之仙家坪湖廣總督倭什布督兵進剿賊憑高拒守旋繞出陰峪河突至距房縣城十餘里之熊家包地方放火滋擾倭什布分兵馳赴截剿副將孫清元等由東面繞往縣城防護時賊匪蜂至攻縣城克俊偕典史蔣大錫把總楊占魁等率在城兵役竭力抵禦適清元兵至前後夾擊殲百餘人奏入上嘉之五年正月辦理糧臺事務十二月隨清元剿徐添德股匪偵知賊屯隆須堽奮力直上乘勢下壓賊分路竄遂克之適後路

紅蓮洞兩河口有五六百匪突出抄截克俊帶竹谿練勇頭目鄭元明等奮勇馳剿清元率兵合擊追奔十餘里殲百餘名克俊身先遇敵衝入賊隊手刃二賊疊受矛傷墜馬陣亡事 聞得 旨照知州例賜卹 賞雲騎尉世職襲次完時以恩騎尉世襲罔替子紹雲襲

右 國史館本傳



張君泰 周仁

張君泰貴筑人由行伍補貴州撫標右營額外外委乾隆六十年正月隨師黔楚攻解大營圍嘉慶元年擢外委嗣因征小竹山賊匪功升本營把總旋征興義苗匪大小數十戰燒燬苗寨三十處解新城圍給行營五品頂帶三年隨征四川邪匪補上江協右營千總四年升鎮遠左營守備五年十二月因楊開第餘匪李炳等竄入廣元德楞柁泰勒保分兩路進勦飭武隆阿傅森額等由泉龍洞左山出銀磨壩截擊君泰隨提督七十五由覽石窖截賊西竄時雪霧交作遇賊於三溪寺七十五督兵追勦君泰首先衝入賊敗潰奔上右山梁正奮擊閒適銀磨壩敗賊突奔柘壩河溝抄我

兵我兵分擊之槍箭齊發斃馬賊三名步賊十數名雪霧愈大山  
上之賊見溝內賊至復下壓君泰殺賊數名力戰歿於陣先是三  
年四川城守營外委周仁在達州臨江寺勦賊陣亡事 聞得  
旨張君泰周仁俱著咨部議卹均廕雲騎尉世職襲次完時各給  
恩騎尉世職爾替君泰子紹基襲仁子文泰襲仁四川華陽人

右 國史館本傳

國朝耆獻類徵初編卷三百六十七目錄

忠義三十七

毛大瀛 余文泰等

凝德

王百忍 馬旺等

馬存 鐵銀等

黃富國 邢永襄等

張發祥 馬麒等

郭承緒 張喜等

楊春和 張斌

邱榮升 謝位揚等

耿貴和 康調元等

馬德舒 周華長等

王萬岱 安榮庫

和興額

阿爾當 捷慶等

李殿魁 陸建敏

陳五輯 郭洪

邊奏凱 馬負圖等

海進龍

汪銓

宋英 張恩錫

傅廷剛 張聯程

吳振亮

陳應彪 李杰

張雲鳳 郭永泰等

孫斯禮

黃大勇等

三福

養尙阿

姚國棟

畢振林

國朝耆獻類徵初編卷三百六十七

通奉大夫前署江西巡撫江西布政使司布政使湘陰李桓輯

忠義三十七

毛大瀛 余文泰等

毛大瀛江蘇寶山人由附監生充四庫全書館謄錄議敘州同分發陝西試用乾隆四十九年丁父憂回籍五十三年服闋仍赴陝省時河南巡撫畢沅督辦湖北荊州萬城隄工以大瀛途次謁見奏請帶往分辦尋復奏畱楚省補用五十四年署漢陽府通判旋丁母憂回籍五十六年山東巡撫惠齡奏准發往東省辦理城工河工服闋畱東補用署利津縣縣丞尋以大兵征廓爾喀惠齡升



四川總督辦理濟甯糧務奏帶大瀛赴西藏差遣事竣畱川補用  
借補潼川府經歷隨營辦事旋以軍功升中江縣知縣嘉慶元年  
檄赴湖北軍營隨剿教匪以功升四川簡州知州時惠齡由湖北  
入川沿路剿辦大瀛從之三年克大鵬寨擒逆首羅其清大瀛在  
事出力 賞戴花翎四年回簡州任五年張子聰股匪竄潼河擾  
三臺中江地總督勒保參贊德楞泰兩路截剿賊復分擾遂甯樂  
至安岳資陽等處由金堂之廣元寺肆行焚掠延及簡州境大瀛  
率鄉勇前往堵禦行抵土橋溝猝遇馬步賊蜂至力戰遇害事  
聞 諭曰毛大瀛因眾寡不敵中途被戕著咨部賜卹是年南江縣  
訓導余文泰防守城池殺賊陣亡署太平縣主簿蔣曰紀於界牌

擊賊力戰陣亡先後得 旨賜卹均 賞雲騎尉世職襲次完時  
以恩騎尉世襲罔替大瀛孫嶽生襲文泰子廷松襲曰紀子存棟  
襲文泰四川成都人曰紀河南睢州人

右 國史館本傳

此手書一紀事詩二毛君守簡州城時所寄也君名大瀛寶山縣  
諸生善屬文及詩試輒不利五十外以薦舉得官教匪起湖北蹂  
躪陝西河南四川諸處大府奏君隨營以功擢知縣尋又擢簡州  
知州土賊復起君城守踰時援不至城陷罵賊不屈死距發書時  
僅五月耳君爲幕府牋奏最工業此者二十年其在山東巡撫國  
泰幕幾十年國泰者君在京邸時素識約爲兄弟者也出官山東

國朝書林類傳卷之二十一  
二  
卽挾之以行國性暴戾妻子僕隸皆若不可一日共居獨重君始  
終無纖毫芥蒂君質直嘗數其過國受之不校也國盛怒時或至  
扑妻子刃僕隸獨得君數語卽解以是署內外事君如神明國亦  
飭所親下人奉君若奉己君或赴試則一府中環以泣阻其行若  
勢不可留則各囊金以贈君一入試則所獲無算君亦隨手輒盡  
不餘一錢也在幕府日國四鼓卽促君起然巨燭與分案治官文  
書日出事始竣國讀書不甚分句讀願酷嗜作制舉文日必拈一  
題強君共作方御史錢澧之特糾國及山東虧缺庫項也 上心  
動 特命親信大臣偕御史晨夕馳往勘實其弟國霖覘知之募  
善走者先半日馳抵濟南國蒼黃喪魄時署中積金寶無數因乘



夜運入司庫及運司首府首縣各庫以補缺項然存金尙纍纍公  
廨後有珍珠泉深丈許遂昇至泉側沈之後撫臣明興濬池尙得  
金數十萬蓋國贖賄如此事大露逮國入都下刑部獄治罪君亦  
隨入時以諧語寬解一日國檢衣底出一大珠圓徑寸授君曰畱  
此無用以遺兄君曰弟事解後此卽可充貢僕無用處也居久之  
國忽得妄耗謂君曰事可無慮兄處此已久可暫出洗沐君乃出  
然國卽以其夕 賜死君偕其弟入哭檢所爲珠已失之矣余識  
君在武昌總督署復有吳門項君字直庵忘其名項君故浙江巡  
撫王直望客也方王遭母憂擁妻妾居會垣並日事讌會爲人所  
發王亦知罪且不測而積重貲至多因闔門召幕客散給之數或

三萬五萬不等屬曰若無事歸我半事不測則諸君盡畱之時項適省親歸不及預後數日至王嗤之曰日前稍有分餉而君不來何運蹇若此項固寒士又極知足則對曰暴得重金不祥前日卽在亦不願預王笑置之居數日王甘肅匿災冒賑及監糧案併發卽日逮入都諸幕客竄已無影項獨送至鎮江王強項曰必送我清江浦俟登陸乃返項允之同舟渡江王忽慨然曰幕中某某吾待之極厚竟無一送我者今走千里反在君吾愧甚因懷中出一硯曰此宋蘇文忠公物也籍沒時獨寶此不忍舍故尙在耳以贈君儻入都後蒙 恩不死異日必措萬金贖硯復賦詩一章贈項王入都卽伏法後項幕橐稍裕感王意別購一室貯此硯及所贈



詩不一歲室燬於火視及詩並煨燼後慕容得王重賞者五年內  
不病死卽子嗣夭絕無一終享其利者余嘗謂毛及項曰二巡撫  
者谿壑可謂不易滿矣至谿壑一滿而要領遂絕徒使己受惡名  
而人享其利計亦大左甚至享其利者不身死卽嗣絕是貪吏之  
金與酖毒又何以異癸亥三月暴書得君此札跋竟復書此以爲  
服官者戒

右跋後洪亮吉撰



凝德

凝德烏雅氏滿洲正黃旗人父官保吏部尙書自有傳乾隆二十九年凝德由拜唐阿挑補藍翎侍衛三十七年授鑾儀衛治儀正四十五年升雲麾使五十年遷冠軍使五十五年升直隸獨石口協副將六十年調督標中軍副將嘉慶元年川陝楚邪匪不靖凝德調赴湖北軍營四月協剿首逆黃玉貴於紅土山奮勇殺賊七月敘功 賞戴花翎二年四月赴孤山衝剿賊六月在沿江一帶陸續拿獲賊目曹漢東等五名並逸賊阮金山等四百十三名十二月王三槐羅其清擾渠縣所屬地方凝德帶兵駐紅架壩截殺賊匪甚眾三年帶兵駐窩堂廟以斷孫家梁賊匪後路四年四月

奉檄防堵二郎壩等處五月由花長溝開道躡賊追殺五十餘里  
殲斃三百餘名是月升甘肅巴里坤總兵六月西安將軍恆瑞督  
勦甘省賊匪檄凝德帶兵一千赴三曹河堵截賊北竄凝德兼程  
追及老柏樹敗之殲獲甚眾七月隨恆瑞追賊分路向牟家壩兩  
河口一帶截殺賊不敢抗拒向東逃竄五年賊日蔡掌櫃合辛聰  
餘黨將竄秦安伏羌等處恆瑞飭凝德由秦安兜截適譌傳賊圍  
伏羌縣城恆瑞以大隊往援而凝德帶兵四百赴之相去四十里  
猝遇賊匪三四千人弁兵以眾寡不敵請急走伏羌凝德不可率  
眾拒賊手弓射斃二匪力竭陣亡事 聞 命下部議卹尋 賜  
祭葬 賞騎都尉世職孫崇壽承襲

右 國史館本傳

國史館本傳  
卷三十一  
二十七  
八





王百忍 馬旺等

王百忍直隸行唐人由武舉揀發鎮定鎮標學習乾隆五十九年  
補右營把總嘉慶元年四月隨征湖北教匪奮勇有功十二月升  
千總五年追賊至甘肅伏羌縣陣亡是年甘肅河州城守營千總  
馬旺在西園鄉擊賊陣亡陝西西安軍標右營把總王民直隸龍  
固營把總魏日連蔚州路把總閃美玉房山營把總劉忠西安軍  
標右營外委黃榮俱於牛驢灣擊賊陣亡事 聞均 賜卹如例  
賞雲騎尉世職百忍子廷統襲旺子喜元襲民弟明襲日連子之  
珠襲美玉子逢時襲忠子殿元襲榮子秀襲旺甘肅河州人由行  
伍於乾隆四十六年隨征撒拉爾逆回五十四年拔補循化營外

委嘉慶元年升把總二年率撒拉爾士兵剿捕西鄉縣教匪著有  
戰績四年升本職民陝西長安人由行伍隨征蘭州逆回屢著戰  
績拔補本職曰連直隸正定人由行伍於乾隆五十四年拔補正  
定鎮標右營外委五十五年升本職美玉直隸宣化人由行伍於  
乾隆五十四年拔補萬全營外委尋升本職忠直隸清苑人由行  
伍於嘉慶元年拔補順德營外委隨剿教匪奮勇殺賊拔補本職  
榮長安人由行伍隨征金川屢著戰績拔補本職

右 國史館本傳

馬存 鐵銀等

馬存甘肅固原州人出行伍於乾隆六十年拔陝甘固原提標左營外委嘉慶元年十一月隨征將軍山賊匪屢戰皆奮克其卡殲數百人擢右營把總十二月隨剿洞河五作雲賊匪時提督柯藩由迴水灣進至斑鳩關克賊卡遂進攻菜麻坪賊乘高以礮迎擊我兵不能進存偕外委傅祿兵丁袁芝鄉勇吳繡才鍾萬周等伏地潛行騰而上奪其礮吳繡才爲礮所斃鍾萬周中矛死存等竟推其礮墮之山下與賊力戰大隊繼進克其卡縱橫奮擊戮千餘人進攻五作雲大寨火之殲戮殆盡二年擢固原城守營千總四年升陝西永安堡守備五年經略額勒登保督官兵分期鎮安野

竹坪等處餘匪奔竄楊開甲辛聰二股由米糧川竄鄖陽邊界柯  
藩扼山陽以斷鄖西入山陽之路存等於上津堡進剿身先士卒  
與賊爭險不避矢石力竭陣亡靜甯協把總鐵銀延綏鎮標右營  
把總張乃榮直隸喜峯路千總郭錦標倒馬關外委韓景祥均死  
之事 聞均 賜卹如例 賞雲騎尉世職襲次完時以恩騎尉  
世襲罔替存子國楨襲銀子紹恩襲乃榮弟乃聰襲錦標子文元  
襲景祥子保清襲銀甘肅固原州人乃榮平涼人錦標直隸萬全  
人景祥定州人俱由行伍擢是職

右 國史館本傳



黃富國 邢允襄等

黃富國湖北竹山人由武生於嘉慶元年糾集鄉勇勦賊有功總  
統湖北軍務永保等奏以千總拔補得旨俞允二年八月賊竄  
竹谿橫擔山以官兵堵禦嚴密在全河潛匿富國率兵勇於兩岸  
山坡擊之賊潰殲三百餘人四年三月補竹山營千總五月張添  
倫股匪竄七里岡富國分路抄截殲四百餘人生擒八十五人得  
旨嘉獎六月移堵張公橋一帶偕守備羅升生擒五人七月李樹  
等股匪竄豐谿富國偕副將孫清元分由郭家湖東北前進兩面  
夾攻賊竄泉河之東南富國追奔至白箕埡遇賊以槍礮擊走之  
是夜賊大隊劫營復大敗之殲執旗賊目一人餘匪十餘人黎明

復追殲二十餘人大甯股匪竄徐家橋富國備孫清元分投策應其竄大河田者盡殲之李淑等匪屯西河口總督倭什布令孫清元與富國三路圍攻賊復折向獅子巖富國潛伏大營山溝遇賊於三更劫營突出殲四十餘人八月於棗陽等處擊賊有功賞戴藍翎李淑等匪在歇馬河一帶滋擾設伏林中富國殲戮二百餘人賊遂潰招撫男婦七百餘人賞守備銜尋補湖廣督標左營守備九月辛聰等股匪屯馬良坪山溝內富國首先衝入殲騎賊三人步賊二十餘人生擒賊目二十餘人賞換花翎五年張洪榮等分股擄掠官兵四面圍攻賊潛從老林內抄出隊後富國被賊裹截前後受敵力竭歿於陣山東卽墨營千總邢允襄膠州

協把總邢允貴湖北漢陽營外委李光春均死之事 聞均 賜  
卹如例 賞雲騎尉世職襲次完時以恩騎尉世襲罔替富國子  
光晟襲允襄子鳳鳴襲允貴子攀龍襲光春子芳名襲允襄允貴  
山東長清人光春湖北興國州人

右 國史館本傳



張發祥 馬麒等

張發祥直隸宣化人由行伍於乾隆四十七年拔額外外委五十年補宣化鎮標中營外委五十四年擢左營把總五十六年升張家口協左營千總嘉慶四年檄剿陝西教匪五年陝匪馬五自西鄉竄堰口副都統綸布春由順水峽向白谿前進令副將李天林率發祥等由土地嶺分兵夾擊與賊接戰戮百餘人賊猶恃眾抗拒發祥隨侍衛保邦等由溝內奮勇追剿戮騎馬賊目數人賊之伏於林莽者乘間截我兵後發祥偕石塘路白馬關外委馬麒極力衝突俱歿於陣賊尋竄入楚境總兵明亮擊之於上龕襄陽鎮標中營把總吳全竹山營外委江化春俱以先登戰歿嗣以賊焚



掠鐵掘寨明亮率兵復於左家壩敗之竹山營額外委梁大成  
受矛傷歿於陣是年山西新平路千總王永清擊賊於晾馬臺水  
泉營把總張成平魯路把總蒯漢基擊賊於法寶寺歸化城把總  
董瑞偏關營把總訥舉擊賊於西鄉縣俱陣亡先後事 聞均  
賜卹如例 賞雲騎尉世職襲次完時以恩騎尉世襲罔替發祥  
子琮襲麒子廷良襲全子興邦襲化春子鎮襲永清子珍襲成子  
攀龍襲漢基子世平襲瑞子世恆襲舉子維藩襲大成照馬兵例  
賞卹麒順天密雲人全化春俱湖北鄖縣人大成竹山人俱由行  
伍拔是職永清山西靈邱人由武舉擢是職成瑞舉俱大同人漢  
基左雲人俱山行伍拔是職

右 國史館本傳

國朝傳狀類文初編

卷三十三 忠義二十七

三

--	--	--	--	--	--	--	--	--	--

郭承緒 張喜等

郭承緒直隸饒陽人由武舉效力期滿於乾隆五十八年選山東  
兗州鎮標中營守備嘉慶元年川陝楚教匪滋事承緒隨將軍富  
成帶山東兵至河南境駐新店賊擾遊擊揆明營承緒擊退之斬  
獲無算旋升山西太原鎮標右營都司二年正月隨尙書惠齡於  
湖北官潭等處勦劉之協股匪有功 賞戴花翎十月賊竄擾雙  
河塘惠齡偕富成督兵前進承緒繞出賊後擊退之三年三月升  
山東高唐營遊擊八月升臺莊營參將十月羅其清殺匪竄擾天  
池子十二灣等處富成率承緒等分兵截勦均有斬獲十一月隨  
富成由青子山進勦賊分股抗拒承緒受傷四年賊掠元壩場六

坡堦等處承緒奮力迎擊戮賊四百餘名並生擒傅懷玉等五年  
 擊賊於陝西洵陽縣三岔河賊伏發三面環繞刀矛相接承緒左  
 右衝突鏖戰踰時與千總張喜外委趙喜俱歿於陣陝西延安營  
 把總牛宗貴陝安鎮標左營把總李永亦死之事 聞均 賜卹  
 如例 賞雲騎尉世職襲次完時以恩騎尉世襲罔替承緒子文  
 錦襲張喜子際桓襲趙喜子振宗襲宗貴子如升襲永嗣無考張  
 喜宗貴俱陝西榆林人喜由行伍於乾隆四十六年隨勦逆回屢  
 立戰功洊升是職宗貴由武生擢是職趙喜甘肅西甯人永陝西  
 安康人由行伍擢是職

右 國史館本傳



楊春和 張斌

楊春和四川閬中人由行伍於乾隆五十五年拔督標左營額外委五十七年隨征廓爾喀五十八年補重慶鎮標中營外委旋擢提標前營把總六十年隨征黔楚苗匪於爆木山大塘汛等處奮勇殺賊 賞戴藍翎又攻克榔木坨黃瓜寨山梁擢夔州協右營千總旋調督標中營千總嘉慶元年攻大里坪及平隴賊巢皆克之尋調勦達州教匪攻茨姑梁香鑪坪殲戮甚眾 賞換花翎三年勦王加美朱正聲等擒之進攻楊家河又擒賊首苟彬克青觀山追至巴州濛子灘擒羅其清復馳赴通江麻壩寨協勦四年以擒冉文偉功升督標右營守備進攻大甯縣沙沱子及青龍坡

協擒林天祥高均德王三槐等五年勦伍金柱股匪於陝西西鄉縣殲馘無算蜀中賊勢頗張春和自徽縣姚家坪取道廣劍於江油縣馬蹏岡迎擊力戰歿於陣時廣東和平營都司馬濤於西鄉督擊伍金柱追奔二十餘里至恭爾山戮三百餘人濤受傷戰歿甘肅同心城把總張斌擊賊於西鄉陣亡江南常州營守備邱榮升於西鄉黃草坪等處追高二馬五股匪越牆搜捕牆壓被傷死之先後事 聞均 賜卹如例 賞雲騎尉世職襲次完時以恩騎尉世襲罔替春和子世吉襲濤子灑襲斌子登魁襲榮升子廕監生濤雲南太和人由行伍隨征猛互被槍傷拔外委歷升龍陵營左哨把總千總昭通鎮標左營守備隨征貴州銅仁苗匪有功

嘉慶四年升是職斌甘肅甯朔人嘉慶元年以隨征川匪有功  
賞戴藍翎榮升廣東曲江人由行伍於乾隆五十三年隨征安南  
擊賊於市球江寨其旗擢行營外委旋升把總嘉慶元年隨征湖  
南苗匪又調赴湖北軍營三年移師陝西累戰有功擢順德協右  
營千總五年升是職

右 國史館本傳

陸軍省編纂部編纂部  
卷三之三十一

三

邱榮升 謝位揚等

邱榮升廣東曲江人乾隆五十三年以行伍隨征安南擊賊於市  
球江舉其旗拔行營外委五十四年遷把總事畢回營五十五年  
補南雄協外委千總五十九年補把總嘉慶元年借提標前營把  
總謝位揚右翼鎮標把總蘇衛疆羅定協右營把總馮連督標中  
營外委穆志雄隨剿湖南苗匪尋調赴湖北軍營三年移師陝西  
屢戰有功擢順德協右營千總五年遷江南常州營守備擊賊於  
西鄉縣黃草坪龍池場等處追賊日高二馬五等各股逸匪越牆  
搜捕牆壓被傷卒志雄先於四年在康家河擊賊戰歿六年衛疆  
戰死於甯陝廳屬之四畝連戰死於西畱壩所七年位揚戰死於



岐山縣西壩先後事 聞均 賜卹如例榮升位揚衛疆連志雄  
並 賞雲騎尉世職榮升子□□襲衛疆弟衛垣襲連子光華襲  
志雄子廷彪襲位揚高要人由行伍於嘉慶五年拔提標右營外  
委六年補本職衛疆連俱茂名人衛疆於嘉慶二年由行伍拔提  
標中營外委千總五年補本職連由行伍拔高州鎮左營外委三  
年遷本職志雄高要人由行伍拔督標後營額外外委嘉慶二年  
補本職

右 國史館本傳

耿貴和 康調元等

耿貴和山西甯武人由武生於乾隆五十二年拔甯武營額外外委五十六年補八角營外委五十八年拔殘虎堡把總嘉慶元年遷新平路瓦口千總二年隨剿陝省教匪殺賊有功遷大同鎮標右營守備四年擢天城都司六年正月陳朝觀辛聰等股匪由鹽場竹峪關等處竄赴大官灣初四日陳朝觀一股先到貴和偕參將李廷臣率兵至鷹嘴寨堵截殲賊三十有餘生擒賊目二次日賊至觀音峽焚掠貴和等迎擊又斃二十餘人自投出者十餘人俄辛聰魏棒棒等大隊踵至我兵寡不敵眾貴和力戰歿於陣同時陣亡者老營營乃河堡把總康調元楚雄協右哨外委高欽選



馬德舒 周華長等

馬德舒漢軍鑲藍旗人由行伍於乾隆四十二年擢驍騎校五十年四月遷印務章京十月兼公中佐領五十五年承襲三等輕車都尉五十七年擢副參領嘉慶二年授兩廣督標左營參將五年十月檄剿湖北教匪先於穀城縣等處防堵嗣隨總督長齡追剿高二馬五股匪由陳家莊葛藤埡進偕參將海麟遊擊拉哩等分七路繞徑環攻戮斃甚眾餘匪竄白河之西壩匿山林險窄窮營德舒偕參將雙福等分路進擊奪其險要大兵前後夾攻殲戮無算升廣州城守營副將十二月偕副將吉林泰追擊洋灘鼠匪又偕遊擊常祿分帶馬步兵赴竹谿協剿屢著勞績六年徐添德



張允壽等屯門神坡放馬溝等處滋擾總督書麟令德舒偕孫清元等由北星河繞其前大兵擊其後斬獲甚夥嗣以房縣北境樊家河香鑪山常家河等處有賊眾踞重山疊嶂之間偕孫清元等分三路進剿由常家河一路迎截遇賊於白火石直前奮擊戮百餘匪追奔至龔家溝突有五六百匪接應德舒等猝不及備奮勇格鬪手刃數十人偕廣東肇慶協千總周華長中矛傷俱力竭陣亡外委杜桂明隨德舒入隊衝擊至是奪獲其屍亦被矛傷歿於陣事 聞均 賜卹如例桂明照把總例 賜卹均 賞雲騎尉世職龔次完時以恩騎尉世襲罔替德舒子毓奇龔華長子鷹揚龔華長廣東高要人桂明嗣籍無考



右 國史館本傳

國朝實錄卷之二十七 臣

皇朝通志卷之四十四

四

王萬岱 安榮庫

王萬岱湖南武陵人由行伍於嘉慶二年四月拔補湖廣提標前營外委隨征邪匪有功十一月升補提標中營把總四年七月隨副將孫清元追剿徐家壩虎溪灣一帶賊匪匪眾竄入老林餘匪會合蜂集且戰且竄進至松樹坪官兵於對面山梁屯紮二十三  
日賊眾分爲五道來撲山梁孫清元率兵迎剿萬岱同千總孫餘慶把總徐秋魁首先壓下奮不顧身賊以矛連刺之顛踣落崖下官兵訝其已殞賊既退始跡獲於深崖箐林中氣尙未絕以救得甦奏入奉 上諭賞給千總嗣於五年正月拔補湖南宜章營千總十一月補授湖廣督標左營守備六年二月隨湖廣總督書麟

湖北巡撫倭什布追剿賊匪徐添德等於竹山縣時匪眾勢欲竄  
赴縣城官兵迎截賊亡命奔突萬岱率領湖南兵丁奮勇追殺衝  
入賊隊斃賊二十餘名身受矛傷猶努力格鬪以傷重力竭陣亡  
是月獨石口松樹堡千總安榮庫於分水嶺擊賊陣亡事 聞奉  
旨王萬岱等著咨部照例議卹均廕雲騎尉世職襲次完時給予  
恩騎尉世襲罔替萬岱子添喜襲榮庫孫青山襲榮庫直隸萬全  
縣人

右 國史館本傳

和興額

和興額滿洲鑲白旗人葛濟勒氏父永昌襲雲騎尉世職和興額初以烏槍護軍從將軍公明瑞出師緬甸有戰功乾隆三十六年授烏槍藍翎長隨領隊大臣莽拉察征金川右臂中烏槍傷受優賞四十年授烏槍護軍校四十三年襲雲騎尉四十四年擢陝西西安佐領四十六年大學士公阿桂征撒拉爾逆回西安將軍伍彌秦令率兵往隸既至蘭州從副都統海蘭察進攻華林山奪取龍尾山梁礮賊甚眾奉旨賞戴花翎加佛爾卿額巴圖魯名號並加協領銜四十七年晉授協領四十九年逆回田五又叛將軍傅玉令偕遊擊高人傑率兵擊賊於西山頂大敗之時官軍盡



銳備逆回於石峯堡總兵蘇靈與和興額俱督兵奮勇爭先右臂復中矢石得 旨獎賞五十二年擢廣州右翼副都統五十四年以私收衙署餘屋租銀鑄一級調用旋授頭等侍衛爲巴里坤領隊大臣六十年復擢廣州左翼副都統嘉慶二年黔苗滋事擾廣西之西隆州總督吉慶以和興額屢經出師熟悉行陣奏調協剿先經敗賊於戛雄殲獲甚眾並得其器械輜重時逆苗屯於亞槁其山徑偏仄多溝坎賊復深掘設伏軍不得進吉慶與和興額偵得深箐中小路一綫可繞出其後乃分兵進攻和興額由西面夾擊殲獲無遺奏入 恩賞玉扳指火鑷包大小荷包等件又攻賊於那地者浪諸處俱斃之西隆州境平復從吉慶圍賊於巖場寨

降其民戮黔苗數百人遂進軍紅水江夜渡江天明至入渡與諸  
軍會合殲賊二千餘人再進至板蚌至板階伏兵山下五鼓賊至  
候過其半突擊之斃賊無算再進至冊亨分路搜剿州城圍解黔  
苗遂平疊次事 聞皆奉 獎賜三年調涼州副都統五年川楚  
教匪蔓延陝甘總督長麟奏令督軍赴陝西邊界枋堵初駐軍紅  
花鋪旋移軍斜谷關復移軍高關時冉學勝張世龍伍金柱各股  
賊匪俱由辛峪竄出和興額未能截剿奉 旨革巴圖魯名號拔  
去花翎貶秩爲防禦隨營自贖會賊匪竄至沔縣之乾溝河設伏  
以誘官軍長麟令和興額往擊之分軍三路盡殲其伏賊奉 旨  
授佐領遇缺卽補六年賊匪樊人傑將由黑河西竄截賊於五丁

關斃賊四百餘人生擒六十餘人奪贏馬器械甚眾方截賊至大路時和與額手刃三賊用力過猛右臂舊創復裂得優旨賞給協領銜遇缺卽補時畱壩逆匪冉學勝屯聚大壩借總兵楊奎猷督軍勦之以五十騎超眾賊前遇伏失利歿於陣恩旨照副都統例議卹子福格襲騎都尉又一雲騎尉世職見任江南松江左營遊擊

右 國史館本傳

阿爾當 捷慶等

阿爾當扎克塔氏熊岳滿洲正黃旗人任岫巖滿洲鑲黃旗佐領  
嘉慶四年隨征陝西教匪六年三月從總兵楊奎猷追剿冉學勝  
股匪偵知大壩地方有賊四五百人屯聚山溝官軍分左右山梁  
直前剿殺溝內石徑偏狹林木叢雜兵力不能施展阿爾當偕漢  
軍鑲紅旗佐領捷慶滿洲正紅旗防禦丹巴涼州鎮標後營外委  
秦朝元河州鎮標右營外委秦敬西甯循化營外委李景伯馬天  
希俱力戰歿於陣事 聞均 賜卹如例 賞雲騎尉世職阿爾  
當子那丹珠襲捷慶子漢琪襲丹巴子奢英額襲朝元子傑襲敬  
子世美襲景伯子馥襲天希子成襲捷慶張氏漢軍鑲紅旗人丹



巴安扎拉氏滿洲正紅旗人朝元甘肅武威人乾隆四十九年由行伍拔補涼州鎮標中營額外外委五十三年補本職敬景伯天希俱甘肅河州人敬由行伍於嘉慶二年隨征達州歷戰有功拔補本職景伯由行伍於嘉慶四年隨剿陝匪積功拔西甯城守營外委五年調補本職天希乾隆五十一年由行伍拔額外外委五十四年補本職

右 國史館本傳



李殿魁 陸建敏

李殿魁甘肅皋蘭人由己亥科武舉於乾隆五十一年拔補陝西河州城守營千總六十年擢甘肅西甯鎮標中營守備嘉慶四年三月藍號賊張映祥擾甘肅境署布政使廣厚署河州鎮總兵吉蘭泰督兵擊之賊分兩股一竄涼恭一竄宕昌將軍富成追剿宕昌賊廣厚吉蘭泰追剿涼恭賊敗之於閭井擒賊目二人賊竄新寺鎮廣厚吉蘭泰督兵進剿殿魁奮擊先登奪器械馬匹無算殲賊目張世龍奏 聞 賞戴藍翎十月擢甘肅安西協中軍都司五年升署甘肅巴里坤鎮標左營遊擊六年正月賊辛聰竄向油扎坪大沙河雪山坪一帶總兵楊奎猷帶兵抄截殿魁自爲一路

殲賊無算三月初十日賊冉學勝由高橋溝東竄玉皇廟遇總兵  
穆克登布等堵剿不敢衝過折向高家臺南奔殿魁隨楊奎猷進  
剿斃賊一百餘名十三日楊奎猷探知冉添元哨聚大壩分兵由  
兩路山梁壓剿協領和興額冒陣殿魁恐其失利卽催兵一齊撲  
下遇伏歿於陣時甘肅張義營都司陸建敏江西銅鼓營千總韓  
萬年同擊賊陣亡事 聞奉 旨李殿魁陸建敏韓萬年俱著咨  
部議卹均廕雲騎尉世職襲次完時給予恩騎尉世襲罔替殿魁  
子麟襲建敏子培襲萬年子世儒襲建敏甘肅甯夏人萬年甘肅  
西甯人

右 國史館本傳

陳五輯 郭洪

陳五輯甘肅河州人由武舉隸西甯鎮標學習於四十五年補巴燕戎格營把總四十六年隨勦逆回遷都堂堡千總旋升陝西循化營守備嘉慶三年擢西安協都司檄剿教匪四年四月高均德股匪由陝竄甘肅秦州分屯渭河之南馬跑泉北社棠鎮與靜甯州華亭縣接壤署甘肅布政使廣厚於南岸設疑兵令五輯偕都司馬良棟等閒道渡河由新集陟丁華嶺下擊賊驚潰爭涉渭河適雨後漲發賊陷於淖者悉殲之餘匪東竄五月五輯復隨廣厚馳擊賊不敢接戰繞避深箐廣厚率兵沿犀牛江東岸追至雙廟子資夜冒雨競進山路陡滑五輯偕同知縱司燁先行至徐家壩

山梁擁兵而下賊駭散斬獲無數六月至句旗寨賊負嶠抗拒五  
輯奮力當前攀崖而上弁兵繼之戮一人奪獲偽帥旗一五輯身  
中矛傷氣不少褻廣厚令縱司燁帶兵協攻賊大潰越山遁五輯  
不避鋒鏑且能激勵兵士 上嘉其功 賞戴花翎並以遊擊升  
用賊南竄大河店將由泉江入陝至楊家灘渡口經我兵追剿遂  
沿江奔虔關五輯等隨後擊之徑極險仄賊自相踐踏多墜巖下  
五年補甘肅肅州鎮標左營遊擊旋調大靖營遊擊時張映祥股  
匪擾岷州有直趨狄道渭源之勢五輯先帶兵哨至大草灘遇賊  
數百人遂率把總關殿魁等擊走之賊奔鞏昌階州五輯隨廣厚  
赴文縣防堵駐賈長壩與遊擊永泰等相犄角適川匪被剿由舊



州東竄蕎莊碧山溝近文縣之玉壘關廣厚飭守備王懷吉等掘其溝渡並知州胡紀謨及五輯相接應賊知有備竄左家壩伐竹木爲筏潛圖過河知州徐學采等率兵迎擊五輯等繼至戮三十餘人偕都司劉天秩駐椿樹壩守禦六年冉學勝股匪竄出廢邱關五輯偕候補協領和興額等以陝甘總督長麟檄先往追剿總兵楊奎猷繼之至柳川溝分三路進剿五輯偕參將羅金亮等攻其右戮百餘人賊越青岡坪老林踞山梁我兵奮勇仰攻至半山適陝西商州城守營遊擊郭洪等已先登兩路齊上賊大潰下部議敘賊復偕冉添元嘯聚畱壩廳之大壩地當兩山之間有深溝溝中樹林茂密石徑崎嶇賊四五百騎伏焉其伏於山灣者尤眾



五輯洪偕巴里坤鎮標左營遊擊李殿魁等隨和興額楊奎猷分道進剿和興額僅率五十餘騎下山遇賊騎前鋒將馬隊截回楊奎猷恐其失事卽率五輯等督步兵齊下伏賊四起林深徑仄我兵勇力不得施和興額被害五輯與洪殿魁俱以力戰歿於陣事聞均 賜卹如例 賞雲騎尉世職襲次完時以恩騎尉世襲罔替五輯子應德襲洪子廷選襲洪甘肅人由行伍拔把總遷千總嘉慶四年升固原城守營守備五年署陝西保安營都司六年升是職

右 國史館本傳

邊奏凱 馬負圖等

邊奏凱甘肅武威人由行伍於乾隆五十二年拔涼州鎮標左營額外委五十五年擢把總嘉慶元年檄鞏川楚教匪屢戰敘功二年遷右營千總四年升陝西波羅營守備六年冉學勝股匪竄陝西汧陽寶雞縣等處奏凱隨總督長麟分三路擊之奏凱偕參將羅全亮攻其右賊由柳川溝南竄犯左右兩山我兵自山頂壓下戮百餘匪賊不能支遁入青岡坪老林據險抗拒我兵攀援而上奪其山梁戮四百餘人生擒百餘人賊奔武關河屯畱壩廳之大壩其地兩面皆山中爲深溝林箐叢密賊四五百騎匿溝中其伏於山灣者尤眾我兵分道夾攻伏皆起奏凱以力戰歿於陣時

甘肅涼州鎮標右營千總馬負圖陝西保安汛把總柴如柏西鳳  
 營千總李洪彥均相繼擊賊於大壩陣亡先後事 聞均 賜卹  
 如例 賞雲騎尉世職襲次完時以恩騎尉世襲罔替奏凱子佩  
 綬襲負圖子玉春襲如柏子柱襲洪彥子成襲負圖甘肅皋蘭人  
 由行伍擢是職如柏甘肅西甯人

右 國史館本傳

海進龍

海進龍甘肅固原州人由行伍於乾隆五十五年拔陝甘督標左營額外委五十六年隨征廓爾喀五十七年補後營外委旋遷中營把總五十八年調固原提標右營把總嘉慶元年三月隨剿湖北教匪四月擢陝西西安城守營千總九月調甘肅甯夏鎮標左營千總十月升陝西波羅營守備四年升督標中營都司五年四月劉添成股匪由甯陝廳之四畝地竄掠七佛溝竹山溝一帶將軍宗室恆瑞由石嘴子進剿令進龍帶步隊由鎮安之黑窯塘翻山前進賊奔山梁抗拒我兵兩路奮擊戮十餘名追殲二百餘名生擒李維正等三十七名閏四月隨恆瑞截剿楊開甲股匪於

漫山關戮斃無算六年總兵九十偵知各股匪出沒老林令進龍帶兵由畱壩廳之大壩關協勦賊屯樊家嶺山梁抗拒我兵奮力仰攻山旁伏賊突出進龍猝受矛傷歿於陣事聞賜卹如例賞雲騎尉世職襲次完時以恩騎尉世襲罔替子珍襲

右 國史館本傳



汪銓

汪銓江西彭澤人由吏員議敘府經歷分發陝西試用乾隆五十九年補漢中府經歷六十年署襄城縣知縣時川楚陝三省軍興銓以接運糧餉無誤題請實授仍調赴軍營辦理糧務嘉慶四年署畱壩廳同知五年賊竄鳳縣及畱壩銓偕從九品雒昂率鄉勇堵禦六年再學勝股匪經官兵勦散復嘯聚於畱壩屬之大壩等處肆行焚掠其地兩面皆山溝深箐密石徑仄隘副都統和興額總兵楊奎猷等率馬隊奮擊賊恃眾抗拒銓接仗三日均有斬獲嗣以賊屯火神廟九臺子諸處偕雒昂帶健勇乘夜擊之施槍礮擲火彈燬百餘人生擒十四人餘匪遁竄窳確廠銓偕雒昂隨總

兵長春復乘夜擊之戮數十人生擒三人翌日長春又令鄉勇曾  
鳳等改裝暗藏火彈混入賊隊銓等夜率兵勇襲之賊營火發我  
兵奮勇進剿殲賊無算生擒九名銓躬冒矢石鼓勇爭先甫至溝  
口遇賊衝突歿於陣事 聞 諭曰畱壩同知汪銓親赴前敵遇  
賊被害實堪憫惜著照知府例議卹 賞雲騎尉世職襲次完時  
以恩騎尉世襲罔替子啟昆襲

右 國史館之傳

宋英 張恩錫

宋英甘肅洮州人由西安駐防漢軍出旗改隸綠營行伍乾隆四十七年拔洮岷營額外外委五十一年補漳縣汛外委旋擢陝西河州鎮右營把總嘉慶二年擢甘肅甯夏鎮標前營守備五年擢陝西綏德城守營都司六年五月隨原任副都統和興額截勦陝西賊匪樊人傑等時賊由西路之武關竄黑河一帶欲犯甘省境我兵自北向南併力兜追賊由黑河寨出大安向東南狂奔竄至鐵鎖關官兵探知賊蹤卽馳赴寬川地方潛伏山路令鄉勇一二入於山頂哨探賊竄至官兵突起喊殺賊卽折向南奔官兵追至五丁關賊搶上對面山梁恃險抗拒經英等帶兵奮力攻撲賊奔

上五丁關山梁官兵緊跟追殺槍箭並施斃賊四百餘名生擒六十七名賊敗竄英以創重歿於陣同時有雲南臨元鎮標中營把總張恩錫隨提督七十五截勦川陝交界竄逃餘匪時賊匪數百屯聚廣元之三溪寺恩錫等奮力衝殺賊奔上大山之右山下柘壩河溝內忽有賊抄來官兵分投力敵斃賊甚夥值雪霧迷漫山上之賊又復下壓官兵併力勦殺賊始遁去恩錫亦力戰陣亡先後事 聞得 旨宋英張恩錫俱著議卹事下兵部 賞卹如例議給雲騎尉世職襲次完時各給恩騎尉世襲罔替英子錫福襲恩錫雲南昆明縣人由武生中式乾隆五十三年武舉五十四年入本省督標中營效力六十年隨勦黔楚逆苗嘉慶二年調征四

川邪匪以功補臨元鎮標中營把總無子弟天錫承襲

右 國史館本傳



西華書局影印 卷三百二十一

三

傅廷剛 張聯程

傅廷剛四川成都人由行伍於乾隆五十年二月拔提標右營額  
外外委五月補中營外委五十一年擢前營把總五十四年遷千  
總嘉慶元年湖北來鳳縣旗鼓寨譚貴股匪平廷剛隨總兵諸神  
保擒獲賊首楊禹九等八名夥匪二千餘人奏入 賞戴藍翎二  
年進剿老木園其地左接蜈蚣嶺爲賊巢穴廷剛偕州判馬鳴鑿  
等攻克山梁木卡戮斃多名三年升邑梅營守備四年擢督標中  
營都司五年五月升川北鎮標左營遊擊八月賊於竹峽子地方  
攻撲民峒經官兵擊退竄甘肅階州廷剛率兵分路堵禦六年二  
月賊竄八斗坪屯山嶺廷剛偕副將游棟雲兩路上山襲戮多名

嗣復勦擊南山股匪生擒首逆王廷詔得旨嘉獎下部議敘並賞換花翎十月樊人傑各股匪由南漳縣之漳河屯花石溝廷剛等奮勇進勦擒斬無數追奔三十餘里山旁伏匪突出衝斷前隊廷剛力戰死之四川建昌鎮標中營把總張聯程亦中矛陣亡事聞均賜卹如例賞雲騎尉世職襲次完時以恩騎尉世襲罔替廷剛子文忠襲聯程子大陸襲聯程四川松潘廳人

右 國史館本傳

吳振亮

吳振亮廣東番禺人由行伍於嘉慶元年三月隨征湖南苗匪六月復乾州十月克平陸十二月攻石隆寨誅首逆石柳鄧振亮皆與有戰績並受槍傷故提標右營外委二年二月隨剿湖北教匪於長陽縣四方壩將其巢四月進攻芭葉山六月克大壩口遷把總九月殲首逆林之華於雪崖頂十一月進攻朱里寨首先撲入被石傷三年正月克終報寨首逆覃加耀就擒二月調赴四川卽由川入陝四月隨領侍衛內大臣德楞額泰勦爛草坪擒賊目王國用五月復追賊入川擒賊目鄂有明於固金壩九月克箕山進剿大鵬山四年正月克麻壩寨首逆羅其清冉文儔等以次擒獲三

月殲首逆冷添祿於石頭堰振亮皆在事有功七月擒僞帥靳有  
年於青岡坪 賞戴藍翎十一月首逆王登廷於蒼谿縣貓兒壩  
就擒十二月升千總五年正月復帶兵入陝於徽縣紅渠鋪殲賊  
目李魁三月擢雲南鎮雄營守備六月擊賊於兩當縣楊家店殲  
戮甚夥六年二月追勦高二馬五等股匪於新集斬馘無算擒王  
廷詔於川陝邊界之鞍子溝三月追高馬二逆於甯羌州鐵鎖關  
擒之升直隸武清營都司並邀 恩賚八月 賞換花翎十一月  
苟文明各股匪竄巴州達州一帶振亮於太平廳屬之野竹灣柏  
森坪等處進勦力戰歿於陣事 聞 賜卹如例 賞雲騎尉世  
職襲次完時以恩騎尉世襲罔替弟振邦襲



右 國史館本傳

國史館本傳  
卷三十一  
忠義三十一  
七

175-654

175-654

175 - 654

陳應彪 李杰

陳應彪四川華陽人由行伍於乾隆五十八年拔馬邊營額外外委五十九年補督標左營外委六十年擢成都城守左營把總嘉慶二年升敘馬營千總三年三月升建昌鎮標左營守備七月張漢潮股匪於四川通江縣北滋擾應彪隨總兵長春由壩谷山梁截剿賊竄青石關直走西山復繞出梅子壩應彪等抄前迎擊戮七百餘人 賞戴藍翎四年賊由馬家坪竄康家河我兵奮勇追擊有矛手五六百人從山坳突出應彪力戰受傷仍躍登山頂後隊繼之賊遁至西毛坪與我兵對河屯紮應彪以將軍輿肇檄過河兜截俘馘二十餘人餘匪向西溝奔竄應彪偕副將多爾濟扎

普等由燕子河分道抄襲復殲百餘名。賞戴花翎賊又從石花街出與我兵遇於趙家山應彪率三十餘騎由山頂下壓並用進步連環礮擊斃數十人賊猶蜂擁而進會侍衛明亮兵至賊潰竄。榜蟬谿六月擊賊於朱家背並於蕭家埡設伏賊驚潰八月賊趨入河腦應彪偕侍衛富翰左右夾擊戮二百餘人六年正月賊屯獅子巖應彪由趙家山擊走之復自西溝進擊追奔二十餘里十一月苟文明各股匪竄廣元縣踞王家埡山梁冰凌溜滑應彪奮勇先登力戰死之先是賊擾廣元時總督勒保率兵由百丈關兜截賊潛伏大茅坡其地山勢懸互樹木叢雜把總李杰入山搜捕遇伏連中矛傷陣亡先後事聞得旨陳應彪著照都司例賜

卹李杰 賜卹如例均 賞雲騎尉世職襲次完時以恩騎尉世襲罔替應彪子鳳麟襲杰子華堂襲杰四川大邑人

右 國史館本傳



皇朝通志卷之六十一

三

張雲鳳 郭永泰等

張雲鳳貴州黔西人由行伍於乾隆四十八年拔貴州黔西協右營額外委五十六年拔平遠協右營外委五十八年拔左營把總六十年拔黔西協左營千總是年隨征苗匪擒賊首吳半生賞戴藍翎嘉慶三年遷上江協右營守備六年十一月川省邪匪滋事雲鳳隨總兵田朝貴進剿時李彬股匪由巴州竄至恩陽山朝貴等偵賊遇於長柏河遂率兵迎擊斬獲數十人賊竄上獅子頭山梁我兵攻之賊分爲二伏溝中我兵前進賊突出截我後隊我兵奮力勦擊殲賊十餘賊始潰雲鳳先登陷陣於黃柏河歿焉同時山西平魯營外委郭永泰署山西懷鎮營把總張威山西老

營營外委屈顯隆俱擊賊陣亡事 聞得 旨張雲鳳郭永泰張  
威屈顯隆俱著咨部議卹均廕雲騎尉世職襲次完時各給恩騎  
尉世襲罔替雲鳳子蘭桂襲永泰子玉麟襲威子光清襲顯隆子  
興順襲永泰山西平魯人威山西大同人顯隆山西偏關人

右 國史館本傳

孫斯禮 黃大勇等

孫斯禮雲南昆明人原籍陝西長安縣由行伍於乾隆五十三年拔雲貴督標右營外委嘉慶二年擢左營把總隨總督勒保剿苗匪於水煙坪天雨甚我兵冒雨攻其山梁有執旗數匪率眾欲遁斯禮奮勇先登獲其二餘匪殲戮無算遂克水煙坪奏入 賞戴藍翎三年遷千總尋升永昌協右營守備四年擢劍川營都司六年隨總兵田朝貴剿四川教匪時李彬股匪爲大兵所截竄巴州至恩陽山朝貴以勒保檄率斯禮等尾追遇賊於黃柏河斬獲甚夥賊奔獅子頭山梁斯禮等率兵仰攻賊忽分爲二乘我兵登方及半伏匪突自溝中出經斯禮等奮力衝擊戮數十人餘匪竄斯

禮以受傷歿於陣是年陝西保甯堡把總黃大勇守漢陰紫陽交界之段江石遇賊乘夜躡淺渡江帶卡兵堵禦以眾寡不敵力竭陣亡事 聞均 賜卹如例 賞雲騎尉世職襲次完時以恩騎尉世襲罔替斯禮子賜祿襲大勇子維忠襲大勇陝西榆林人由行伍擢是職

右 國史館本傳



三福 賽尙阿

三福滿洲正黃旗人姓嚴佳氏由烏槍護軍於乾隆五十五年二月拔護軍校五十八年授空銜花翎六十年擢委護軍參領嘉慶四年授副護軍參領五年閏四月奉 旨發往湖北軍營以遊擊委用尋授湖北衛昌營遊擊十二月賊匪徐添德一股屯聚隆須堽一帶三福隨同副將吉林泰進兵蹙之賊隨戰隨竄六年十一月戴家營一股竄往白河口老莊子一帶復聚集山內零匪南奔大禾田又會合川省邊界大股賊眾併力竄回湖西平渡河地方人數驟增幾及二千餘人巡撫全保提督長齡約會兩路並攻初八日全保趕至老居溝官兵分投抄擊賊匪連夜散竄八里坡併

力肆突適三福搜山至彼乘夜抄至一椀泉攔勒槍箭並發斃賊七十餘人賊已退卻三福帶領兵勇衝入賊隊射斃數賊匪眾情急攢撲路仄冰凌馬力難施受槍陣亡是時直隸霸州營遊擊賽尙阿亦在黃柏河擊賊歿於陣先後事 聞得 旨三福衝入賊陣受傷陣亡深爲可惜著咨部賜卹與賽尙阿卹如例均廕雲騎尉世職襲次完時給予恩騎尉世襲罔替三福子六十五襲賽尙阿子窩新布襲賽尙阿滿洲鑲藍旗人姓倉佳氏由前鋒於乾隆四十二年授藍翎長四十二年擢前鋒校四十九年授山西應州城守營守備六十年擢天城營都司嘉慶二年擢本職

右 國史館本傳

姚國棟 畢振林

姚國棟山東歷城人由武舉隸撫標效力於乾隆四十五年補膠州協把總四十六年擢登州鎮標中營千總四十九年升卽墨營守備五十八年遷膠州協都司嘉慶三年三月隨剿湖北教匪時張漢潮股匪二萬餘人自石牌向北竄國棟隨總督景安率弁兵分路迎截追奔二十餘里九月升河南南陽鎮標中軍遊擊四年四月獅子壩股匪由洋谿竄雲路溝邊隘國棟隨總督倭什布迎截戮前隊三十餘人七月隨總兵路超吉駐守梓桐堽適倭什布檄路超吉分兵赴竹谿守城其梓桐堽防堵事宜卽交國棟偕參將海齡督辦十一月升湖北興國營參將六年正月國棟偕副將

樊雄楚駐守竹谿縣適徐添德股匪攻城竭力堵禦總兵長齡領隊大臣明亮督兵應援賊遂遁六月隨總督吳熊光巡撫全保駐守獅子崖並督催糧運九月隨全保由竹谿赴房縣截擊曾芝秀股匪生擒賊目陳國章李旺吳嘉周三人十一月隨全保由獅子崖北面截剿曾芝秀戴家營賊竄八里坡一帶國棟偕遊擊三福帶兵勇搜山乘夜抄至一碗泉截剿戮七十餘人賊稍卻國棟復衝入賊隊射斃數匪以路仄冰凌馬力難施歿於陣先是大同鎮標中營把總畢振林擊賊於黃柏河陣亡先後事 聞均 賜卹如例 賞雲騎尉世職襲次完時以恩騎尉世襲罔替國棟子文壇襲振林子映斗襲振林山西大同人

右 國史館本傳

國史館本傳

三十一





國朝耆獻類徵初編卷三百六十八目錄

忠義三十八

唐玉龍

賈紹復等

吳浩

段松林

伊克唐阿

徐延齡

朱得芳等

酒天培

樊志曾等

李鳳鳴

桂天元

韓自昌

金三重等

歐愷

郭大朝

高承耀

陸世元

馬相

黃勝照等

鄭憲恩

王朝宗

王懋賞

方雲超

倪聯清

鄒宗夔

張建業

賈龍圖

胥泗起

周長泰等

卓祿

張明升

李自明等

李廷彪

李正太等

馬濟

石華貴等

李芝榮

李翠

穆克登布

朱集才

張明德

陳名魁 連旭

胡振聲

武克勤 王維光等

國朝耆獻類徵初編卷三百六十八

通奉大夫前署江西巡撫江西布政使司布政使湘陰李桓輯

忠義三十八

唐玉龍 賈紹復等

唐玉龍四川雅安人由行伍於乾隆五十四年拔龍安營左哨外委五十七年擢平番營左司把總嘉慶元年七月遷松潘鎮標中營右哨千總十一月升雲南開化鎮標左營守備三年隨參贊德楞額秦勦高均德股匪於陝西雒南兩岔河四年四月升臨元鎮標左營都司八月攻克龔文玉卜三聘等賊巢玉龍偕都司李東山等於香衝地方搜獲偽元帥龔其位並龔文玉次子龔以楚及蕭

永年等二百七十四名奏入 賜葬肅巴圖魯號五年正月升陝西河州鎮標右營遊擊三月隨德楞泰進剿川匪由黃茅嶺偕副都統賽沖阿溫春等四路並進槍斃冉添恆生擒陳德俸射殪冉添元餘匪斬獲無算閏四月賊竄亭子鋪麻柳場等處玉龍偕溫春賽沖阿等擊走之八月剿李彬陳朝觀股匪於陡坎子有功升廣東新會營參將十二月楊開第齊國謨股匪竄觀音河玉龍等率兵截擊戮二百餘名六年高二馬五股匪蟻聚乾溝窺伺山陽縣城玉龍等分路夾攻大敗之生擒老教師龔如一戮僞元帥閻慎珍並艾文舉等三名餘匪竄蔣家溝老林玉龍復偕副將蒲尙佐追擊之功最下部議敘尋龍紹周股匪分前中後三隊將由和



岡谿奔逸並於後面老林內伏千餘人以防追剿玉龍偕都司達  
自祥等帶步兵數百名扼谿口堵截之嗣以大兵進攻和岡谿其  
老林伏匪由一椀泉抄襲玉龍營後圍攻甚急玉龍單騎先行衝  
突射斃騎馬賊數名手刃數十人歿於陣大兵攻和岡谿其地兩  
山夾峙河水洶涌賊恃險抗拒我兵奮力擊走之四川巫山營都  
司賈紹復提標右營外委鄭起高力戰陣亡事 聞均 賜卹如  
例 賞雲騎尉世職襲次完時以恩騎尉世襲罔替玉龍子繼恩  
襲紹復孫元睿襲起高弟起能襲紹復起高俱四川成都人

右 國史館本傳



吳浩 段松林

吳浩陝西安康人由行伍於乾隆五十九年拔興漢鎮標左營外  
委嘉慶二年擢把總遷右營千總五年正月升山西得勝路守備  
十月升直隸河間協中軍都司檄赴陝西軍營六年陳朝觀等匪  
被四川官兵剿潰合三四股爲一處竄陝境由簡池壩李子坪北  
奔羅家壩經略大臣額勒登保飭提督慶成帶兵截剿由廟壩雁  
礮一帶迎擊時值陰雨雲霧四塞我兵冒雨直前左右衝擊戮百  
餘人生擒十餘名浩以力戰受傷陣歿先是總督勒保駐川陝接  
壤之界嶺其大了口野龍池一帶山險林密俱有匿匪分撥兵勇  
隨剿隨進以乾龍峒存有軍米賊攻甚急四川督標中營千總段

松林隨侍衛阿哈保等前往救援賊遂遁我兵乘勢追擊有股匪由乾龍峒左山林內突出分投迎剿殲賊百四五十名松林奮勇追入樹林中矛傷歿於陣先後事 閻均 賜卹如例 賞雲騎尉世職襲次完時以恩騎尉世襲固替浩子天福襲松林子廷秀襲松林成都人

右 國史館本傳

## 伊克唐阿

伊克唐阿瓜爾佳氏吉林烏拉滿洲正黃旗人經略大臣威勇侯額勒登保弟由馬甲於嘉慶四年隨剿四川教匪屢戰奮勇斬獲多名五年擢驍騎校 賞戴藍翎六年調赴陝西軍營以冉學勝股匪竄隴州之草白峪伊克唐阿隨護軍統領扎克塔爾領馬隊馳擊賊騎從溝岔突出我兵直前衝壓戮四五十人伊克唐阿陷陣歿事 聞 上以額勒登保爲國宣勞伊弟又奮勇捐軀 命加等議卹餘 賜卹如例 賞雲騎尉世職襲次完時以恩騎尉世襲罔替子哈琅阿襲旋襲額勒登保一等威勇侯爵官 御前侍衛鑲紅旗蒙古都統



國史館本傳

右 國史館本傳

徐延齡 朱得芳等

徐延齡甘肅甯夏人由武舉於乾隆三十九年遷兵部差官四十五年中式武進士以衛守備用仍充差官效力四十六年期滿引見以營守備用五十二年選陝西起臺堡守備五十三年署舊洮營都司五十八年升安邊堡都司嘉慶元年署延綏鎮標左營遊擊六年升商州城守營遊擊時苟文明股匪由嘉陵江竄甘境之梅子園直趨西固文縣等處經提督七十五迎擊追奔至太平川七十五偕提督慶成總兵永明等合圍之賊乘夜由陽平關下游之燕子河潛渡白水江東岸延齡方在陽平關駐守聞賊至率弁兵二百於江岸堵禦黑夜與賊相角兵寡不敵延齡猝中刀矛傷

歿於陣先是賊竄梅子園時山西保德營千總朱得芳隨慶成擊賊陣亡先後事 聞均 賜卹如例 賞雲騎尉世職襲次完時以恩騎尉世襲罔替延齡無子孫濟寬襲得芳子鈺襲得芳甘肅固原州人由行伍於嘉慶四年拔固原提標前營外委五年擢中營把總六年升是職

右 國史館本傳

酒天培 樊志曾等

酒天培直隸正定人由行伍於乾隆五十九年拔固關營外委嘉慶二年擢提標中營把總旋升磁州汛千總四年遷正定鎮標左營守備六年升陝西建安堡都司隨剿教匪時徐添德股匪竄甯陝廳一帶經大兵堵截由天池垣東遁其夥匪由夫子關北竄老魚壩將涉淺渡江復爲提督慶成所擊匿黑溝適是夜風雨交作又逸出東竄我兵三路追剿擒戮多名餘匪四五十人潛從老林向東南遁天培獨當其衝將乘勢盡殲之深入林箐奮力追逐猝被矛傷陣亡先是直隸深州汛千總樊志曾擊賊於黑溝戰歿是時冉學勝股匪由楚境折竄白河與張添倫姚馨佐等合我兵分

數路進剿賊屢敗竄董家坡其地爲東走楊柏坡之路我兵夾擊之擒戮甚眾廣西慶遠協守備朱純彩奮勇直前亦中矛陣亡先後事 聞均 賜卹如例 賞雲騎尉世職襲次完時以恩騎尉世襲罔替天培子成章襲志曾子行簡襲純彩子一森襲志曾直隸正定人純彩廣西臨桂人由行伍於嘉慶元年出師湖北二年拔桂林營外委四年擢把總以隨征出力 賞戴藍翎尋升梧州協左營千總六年升是職

右 國史館本傳



李鳳鳴 桂天元

李鳳鳴四川華陽人由武生中式乾隆四十四年武舉五十二年補四川重慶中營把總五十八年擢右營千總嘉慶五年擢綏甯協右營守備六年遷陝西定邊協左營都司嘉慶七年二月剿捕雅匪隨四川總督勒保等帶兵向大竹縣進攻分爲左右兩路探蹤進躡鳳鳴率馬隊由左手山坳抄至溫家槽地方山勢陡險賊匪一聞官兵信卽奔上山梁鳳鳴帶兵爭先追殺賊匪在山上拋擲石塊勢如雨下鳳鳴奮力搶上射斃執旗賊一名賊匪猶恃險抗拒鳳鳴率兵勇仰攻所騎馬爲石塊擊傷躓山坎遂棄馬步行督兵向前忽坎旁突出二賊持矛向截猝不及備被戕陣亡時湖

北賊匪亦聚眾於巴東縣屬兩河口圍攻峒寨將軍德楞泰督飭官兵三路進剿賊眾恃險下壓將弁競進仰攻槍箭齊發復以大礮轟擊之立斃賊匪三十餘名生擒項朝富等十七名餘賊搶上山頂倚恃陡險推滾亂石搏擊如雨官兵冒石競進搶上山頂衝入賊隊貴州凱里營外委桂天元受傷歿於陣先後事 聞得旨李鳳鳴桂天元俱著咨部賜卹均廕雲騎尉世職襲次完時各給恩騎尉世襲罔替鳳鳴子寶餘襲天元無子貴州都勻府都江廳人由行伍補今職

右 國史館本傳

韓自昌 金三重等

韓自昌甘肅武威人以父涼州鎮標右營千總增壽隨征金川陣亡廕把總於乾隆四十三年補涼州鎮標左營把總洊擢陝西靜甯協中軍都司嘉慶元年隨剿教匪三年升甘肅大馬營遊擊尋遷陝西陽平關參將五年賊擾沔縣乾溝河及南鄭縣大石埡總督長齡分兵截擊率自昌等赴各路接應斬獲甚眾賊旋分股竄梅子壩等處我兵奮勇躡追殲執旗賊目一人矛手四五十人餘匪遁匿老林山徑陡險盤曲冰雪堅凝自昌乘夜從東擣入賊不及防遂大潰六年升甘肅莊浪協副將擊賊於牛尾河及小香鑪溝斬獲甚夥七年正月賊東竄山陽自昌率兵繞其左賊懼奔圍

灣扼山隘相抗自昌仰攻之戮五六十人擒執旗賊目李正及矛手十六人獲器械甚多 上嘉其勇 命於此股賊匪剿盡後酌量加恩二月宋應伏股匪由西駱峪南竄自昌偕陝西邠州營都司金三重於蓋屋縣板房子扼之適苟文明股匪越秦嶺而來宋逆亦乘勢衝突我兵以寡不敵眾潰自昌三重俱被矛傷歿於陣時餘匪由西鄉縣簡池壩竄黃柏嶺直隸正定鎮標左營守備謝占魁以總兵富蘭檄入山搜剿遇伏陣亡事 聞均 賜卹如例賞雲騎尉世職襲次完時以恩騎尉世襲罔替自昌子紹祖襲三重子維章襲占魁子祖繩襲是年復得 旨韓自昌卽前次陣亡副將韓嘉業之胞兄弟均歿於王事且有八旬老母甚爲可憫



著照陣亡總兵例議卹資送回籍官爲辦理賞伊母銀三百兩並  
著地方官於原籍建祠賜名雙烈春秋祭祀伊子幾人俟服闋後  
俱著送部引見尋 賞自昌子紹祖騎都尉世職三重甘肅甯夏  
人占魁四川成都人乾隆四十四年武進士

右 國史館本傳





歐愷 郭大朝

歐愷湖北東湖人由行伍於乾隆五十六年拔宜昌鎮標水師後營外委嘉慶元年二月東湖縣楊家垸有匪徒數百屯聚愷率兵往捕手刃數人殲執旗賊目一兵勇乘勝追奔戮斃無算超擢四川成都城守營千總四月林之華股匪擾長陽愷隨署巴東令黃應文遊擊邱作訓往剿之行抵查角石與賊四五百人遇官兵猝不及陣攻以礮會天雨礮溼不可用賊勢益張黃應文邱作訓皆死之愷率眾大呼破圍爲之殿師得不覆十月遷重慶左營中軍守備二年賊踞黃柏山總督福凝督兵由老米山開道進攻賊堅壁拒守愷受石傷猶奮戰經兩晝夜獲賊卡三奏入 命以應升

之缺升用四年經略勸保奏陳軍營出力員弁愷與焉 賞戴藍  
翎六年生擒王廷詔於鞍子溝敘功 賞換花翎七年正月辛聰  
股匪竄四川南江縣一帶踞蕭家坡愷偕參將朱槐擊走之賊屯  
登碑埡愷復偕朱槐進剿追奔至五寶山大敗之擒辛聰三月追  
剿張子聰股匪至平茅壩兵勇尙未到齊愷卽馳衝入隊手刃二  
匪中矛殞命時浙江衢州鎮標右營守備郭大朝擊賊於東鄉縣  
長吉谿亦陣亡事 聞均 賜卹如例 賞雲騎尉世職襲次完  
時以恩騎尉世襲罔替愷子連升襲大朝子萬順襲大朝湖北江  
夏人應文作訓自有傳

右 國史館本傳

高承耀 陸世元

高承耀廣東高要人由行伍於乾隆四十八年五月拔督標左營外委十二月擢把總五十二年遷中營千總嘉慶元年擢雷瓊鎮標左營守備二年升羅定協右營都司三年調惠州協左營都司五年隨剿湖北教匪時賊踞東湖縣之陳家坪交戰埡承耀隨總兵長齡督兵分路進擊適各路官兵齊集賊眾分投下歷亂石如雨勢極兇悍相持良久我兵鼓勇直上戮斃甚多賊大潰追奔二十餘里七年二月升湖北衛昌營遊擊三月賊竄房縣北鄉之東浪地方提督長齡令遊擊王占鼇等帶鄉勇進剿承耀率兵策應復親率馬隊分馳衝擊戮三十餘人傷者無算殲執旗賊目一遂

乘勢擁上山梁殲戮尤眾承耀馳入賊隊手刃二人猝受矛傷歿於陣時廣西平樂協右營守備陸世元擊賊於東湖縣霧渡河受傷身故事 聞得 旨高承耀著咨部議卹陸世元前因打仗受傷甚爲奮勇已加恩以都司升用茲因傷身故著卹照都司例議卹均 賞雲騎尉世職襲次完時以恩騎尉世襲罔替承耀子應虎襲世元無子胞弟世甫襲世元廣西宣化人

右 國史館本傳



馬相 黃勝照等

馬相甘肅安西州人由行伍於乾隆三十一年拔巴里坤鎮標左營把總洊升守備嘉慶三年升廣西梧州協左營都司五年檄剿湖北教匪七年蒲添寶股匪竄竹谿縣一帶爲副都統銜色爾裘總兵蒲尙佐擊敗東奔鮑家山參贊大臣德楞泰分三路進剿令相偕廣西提標後營守備鄭憲恩等率兵六百駐九家泡寨灣扼其返奔之路賊被剿果回竄憲恩守營相帶兵四百迎擊戰於箬箕凹戮數十匪會大霧迷漫賊分股由山溝繞出襲營憲恩率兵抵禦戮三十餘匪以兵單失守憲恩死之賊乘勝前後夾攻相力戰陣亡湖南岳州水師營把總黃勝照四川漳臘營外委王得勝

廣西撫標左營額外外委陳大榮俱歿於陣先後事 聞均 賜  
卹如例 賞雲騎尉世職襲次完時以恩騎尉世襲罔替相子中  
驥襲勝照子明高襲得勝弟得春襲大榮照馬兵例 賞卹勝照  
湖南龍陽人得勝四川溫江人大榮廣西馬平人均由行伍拔世職憲  
恩別有傳

右 國史館本傳

鄭憲恩 王朝宗

鄭憲恩湖南武陵人由行伍補湖南提標右營額外外委乾隆五十八年擢前營外委嘉慶元年以隨征苗寨功升中營把總三年從征湖北邪匪駐當陽四年積功升中營千總六年升廣西提標後營守備七年七月賊匪蒲添寶盤踞鮑家山經官兵搜剿參贊德楞泰飭憲恩與都司馬相等分帶步隊兵由九家泡寨灣擊卡堵禦二十八日賊自鮑家山西奔我兵至箬箕凹與賊遇迎剿之賊稍退用槍礮轟擊斃賊二十餘正相持閒忽大霧迷漫賊分遣餘眾從溝底繞出我兵後路抄襲營卡憲恩令牆子官兵槍箭齊發立斃賊三十餘名賊抵死衝撲兵力不敵營卡爲賊衝破憲恩

力竭歿於陣是年二月湖南永州鎮標左營把總王朝宗亦於是地陣亡事 聞得 旨鄭憲恩王朝宗俱著咨部議卹均廕雲騎尉世職襲次完時各給恩騎尉世襲罔替憲恩子廷柱襲朝宗子心傳襲朝宗憲恩同邑人

右 國史館本傳

王懋賞

王懋賞山東福山人乾隆四十年一甲一名武進士授頭等侍衛四十六年選雲南景蒙營遊擊四十八年調昭通鎮標中營遊擊尋升廣西鬱林營參將六十年五月遷潯州協副將調赴湖南軍營協剿逆苗九月帶兵攻龍角峒槍傷左手嘉慶元年攻克結石岡並奪獲尖雲山乘勝進剿克復乾州二年赴廣西西隆剿捕苗匪旋回任五年調赴湖北軍營六年二月擊賊於余家河茅倫山等處奮勇出力 賞戴花翎五月同總兵德昌參將富永等剿賊於秦家坪斬獲甚眾六月復同德昌遊擊承祿守備韓英等剿賊於鵝坪乘勢追殺自石門溝至三岔溝等處生擒楊天貴等七十



四名五月同德員富永等勦賊於秦家坪斬獲甚眾七月擢湖南  
 永州鎮總兵帶兵赴興山房竹邊隘迎截川陝竄賊時股匪曾芝  
 秀王國賢合樊人傑戴任傑餘黨往來奔竄飄忽山林七年懋賞  
 隨巡撫全保由竹山縣官渡兼程追賊取道保康賊聞風北走官  
 兵從捷徑追及賊急據馬鬣嶺山勢險峻懋賞身先士卒登山殺  
 賊猝遇矛傷死之事 聞 賜卹如例 賞騎都尉世職長子聯  
 甲承襲

右 國史館本傳

方雲超 倪聯清

方雲超廣西賓州人由行伍於乾隆四十九年拔右江鎮左營額  
外外委五十一年補右營外委五十六年拔左營把總六十年遷  
鎮安協右營千總嘉慶二年擢隆林營守備時苗匪滋事沿江賊  
卡林立其平廣亞橋那地遮逢諸處恃險盤踞尤爲獯悍四月賊  
率眾擁至江岸雲超隨都司井汲泉奮力勦擊槍礮齊發斃其執  
旗賊目一被傷溺死者百餘人賊遂潰散九月總督吉慶率廣東  
兵渡江奪據新會山梁雲超以功 賞戴藍翎七年二月湖北邪  
匪滋事雲超隨巡撫全保進勦賊首曾芝秀王國賢等圍松柏寨  
欲奪軍糧爲我兵擊退賊復竄踞馬鬣嶺山腰全保分三路攻之

雲超隨總兵王懋賞等由中路進山勢險狹雲超奮勇直撲墜崖而斃同時永甯營守備倪聯清與焉事 聞得 旨方雲超倪聯清俱著照陣亡例議卹均廕雲騎尉世職襲次完時給予恩騎尉世襲罔替雲超子守敬襲聯清弟聯沛襲聯清廣西宣化人出行伍於乾隆五十一年拔左江鎮右營外委五十四年補右營把總五十八年遷新太協左營千總嘉慶二年隨勒黔苗論功、賞戴藍翎九月遷今職

右 國史館本傳

## 鄒宗夔

鄒宗夔山東甯海州人乾隆四十四年武進士五十一年選湖北襄陽城守營中軍守備五十六年調湖廣督標左營守備嘉慶三年升湖北襄陽城守營都司隨剿湖北教匪屢戰有功五年閏四月賊竄茅坪總督倭什布檄宗夔禦之十一月賊由陝西西鄉縣瓦谿溝踰江北七里壩出松樹溝將東趨距鄖西甚近宗夔鼓勵練勇嚴守要隘賊不敢竄七年曾芝秀王國賢股匪竄霧渡河偏近東湖遠安縣一帶湖北巡撫全保督兵截剿宗夔偕廣西隆林營中軍守備方雲超河南撫標左營中軍守備張建業隨總兵德昌王懋賞等由竹山縣之官渡河進適賊圍攻松柏寨圍劫軍糧

宗夔等馳往救護圍遂解賊旋踞馬鬣嶺大兵分三路進宗夔建業等隨德昌襲其左雲超等隨王懋賞由中路自下仰攻賊亦分三路迎拒我軍以劈山礮轟之殲戮無算賊猶困鬪將弁悉力攻擊雲超偕廣西永甯營守備倪聯清墜崖殞命賊退踞延旺壁山勢陡峻憑高展旗招集潰匪悉眾下壓宗夔等憤甚督率兵勇併力迎擊戮數十人賊戰益力宗夔建業死之事 聞 賜卹如例賞雲騎尉世職襲次完時以恩騎尉世襲罔替子永泰襲雲超建業別有傳

右 國史館本傳



張建業 賈龍圖

張建業山西代州人由武生拔天城營外委尋升東路營把總神池營千總調殺虎口右營千總乾隆五十九年升河南河北鎮標右營守備嘉慶二年調赴盧氏一帶堵剿邪匪四年調撫標左營中軍守備四月張添倫一股賊匪擾關垵黑龍洞經官兵迎擊退踞黃土坡建業以總督倭什布令隨總兵路超吉抄出賊匪之北由石牛河左山梁進剿用礮攻之斃賊數十人生擒胡漢周等九人賊潰六月隨副將孫清元在平利縣鎮坪一帶堵剿賊由皮風溝衝出建業等分兵兩路抄擊斃賊二十餘人追至乾州河復斃賊四十餘人七年二月隨總兵德昌由竹山縣之官渡河進剿值

賊圍攻松柏寨圖搶軍糧建業等飛馳衝擊圍頓解賊旋據馬鬣嶺山腰建業等分路進攻賊亦分三路拒險抗敵施放槍礮我兵斃賊五六十人並用劈山礮轟擊斃賊無算賊退延旺壁陡崖搖旗招集餘匪乘高併力下壓建業與浙江處州鎮標守備賈龍圖力戰陣亡事 聞奉 旨張建業賈龍圖均著咨部賜卹俱廕雲騎尉世職襲次完時給予恩騎尉世襲罔替建業子五瑞襲龍圖子清元襲龍圖河南獲嘉人由武生拔補開河營外委累升河北鎮標左哨把總陝州營千總嘉慶三年三月隨剿楚賊張漢潮於白雲山奮勇殺賊 賞戴藍翎四年調赴陝西堵賊授行營守備追剿餘黨徐添德所向克捷六年補本職

右 國史館本傳

國史館本傳  
卷二十八

一



胥泗起 周長泰等

胥泗起山東歷城人由行伍於乾隆五十年拔撫標左營外委五  
十三年擢把總五十四年遷千總五十八年升卽墨營守備嘉慶  
二年檄赴湖北軍營三年隨湖廣總督景安迎擊張漢潮股匪於  
白雲山殲執旗賊目 賞戴花翎升膠州協都司四年隨湖廣總  
督倭什布堵剿高均德股匪於竹谿縣雲路溝擒戮甚眾又於歇  
馬河擊賊出力得 旨以應升之缺升用旋升河南南陽鎮標中  
軍遊擊五年二月擊賊於竹山縣入道河擒姜繼文杜守仁等戮  
四十餘人又偕守備吳純俊王占鼇夾擊樊人傑股匪於保康縣  
五虎埡敗之三月又截擊於遠安縣白虎嶺四月倭什布擊賊於



水月寺泗起奉檄在西面防堵閏四月截擊於謝家灣之北時徐  
王股匪由盛家埭竄入山中出沒於北風坪麻坪等處官兵分路  
進剿知有千餘匪在螃蜞谿林箐中倭什布先遣泗起偕參將朱  
士奉設伏山口而自率兵擊之賊潰奔至山口泗起等扼擊大敗  
之九月徐添德股匪竄陝西洵陽縣潛趨汝河腦泗起隨總兵明  
亮進剿遇賊於汝河明亮先遣泗起偕副將樊雄楚等過河抄截  
而自迎擊於汝河腦賊潰渡河官兵躡渡追擊賊負隅衝突適泗  
起等率眾至大敗之十二月隨明亮回擊高二股匪於湖北東湖  
縣之交戰垵六年二月苟文明李彬股匪由陝竄竹谿縣關入竹  
山明亮剿之於獅子巖泗起分擊於趙家坡敗之五月隨總兵長

齡追擊於檀口是年升江西吉安營參將七年曾芝秀等股折回興山巴東縣一帶將趨東湖遠安湖北巡撫全保擊之於霧渡河賊踞馬鬣嶺官兵分三路仰攻賊乘高下壓泗起偕江西南康營都司周長泰隨總兵王懋賞由中路直上殲戮無算泗起長泰鼓勇先登山徑陡險墜崖殞命時曾芝秀股匪折回巴東龍船河湖北宜昌鎮標後營千總唐宗莒隨遊擊俞國智迎擊手刃數匪力竭陣亡江西九江鎮標水師營守備謝貴擊賊於霧渡河力戰死之先後事 聞均 賜卹如例 賞雲騎尉世職襲次完時以恩騎尉世襲罔替泗起子裳襲長泰子學池襲宗莒子秉忠襲貴弟蕃祥襲長泰浙江江山人由武舉擢江西興國營千總調南贛鎮

國朝通志卷之三十三  
標後營千總嘉慶元年隨剿湖北教匪以功授行營守備三年補  
南昌協守備六年升是職宗莒湖北東湖人由武生洊擢是職貴  
江西南昌人

右 國史館本傳

阜祿

阜祿鑲紅旗滿洲人富察氏由馬甲隨征甘肅逆回得功牌二挑  
烏槍護軍乾隆五十三年擢烏槍藍翎長五十八年擢護軍校嘉  
慶四年五月擢空銜花翎十一月委署烏槍護軍參領五年七月  
隨征湖北邪匪六年六月授健銳營副前鋒參領七年二月老黃  
號賊樊人傑糾賊曾芝秀王國賢戴四掌櫃等竄霧渡河逼近東  
湖遠安一帶湖北巡撫全保督兵截勦賊方攻松柏寨我兵進擊  
圍解賊走南面大山據馬鬣嶺扼險相拒總兵王懋賞等由中路  
進攻總兵德昌等抄其左阜祿與侍衛塔津保等率前路馬隊衝  
其右三路齊入殺賊五六十人賊冒死抵敵王懋賞等一路爲賊

所乘阜祿等左右兩路猶奮力仰攻槍箭齊發復斃賊七八十人  
賊退據延旺壁山勢愈高峻賊恃險搖旗集眾拚力下壓阜祿爭  
先格戰歿於陣事 聞得 旨副前鋒參領阜祿著咨部議卹  
黃雲騎尉世職襲次完時給恩騎尉世襲罔替子德元襲

右 國史館本傳



張明升 李自明等

張明升廣東連州人由行伍拔三江協右營外委乾隆五十年擢把總五十一年升千總嘉慶二年五月隨剿廣西苗匪攻克蒙里八渡口冊亨州等處賊巢明升均在事有功尋於洪水江奮勇擊賊斬馘無算 賞守備銜九月回營四年檄赴四川隨大兵殲擊高二馬五各股教匪敘功列超等旋調赴陝西在松樹壩協擒首逆冉添泗王任虎等升新會營守備七年復由陝入川隨副將閻俊烈追剿通江縣一帶餘匪抵龍坡埡大霧迷漫山凹伏匪突出明升奮勇戮數匪偕連陽營中軍守備李自明猝中矛傷俱歿於陣是年三江協右營千總呂萬德擊賊於通江縣大壩督標前營

外委孟燦魁增城營外委沈顯揚擊賊於太平廳土地垵俱陣亡  
先後事 聞均 賜卹如例 賞雲騎尉世職襲次完時以恩騎  
尉世襲罔替明升子玉鳳襲自明子錚襲萬德弟萬邦襲燦魁顯  
揚嗣襲無考自明廣東新會人由行伍於乾隆五十三年拔新會  
營外委五十五年擢把總六十年升千總嘉慶三年升是職萬德  
燦魁顯揚俱高要人萬德由行伍於乾隆五十二年拔督標後營  
外委嘉慶二年擢把總隨剿湖北教匪於鄖陽三岔河協獲首逆  
齊王氏姚之富等 賞戴藍翎五年升是職燦魁顯揚俱由行伍  
拔是職

右 國史館本傳

李廷彪 李正太等

李廷彪順天密雲人由行伍於乾隆四十八年拔提標中營額外委五十一年補右營外委五十三年擢前營把總五十四年調左哨把總五十五年遷右營千總六十年調中軍左哨嘉慶元年隨勦陝西教匪攻克張家壩有功二年升右營守備五年升忠順營都司六年張添倫股匪竄甯羌一帶老林適楊開甲之子楊麟生與其餘匪嘯聚兩會寺溫水壩添倫遂與之合提督慶成督兵進勦賊由尖場子奔流沙坡廷彪偕參將吳亨衍等率步兵迎擊天未明與賊遇我兵自旁橫衝入其隊賊猶併力抗拒廷彪率眾奮擊戮數十人生擒百餘人賊大潰獲楊麟生七年慶成以略陽

沔縣老林餘匪盤踞日久檄廷彪往擊廷彪乘夜前進猝與賊遇力戰歿於陣是年湖北黃州協千總李正太擊賊於五寨山東東昌營把總抗圻擊賊於延旺壁廣東提標前營把總謝位揚擊賊於岐山縣西壩甘肅貴德營外委陳兆武擊賊於雷壩廳大壩赤金營外委何勝擊賊於甯羌州鄧家坡俱陣亡先後事 聞均賜卹如例 賞雲騎尉世職襲次完時以恩騎尉世襲罔替廷彪子學周襲正太子守義襲圻弟坤襲位揚嗣襲無考兆武子勝襲勝子殿元襲正太湖北安陸人圻山東聊城人位揚廣東高要人兆武甘肅西甯人勝敦煌人

右 國史館本傳



馬濟 石華貴等

馬濟四川松潘廳人由行伍於乾隆五十五年拔慶甯營額外外委五十六年補綏靖營外委五十七年擢龍安營把總五十八年調懋功協把總六十年遷黎雅營千總嘉慶元年擢督標右營守備二年帶土屯兵隨署廣州將軍明亮擊賊於宜昌府屬之羅耳坪乘勝追剿四年四月升平番營都司七月隨副都統德楞泰擊賊於四川大甯巫山縣界之八石坪等處奮勇攻剿受石傷五年正月升建昌鎮標遊擊三月擊賊於江油縣之火石埡賊大潰竄劍州石門寨寨南北二門圍長五六里兩面懸崖不能攀援而上濟帶弁兵從右手溝底繞上西角寨門斫柵衝入戮賊甚眾墜崖



斃者五六百人十月升山東萊州營參將仍留軍營六年五月賊  
竄陝西甯陝廳之爛草壩濟帶步隊躡追於箐林中剿之七月賊  
自開縣之姚城壩潛趨峯竹廠大山箐林濟偕遊擊王玉龍率兵  
繞謝家灣小山梁對山轟擊以馬隊由山旁截剿戮三百餘名追  
奔至三谿子直抵五雷山梁生擒偽總兵等六十餘名斬馘無算  
九月龍紹周股匪由柵子山將入老林濟偕副將李應貴等追至  
小乾河謀知龍逆與各股匪尙在茅坪避雨出其不意由茶埡子  
進剿賊大潰戮八十餘名生擒六十餘名復追至平利縣之龍盤  
山岳家坪偕遊擊沈洪繞過賊巢之南進偕汝谿山擒斬二百餘  
名並殲首逆龍紹周 上嘉其勇 賞伊特格勒依巴圖魯名號

十一月賊屯通江縣木耳巖濟由趙家河進剿七年陳朝觀餘孽  
竄巴東縣兩河口攻張家峒峒民被困於山頂聲救濟偕貴州古  
州鎮標把總石華貴銅仁協右營把總戴應鼇首先奮躍仰攻大  
兵以大礮繼之殲三十餘名生擒十七名濟華貴應鼇以受礮石  
傷歿於陣朗洞營把總王占鼇銅仁協外委楊正坤冒石繼登亦  
戰歿事 聞均 賜卹如例 賞雲騎尉世職襲次完時以恩騎  
尉世襲罔替濟弟奇襲華貴子定國襲應鼇子經恩襲占鼇子世  
臣襲正坤子通連襲華貴貴州古州人應鼇銅仁人占鼇普定人  
正坤松桃廳人

右 國史館本傳

175-720

1111

李芝榮 李翠

李芝榮陝西三原人由行伍於乾隆三十八年拔貴州威甯鎮標左營外委擢長壩營右哨把總歷升撫標右營千總台拱營左軍守備四十年遷四川重慶鎮標右營都司四十九年升峽邊營遊擊嘉慶二年川匪竄聚羅家巖芝榮率兵勇於雲陽縣堵之三年林亮功股匪自開州坪竄至葛藤山後屢被勦於鳳凰山溝奪路思竄芝榮偕總兵艾如文分兵進擊殲六百餘人奪獲器械無算四年升山東曹州營參將尋以參贊德楞泰檄率弁兵禦賊於巴東縣羅坪五年堵勦巴州南江縣一帶六年擊賊於蔥子坪追至馬家營殲擒甚眾苟文明冉添泗股匪竄匿沙光子芝榮由白馬

廟進剿賊聞風先遁追至觀音巖戮百餘人生擒八十餘人嗣偕  
總兵田朝貴分兵三路乘夜剿樊家肚寨股匪殲斃無算又擊賊  
於太平坡克之七年張添倫魏學勝股匪竄蒼谿縣之地捲寺以  
大兵掩擊踞山梁併力抗拒芝榮率弁兵奮勇仰攻首先撲上山  
梁身受重傷歿於陣又奉節縣之九盤子有餘匪竄擾副將富明  
阿率兵進剿四川龍安營把總李翠首先奮擊追至山後密箐中  
被戕先後事 聞均 賜卹如例 賞雲騎尉世職襲次完時以  
恩騎尉世襲罔替芝榮子照襲翠子萬年襲翠西昌人

右 國史館本傳



穆克登布

穆克登布滿洲正紅旗人姓鈕祜祿成都將軍成德子乾隆五十四年成德入覲 高宗純皇帝詢之曾經從征金川卽授藍翎侍衛在大門上行走五十六年出師巴勒布擢三等侍衛五十九年補副護軍參領六月授直隸提標右營遊擊嘉慶元年隨征湖北邪匪於翟家灣張家壩諸處接仗有功 賞戴花翎二年擢山東曹州營參將三年四川總督勒保以剿賊奮勇奏加副將銜四年正月隨都統惠齡攻克麻壩寨生擒逆首冉文儔 恩加總兵銜尋補清江協副將三月 賜濟特庫勒特依巴圖魯名號十月授山西太原鎮總兵五年五月督兵赴陝剿辦伍金柱股匪在手扳

崖等處直前攻撲殲賊甚多六月兜賊匪至銅錢窖殲一千餘名  
生擒五百餘名逆首龐洪勝殲焉又於洋縣之茅坪剿斃逆首楊  
開甲七月攔截張添倫股匪於兩當之翦子巖追殺數十里多有  
斬獲八月在階州之佛堂寺截擊擒斬無算殲偽元帥曾印均有  
旨獎敘並 賞拔指荷包有差六年正月冉學勝股匪將由陝之  
武關關入豫境乘雪追剿並親率數騎直前衝擊賊眾潰竄二月  
於五郎江口截剿南山伍懷志股匪痛加殲洗 命在乾清門行  
走六月賊首伍懷志在漢江北岸率其黨將由舊縣關東竄穆克  
登布先於黃官峪墮馬傷足仍徒步連夜督兵登山剿捕生擒首  
逆餘賊亦擒斬無遺旋以勞得病 恩給雲騎尉世職七年三月

調湖南永州鎮總兵八月擢甘肅提督十一月領兵追剿川省雲  
萬竄匪於青坪岡又於太平坎首先督兵搶上山頂擒斬多賊並  
生擒逆首劉景等有 旨 在御前侍衛上行走加騎都尉世職仍  
賞扳指荷包有差八年二月分兵勇爲數路向巫山埡搜捕又親  
督弁兵取路巴峪關深入排搜逆首宋應伏就擒賊大震懾三月  
赴太平通江剿賊以力竭歿於陣事 聞 恩給二等男世職予  
諡剛烈並 命將伊父成德應賂巴勒布軍需銀三千八百餘兩  
全行豁免子頤齡襲二等男兼三等侍衛見在乾清門行走

右 國史館本傳



朱集才

朱集才甘肅靈州人由武舉乾隆五十三年分發四川候補千總五十六年署撫邊營守備隨征廓爾喀著有戰功五十八年補川北鎮標左營千總六十年檄征湖南苗匪隨攻蘭草坪滾牛坡及乾州平隴賊巢有功嘉慶元年四月升廣西提標左營守備攻城於黃連坡中矛傷十一月凱旋二年二月檄剿湖北教匪四月覃加耀股匪踞長陽縣之四方臺攻克之集才與有戰績 賞戴花翎六月遷四川川北鎮標右營都司十二月進剿朱里寨深入賊巢復受傷五年五月追剿入陝楊開甲股匪竄雒南集才隨總兵楊遇春於龍駒寨扼之殲數百人八月復破伍金柱股匪於佛入



崖六年四月升陝西畱壩營遊擊十一月賊由甯羌州竄沔縣集才帥師禦之復邀擊於鳳縣之關刀山殲戮甚眾七年二月宋應伏股匪竄盩厔縣板房子集才隨總兵劉瑞擊走之五月於王溝搜勦餘匪戮二十餘人復於大樹壩棗木欄等處斬獲多名十月於畱壩應之土地嶺生擒數匪十二月擊賊於大壩溝追至三花石先後殲戮無算八年八月復調赴湖北十月陝西餘匪由鎮安縣東竄鄖西集才隨楊遇春乘夜至高橋溝截擊賊殊困鬪集才率兵力戰戮十餘匪被傷陣亡事 聞 賜卹如例 賞雲騎尉世職襲次完時以恩騎尉世襲罔替子儼襲

右 國史館本傳

張明德

張明德雲南恩安人由行伍於乾隆五十三年隨征安南五十五年拔昭通鎮標左營額外外委五十六年補前營外委六十年貴州苗匪滋事檄赴銅仁縣堵禦嘉慶元年五月擢左營把總十二月遷前營千總時川陝楚三省教匪倡亂滇兵調赴川中明德於達州等處協剿三年正月升提標中營守備十月遷貴州大定協左營都司十二月升四川酉陽營遊擊五年四月協剿入陝破匪眾於卡狼寨旋升山西北樓營參將六月追剿張漢潮股匪盡殲之明德在事有功下部議敘六年隨總兵田朝貴剿張添倫股匪敗之復分路搜捕竄匪七年三月擊賊於開縣之乾谿四月剿賊

於東鄉中河前河等處俱有斬獲五月至豐城沙罐場夜方雨賊  
匿山坳草舍乘其不備燬其巢眾匪驚竄殲戮甚夥十月調雲南  
新營營參將八年至大甯太平縣一帶搜捕逸匪擒斬數十人餘  
黨分竄悉獲之時陝甘竄匪皆於沿邊老林輒轉伏匿明德隨田  
朝貴由夔州追至後坪山險不能騎率兵勇步行而前至黃連灣  
林箐深密伏匪突出抗拒明德中矛陣亡事聞賜卹如例  
賞雲騎尉世職襲次完時以恩騎尉世襲罔替子占鼇襲

右 國史館本傳

陳名魁 連九

陳名魁福建漳浦人乾隆四十六年武進士五十年選福建金門鎮標右營守備嘉慶元年護理水師提標前營遊擊巡哨至番洲洋等處獲盜十四名五年護理閩安協副將時閩浙洋面有盜匪分幫滋擾名魁隨海壇鎮總兵倪定得追捕蔡牽幫匪於蠟場洋適盜船遭風沈四十餘隻餘船竄南洋追獲其一擒譚月等十三名超升水師提標前營遊擊仍護閩安協副將尋借澎湖協副將何定江在閩浙交界之北關山一帶隨定海鎮總兵李長庚搜捕土盜獲犯多名下部議敘六年隨定江擊盜於四礮洋燬船一又沈其一擒陳標等三十四名獲礮械多件七年二月在特嶼洋追捕



蔡牽幫船至下目洋沈其船一擒黃拱等九十二名溺斃無算十一月蔡牽竄浮鷹洋名魁偕護理海壇鎮總兵羅江泰分路追剿至橫山洋獲其船一載二人俘三十四人是年升廣東海門營參將八年姚亞馬等匪勾結在牌角洋行劫名魁督兵往剿盜逸追至三嶼港殲斃甚夥救出被劫余爵利等七名焚盜船一擒盜二尋被戕嗣是九年署廣東香山協左營守備連旭擊賊於大鵬洋亦遇害先後事聞名魁賜卹如例旭得旨照守備例議卹均賞雲騎尉世職襲次完時以恩騎尉世襲罔替名魁子朝用襲旭子承宗襲旭廣東豐順人捕魚爲業以誘殺洋匪十三名生擒二名赴官投報給外委頂帶旋補左翼鎮標右營外委洵升香



山協左營千總署達濠營守備疊拏洋盜多名調署是職

右 國史館本傳

皇朝通志卷之九

三

胡振聲

胡振聲福建同安人提督胡貴之子由行伍拔補千總乾隆五十三年擢福建海壇鎮左營守備五十七年調水師提標中營守備五十八年補閩安左營都司五十九年補海壇鎮左營遊擊嘉慶三年遷浙江玉環營參將四年補廣東龍門協副將五年三月總督玉德奏振聲在浙緝捕盜匪於洋面情形素所諳悉以之補授温州鎮總兵可期勝任得旨允行旋經巡撫阮元等奏會勘洋匪事宜諭令定海鎮總兵李長庚總其號令振聲與黃巖鎮總兵岳翼聽其關會協同策應九月探聞水溪鳳尾兩幫盜船在洋游奕卽督率兵船駛至盜放礮迎敵振聲督同將弁奮勇攻擊自

卯至午盜匪受傷落水不計其數追至北鹿外洋盜匪大船被兵船破轟沈沒匪徒落水四散拏獲盜匪三十二名割首級五十二顆 上以振聲所轄之北鹿外洋有盜船游奕並未確探速捕實屬疏玩著交部嚴議尋奉 旨降三級從寬畱任六年七月蔡牽等追劫商船自閩竄浙總兵岳璽李長庚沿途追擊振聲會剿之獲洋匪陳贊等一百四十名斬首四十八沈溺盜船及獲器械無算奏入 上嘉之下部議敘九年六月振聲以兵船二十六隻與海壇鎮總兵孫大剛會捕洋匪蔡牽駛至浮鷹洋面瞭見匪船游奕督率將弁奮勇追擊賊匪迎拒振聲與孫大剛夾攻自未至酉賊匪受傷落水甚多而振聲以坐船逼近山麓一時不能轉運被

賊擲火焚燒振聲被害經總督玉德奏入 諭曰胡振聲在洋被盜戕害殊可矜憫著加恩照提督陣亡例賜卹伊如有子嗣著於服闋後送部引見尋議給騎都尉又一雲騎尉世職繼子廷恩襲

右 國史館本傳



--	--	--	--	--	--	--	--	--	--

武克勤 王維光等

武克勤甘肅武威人乾隆三十六年武進士三十九年選山東高唐營中軍守備四十八年擢直隸樂亭營都司五十九年升福建建甯鎮標左營遊擊嘉慶四年調龍巖營遊擊八年調臺灣鎮標左營遊擊九年蔡牽幫匪乘風駛至鹿耳門口外北汕擁上礮臺官兵竭力堵禦戮數十人克勤偕右營守備王維光俱被戕是年興化城守右營把總歐鏘捕匪於平海洋陣亡先是八年浙江甯海左營把總鄭金捕盜於蒲門洋乍浦右營把總柯介錫捕盜於面藿洋俱陣亡温州鎮標外委張大魁於三嶼洋捕盜力戰至橫址洋陣亡嗣是十年蔡牽幫匪自臺洋內竄雲騎尉涂繼勳追擊

至定海洋歿於陣臺灣南路下淡水營把總蘇國樑擊賊於下淡水谿陣亡先後事 聞 諭曰遊擊武克勤守備王維光同時遇害曾有旨命該督等確查具奏茲據愛新泰等奏匪船乘風齊擁北汕擁上礮臺官兵因火藥被雨溼透不能施放各用刀矛殺傷數十名寡不敵眾武克勤王維光力竭被害均係歿於王事著照陣亡例賜卹餘均 賜卹如例 賞雲騎尉世職繼勳以原襲雲騎尉併爲騎都尉世職襲次完時均以恩騎尉世襲罔替克勤孫經文襲維光子廷山襲鏘子注生襲金子文運襲介錫弟介眉襲大魁子紹思襲繼勳弟繼猷襲國樑子成銓襲維光福建長汀人出行伍洊升是職鏘莆田人金浙江定海人出鄉勇入行伍洊擢

是職介錫鎮海人平湖籍由行伍拔乍浦左營外委協緝於山東黑水洋獲匪多名又於盡山普陀衢港各海面擊艇匪著有勞績擢是職大魁永嘉人繼勳福建詔安人以父國章任銅山營把總剿臺匪陣亡襲是職國樑閩縣人

右 國史館本傳





國朝書獻類徵初編卷三百六十九目錄

忠義三十九

李應貴

李長庚

藍嘉瑛

林國良

林道材

翟超漢等

許廷桂

嚴高等

泊大剛

葉榮高等

國朝文獻通考卷三百四十四

--	--	--	--	--	--	--	--	--	--

國朝耆獻類徵初編卷三百六十九

通奉大夫前署江西巡撫江西布政使司布政使湘陰李桓輯

忠義三十九

李應貴

李應貴四川成都人由行伍拔補把總擢千總乾隆五十二年隨征臺灣逆匪林爽文在事出力 賞戴藍翎五十六年升四川永定營守備五十八年出師廓爾喀敘功得 旨賞給應升頂帶五十九年授冕山營都司尋以解邪教人犯中途淹斃被參革職六十年征黔楚逆苗隨大學士公福康安四川總督和琳軍營效用連克苗寨 諭曰李應貴前於臺灣廓爾喀等處屢次出兵著有

勞績見在隨同打仗更能奮勇從前被參之案尙屬因公著以守  
備補用四月攻黃瓜寨受槍石傷六月攻克大烏草河苗寨 賞  
戴藍翎十月仍授崑山營都司隨都統額勒登保攻鴨保山毀木  
城石卡嘉慶元年由地良坡進偪平隴賊巢應貴繞出賊後以火  
攻斃賊甚多復由犇車進攻牽制賊勢我兵得據賊石卡奏入  
賞戴花翎十一月升綏靖營游擊三年苗匪平川陝楚教匪滋事  
應貴隨征入四川三月總兵朱射斗師次漏月巖伏匪二千餘突  
出應貴偕副將長春擊退之復隨朱射斗克賊於雞爪嶺三年十  
一月賊匪羅其清屯大鵬山寨隨署領侍衛內大臣德楞泰攻克  
南門應貴首先入寨擊之四年十月擢兩廣督標右營參將五年

隨德楞泰進剿丹添元股匪三月克之於火石垭新店子等處賊犯應貴營立斃十餘人獲槍矛二十餘件六月隨德楞泰攻克張子聰股匪於南江長池壩八月賊據陡坎子山梁應貴隨總兵馬瑜率步隊擊敗之十一月追賊至大竹河斬獲甚夥參贊德楞泰奏入得 旨交部議敘旋授山西蒲州協副將六年正月擊賊於山陽乾溝三月德楞泰率兵抵安康賊匪二百餘自文彩溝突出應貴盡殲擒之我兵抵黃花廟賊夜撲營與提督賽冲阿率兵夾擊賊敗入馬鞍山官兵分三路進應貴由中路迎擊賊竄官渡河我兵追及賊驚潰淹斃無數四月殲賊於紅花埭五月德楞泰剿徐添德等股匪至陝西洵陽應貴率步隊敗賊於爛草灣生擒偽



總兵李光武等是月調四川維西協營副將六月賊東竄紫陽應  
貴由蕭家壩追剿日行百五六十里多斬獲七月賊首龍紹周遁  
太平之後坪我兵截其竄陝之路賊潰餘匪五百回望鄉臺山勢  
陡峻馬力難施應貴伏步隊於山傍之白雞坪伺賊出冒雨橫擊  
殲戮無遺龍紹周竄石溪峒應貴率步隊往用礮轟擊賊遁八月  
由三溪子追賊馘二百餘生擒僞先鋒楊貞禮等翌日率兵抵五  
雷山梁適賊竄至殲賊百餘擒僞總兵李懷玉等龍紹周竄蝦蟆  
峽後坪應貴偕參將馬元等追至半山賊恃險抗拒適德楞泰率  
兵迎擊賊旁竄追三十餘里匪由竹山梨子坪入老林應貴乘勝  
追逼途次元狐嶺探知賊據山坳我兵疾趨奮擊之賊越興山青

田泡分三路竄應貴亦分兵追剿躡之於木水坪殲賊無算時賊竄野狐巖老林應貴率步隊進攻斬獲百餘餘匪竄九湖應貴偕參將何君佐徒步入林由烏雲頂追捕日馳百五六十里賊東竄賽沖阿規其古牛窩東路應貴偕馬瑜追至魯家坪斬馘百餘獲龍紹周妻汪氏僞軍師王鵬老教首李添棟等九月隨賽沖阿克賊於雲霧溪十月龍紹周向瓦木泡南竄盡毀所過塌橋應貴偕參將馬應國等隨修隨進賊由柵子山入老林應貴率兵勇五百步行而進紹周方避雨茅棚應貴掩其不備由茶埡子撲入賊營擒斬百數十名紹周遁竹溪我兵馳抵竹谿上鵝坪天暮水漲賊先以小漁船隻渡河我兵亦乘夜渡德楞泰令應貴進盤龍山老

林斷其去路會天大雪賊未之覺馬應國馬元等率兵衝入賊奔竄應貴復率兵會諸將截殺紹周欲走無路遂伏誅 諭曰此次勦除龍紹周全股賊匪該將領員弁兵勇等奔走荒山窮谷不避險阻奮力擊賊實屬可嘉李應貴著加恩記名以總兵用十一月餘匪數百屯丁家溝隨馬瑜擊敗之十二月擢貴州安義鎮總兵隨經略額勒登保追勦賊首苟文明於廣元境賊回踞王家埡山梁應貴偕馬瑜等分路進勦屢獲勝仗文明屯木爾巖應貴由趙家河進擊之七年正月賊竄青灣總兵薛大烈躡蹤進應貴自旁夾擊追至炕香巖路窄雪深斃賊甚夥得 旨嘉獎二月賊竄漢陰觀音河腰竹嶺等處應貴俱擊敗之三月攻賊於萊子坪旋有

餘匪四百餘名竄至應貴率兵迎擊賊遁四月苟文明竄楊泗廟  
零匪伏於後路林箐應貴沿途搜捕深夜攻賊於平安寨賊懼走  
文明由蕉溝口欲越營卡西竄應貴出卡擊退之復隨額勒登保  
徒步疾追賊遁朝天廠大梁應貴率兵競進乘勢殲擒獲旗幟長  
矛各件賊奔秦嶺老林應貴仍緊躡之七月苟文明率賊百餘竄  
黃龍峒應貴偕副將吳廷剛徒步入林追擊僞先鋒王世貴伏密  
箐中我兵奮擊立斬世貴等數十名文明逸去復偕副將張廷楷  
等越林搜捕屢有斬獲文明遁花石巖我兵疾抵巖下天暮兩作  
應貴鼓勵兵勇直前仰攻文明中矛死得 旨交部從優議敘時  
山南零匪未竣八月由螞蟻溝金牛坪剿捕九月殲賊於觀音寨



高溝朱家溝等處十一月追賊至南溝及天牢各有斬獲十二月  
經略額勒登保奏報威功先是應貴丁母憂 諭曰李應貴在營  
帶兵有年能耐勞苦見經額勒登保派令剿賊正在喫緊之時自  
不便遽易生手李應貴著暫行畱任一俟剿辦南山竄匪完竣卽  
令回籍治喪至是回籍九年八月服闋十年正月授福建汀州總  
兵十一年十月洋匪朱濟滋事應貴率兵至大坦外洋遇盜船圍  
劫我兵用礮轟擊賊船亦以礮拒應貴猝中礮被害 諭曰李應  
貴在洋督兵擊盜致被戕害奮不顧身著咨部照陣亡例賜卹子  
文光襲騎都尉世職

右 國史館本傳



李長庚

李長庚福建同安人乾隆三十六年武進士授藍翎侍衛四十一年補浙江衢州營都司四十六年升提標左營遊擊四十九年遷太平營參將五十年升樂清協副將五十二年署福建海壇鎮總兵五十三年六月以所轄洋面盜案多未捕獲革職畱緝隨於外洋各處疊獲洋盜林權等及首夥各犯並船隻槍礮刀械等物五十四年十一月奉 上諭李長庚准其畱於福建遇有遊擊缺出該督酌量奏補五十九年二月補海壇鎮標右營遊擊署銅山營參將疊年在洋捕獲盜犯林瓢等嘉慶元年二月遷銅山營參將會合浙省兵船圍捕粵匪獲吳興信等三十七名二年四月升署

澎湖水師副將又獲盜犯鄭翁周疊等三年二月摧浙江定海鎮  
總兵六月長庚帶領兵船於黑水洋面攻擊蘇柳等斬賊二十名  
八月攻盜於普陀外洋獲其船殲斃無數四年七月於潭頭外洋  
生擒盜首侯納等旋以土盜鳳尾幫勾結夷艇百餘人踞浙界島  
嶼長庚率舟師出擊追至溫州三盤嶼沈其一艇時守備許松年  
等三船皆爲賊困長庚返蓬衝入夾攻三船皆得出賊遁有旨  
嘉獎旋謀知艇匪竄過泉州而閩盜蔡牽船三十餘隻泊海壇境  
內之沙鄔南盤一帶遂由南日洋面駛往沈其船一殲賊三生擒  
三十餘人復追艇匪至閩粵交界之甲子洋嗣聞蔡牽潛伏於白  
犬洋長庚率兵往擊生擒許老等三十餘人奉旨賞戴花翎五

年閏四月過温州鳳凰洋救護商船獲盜林青等並鐵礮二巡撫  
阮元奏以長庚統率水師得旨三鎮會剿自應有一人統其號  
令李長庚素有威望應令温州黃巖兩鎮聽其關會協同策應六  
月艇匪自温州北來長庚率師會同黃巖鎮淀泊海門與松門盜  
隔港相持適颶風起盜船覆溺甚多賊有泗水匪島登岸者官兵  
水陸並擒之旬日閒獻俘千數獲安南僞爵侯倫貴利事聞得  
旨褒嘉又殲賊於調班洋獲李出等二十七人於深水外洋沈其  
船一擒丁郭等十九人於潭頭外洋六年獲林俊新等十五人於  
六橫洋獲楊烏等十九人於徐公洋至福建竿塘外洋獲林俊興  
等十人燒其船一至旗頭獲蔡牽等五首陳帖等二十二入奪其

船一至東雀山獲李廣及女犯等二十一人至盡山獲盜首陳火  
燒等二十二入至三盤獲高英等七人十月擢福建水師提督奉  
旨李長庚於緝盜事務尙屬奮勉是以加恩簡用此時蔡牽等逃  
竄閩洋李長庚卽往新任儻盜船折回浙洋當不分畛域以副委  
任尋以籍隸福建例應迴避調任浙江七年至象山潭頭獲張如  
茂等十四人至閩南日東滬洋獲徐逆等三十五人八年蔡牽竄  
漁山長庚率舟師掩至晝夜窮追蔡牽僅以身免復與黃巖鎮總  
兵張成合兵擊盜尤升等生擒五十六人獲其船二又獲石塘釣  
艇盜二十餘人進擊蔡牽於三沙沈其船一斃數十人賊北竄復  
追及南鹿外洋奪其船一燒其船一生擒八十七人九年六月閩



浙總督王德等會奏請以長庚總統閩浙兩省水師得 旨俞允  
先是三月蔡牽泊於閩洋之浮鷹長庚率兵擊之擒其男女四十  
餘人殲斃十三名燒其船一奪其船二並獲紅衣礮刀械百餘八  
月遇馬蹟盜船六十餘長庚督兵衝入賊分兩股東西竄長庚分  
兵擊之沈其船二殲斃無數蔡牽所坐船篷索爲官兵所斷及過  
盡山風雨驟起收兵入衢港俘五十二駢首五級得 旨嘉獎十  
年四月兼署福建水師提督奉 旨李長庚調福建水師提督鎮  
將皆其統轄著將擒捕蔡牽一事責成專辦一切機宜悉聽調度  
閏六月蔡牽聞長庚至遂由臺灣北竄入浙長庚追擊之青龍港  
獲其船一沈其船二擒彭來等二十八人得 旨李長庚自統舟



師以來具報勦賊均無虛飾俟閩浙洋面一律清平必加懋賞又奉 上諭李長庚總統水師溫州海壇二鎮總兵爲左右翼聽李長庚調遣俾事權歸一八月長庚追蔡牽於台州大陳斗米洋攻擊三晝夜燒其船一沈其船一生擒七十三人尋以浙江提督孫廷璧不諳水師奉 旨浙江提督仍著李長庚調補十二月蔡牽大小盜船百餘肆擾臺灣長庚率師會剿殲斃無數親駕杉板往勘鹿耳門外港口同護溫州鎮總兵李景曾分幫把守長庚截守新港於水深處鑿沈同安船以防竄逸時東風甚急同安船爲巨浪所衝蔡逆乘潮竄去 詔摘去翎頂立功十一年四月蔡牽與朱濟俱竄福甯外洋長庚會兵往勦賊東竄張坑洋復追擊之沈

其船一奪其船三生擒盜首陳潰李阿七等七十餘人斃百七十餘人獲刀礮偽印旗幟救出商船及被劫難民蔡逆北竄又折回南復追至台州之調班洋生擒李按等五十一人殲百五十餘人獲銅鐵礮十七門時新任閩浙總督阿林保密參李長庚因循怠玩並鈔李長庚致署總督溫承惠書請旨革職治罪上諭阿林保密參李長庚因循怠玩二摺覽奏均悉但如摺內所云李長庚藉燂洗船隻爲名收船進港恐其私回衙署亦未可定等語尙係該督揣度之詞又稱李長庚於七月初間在盡山等處洋面追剿賊船扼住上風旋又探聽無蹤其跟切竟屬空虛等語但昨據李長庚奏稱七月二十一日在大陳等處洋面擊沈盜船一隻殲

獲盜犯一百五十餘名起獲槍刀鐵墩等件並拏獲另船盜首李  
按等語阿林保發摺時尙未得其咨報如果屬實是李長庚兵船  
七月初間在盡山外洋一時未能瞭見賊蹤旋又追獲得勝尙非  
始終株守可比又李長庚所稱兵船缺乏口糧之處是否實情抑  
係藉口引避均須詳查明確方可治以應得之罪該督遠在閩省  
僅據李長庚致溫承惠信內之言恐尙未確實當勦賊喫緊之時  
水師統領責任綦重一時亦無可代之人沈臨敵易將亦不可草  
率此時且毋庸革職逮問同日又諭清安泰見在溫台一帶所  
有李長庚追賊情形知之必悉著卽詳細密查據實回奏八月李  
長庚率各鎮舟師擊賊漁山身受多傷事聞得旨此次李長

庚督兵圍捕蔡逆殲擒盜匪多名身受多傷實爲奮勉著加恩賞  
還頂帶旋據浙江巡撫清安泰覆奏李長庚帶領兵船經過海口  
並未回署至於海船若不勤加燂洗則船底苔草蝓蟲膠黏纏結  
輒致駕駛不前其生擒盜犯李按委係蔡逆另船頭目餘係李按  
同船夥犯並無捏報又兵船口糧實有暫時缺乏應採購之處亦  
無藉詞耽延情弊復遵 旨將李長庚在洋剿捕情形密詢黃飛  
鵬何定江二人據稱黃飛鵬爲守備時卽同李長庚在洋捕盜無  
不勇往向前自蔡逆滋擾臺灣倍加感奮誓不與賊俱生實無鬆  
玩情事何定江居官閩省時卽知李長庚身先士卒奮勇直前茲  
與連幫出洋總以剋除首逆爲急務實無怠玩奏到奉 上諭阿



林保前此密奏李長庚因循怠玩種種貽誤請將伊革職治罪朕披覽該督所奏卽覺不愜阿木保到任不過旬日地方公事一切未辦海洋情形素未熟悉而於李長庚從未謀面輒行連次奏參殊屬冒昧是以降旨令清安泰秉公詳查本日據清安泰覆奏則稱李長庚帶領兵船經過海口並未回署又稱海船若不勤加燵洗輒致駕駛不前又所獲李按實係蔡牽夥黨並無捏報斬獲情弊又轉詢黃飛鵬何定江二人亦均稱李長庚實在奮勇等語是阿林保奏參全屬子虛今兵船正當剿捕喫緊之際若阿林保尙不知以國事爲重猶復輕聽人言甚至因此次奏參李長庚不能遂意遇事掣肘使其不能成功則阿林保之罪甚大阿林保著傳



旨嚴行申飭九月長庚於竿塘外洋擊斃蔡牽之姪蔡添來沈其  
船二計擒獲及落海者約數百人駢首五級得 旨此次李長庚  
督兵攻剿不遺餘力奮勇可嘉俟孥獲蔡牽再賞世職酬勳十月  
長庚會師擊蔡牽於二盤沈其船一生擒盜首李添來等七十人  
斃其股首周添秀等七十餘人十二年正月追剿蔡牽入粵洋沈  
其船一獲十一人二月追至大星嶼奪其船一又擊蔡逆坐船時  
風浪大作兵船不能聯絡收軍還抵肇慶賊船澳四月會同廣東  
提督錢夢虎擊粵匪鄭一幫船於佛堂外洋生擒盜首羅二十及  
男婦四十八人七月由閩還浙奏請辦理軍政奉 旨李長庚統  
領水師剿捕蔡逆正在喫緊之時卽因軍政屆期亦當權其緩急

或請令清安泰代爲考驗候旨遵行乃並未具奏請旨輒順道往甯波竟置海洋盜首於不問實出意料之外著傳旨嚴行申飭八月仍具奏出洋十一月與金門福甯兩鎮合追蔡逆於浮鷹洋面獲其船二擒九十五人駢首十五級賊竄東南外洋十二月二十四日長庚會同水師提督張覲陞聯踪入粵二十五日至黑水外洋蔡逆僅存三舟長庚率師專取逆船槍礮並發逆船兩旁並巾頂插花皆被轟破賊蒼黃落水者不可勝數長庚又別用火攻船乘風挂其後舫時烈風大作波浪洶涌火礮亂發互擊長庚猝被賊礮子中傷咽喉額角遂於是日未刻卒事 聞 上震悼下部議卹 諭曰浙江提督李長庚宣力海洋忠勤勇幹不辭勞瘁懋

著威聲數年以來因閩浙一帶洋盜滋事經朕特命爲總統大員督率各鎮弁舟師在洋勦捕李長庚身先士卒銳意擒渠統兵在閩浙臺灣及粵省洋面往來跟勦艱苦備嘗破浪衝風實已數歷寒暑每次赶上賊船無不痛加勦殺前後殲斃無數擒拏盜船多隻蔡逆亡魂喪膽畏懼已極聞李長庚兵船所至四處奔逃正在盼望大捷之際乃昨據阿林保奏到李長庚於上年十二月二十四日由南澳洋面駛入粵洋追捕蔡逆望見賊船祇賸三隻窮蹙已甚官兵專注蔡逆窮其所向追至黑水洋面已將蔡逆本船擊壞李長庚又用火攻船一隻乘風駛近挂住賊船後艚正可上前擒獲忽暴風陡作兵船上下顛播李長庚奮勇攻捕被賊礮中傷

咽喉額角竟於二十五日未時身故覽奏爲之心搖手戰震悼之  
至朕於李長庚素未識面疊經降旨褒嘉並許以奏報擒獲巨魁  
之時優予世職李長庚感激朕恩倍矢忠藎不意其功屆垂成之  
際臨陣捐軀朕披覽奏章不禁爲之墮淚李長庚辦賊有年所向  
克捷必能擒獲巨憝朕原欲俟捷音奏到時將伊封授伯爵此時  
李長庚雖已身故而賊匪經伊連年痛剿之後殘敗已極勢不能  
再延殘喘指日舟師緊捕自當縛致巨魁況李長庚以提督大員  
總統各路舟師今歿於王事必當優加懋賞用示酬庸李長庚著  
加恩追封伯爵賞銀一千兩經理喪事並著於伊原籍同安縣地  
方官爲建立祠宇春秋祭祀其靈柩護送到日著派巡撫張師誠



親往同安代朕賜奠並查明伊子見有幾人其應襲伯爵俟伊子服闋之日交該督撫照例送部引見承襲其李長庚任內各處分著悉予開復所有應得卹典仍著該部察例具奏以示朕篤念勞臣恩施無已至意十三年二月奉 上諭李長庚爲國捐軀凡水師大小將弁兵丁皆當爲李長庚復仇方不愧同心敵愾之義見在蔡逆不過賸船數隻閩粵兩省大幫兵船總先專注蔡逆上緊擒拏上以張國威下以洩眾忿亦可慰忠魂於地下也是月又奉上諭水師提鎮將弁等如能將蔡逆擒獲卽遵旨將該逆解京如拏獲賊犯必究出放礮中傷李長庚之人解赴同安於李長庚靈前禱祭以慰忠魂儻不能究出放礮之賊亦當將賊眾內罪應凌



遲者解往一二人鬪割致祭俾伊家附近居民皆得同伸憤恨嗣部臣以伯爵等次請 欽定得 旨李長庚著封三等伯承襲十六次襲次完時給予恩騎尉世襲罔替其卹賞銀著再賞給四百兩 子專祠 賜諡忠毅子廷鈺承襲封爵

右 國史館本傳

嘉慶十有二年十二月壬辰浙江提督李公勦洋匪蔡牽於廣東潮州之黑水洋卒於行間 皇上軫悼封三等壯烈伯諡忠毅子祭葬十四年公舊部王得祿邱良功殲蔡牽於浙江温州之黑水洋洋匪平二十年前揚州府知府甯化伊君秉綬以公之事請敬銘之墓闕公諱長庚字西巖福建同安人也曾祖思拔祖崇德父

希岸皆 贈建威將軍母王氏 贈一品夫人公乾隆三十六年  
武進士由藍翎侍衛補衢州都司升提標左營遊擊太平參將樂  
清副將因勦林爽文入福建護海壇總兵緣事革職公罄家財募  
精勇捕洋匪獲戕參將張殿魁之林明灼陳禮禮以遊擊起用署  
銅山參將丁父憂去官服滿補海壇左營遊擊時浙江福建洋匪  
北接山東西通廣東西三面數千里皆盜出沒其內地曰洋匪蔡  
牽最大朱瀆次之外地曰夷匪多中國人挾安南人爲之鳳尾最  
大一艇載數百人洋匪曰匪艇夷匪曰夷艇夷艇至輒數十艇蔡  
牽百數十艇朱瀆亦數十艇其大較也五十九年夷艇始入福建  
之三澎公敗之嘉慶二年升澎湖副將浙江定海總兵三年擊洋

匪於衢港及普陀敗之四年鳳尾引夷艇入温州洋敗之 賜花翎五年浙江巡撫阮公元以公可任奏請總統浙江福建水師得旨俞允公申號令嚴標識東部伍信賞罰自偏裨至隊長舵工水手耳目皆一於是水師皆可用能立功鳳尾引夷艇入台州松門遇颶風覆溺幾盡登岸者悉就俘獲安南僞侯倫貴利磔之自後夷艇不敢至鳳尾不知所終是年升福建水師提督調浙江提督先是匪艇皆高大我軍仰攻殊失勢而匪艇用晉石及蠶脂浴帆禦火箭帆下渴烏車發水及數丈滅餘火其舷以錫傅之不能傷故不易敗公與阮公議造大艇凌匪艇上至是成名曰霆船連敗蔡牽於岐頭東霍獲匪目張如茂徐業兵威大振其明年以霆船

大敗蔡牽於定海牽南走福建乞降是時牽已窮蹙糧盡艇亦朽壞公窮追不日可擒而總督以令箭止公兵牽得以其閒修艇揚帆去是役也功垂成而中廢天下皆惜焉蔡牽畏霆船厚賂福建商人造大艇高於霆船出洋以被劫歸報牽得之大喜渡橫洋劫臺灣米數千石分餉朱瀆遂與瀆合九年戕温州總兵胡振聲公追之及於馬蹟敗之至盡山復敗之牽以大艇得遁去委敗於朱瀆瀆怒於是復分公與阮公議禁商人造大艇牽計不行是年敗朱瀆於全廈調福建提督十年敗蔡牽於龍灣復調浙江提督十一年蔡牽合大隊攻臺灣別部屯仔尾洲沈舟鹿耳門阻官兵公至不得入謀知南汕北汕大港門可通小舟遣金門總兵許松年



澎湖副將王得祿乘澎船攻仔尾洲敗之其明年復敗之二月己卯朔松年夜率銳師跣海水登仔尾洲焚其寮牽反救公遣師出南汕自後焚其舟松年出仔尾洲夾擊大敗之庚辰復夾擊大敗之牽棄仔尾洲屯北汕以鹿耳門沈舟自塞走路也甲申潮驟漲沈舟漂起牽奪鹿耳門遁去奉 旨革翎頂是役也許松年爲軍鋒前後奪舟大小數十焚寮及舟無算殺賊數萬人尸橫數十里臺灣獲全公所將止三千人耳是年蔡牽復合朱潰走福甯追敗之 皇上知公臺灣功復翎頂十二年敗蔡牽於廣東之大星嶼復敗之於福建之浮鷹十二月率福建提督張見升追牽是時朱潰已爲許松年所擊敗死其弟渥降牽亦屢敗羣黨散沒止三舟



矣初公以謀勇耐辛苦受 皇上深知屢立功軍事悉主阮公福建忌之故主招撫後被給益恚怒而阮公又以事去浙福建益撓阻公公以 聞 皇上逮治總督代以阿林保公阿林保公初至福建劾公逗撓 皇上以問浙江巡撫清安泰公公得直於是 皇上眷公益厚 敕福建不得撓阻責公專擒蔡牽予世職蓋公天性忠勇 皇上拔之廢棄之中推心委任不使節制大臣得掣其肘至是而公不得不死矣蔡牽雖止三舟皆百戰之餘合死力拒公於黑水洋公自將親軍當蔡牽大艇公前後臨陣多親搏戰至是自搗鼓合戰良久冒煙火麾火船挂蔡牽大艇將焚之忽礮彈掠過傷公喉血涌出不可止遂仆而張見升見中軍舟亂引師

退率得走安南蓋見升官福建每戰必自全其師不敢縱也然公雖授命後卒遵公部勒滅蔡牽故言水師良將皆推公第一既明日潮州知府至舟斂公得載榇蓋公之誓死非一日矣公無子嗣子廷鈺襲爵葬公於同安之祖塋銘曰

妖鯨叩天飛駭雲長鼉大鼉紛輪困剗刎腹搜其羣手提雙桴桴不歇天狗奔空襲明月誰獲貯之烈士血煌煌前績銘旂常五等之錫邦家光子孫保之噫勿忘

右墓闕銘惲敬撰

嘉慶十二年冬十二月二十有五日本江提督李公帥師剿海盜死之事聞上震悼詔追封三等壯烈伯予世襲諡忠毅給

喪事。命福建巡撫往迎其喪，攝奠建祠，其縣數。敕水師將士爲公復仇。恩禮篤異，動天下。越明年九月，葬公同安坪邊山。原公女夫甯波同知陳大琮來京師，請文於碑，壽祺公鄉人，且史官也。謹次功狀之實，以昭示來世。敘曰：公諱長庚，字超人，一字西巖，泉州同安人。曾祖思拔，祖崇德，父希岸，寄籍彰化縣。學生三世，贈皆如公。官公於兄弟次三，幼倜儻異常，稍長，習騎射，慨然有當世志，弱冠以武學生舉。乾隆三十五年鄉試，明年成進士，授藍翎侍衛。四十一年，出爲浙江衢州都司，擢提標左營遊擊。遷太平參將，再遷樂清副將。林爽文之亂，檄人閩權海壇鎮總兵所轄南日、湄洲故盜，鼓公至捕除之。會鄰民被劫，誤指海壇，坐削職，遽歸散。

家財募鄉勇率子弟操舟入海擒盜首從數十復擒盜大昨公自是有致命之志矣頃之郡王福文襄定臺灣還訪水師將才禮異公公慷慨請曰長庚破家爲國舟及軍食軍械一不資官惟火藥非私家物願便宜得調文襄許之初閩盜林明灼等入浙海戕一參將吏莫能捕以屬公不三月皆獲奏起遊擊五十五年權銅山營參將後四歲補海壇右營遊擊仍權銅山事六十年安南艇盜闌入閩傍近驟駭公率戰艦入擊之象嶼追北及三澎賊來撲舟師未集麾兵士急伏舳艫中候賊礮盡突過其東發一礮殲之日暮望數艇踵至令列艦銜舳迤若長蛇比曉東西迭轉關大挫之今上卽位之二年由銅山參將擢守澎湖副將未行遷浙江定海



鎮總兵定海更盜患嬰城守公條上緝捕事於總督故大學士書  
麟多施行於是攻盜衢港北越山東登萊又攻盜普陀洋又攻盜  
潭頭斬獲多當是時鳳尾羣盜誘夷艇百餘踞浙江巔澳而巨盜  
蔡牽林阿全等名號以數十船交海中當事者特急艇患日夜程  
督公乃擊之温州三盤澳還拔他將之被圍者鋒銳甚賊宵遁南  
追至竹嶼過粵閩之交甲子洋乃返 上聞慰諭曰李長庚素勇  
追勦力然風濤險阻稍爲持重不可輕進又 誠總督王德曰李  
長庚爲水師傑出宜用於要處莫令往返奔波徒勞無益也公致  
書提督蒼保大略謂定海黃巖温州三鎮宜更抽戰船專督帥假  
便宜勵賞罰加口糧足薪米稽要隘斷火藥遏糴汲益募丁壯增



調水兵稍變通成例權利害而勿惜小費其言皆中機要五年擊賊功最 賜花翎夷艇大入浙江巡撫阮元奏以公總領水師遂申軍約別徽幟嚴號令明進退疾徐之節曰吾熟水戰不如法不可欺也夏扼夷盜於松門颶風作覆其艇幾盡獻俘千磔僞侯倫貴利自是夷盜不復踐浙海他土盜亦寢蹙而蔡牽擾閩海劇張其冬公南下剪水澳盜及牽黨六年冬授福建水師提督尋調浙江九年秋 命公爲閩浙水師總統温州海壇二鎮爲左右翼專捕牽公議賊略船於商船高大仰攻不便當禁海商毋擅造巨舶巨舶毋出口賊所掠止干斛之舟乃無能爲矣又自剗火攻船頗倣明人子母連環船法十年夷艇挾羣盜朱潰窺金廈漳泉戒嚴

率因入淡水迫臺灣復授公福建水師提督出廈門率引去仍調  
浙江其秋詔書巡撫清安泰曰蔡牽有船八九十而長庚所統兵  
船僅相抵浙江尙有邱塔小肥賓等盜船三四十而三鎮兵船亦  
僅相抵自揣兵力猶未足勝賊用兵之道知彼知己謀出萬全長  
庚自督府奏定勒限一年以來趨蹈艱險橫戈直前出入死生徒  
勞無成者緣閩浙洋面三千餘里所在兵力單輒祇恃長庚一軍  
往來逐捕顧肩失股賊反以逸待勞前奉 中旨勿事尾追今日  
之病實在於此竊謂兩省宜各厚集艤艘隸之兩提督使不分畛  
域首尾策應勿予賊暇庶少有多公自以總兵討牽歲餘東擊之  
南盤掩之白犬洋敗之旗頭至東霍山乘勝至盡山以提督二歲

國朝通志卷之三十一  
乘之象山東薄之東滬蹙之三沙北躡之南鹿手鎡之浮鷹以總  
統踰三歲邀於馬蹟東及於黃壠轟之賊復自淡水北覆之青龍  
港擣之斗米洋戰三晝夜東燿之臺灣洲尾焚其舟數十北走而  
東蹙之張坑掀商艘出虜者復北折而南克之調班洋合諸鎮兵  
圍之漁山再蹈之竿塘破之三盤賊東走逐之東涌反而北又竄  
而南趾之廣東大星嶼凡斬首八十餘級殪禽數千人得賊從子  
一人頭目十餘人俘器械礮火萬計 上知公不遺餘力且功簿  
無虛飾累 詔嘉之公追奉三沙也賊食盡逢纜戰具皆敗乃遣  
黨詐乞降督府督府不虞也輒遣吏招撫而飛檄趨舟師入倚公  
勿動賊以閒繕備揚颿去牽之圍臺灣也陷鳳山據洲尾鑿巨舟

塞鹿耳門阻外援結奸民鴉餘人大掠公令掘隘口遣將繞出其  
腹背夾攻連破之已而賊乘潮從北汕逸事 問奪翎頂而公固  
逆知海道遶開賊眾我寡嘗從督府乞濟師不時應故失牽漁山  
之役賊以石火箭如雨公力戰被數創當是時總督王德以罪請  
戍邊代者因銜公構蜚語遠劾公而巡撫清安泰訟公戰功章尋  
至 詔復公冠頂而切責劾者大星嶼之役斷賊舟大桅燬其蓬  
圍急而公舟亦摧於浪粵援絕故止 上聞切責粵帥敘公功其  
歲與粵師勦他盜竣還浙江請暫理軍政 上不許遽行與家人  
訣曰吾不滅賊誓不返矣於是合金門福甯二鎮兵南擊牽及之  
廣東黑水洋賊才三舟矣火攻船乘風絙其艚公奮欲登者三幾



獲牽俄風大起水立舟中皆傾眩飛礮中咽及額是日日昃殞垂  
絕猶右手持刀左執盾目怒視如生時公天性知兵尤長水軍在  
颶濤頽霜雹袒鋒鏑身大小百餘戰所向風靡賊私相戒曰不畏  
千萬兵但畏李長庚其警服如此天下知與不知皆以爲今之頗  
牧然所與同心者阮公清公而已它督部多不相中驟之掣之齟  
齟之提孤軍奔命四涉萬里往往客主不相接髮凋齒豁卒羅纒  
鱗悲已然而公將兵在外十數年 上未嘗識公面獨排箕舌洗  
篋書始終倚公如長城其生也愛之其死也哀之蓋古名將不易  
得之於其君天下又以感公之遭也或謂以公之勇功隳旦夕賊  
罪巨於海而網數漏何也豈天欲俾公盡瘁以彰忠烈而後已耶



公卒踰年提督王得祿邱良功竟以閩浙舟師蹙牽海上總兵許  
松年亦已斃賊朱潰潰弟渥牽義子小仁先後舉黨降然則

天子之威德公之英靈與文武吏士之所以爲公雪憤者皆可知矣  
昔漢滅蜀追念來款越嶲夷降賜岑彭家晉平吳策告羊祜廟唐  
掃蕩河洛原功張許繪形凌煙今公功方百世祀天下無一日不  
思公公何恨哉公所至嘗修學校振饑施棺置義冢善拊吏士今  
大帥得祿松年之屬皆公所薦拔蓋又仁智儒將也生乾隆十五  
年四月二十五日春秋五十八無子養子廷駒武舉人早卒聞於  
朝以所撫同姓子廷鉅嗣襲爵銘曰

茫茫大瀛寬生蛟鼉去來閃電血人於波 天子命我樓船我我

日華書局影印  
三  
剪此朝食齒我天戈雷碎霆激奔駭妖魄乘風簸濤因而反辭黃  
頭之軍南北寡援蒼兕蒼兕觸涉險難胃蝨十霜飢不暇餐志業  
未竟先摧師于隴西確虜昆邪恐亡新息介介壺頭卒儻公知  
國恩安知福禍惟 帝念忠報勳優大鼓鼙琴瑟聽之立懦登於  
明堂功宗曰可

右神道碑陳壽祺撰

李忠毅公名長庚字西巖福建同安人曾祖思拔祖崇德父希岸  
公生而倜儻警敏甫入塾卽弄筆書天生我才必有用七字性至  
孝母喪旣除益讀書習騎射乾隆辛卯科武進士藍翎侍衛屢扈  
蹕乾隆四十一年年二十六補浙江衢州都司累遷提標遊擊太

平參將樂清副將林爽文亂臺灣閩中求良將於浙提督陳大用  
以忠毅應遂入閩護海壇鎮總兵掩捕南日涓洲之賊數十人餘  
黨解散會鄰海有民船被盜誤指海壇者被參革職忠毅出家財  
募鄉勇率子弟操舟出擒盜首林權等數十人又擊盜陳營於大  
厝盜善火器忠毅迴舟據上風以長竿繫月鏹斷其帆縹須眉皆  
燎躍入盜船斬獲以歸福郡王平臺灣歸加禮善遇之檄郡縣曰  
李某用火藥所在支與之海盜林明灼陳禮禮等入浙戕參將張  
殿魁總督屬忠毅捕之遂獲之奏功以遊擊起用五十五年署銅  
山參將選鋒自隨作商人裝屢獲賊明年丁父憂去官五十九年  
補海壇遊擊仍畱銅山六十年安南夷艇始入閩閩人驟駭忠毅

國朝通志卷之三十一  
三  
以小船入擊之三澎救商船賊舍商拒兵忠毅麾兵伏船內待賊  
礮盡過賊東發一礮碎其舟餘盜夜相偪公計算不敵乃以八船  
首尾緝爲一詰旦賊東來則以東一舟應之至八西來亦如之迴  
環至暮賊乃去嘉慶二年授澎湖副將定海鎮總兵 純皇帝召  
見諭曰汝勤於捕盜故有此授三年至定海時定海累更盜患艇  
夷登岸劫擄婦女官士嬰城至是始有所恃夏擊盜於衢港窮追  
入山東界獲之秋攻盜於普陀明年秋擊盜於潭頭皆斬獲無算  
秋閩盜鳳尾引夷艇入浙共百餘艘忠毅追擊至温州沈其一艇  
守備許松年等三船困於賊忠毅返舟入賊圍救出之窮追至廣  
東甲子洋遇蔡牽再擊之總督玉德巡撫阮元奏其事奉 旨李



長庚奮勇爲賊所畏懼此次追剿洋面風濤亦不得不稍爲持重  
李長庚爲傑出之員總宜用於要處弗令往返奔波徒勞無益復  
奉 旨賞戴花翎五年五月至甯波與巡撫阮元提督蒼保護造  
大艇船三十以攻夷盜六月夷盜大小七十船復入浙阮元謂賊  
多非會剿不可會剿非有謀勇者爲統帥不可於是奏以忠毅爲  
總統得 旨允行忠毅旣統水師遂條申軍令曰一定海鎮船居  
中軍用黃旗總領用五色方旗黃溫二鎮居左用紅旗總領用五  
色尖旗閩鎮居右用白旗總領用五色尖旗一中軍船晝行插五  
色旗夜懸三鐙將領二鐙弁兵一鐙中軍船起頭蓬之後掌進號  
一次者紅旗行二次者白旗行三次者黃旗行一遇賊船無論何



鎮先見者卽插本色旗使後船見之仍視中軍所持五色方旗所指前後四方隨指追攻若中軍挂五色旗於大遲者收兵一各鎮雖分三色旗又於本色旗心黏他色以別其隊何隊犯令卽罪其領隊者一中軍船高插五色旗者收輿夜中軍船放火號三枝各總領二弁兵一亦收輿支更譙警夜見有外船近者鳴金一陣各船互傳見盜近乃擊之毋遠而亂若收輿旋須行者中軍插三色旗各船毋放杉板船入海一遇大盜宜安靜前後左右以旗進退之遲者亂者按以軍法旣追盜盜返逢擊我我毋避如有船陷賊本隊遲救者罪其長一追捕遇無風時必加槽若心怯將遲或鬆或緊者罪之前船若速必回待後船後船不加速而亦回住者罪

之一泊舟各總領船插黑旗禁縱兵上岸一中軍傳將備出黃旗  
傳千把外委出藍旗傳隊目柁工出紅旗一兵船獲盜船以盜賊  
物爲賞兵船過礁門必魚貫爭先者罪舵工六月安南夷艇鳳尾  
盜六七十過閩入浙偪台州松門將登岸巡撫阮元勒兵於太平  
松門擊之二十二日忠毅率師至海門將會黃巖鎮謀攻取夜颶  
風起明日風益甚盜船覆溺於松門外僅餘二三船漂出外海海  
門兵船亦多損忠毅船隨潮溢入田挂木而止賊在松門據破船  
及泗水登岸者黃巖鎮率松門兵縛梃合水陸悉攻俘之獲安南  
四總兵印及僞爵侯倫貴利磔之又獲安南王敕擲還安南自是  
夷艇不復入浙海秋忠毅以夷寇雖滅閩盜尙有水澳蔡牽乃修

船往來閩浙間屢獲劇盜李出丁郭林俊新楊烏李車黑陳帖李廣高英等船冬擢福建水師提督總督王德以忠毅福建人奏請迴避奉旨調浙江提督六年新艇成忠毅入閩駕歸浙初阮元以造艇銀鉅萬全付忠毅曰船乃兵將所寄命文官不善於工請公自造之忠毅曰公不疑我我當任之命守備黃飛鵬及族人齎銀入閩造艇至是艇成名曰霆船最堅壯加以大礮兵威大振夏擊蔡牽於岐頭東霍等洋擒獲甚夥七年春獲盜張如茂船於浙潭頭獲徐業船於閩東滬是時水澳等賊以次殄滅海盜畏霆船勢頗戢八年正月蔡牽匿定海北忠毅以舟師掩至牽僅以身免追至閩糧藥盡蓬索朽遺其黨千道員慶徠乞降於總督總督不

虞其詐招撫之牽又言果許降勿令浙兵由上風來倘我總督聞  
浙兵居下風牽以其閒繕器備物揚帆去總督大怒越浙兵擊之  
已無及矣十一月擊牽於三沙沈其船一牽北竄蹙之於温州南  
鹿奪其船二沈其一焚其一斬獲無算是年兼攝定海鎮凡十閱  
月蔡牽畏霆船厚賂閩商更造船之大於霆者令商載貨出海濟  
牽用商歸岸僞報被劫牽得大船遂能渡橫洋渡臺灣九年夏劫  
臺灣米數千石及大橫洋臺灣船會閩粵聞盜朱漬斷糧牽分米  
飽之遂與漬合八十餘大船猝入閩海温州總兵胡振聲以二十  
四船入閩運船工木總督遵檄振聲擊之振聲陷於漬死之賊勢  
甚熾六月王德阮元會奏請忠毅總統閩浙水師以温州海壇二



鎮爲左右翼專捕蔡牽秋牽潰同入浙八月追及之於馬蹟牽潰  
結爲一陣忠毅督兵衝貫其中盜分東西竄逐至盡山沈其二船  
斃牽船盜數十人俘餘船五十餘人終以牽船高未獲遁去牽責  
潰不用命潰怒先返自是牽潰始分牽亦少衰忠毅建議禁商造  
大船無爲盜齎十二月潰結粵盜伺金廈忠毅擊走之奪其船二  
於甲子洋牽擾臺灣奉 旨調福建水師提督責捕牽十年夏牽  
由臺入浙忠毅擊之於青龍港阮元奏浙江提督孫廷璧不請水  
師奉 旨復調忠毅爲浙江提督九月被風於盡山所部船多損  
冬牽聚船百餘復擾臺灣結陸路無賴萬餘人屯洲仔尾沈舟塞  
鹿耳門阻官兵十二月忠毅至臺不得入然分力回拒忠毅以故



臺灣府城得不破時南北汕安平大港門三處尙通小船忠毅掘之別以小澎船五十令金門總兵許松年澎湖副將王得祿進攻之焚獲三十餘船盜千餘人十一年正月忠毅令許松年進柴頭港自領兵截港外松年得祿水陸夾擊之焚獲甚夥二月朔令松年夜入洲仔尾登山焚其寮大船盜至鹿耳門者掩至忠毅別遣將以火攻船從南汕出其後燒之松年進蹙之焚斬無算二日復登岸擊陸賊以火焚其小船尸橫七八里賊大敗棄洲仔尾困守北汕內僅餘五六十船七日東風大潮驟漲鹿耳門所沈舟漂去賊奪門出忠毅追擊之奪其船十餘而牽竟遁去 詔奪翎頂立功自贖四月牽潰復合在福甯追擊之牽入浙又擊之於台州入

國朝通志卷之三十一  
月擊之於定海漁山忠毅專擊牽舟牽瓦石火器雨下公額身皆受傷牽復遁去 詔賜還頂帶果擒渠許錫世職九月擊牽於閩之竿塘獲牽姪蔡添來十二月擊牽於溫之三盤多所斬獲初忠毅與阮元同志氣十年元欲造更大於霆船之大船寓書忠毅旋以父喪去官忠毅言於總督請造之總督阻之牽自鹿耳門遁入內海甚狼狽蓬柁皆毀四月至福甯得岸奸接濟易新蓬勢復張忠毅皆列狀奏 聞 上切責閩文武官逮總督以阿林保爲總督阿林保初至閩閩官交譖公阿林保密劾公因循逗遛捏報斬獲奏五上 上以問浙江巡撫清安泰清安泰辨之九月奉 上諭本日清安泰奏到查明李長庚在洋捕盜並無因循懈玩一摺

所奏甚屬公正阿林保前此密參李長庚因循怠玩種種貽誤請將伊革職治罪朕覽該督所奏卽覺不愜阿林保身任總督原不能無參劾之舉但伊到任不過旬日地方公事一切未辦海洋情形素未熟悉而於李長庚更從未謀面輒行連次奏參專以去李長庚爲事殊屬冒昧是以降旨令清安泰秉公詳查俟奏到時再行覈辦而本日據清安泰覆奏則稱李長庚帶領兵船經過海口並未回署清安泰曾於致阿林保信中將其兩年在外公爾忘私之處敘及特阿林保尙未接到耳又據稱海船若不勤加燂洗則船底苔草蠶蟲黏結輒駕駛不靈故隔越兩三旬卽須傍岸燂洗李長庚收船進港委非無故逗遛而李長庚所獲李按實係蔡牽

夥黨俱經審明確鑿並無捏報斬獲情弊並據另片奏稱八月十六日李長庚帶兵圍攻蔡逆坐船一事將盜船燒沈二隻斃賊無算生擒七名不但李長庚身受多傷卽黃飛鵬亦被礮彈擲傷腰骹又官兵受傷者一百四十餘人清安泰又轉詢黃飛鵬何定江二人亦均稱李長庚實在奮勇並無怠玩等語是阿林保前此奏參李長庚之處均係捕風捉影全屬子虛設朕誤信其言不加詳察卽照阿林保所奏辦理則李長庚正當奮不顧身爲國殄賊之際忽將伊革職拏問成何事體豈不令水師將弁寒心試問水師中有過於李長庚者乎阿林保未見確實任意糾彈殊屬冒昧朕素不昏憤糊塗豈受汝蠱惑自失良將耶李長庚平日旣無逗遛



惟怯情事此次在長途洋面痛剿蔡逆身先士卒躬受多傷實爲  
認真出力朕已特降恩旨先行賞還頂帶以示獎勵并將剿辦蔡  
逆一事責成該提督勉以成功李長庚感激朕恩既知責無旁貸  
自必倍加奮勉兵船在洋捕盜全在地方官協力幫助文武和衷  
方克有濟從前玉德在閩浙總督任多年於李長庚兵船剿賊之  
時事事掣肘如所需火藥礮位船隻兵米等事不能應手而於盜  
船接濟之路又不爲之嚴行杜絕以致兵船日形匱乏盜船駛竄  
自如追捕不能得力此等實在情形朕皆洞悉是以將玉德革職  
逮問今兵船正當剿捕喫緊之際若阿林保尙不知以公事爲重  
屏除私見猶復輕聽人言罔恤公論甚至因此次奏參李長庚不



能遂意因而挾私逞忿心存嫉忌遇事掣肘使其不能成功以致  
禁逆逋誅海疆貽誤則阿林保之罪甚大玉德卽伊前車之鑒朕  
惟執法懲辦是此時李長庚不至革職治罪而阿林保不知改悔  
轉恐不免矣阿林保著傳旨嚴行申飭並諭溫承惠清安泰知之  
十二年春忠毅追牽入粵擊之於大星嶼四月擊粵盜鄭一於佛  
堂洋獲其二艇七月請回甯波辦軍政 詔飭之八月卽出海十  
一月擊牽於閩之浮鷹十二月率福建水師提督張見陞等追牽  
入粵海廿五日質明至黑水外洋牽僅存三舟忠毅以浙江親軍  
專擊牽一舟斃賊甚夥又自以火攻船挂牽船將成擒忽賊發一  
小礮適中忠毅喉忠毅遽殞閩帥張見陞本庸懦又窺總督意頗

不受提挈及是遠見總帥船亂遽率舟師退率乃遁入安南夷海中阿林保以其事聞上震悼哭之廷臣亦哭詔曰浙江提督李長庚宣力海洋忠勤勇幹不辭勞悴懋著威聲數年以來因閩浙一帶洋盜滋事經朕特命爲總統大員督率各鎮舟師在洋勦捕李長庚身先士卒銳意擒渠統兵在閩浙臺灣及粵省洋面往來跟勦艱苦備嘗破浪衝風實已數歷寒暑每次赶上賊船無不痛加勦殺前後殲斃無數擒獲盜船多隻蔡牽亡魂喪膽畏懼已極聞李長庚兵船所至四處奔逃正在盼望大捷之際乃昨據阿林保等奏到李長庚於上年十二月二十四日由南澳洋面駛入粵洋追捕蔡牽望見賊船祇賸三隻窮蹙已甚官兵專注蔡逆

窮其所向追至黑水洋面已將蔡逆本船擊壞李長庚又用火攻船一隻乘風駛近挂住賊船後艏正可上前擒獲忽暴風陡作兵船上下顛播李長庚奮勇攻捕被賊船礮子中傷咽喉額角竟於二十五日未時身故覽奏爲之心搖手戰震悼之至朕於李長庚素未識面因其在洋出力屢經降旨褒嘉並許以奏報擒獲巨魁之時優予世職李長庚感激朕恩倍矢忠盡不意其功屆垂成之際臨陣捐軀朕披閱奏章不禁爲之墮淚李長庚辦賊有年所向克捷必能擒獲巨魁朕原欲俟捷音奏到時將伊封授伯爵此時李長庚雖已身故而賊匪經伊連年痛剿之後殘敗已極勢不能再延殘喘指日舟師緊捕自當縛致巨魁況李長庚以提督大員

總統各路舟師今歿於王事必當優加懋賞用示酬庸李長庚著  
加恩追封伯爵賞銀一千兩經理喪事並著於伊原籍同安縣地  
方官爲建立祠宇春秋祭祀其靈柩護送到日著派巡撫張師誠  
親往同安代朕賜奠并查明伊子見有幾人其應襲封爵俟伊子  
服闋之日交該督撫照例送部引見承襲其李長庚任內各處分  
著悉予開復所有應得卹典仍著該部察例具奏以示朕篤念勞  
臣恩施無已至意部臣以伯爵等次請得 旨李長庚著封三等  
壯烈伯承襲十六次襲次完時給予恩騎尉罔替其卹賞銀著再  
給四百兩全祭葬 賜諡忠毅忠毅無子以族子廷鈺爲後襲爵  
忠毅治兵有紀律恩威兼施諸盜皆畏之爲之語曰不怕千萬兵



但怕李長庚海盜沈振元自言爲盜時泊浙海夜夢公至一夜數  
驚遂革心投誠爲水師健弁公家故豐悉毀於兵事好讀書究攷  
略爲詩古文修甯波學宮置義冢爲粥食餓民士民皆感之忠毅  
舉武科會試卽航海入天津識海中形勢及在水師識風雲沙線  
自持柁老於操舟者不及之在兵船緘所落齒寄其妻吳益以身  
許國慮無歸櫬也閩健將許松年王得祿等皆公所薦拔者朱  
濱後爲許松年礮所斃其弟渥率眾降於閩十四年阮元復任浙  
撫八月十八日福建提督王得祿浙江提督邱良功始其殲蔡牽  
於温州黑水洋

右傳阮元撰



公諱長庚字超人自號西巖其先家縣之山邊鄉 國初徙著侯  
賓鄉至公父彰化學生希岸生五丈夫子公於兄弟次居三幼而  
見奇故命以今名年十七喪母精習騎射慨然有志於當世試補  
武生舉乾隆庚寅 恩科鄉試明年成進士授藍翎侍衛扈 蹕  
畿輔者三 高宗純皇帝之四十一年公年二十六出爲浙江衢  
州都司居六年遷提標左營游擊又六年由太平參將擢樂清副  
將林爽文之亂入閩護海壇鎮總兵海壇所隸南日湄洲故盜藪  
公至始哨其地而捕除之會鄰境有被劫者謾指爲海壇界落職  
畱緝公不申辨遽自毀家募鄉勇出洋擒大詐盜陳營盜善火器  
戰屢卻公竿月鏹斷其船繚跳而登賊火燎公鬚短兵接大獲以

歸頃之福文襄郡王訪水師將才得公一見驟加禮異公慷慨言  
曰長庚破家爲國船既自造軍食軍械無資於官惟火藥非私  
家物願有請於是文襄下檄沿海凡李某所在調用軍火不限多  
寡與之先是閩盜林明灼陳禮禮等闖入浙江戕參將張殿魁吏  
莫能捕以屬公不三月獲之奏起游擊五十五年署福建銅山參  
將銅山戰艦徒空名公別用選鋒作商人裝出海不張旗幟罔知  
其官軍也故賊至輒得居銅山五年先後三出南洋五出北洋公  
謂逐捕固武臣常職不當報功有所獲往往不以自聞中閒丁父  
憂暫歸仍還署事補海壇右營游擊未之任今上御極卽授公  
銅山參將先是救象嶼商船之被劫者賊來撲我兵少勢不敵公

伏不動待賊礮盡出不意賊過其舟一礮殪之日嚮暮矣隱約又見數艇公亟收泊數艇者亦泊比曉相持公命我舟一字排列作長蛇形後船插前船尾繼之巨纜賊從東來我師東第一舟應之以迄第八從西來西第一舟應之以迄第八迴環終日賊無如之何是役也槍礮聲震數百里海水爲沸所殺傷過當賊有奪屍以埋者遮而墮之海中 上之二年擢署澎湖副將以保舉入京未至授定海總兵 純皇帝召見慰遣以三年四月就鎮定海累更盜患前此文武吏獨事城守公至以水戰利病指授其士不三月出擊盜之泊衢港者追過山東黑水洋生擒盜首林蘇及眾五十餘人其年八月平普陀外洋之盜明年平潭頭外洋之盜已而土

盜鳳尾幫誘入安南夷艇公破之三盤舉拔他將被圍者出之當  
是時羣盜蔡牽柳阿全等諸有名目無名目大小以百數舶交海  
中而當事者獨急艇匪日夜程督公追之浙洋追之閩洋又追過  
閩粵交界之甲子洋乃返五年四月擊蔡牽白犬洋獲多 賜花  
翎五月夷匪大入巡撫阮公元奏以公爲統帥報 可公更定章  
程條下其法凡所俘獲悉以賞功俾弁兵知富貴皆在盜船之內  
槍礮必賊近乃發勿虛施六月與黃巖鎮會師松門颶風作覆賊  
舟幾盡獲其僞侯爵倫貴利俘斬數千人我師亦頗失利自是艇  
患紓矣而蔡牽在閩洋橫甚公出收撫其脅從者而後擊之所擊  
滅李出丁郭林俊新楊烏等有名賊目數十股七年冬擢浙江提



督明年正月朔蔡牽進香漁山公掩至牽踉蹌僅以身免公蹙之  
猛賊船食盡篷索壞不得修乃遣黨詣總督乞降總督不虞其詐  
也遽檄我師入口倚公勿往而牽以其閒次第繕完大購糧儲揚  
帆去其年閏二月公復與黃巖鎮合兵擊盜尤升等獲之九月平  
石塘釣艇盜十一月遇蔡牽於三沙沈其船一十二月追之南麂  
奪其船二沈其船一燒其船一斬首二級生擒八十餘人明年三  
月及之浮鷹燒其船一奪其船二斬首十三擒其男女四十餘人  
八月戰馬蹟公率師中貫其陣賊東西竄公分兵授孫大剛俾西  
追自率羅江泰李景曾東追及黃擺沈其二艘斃其人七八十人  
衢港數俘得五十二斬首五級牽船重疊張牛皮漁網礮彈不得



入又其船高出官軍所駕米艇仰攻非便公建議賊船之高於兵船者賊固劫船於商今兵船有成式而商船無定制請嗣後商船有當修者其樑頭限以一丈七八尺如此數年賊無大船可劫其大礮亦且無施公又嘗以意劫火攻船略本明人子母聯環船法用善泅者載油薪駛釘盜船藥發鳧水而還督臣以奏皆見施行於是土盜朱瀆挾艇匪窺伺金廈而蔡牽入臺灣大掠 上調公爲福建水師提督公以艇患方劇卽先擊艇匪艇匪旣逸別遣將追之外洋而身自東渡勦蔡牽牽聞解去公追創之臺灣平自上親政以來一意任公又鑒公孤忠有不獲盡其用者及是授爲總統 命温州海壇二鎮爲左右翼專以蔡牽事付公各路舟師

皆屬焉公感上知益自奮其年敗蔡牽於青龍港又覆之斗米洋有旨調浙江總統各路舟師如故九月過盡山遭颶風失公所愛將羅江泰劉成業十二月蔡牽再擾臺灣陰結岸匪萬餘人據洲仔尾鑿大船寒鹿耳門我師不得進鹿耳外巨浸稽天其別港有日南北汕曰安平港曰大港公駐汕外別遣將以小澎船由大港繞安平出不意攻之密約臺灣鎮道爲內應一戰燒其船二十餘奪其船九乘勝入之當是時岸匪助賊勢張甚公率所部水陸分道連五戰如破竹十二月朔夜薄洲仔尾賊以小舟二三十蜂擁來拒鋒乍交忽鹿耳門所屯大幫盜船內軼出同安船數十橫襲我師公以所造火攻船繞出其大幫船後燒之於是同安船

賊還救我師從而蹙之大勝質明擊山匪之屯聚者焚其寮七八里火光燭天賊氣自此沮矣牽既敗走北汕中其北汕旁出有道曰舊港南汕旁出有道曰新港公自守新港以別將守舊港又擊沈同安船堵其隙牽因阱獸乍且擒俄暴風從東來掀起所沈同安船牽從掀船處漏出事 聞奪翎頂四月牽與朱瀆合竄福甯外洋公以兩鎮兵敗之三盤牽折而北又敗之調班洋八月大搏漁山賊舟瓦石與火箭火毬雨下公縱橫血戰受傷事 聞復冠頂九月再敗之東涌礮擊蔡牽從子蔡添來落海十二年二月扼之粵洋大星嶼斷牽船大桅燬其頭篷合圍者屢而粵援不至亟收抵肇慶戢船澳 上聞切責粵帥下部敘公功四月與粵帥會



勦溪門盜已還視浙江軍政旋復出洋有旨責公速行而公實先已就道矣十一月合金門福甯兩鎮擊率浮鷹擒九十五人斬級十五十二月二十五日至粵黑水洋追擊之蔡牽所有三舟耳公奮欲攏登其舟幾登矣風浪暴作倉猝誤中賊礮傷咽喉額角是日日辰加未薨於陣督臣疏入上震悼遣撫臣迎奠賜白金千兩治喪追封三等壯烈伯予專祠仍下部臣議卹賜祭葬予諡忠毅倍其卹賞又累降旨申誠水師將帥爲公復仇敕督臣用所獲蔡牽義子僞總兵蔡二來祭公梟其首幕次其他恩數皆如故事公生平讀書之外喜靜坐天性知兵尤長水戰盜賊相誠有不怕千萬兵只怕李長庚之語身經大小百

十戰所殲擒匪啻千數所俘獲軍械礮火匪啻萬數他人得其一  
皆奇功在公爲不足書公所至修學校作義冢賑饑周急諸高義  
事有紀於同時學士大夫亦姑弗著其生也當乾隆十五年四月  
二十五日日辰加午所著有水戰紀略若干卷藏於家配吳太夫  
人無子所養異姓子一曰廷駒乾隆乙卯科武舉人前歿所養同  
姓子一曰廷鈺實承公喪有 旨襲爵爲公後吳夫人生女二一  
字葉寅未適而殤一適同縣安徽候補同知陳大琮公薨大琮自  
安徽奔問不遠千里奉公所遺章疏文移謁余爲狀余未識公迹  
公所爲其於大易之匪躬小雅之沉悴殆兼之矣然 上所委曲  
擁護保全之者後先非一烏虜此古名將未之或遇者也其始末



具存中祕異日必書於館臣天下後世將有爲之雪涕者無待乎  
余之表而暴之也今第就章疏文移舉其勞閔之較大而尤難者  
年月件繫以俟載筆者擇焉

右行狀王芑孫撰



藍嘉瑛

藍嘉瑛浙江定海人由行伍於乾隆五十五年拔定海鎮標左營外委五十七年擢把總五十九年升千總嘉慶元年遷黃巖鎮標左營守備五年超擢游擊十年升福建銅山營參將十一年升廣東龍門協副將十二年追剿海匪蔡牽至黑水洋遭風漂入夷洋遇艇匪合圍嘉瑛督率弁兵奮力勦捕身受多傷落海淹歿先是二年己革游擊復以都司用蔡得耀巡哨於小門洋四年浙江定海鎮標右營外委李文耀管駕同安船捕匪於三盤洋五年麗水營外委秦華隨捕洋匪漂出外洋六年署玉環右營千總周耀光追擊艇匪於東西柱外洋八年定海鎮標左營外委郁廷彪捕匪

於大盡山洋九年署温州鎮標左營把總黃金標捕匪於百畝礁  
洋温州鎮標左營把總馮光升由浮鷹洋追洋匪至水密洋十年  
定海鎮標右營外委李永譽追洋匪於山東黑水洋擊沈其船回  
至江南蛇山洋遇另匪乍浦營外委鄭國泰嚴鎬捕匪於大盡山  
洋俱戰歿先後事 聞嘉瑛得耀耀光光升 賜卹如例嘉瑛得  
耀光升 賞雲騎尉世職襲次完時以恩騎尉世襲岡替嘉瑛子  
運凝襲得耀子長謀襲光升姪國勝襲耀光廕把總子裕龍襲餘  
均照馬兵例 賞卹得耀浙江定海人由行伍拔外委游升甯海  
鎮標左營守備嘉慶二年以首先奮勇登船擊盜超補黃巖鎮標  
左營游擊嗣因疏防洋盜連劫四案奪職五年隨捕洋盜熟諳水

師屢獲首夥各犯經閩浙總督玉德奏請開復原官得旨降一等補用文耀廷彪永譽國泰鎬俱定海人華麗水人耀光光升金標俱永嘉人光升由行伍游擢把總以疏防船戶奪職留營緝捕復是職

右 國史館本傳



醫明者庸矣  
卷三十三

三

林國良

林國良福建海澄人由世襲騎都尉兼一雲騎尉於乾隆四十二年發往廣東以游擊用四十四年補碣石鎮標中營游擊四十七年升海門營參將五十八年丁憂回籍五十九年奏留粵省委用嘉慶元年奉 旨署南澳鎮總兵俟服闋實授四年六月因疎防盜船駛入海澄地方圍劫商船降三級調用五年補南澳鎮標右營游擊七年升大鵬營參將八年調崖州營參將九年委護左翼鎮總兵帶領師船出瀝隔外洋獲盜犯八十餘名又於神泉烏塗各洋擒獲洋匪六十五名肩負石傷十一月遷澄海協副將十年授左翼鎮總兵十三年追勦盜船受傷陣亡奏入 諭曰據吳熊

光等奏總兵林國良率領師船駛至了洲洋面追擊盜匪烏石二  
等轟沈匪船數隻賊匪紛紛落水正在得手之際復有盜船陸續  
駛至幫同拒捕林國良親身督戰適遇颶風大作坐船被賊火焚  
林國良受傷陣亡等語林國良督師勦捕洋匪臨陣捐軀實堪憫  
惻著加恩從優照提督例賜卹尋 賜祭葬 予謚果壯 恩賞  
騎都尉又一雲騎尉世職

右 國史館本傳

林道材 翟超漢等

林道材廣東新甯人由行伍歷升碣石鎮標中軍守備嘉慶十一年署右營都司十三年隨左翼鎮總兵林國良剿捕洋匪烏石二等於了洲洋擊沈數舟賊溺死者無算復有盜船駛至協同拒捕適颶風大作戰艦被焚道材歿於陣署左翼鎮標中營千總翟超漢碣石鎮標左營把總陳鴻洪日升中營額外外委李開恩香山協左營外委胡卓堂俱同日戰歿先是五年署龍門協右營千總王瑞鳳協巡至南洋尾外洋遇賊接戰被傷溺於水八年署海門營守備李象斌擊賊於參嶼洋陣亡十年碣石鎮標右營外委陳朝勳防守長沙礮臺以盜船駛入內港督兵奮擊受傷殞命十一

年碣石鎮標中營外委張開盛追賊於汕尾外洋被傷病歿十二年候補外委王大猷擊賊於大金島外洋力戰被戕嗣是十四年署春江協右營守備彭朝勝追賊於白礁洋力戰溺於水在籍候選衛千總何定龍自駕船協同官兵堵剿屢有殲獲亦於黃蒲洋戰歿平海營外委林超選追賊於甲子外洋遇風漂歿南澳鎮標左營把總林振輝巡哨至福建坪嶼外洋中礮死之先後事

聞均 賜卹如例 賞雲騎尉世職襲次完時以恩騎尉世襲罔替道材子朝盛襲超漢子大榮襲鴻子國恩襲日升子智明襲卓堂子鵬揚襲瑞鳳子者香襲象斌子家駒襲朝勳弟承勳襲開盛弟開承襲朝盛子殿光襲定龍子夢元襲超選孫亮襲振輝子榮



廷襲大猷 賞恩騎尉世職子勳襲開恩照馬兵例 賞卹超漢  
大猷俱廣東東莞人超漢由行伍擢把總嘉慶十二年署是職大  
猷由行伍擢大鵬營把總因疏防船戶被劫奪職嘉慶元年出洋  
效力獲盜三十七名候補是職鴻開恩朝勳俱陸豐人日升澄海  
人鴻日升俱由行伍拔碣石鎮標左營外委嘉慶二年升是職朝  
勳由行伍拔是職卓堂新甯人由行伍拔左翼鎮標中營外委嘉  
慶三年擢廣海寨把總四年升左翼鎮標左營千總旋署春江協  
右營守備緣事降調九年因出洋緝捕有功補是職瑞鳳欽州人  
由行伍拔龍門協右營把總嘉慶四年署是職象斌程鄉人由武  
舉歷升碣石鎮標左營千總嘉慶十二年署是職定鼇香山人由

武舉候選是職超選歸善人振輝湖陽人俱由行伍擢是職

右 國史館本傳

許廷桂 嚴高等

許廷桂廣東歸善人由行伍於乾隆二十九年拔福建提標水師後營外委四十九年擢前營把總五十一年遷左營千總隨征臺灣五十四年升金門鎮標左營守備五十五年超擢右營游擊五十六年升烽火門參將六十年以巡查洋面不能實力緝捕革職仍畱地方協緝嘉慶元年開復原官撥廣東以都司用五年以擊獲積年劫擄洋盜多名補香山協都司七年以協剿博羅永安二縣會匪出力 賞戴花翎九年升海安營游擊十三年升海門營參將十四年六月護理廣東左翼鎮總兵七月巡剿盜匪於磨刀洋陣亡時廣東碣石鎮標右營都司嚴高左翼鎮標左營千總陳

大德協勦盜匪俱於磨刀洋陣亡事 聞均 賜卹如例 賞雲  
騎尉世職襲次完時以恩騎尉世襲罔替廷桂大德未襲高子承  
恩襲高江蘇通州人大德廣東東莞人

右 國史館本傳

泊大剛 葉榮高等

泊大剛廣東陸豐人由行伍拔補碣石鎮標中營外委嘉慶十年擢本營把總旋署千總十四年七月出洋緝捕擊賊於香山縣屬磨刀洋陣亡時署水師提標左營千總葉榮高外委何新署水師提標左營把總劉旺錦外委萬國平陳見揚碣石鎮標右營把總魏高左營外委郭韜張得義陳大光中營額外外委莊派俱力戰死之事 聞大剛等均 賜祭葬 賞雲騎尉世職襲次完時以恩騎尉世襲罔替見揚以新補外委未予世職仍 賜卹榮高新安人由行伍累擢水師提標右營把總嘉慶十二年署是職新東莞人由行伍拔補是職旺錦東莞人由行伍拔補水師提標左營



外委嘉慶十三年署是職國平見揚東莞人均由行伍拔補是職  
高陸豐人由行伍拔補碣石鎮標右營外委嘉慶十年升是職韜  
得義陸豐人大光海豐人均由行伍拔補是職派陸豐人大剛子  
承恩襲榮高弟華魁襲新子龍光襲旺錦子生襲國平子蔭昌襲  
高子大進襲韜子茂興襲得義弟得忠襲大光弟大隆襲

右 國史館本傳

國朝書獻類徵初編卷三百七十目錄

忠義四十

黃振烈

蔡振華等

強克捷

叔京課從子有勳  
徐雲章等

劉斌

呂秉鈞等

趙綸

姚國旃

兄國林從子大綜  
楊雲漢等

賀德瀚

朱樹堂等

那倫

德玉等

楊連仲

紀祥等

岳王保

任起鳳

朱祥等

胡文秀

法里那

訥蘇魯額等

劉發恆

伍開江

都友周

李文彥

馬良

馬輪寶

赫福等

吳亨佑

王友貴等

烏凌阿

穆克登布

皇朝通志卷一百一十四  
家三十四下

--	--	--	--	--	--	--	--	--	--

國朝耆獻類徵初編卷三百七十

通奉大夫前署江西巡撫江西布政使司布政使湘陰李桓輯

忠義四十

黃振烈 蔡振華等

黃振烈廣東潮陽人由行伍拔補南澳鎮標右營外委嘉慶三年擢本營把總五年升海門營千總十三年遷碣石鎮標左營守備旋署本營遊擊十四年十一月出洋緝捕於新安縣屬大鏟洋焚攻賊船被火陣亡時署春江協右營守備蔡振華同營外委雷常振俱死於難事 聞均 賜祭葬 賞雲騎尉世職襲次完時以恩騎尉世襲罔替是年署碣石鎮標中營守備葉遇高擊賊於赤

瀝角洋香山協中營千總梁韜擊賊於沙灣洋均歿於陣事聞  
賜祭葬世職如振烈等振華澄海人由行伍拔補春江協右營外  
委嘉慶七年隨都司許廷桂勦辦博羅會匪有功升電白營把總  
出洋捕盜屢著勞績九年六月擢本營千總八月調澄海協右營  
千總十年五月調春江協右營千總九月署是職常振陽江人由  
行伍拔補是職遇高新安人由行伍累擢碣石鎮標中營千總嘉  
慶十一年署是職韜香山人由行伍拔補是職振烈子廷傑襲振  
華孫兆星襲常振子道明襲遇高世職未襲韜子得祿襲

右 國史館本傳



強克捷

叔京課從子有勳  
徐雲章等

強克捷陝西韓城人嘉慶十三年進士卽用知縣簽分河南旋丁母憂十五年服闋仍發原省十六年補滑縣知縣十八年九月教匪李文成聚眾謀不軌期於十五日起事克捷偵知之捕獲文成等二十五人嚴刑夾訊繫於獄匪黨劉成章等糾合賊眾猝於初七日入城劫文成於獄踞城以叛克捷及家屬俱被戕事 聞

賜卹如例 賞雲騎尉世職襲次完時以恩騎尉世襲罔替文成之將作亂也兩次至京與直隸教匪林清約同日起事清由中發文成自外應之會文成爲克捷所獲遂失期林清以外援不至亦就獲伏誅官軍圍滑縣逆黨劉國明等引文成先遁因刑傷重不

能行載以車旬餘抵輝縣司寨山距滑縣僅二百餘里官軍一鼓殲之文成自焚死出其屍傷痕猶在 上以二逆未遂期會故前後授首易如拉朽克捷首破逆謀厥功甚大照例賜卹尙不足旌死事之忠命加等照知府例賜卹入祀京師昭忠祠克捷子二人長逢泰次望泰亂作之先一月逢泰送望泰回籍完婚俱得免於難惟逢泰妻徐氏隨任城破克捷夫婦被戕徐氏抗節不辱挺身罵賊賊釘於廳柱斃割之骨棄無存克捷叔京課姪有勳徐氏叔雲章幕友李槐蔭諸自涵梁廷輝廷輝子需泰來張炎孫鼎章冠山及家丁祁升等共三十五人均遇害經巡撫朱勳遵 旨查明奏 聞 諭曰強克捷職膺民社能周知一縣之事首先訪獲逆

黨傅林清李文成等失約敗謀後先投首實屬傑出良臣功在社稷且以身殉難闖署被害者至三十餘人深堪嘉憫覽奏揮淚不止前經降旨照知府例賜卹入祀京師昭忠祠尙不足以酬忠蓋強克捷著加恩賜諡忠烈賞給騎都尉世襲罔替伊長子強逢泰卽著承襲騎都尉世職服闋後送部引見次子強望泰著賞給舉人一體會試長媳徐氏著賜諡節烈誥贈恭人照例建坊旌表並著朱勳遵照前旨在韓城縣建立專祠前層設強克捷牌位後層設節烈恭人牌位其從難之三十五人俱設牌從祀地方官春秋致祭以慰忠貞初次致祭著巡撫朱勳親詣拈香至韓城縣登仕籍者有強克捷之忠良前大學士王杰正色立朝亦籍隸該縣士

風清茂宜示優旌著將文武學額各增五名著爲例又命於滑  
縣亦爲克捷建祠與難者一並從祀逢泰於二十一年服闋引  
見以未嫻弓馬乞就文職上以克捷功烈偉著特命以主事  
用在軍機處學習尋補工部主事旋授福建督糧道望泰於二十  
二年會試不第欽賜進士改翰林院庶吉士習國書二十四年  
散館三等是科考列三等初俱歸班銓選望泰蒙恩授內閣中  
書四川直隸州知州

右 國史館本傳

嘉慶十八年秋九月妖人李文成等據滑叛十五日賊之魁林清  
族其黨入禁城爲亂卽伏誅冬十二月復滑事定詔以滑縣



令強克捷先事敗賊謀有社稷功既以例卹其死事矣復特贈  
知府 賜諡忠烈且 命韓城及滑皆爲立祠堂公長子婦徐氏  
罵賊死 贈節烈恭人其媼亞朋友同死者皆附焉凡三十餘人  
賜其長子四品世襲次子舉人一時天下皆知強公之功之偉亦  
既褒顯矣哉事起倉卒傳聞多異詞小人好爲瑕疵或議公死稍  
後予訪問既得實不敢不直書以白公之志且備 國史他日之  
采擇云公初莅滑有退吏某方頌繫公白其誣出之吏感激思自  
效八月訶李文成等逆謀以白公公慮激之變且害民密申於太  
守請調營兵爲備而後禽之太守不應且屬母張皇生事端再申  
又不應九月某日或載兵兩車入滑吏詰之仰而荅曰牛亮臣爲



之若我何吏不敢問公知之曰事急矣又以申於守守方以他事之開封其幕下客荅如前公曰兵不得調矣當奈何顧其下曰吾欲遂禽之何如吏役多惑公願盡力皆曰諾遂突入文成舍繫而歸坐堂皇嚴詰謀叛狀暴笞斷其脛文成及其黨二十四人皆具服乃鏞之獄夜中牛亮臣突入獄劫文成出攻某吏屠其家遂舉事公聞變率吏役數十輩出禦賊巷戰久之賊益眾吏役爭擁公且戰且走出滑城旦至封邱當是時公將赴開封求急調兵擊賊以復滑頓曳不能行封邱令全福勸稍休而卽夕白太守太守曰吾聞滑破不得令聲息謂死矣已申省強君義不可不死全福匿郡檄而從容謂公曰聞賊據滑勢張甚非厚集兵力不能擊旦夕

不得復矣將奈何公大慟曰城不得復耶我死後矣公起立問曰  
有朝服乎則曰有全福入取朝服奉公公受而服望闕北面再  
拜訖爲書致其同年生席元榜屬善教二子諭二子事席君其如  
父賦詩一章吾必爲厲鬼殺賊乃縊後城破三日也或疑公是時  
欲遁去或云太守以始之不從公請早發兵也畏公言其短迫之  
死是皆不然公於賊圍中已脫身走至於封邱而卒以身殉公之  
不惜死明矣若衛輝距開封密邇太守早從公言謁大府集營兵  
爲備則亮臣不得劫文成以起而滑可不失而林清之謀必早著  
飛章入告掩捕可盡得何至氛擾 宮禁亟返 天蹕用兵歷兩  
時之久而後卽平且賊之逃匿者逾年而猶有未獲者哉高爵厚

國朝通志卷之三十一  
三  
祿不恤國事狃於太平泄泄沓沓不知賢否成敗之故以失地殃  
民若曹所爲誠可恨至城破而謂公當死此責公以人臣之義不  
可謂相迫且公之死亦未嘗見郡檄也嗚呼天下當有事時所恃  
者人心耳孔子荅子貢兵食皆可去而民無信不立賊謀本不欲  
殘滑假令公不禽文成可以安於滑而文成奸謀將以十五日前  
北來爲林清後繼夫以 國家德澤涵濡百數十年京師之民必  
不爲賊脅且 上自行在旋師撲滅賊亦懸命漏刻聞耳然而百  
官萬民其能泰然衽席安堵無恐如今日否也且文成卒以刑傷  
足距躍不能颺去其黨護之乃聚而殲旃滑所以卽復旁近縣所  
以無擾皆藉此然則公卽不死而公之功亦足以廟食而無愧焉

已且夫爲民長上養癰而不覺卒起不及備而罹於鋒鏑之禍論者猶必恕其智之所不及而哀其死事況如公之忠勇謀賊大效著於身後而又慷慨作歌就義如歸者乎 聖主以爲治天下之道維風教勸忠義最急 特命表揚以風示有位而浮議蠶起爲賊助攻痛哉人心何足爲公悲乎公死事本末席君以告祥符周編修編修以告予予與編修亦公同年生編修兄孝廉之瑀往歲來京師過別公公寄聲曰爲我問訊之琦哥之琦編修名也其質直如此

右記事錢儀吉撰







劉斌 呂秉鈞等

劉斌陝西咸甯人由吏員於乾隆五十八年選河南盧氏縣朱陽司巡檢嘉慶九年調滑縣老岸鎮巡檢十八年九月教匪李文成與直隸教匪林清潛通逆謀期於十五日同時起事斌偵知之聞於知縣強克捷捕獲文成等下於獄逆黨劉成章等猝於初七日入城劫獄滋事斌及教諭呂秉鈞典史陳寶勳皆死之把總戚明彰拒賊陣亡俱闔門殉節賊之初起也逆黨朱成隨賊目王良道赴朱村說降生員朱繼連誓死不從率村人拒守賊數千來攻繼連戰歿賊平後經欽差大臣那彥成查奏 諭曰巡檢劉斌於逆首李文成未經起事之先訪聞稟縣迅就擒獲刑訊受傷旋經官

兵殲蕩厥功甚鉅且捐軀殉難全家被戕實爲可嘉可憫教諭呂秉鈞勵節捐軀一門殉難深堪憫惻均著加恩照知縣例賜卹典史陳寶勳把總戚明彰亦全家被害均爲慘烈著加恩照原官給予卹典以勵臣節而慰忠魂斌秉鈞寶勳明彰均 賞雲騎尉世職襲次完時以恩騎尉世襲罔替斌子寶善襲秉鈞世職未襲寶勳子邦英襲明彰子華襲繼連 賜卹如例皆入祀本籍昭忠祠秉鈞河南新安人由拔貢捐納教諭於乾隆五十一年選靈寶縣教諭五十二年丁母憂五十五年服闋六十年選是職寶勳順天宛平人由供事議敘未入流於嘉慶十一年選安徽舒城縣典史以親老告近十二年選是職明彰河南陝州人由武舉揀選三等

投營效力嘉慶二年署閩鄉汛把總五年四月署河北鎮標中軍千總八月署靈寶汛把總十二年補是職繼連滑縣人

右 國史館本傳

君姓劉氏諱斌陝西咸甯人始爲盧氏縣朱陽巡檢嘉慶初嘗練鄉兵以禦賊九年改滑縣老岸鎮巡檢去縣治七十里勤其職奸民畏之嘗飲聶監生所酒半私語君曰是邑將有變君亟去官可免時十八年八月十五夜也因微服時行村落中時久雨夜氣慘悽聞治兵仗聲甚厲君拊膺悲歎聶監生言不誣也偵鐵工具知賊李文成與直隸林清首尾謀逆事告令守皆難其事卽訊鐵工以得李文成牛亮臣親致之縣訊文成折其脛賊始與林清謀定

九月十五日期也至是不及待又忿君戕其魁也九月七日奪城門以入君時居典史署晨起更衣聞變問僕持衣者曰信乎曰信也君卽更短衣持械出遇賊於衢前擊殺二賊並子嘉善皆死妻韓氏先得君與訣書坐署樓與子炳善女巧雲自焚死婢從死者曰春梅曰夏蓮先是韓偽怒其前妻子寶善逐之媼家故以免君死事 聞 贈官知縣諡忠義子蔭襲雲騎尉改文職爲貴州某官時與君同死者教諭呂秉鈞典史陳寶勳把總戚明彰也梅曾亮曰以林清黨之蓄謀祕計而服死不旋踵以黨與禽而期會誤也則君之功豈僅以死償節者哉使其從人言免身而宿禍孰以必死責是官者不忍出此而妻子相隨於煨燼也悲夫雖然



君不死奸必不彰君固自知所全者大矣

右家傳梅曾亮撰

嘉慶十八年九月六日夜雞鳴時賊宋元成等踰入滑城內賊應之潛傳縣署斫門入知縣強君闔門死豕婦徐詈賊賊釘諸扉而殘之死尤烈元成等出文成亮臣於獄城守營把總戚名彰聞變率兵至與巷戰死之縣胥毛天雄率眾與賊戰於南關甚力既而賊大至遂戰死殺巡檢劉斌執教諭呂秉鈞典史陳寶勳將降之秉鈞慮賊黨眾設流寇他州縣將蔓延不可制遂詐爲賊畫策給賊據滑爲根本事可集賊果據滑推文成爲主以牛亮臣爲軍師宋元成爲大元帥分眾奪據滑縣之道口鎮以劉國明爲將軍守



之道口河南貯兌漕糧之所距滑僅八里商販輻輳潞巨鎮也先是馮克善者有勇力強君令胥役追捕於迎陽堡克善手雙刀獨出拒敵役眾傷還克善跳而免賊以捕急因先期發至是克善復來文成令率司莊富莊新莊民人至謝莊運餉遂四出脅降未幾秉鈞與實勳仍俱不屈死全家皆死論者以賊聚殲於滑爲秉鈞力焉

右黎陽聞見錄趙如椿撰

趙綸

趙綸浙江錢塘人由副貢生就職州判分發直隸補霸州淀河州判尋升知縣歷任東光盧龍曲陽等縣嘉慶十六年調長垣縣時河南滑縣教匪李文成潛蓄逆謀於直隸山東附近各縣散布匪黨遞相煽惑十八年八月山東金鄉縣匪黨崔士俊等叛跡大著綸團練丁勇豫籌防堵九月李文成陷滑縣長垣匪黨徐安國等謀應之屯聚於縣屬東北鄉葦園村綸廉得其情屬典史劉世治偕城守營弁兵守城親率丁役密赴查拏安國等舉白旗爲號糾眾抗拒綸以眾寡不敵徧體受傷死之嗣經都司陳夢熊帶兵搜剿至葦園村於賊黨王盡寶家與尸以歸總督溫承惠奏聞

諭曰知縣趙綸平日官聲尙好因查拏匪徒猝被戕害著照陣亡例賞給卹典尋命入祀本籍昭忠祠賞雲騎尉世職襲次完時以恩騎尉世襲罔替子錦襲

右 國史館本傳

姚國旃 字國材從子大綜

榜雲漢等

姚國旃安徽歙縣人由監生捐納未入流乾隆三十九年選直隸懷來縣土木驛驛丞四十四年調易州上陳驛驛丞五十四年丁父憂五十六年服闋六十年揀發東河河工嘉慶元年署曹考廳巡檢三年升署山東單縣主簿九年遷曹縣縣丞十二年遷知縣十五年以東河秋汛安瀾在事出力賞加同知銜十八年九月河南滑縣教匪李文成倡亂曹縣匪黨朱成貴等潛與勾結國旃捕獲朱成貴弟成珍械送至省續獲夥匪趙廣春等五人繫於獄以成貴逃逸率捕役赴鄉訪緝無獲遂回署賊於次日糾眾入城釋獄囚殺入縣署國旃出禦之被戕兄國林姪大綜媳馮氏尙氏

姪媳王氏幼孫男女二人及馮氏母馮程氏婿張士鈞幕友吳星  
萃吳煥煥子吳中惠並內外僕從共二十八人皆死於難賊之未  
入縣署也先至千總楊雲漢署雲漢持槍出戰陷入圍中陣亡妻  
高氏媳顧氏俱殉事 聞 諭曰知縣姚國旃著照同知例議卹曹縣城守營千總楊  
捕捐軀或拒賊殞命並家屬幕友親戚僕從同時被害深堪憫惻  
同知銜曹縣知縣姚國旃著照同知例議卹曹縣城守營千總楊  
雲漢著照本職例議卹幕友吳星萃等及各該眷屬被害殉節者  
一體查例撫卹國旃雲漢尋 賜祭葬並 賞雲騎尉世職襲次  
完時以恩騎尉世襲罔替入祀本籍昭忠祠雲漢山東滋陽人由  
行伍拔補兗州鎮標右營外委遷太安營把總嘉慶元年隨征川



陝楚三省教匪在湖北黃龍壩陝西磨溝四川溫陽井等處殺賊有功 賞六品頂帶旋以身受矛傷撤回原營十一年升是職國旃世職未襲雲漢孫嘉澍襲

右 國史館本傳

吳星萃

吳君諱星萃字東聯陽湖馬蹟山人父桂枝以名進士爲經師受業弟子數百人故修撰金先生榜今太保大學士董公誥其尤著者也君早稟庭訓未冠卽補學官弟子進士君與先君子交相善以女妻先兄繼舉進士君歿君時時讀書余家先君子頗稱譽其所爲制舉文已而依董太保於京師肄業國子監凡客京師三十

年君既屢試不讎欲南歸輒因循不果年未三十卽喪婦無子亦不更娶有友人姚君者官曹縣令請於董太保偕君而東嘉慶十八年林清之黨將爲亂金鄉令吳階捕得崔士俊卽羽檄各縣緝賊至曹姚令不之信君力陳利害並爲設鉤致方略甚具姚令意稍動而吏役多賊黨奔告其魁知事泄遂先期攻縣署入之急求得君叱曰汝令捕我輩者汝耶君曰然恨令不早聽吾言使汝曹猖獗至此吾年七十有二豈畏死邪賊益憤攢刺之被數十創姚令一家亦遇害賊去有營兵數輩至君臥積屍中見之呼曰吾已無生理幸加刃令我卽死兵憐之爲斷氣管乃絕時九月初十日也吳階既得崔士俊族誅其黨桀黠者數十人金鄉獲全巡撫將

上其功並陳姚令死難狀階先已遣人開行求得君屍棺斂如禮  
置佛寺中至是請以君名附奏得 旨入祀忠義祠嗣子某以二  
十年八月迎君柩歸馬蹟山越九月啟君配汪孺人之藏而合窆  
焉里中士大夫會葬者數十人方吳階之擒崔士俊也訊得林清  
九月十五日潛入 禁城之謀馳報大府兩司以下無不駭且笑  
以爲邀功生事非獨一姚令然也賴巡撫據以上 聞階之功在  
滑令強克捷上顧君以一老諸生又平生選懦恆緩不及事而先  
事設謀臨難致命乃能如此其殆養之有素邪抑進士君粹然儒  
者靈爽實式憑之邪吾媿向者知君之淺也乃爲之銘曰  
安居 城急斯棄彼何人哉守土吏君令客耳宜可避挺身罵賊

殉大義煌煌 殊恩逮九地君之始願甯所冀我銘其幽不出涕  
君骸雖殘有生氣

右墓誌銘陸繼輅撰

賀德瀚 朱樹堂等

賀德瀚湖南甯鄉縣人由舉人於嘉慶六年大挑一等分發山東以知縣用旋丁母憂九年服闋仍發原省十年署荷澤縣知縣以捕獲鄰境在逃流犯下部議敘十二年歷署鄆城利津兩縣十三年審結登州府積案八十餘起十五年署朝城縣以捕獲鄰境盜犯下部議敘朝城徵收錢糧向用活串德瀚請於藩司改板串以防弊混通省遵行十七年審結曹州府積案五十餘起十八年三月署范縣八月署定陶縣九月河南滑縣教匪李文成倡亂曹縣匪黨朱成貴等應之陷定陶外委張廷立帶兵出戰爲賊所敗德瀚見事急令家丁齋印赴府告變自率丁役出署迎擊賊大至被



戕幕友朱樹堂陳瑤圃陳鳳均皆死於難時 聖裔在籍洙泗書  
 院學錄孔毓俊廩生孔毓仲增生孔毓溇孔毓伯附生孔毓良孔  
 傳鑪孔傳錦孔傳璧亦率鄉勇助官剿賊戰死於奮義村事 聞  
 均 賜卹如例入祀本籍昭忠祠德瀚毓俊 賞雲騎尉世職襲  
 次完時以恩騎尉世襲罔替德瀚子懋榘襲毓俊子傳生襲毓俊  
 等俱山東曲阜人

右 國史館本傳

嘉慶十九年八月甲寅 予死事山東定陶縣知縣賀德瀚典史  
 孫世縉世職

右東華續錄王先謙編

按賀公 國史本傳遺  
 典史孫公謹補此條

君諱德瀚字勺菴長沙甯鄉縣人先世出吉水屯長沙明永樂初徙居甯鄉曾大父發大父清寅皆諸生曾大父考授州同母老不謁選有拾金還人事大父蠲穀百石儲社倉皆載府縣志父嘉謀國子監生母蔡氏君生之前夕父夢達官至堂傳呼接詔生而端偉穎異九歲能文乾隆己亥恩科以廩生舉於鄉嘉慶辛酉年大挑知縣發山東歷荷澤鄆城利津朝城范縣定陶皆有廉能聲卒殉難定陶年六十有四先是首逆林清伏莽近畿藉邪教嘯聚煽惑以癸酉年九月構逆於直隸山東河南地錯交而兇黨徐安國朱成貴等分擾曹縣定陶初十日昧旦蠶至定陶城外委張廷立率守卒數十人拒之傷斃君知事急取印付僕李庭來齋郡而

白衣冠升堂大聲諭之弗退且劫獄君三日前聞陷滑縣練義勇未成隊君卽率之迎捕力不敵遂死之君死時罵不絕口故受禍最烈賊退邑士民收其屍哭奠三日後觀察熊公方受驗視乃殮顏色如生中丞同公興以聞奉旨如例賜卹予雲騎尉罔替卹葬銀各百兩致祭一次國史立傳祀長沙府昭忠祠君性平易獨於名節所關則辭氣震厲居官案無畱牘在朝城嚴治竊盜閭里安枕回民叢毆傷人人畏其橫君必按問如律徵賦請行江南版串法民便之在范爲糜粥賑貧饑粥可立箸乃分食之權定陶未一月卽罹難當是時承平日久民不知兵不軌之徒變起倉卒甚至逆天犯闕毒流三省然不旋踵而殲磔靡遺蓋國家

德澤淪肌髓故雖稂莠蔓生而芟夷蘊崇之無難也夫平日培之  
蒔之責在州縣使爲政期月化行而禦侮有備必能式遏安堵無  
如時暫而變劇然君致命遂志吏民感歎烝嘗弗衰 朝廷褒卹  
子孫榮蔭可謂不負所學矣余與君計偕相友善每以行誼交勸  
是年余監試出闈得君八月中旬書言抵任檢災甚勤未及復而  
邸報君死難矣爲之欷歔流涕信君之不媿其言也君子懋榘以  
君行狀寄余請志其墓余曷敢辭君配王孺人同邑進士廣西上  
林令忻之女先君卒子三懋榘蔭雲騎尉懋榘懋樞皆邑諸生女  
四皆適士族孫二容燭榘生容煥榘生孫女七皆幼君殉節之明  
年三月懋榘等始自定陶扶輓歸里卜吉於某年月日葬其邑之



一都九區東茅嶺之陽銘曰

砥行以豫臨難不撓況佩名義當 仁聖朝綰綬執殳咸爲毅魄  
所尤難者官攝時迫君學有原有文有政文惟理明政惟經正瘞  
犬旁猗突不及防惟志素定處變如常歸神故土 旌寵葬祭臣  
節 國恩施及苗裔

右墓誌銘唐仲冕撰



那倫 德玉等

那倫納喇氏滿洲正黃旗人由備箭拜唐阿於乾隆二十九年授藍翎侍衛三十三年遷三等待衛四十年遷二等待衛四十六年擢頭等待衛五十五年襲世管佐領嘉慶十八年九月直隸教匪林清倡亂遣其黨陳爽等入禁城謀逆那倫在太和門直班聞變往捕爲賊所戕烏槍護軍校德玉同時被害護軍校四德入禁城剿捕亦被戕賊之入禁城也先至文穎館供事議敘從九品胡大銓蘇濤未入流戴杰方在館猝遇賊皆死之事 聞均 賜卹如例 賞雲騎尉世職襲次完時以恩騎尉世襲罔替那倫子恩隆襲德玉子岳桑阿襲四德子福泰襲大銓子富齡襲濤子斌襲杰

子宸鉉襲那倫得旨入祀昭忠祠德玉兆雅蘇忒氏蒙古鑲藍旗人四德鈕祜祿氏滿洲正白旗人均由閒散補護軍洊升是職大銓江蘇太倉直隸州人濤安徽石埭人杰順天大興人

右 國史館本傳

嘉慶癸酉九月十五日教匪林清黨祝現等句結太監闖入宮禁有侍衛那倫者納蘭太傅明珠後也少時家巨富凡滌面銀器日易其一晚年貧窶一冠數十年人爭笑之是日應值太和門聞警趨入時有勸其緩行者那故迂直曰國家世臣當此等事敢不急趨所守耶及趨至熙和門門已閉那方徬徨間適賊益至遂被害又賊人文穎館殺供事數人陶梟慈編修梁方校書聞門外屢

聲震然突問曰金鑿殿在何所其愚蠢也若此陶僕駱升方提茶  
楹至遂以身障冕茲賊傷數刃駱升死而冕薙得以免

右錄宗室昭榘撰



楊連仲 紀詳等

楊連仲湖南綏甯人由行伍於乾隆六十年隨征黔楚苗匪嘉慶二年拔廣西提標左營外委三年隨剿湖北教匪攻克歸州終報寨首逆覃加耀就擒連仲與有功四年擢平樂協右營把總五年調赴陝甘軍營尋遷梧州協左營千總六年正月升陝西永安堡守備六月隨總兵銜穆克登布擒首逆伍懷志於秦嶺 賞戴花翎七年隨穆克登布追賊入川至通江縣鐵鐙臺地方生擒首逆景英及賊目蒲添香 賞白玉翎管八年正月升靖邊營都司八月調鞏坪營都司在安康平利等縣搜捕餘匪九年升甘肅甯夏鎮標右營遊擊十年三省肅清撤回原營十二年調陝西略陽營



遊擊十八年九月河南教匪李文成滋事陷滑縣城踞之連仲隨  
欽差大臣那彥成進剿賊分屯濬縣之道口鎮爲犄角勢十月官  
軍攻道口連仲偕甘肅峽口營都司紀祥直隸昌平營千總吳炳  
通陝西固原城守營千總李洪春商州城守營外委柯玉先後陣  
亡時匪眾散布村落閒往來侵略官兵分剿之河南汝甯營把總  
梁國幹在施家寨傷亡陝西漢中城守營外委吳毓暄於胡家營  
戰歿候補守備世襲雲騎尉許天貴陝西臨潼汛把總楊秀廷河  
南源潭鎮外委馮國棟陝西東江口營外委馬秀午總銜韓應祥  
亦以攻城先後陣亡又圍滑城時李文成乘閒遁副都統色爾滾  
等躡之於輝縣司寨山克其巢文成自焚死甯陝營外委岳貴冒

火礮擊受傷死之先後事 聞均 賜卹如例 賞雲騎尉世職  
襲次完時以恩騎尉世襲罔替連仲子三元襲紀祥子克耀襲炳  
通子基順襲洪春弟洪泰襲玉未襲國幹子安貞襲毓瑄子兆賢  
襲天貴子榮襲秀廷子炳襲國棟子殿試襲秀子兆明襲應祥子  
景黎襲貴嗣襲無考紀祥甘肅固原州人由武舉隨營效力於嘉  
慶九年補陝西提標前營千總十一年隨勦甯陝營叛兵十二年  
隨勦瓦石坪汎叛兵均有戰功十八年遷甘肅安定堡守備署甯  
夏鎮標前營遊擊檄赴河南軍營升是職炳通陝西安康人由鄉  
勇隨勦川楚教匪於嘉慶六年擒首逆楊霖生於四川廣元縣  
賞六品頂帶尋拔直隸廣平營外委七年擢豐潤營把總十四年

升是職玉陝西商州人由行伍拔是職國幹河南新蔡人由鄉勇於嘉慶二年隨剿息縣賊匪擒首逆游拔外委五年擢是職毓暄四川華陽人由行伍拔是職天貴國棟俱南陽人天貴於嘉慶三年以世職隸南陽鎮標學習期滿候補是職秀廷四川廣元人秀巴州人俱由行伍拔是職應祥陝西涇陽人貴四川達縣人由鄉勇於嘉慶四年投效陝西軍營以功 賞六品頂帶六年拔雙山堡額外外委十年改充東江口營馬兵十三年復拔額外外委十八年隨攻滑城受傷補是職

右 國史館本傳

楊連仲湖南綏甯人嘉慶戊午以把總從經略額勒登保征教匪

轉戰楚蜀素隴所在克捷累功擢遊擊任洛陽營遊擊癸酉滑寇起總統那彥成檄赴河北營時賊踞滑城分黨數萬屯道口道口者南北衝衢也是年十月大軍進攻連仲與遊擊周君貴奮馬先入道口巷手殲賊數十人賊悉眾圍擊之連仲環顧無一卒從而馬復受創踣乃步鬪潰圍自巷後出左腋下創痕攢簇血漬衣盡赤既知其部卒皆與賊戰巷口乃挺矛由別巷轉抄賊後與部卒夾擊賊驚潰仲連尾殺數十人戰方酣俄賊自牆缺處斫中其腦連仲憤奮手刃數賊而死尸僵立不仆者久之先是略陽寺僧晝見連仲入寺面血淋漓詫焉越數日遂聞死事狀 詔賜卹蔭入

祀昭忠祠

右傳李元度撰



岳王保

岳王保瓜爾佳氏滿洲正白旗人嘉慶七年由護軍授藍翎長十二年升護軍校十八年九月河南教匪李文成作亂據滑縣岳王保隨欽差大臣那彥成往剿十一月克道口進偃滑縣軍其三門惟北門及西北門未合圍賊之屯桃源者以三千人來援城中人出應之岳王保奮力截殺歿於陣事 聞 賜祭葬 賞雲騎尉世職襲次完時以恩騎尉世襲罔替子托金太襲

右 國史館本傳



任起鳳 朱麻等

任起鳳陝西長安人嘉慶元年由行伍隨剿湖北竹山縣教匪打仗受傷十年投西安鎮標中營額外外委十一年隨剿甯陝鎮叛兵陳達順等在事有功十二年補本營外委十六年遷右營把總十八年六月擢中營千總九月河南教匪李文成作亂陷滑縣據之十月調起鳳赴軍營協剿十二月官軍克道口進圍滑縣穴地道於東門竄以火藥爲攻城計會賊於夜閒然炬瞭望誤墮穴中地雷發起鳳與西安鎮標右營把總朱祥潼關協華州汛把總李登高皆轟斃官軍屢攻東門河南荆子關協左營外委李有時外委頂帶張士俊先後歿於陣事 聞均 賜祭葬 賞雲騎尉世

職襲次完時以恩騎尉世襲固替祥陝西長安人嘉慶元年由行  
 伍隨剿川楚教匪屢立戰功五年授西安軍標左營額外委九  
 年補本營外委十三年升右營把總十六年調是職登高陝西潼  
 關人有時河南浙川人均由行伍洊升是職士俊河南洛陽人起  
 鳳于忠魁襲祥子連登襲登高子蔚盛襲有時子長生襲士俊子  
 丙襲

右 國史館本傳

胡文秀

胡文秀湖北武昌人由鄉勇於嘉慶元年隨剿竹山縣一帶教匪著有戰功給七品頂帶二月於四川太平縣通天關南津關等處殲擒甚眾並奪獲器械換六品頂帶五年五月隨經略額勒登保剿賊有功 賞戴藍翎十一月隨總督長麟於陝西褒城縣毛家水井接仗奮勇 賞五品頂帶以千總卽補六年二月進攻汧陽縣黃土梁擒賊十餘人得 旨獎賚三月賊竄鳳縣瓦房溝官兵乘雨圍剿文秀衝入賊隊殲賊目四人賊遂潰事 聞 賞換花翎以守備卽補復於秦州王家河轟斃賊匪數人身受矛傷四月補陝西甯陝鎮標中營千總十一月攻賊於鎮安縣之獅子口七



年復於洋縣蘿蔔廠擊賊先後均有斬獲十年補柏林堡守備十二年調赴喀什噶爾換班十六年班滿回營十八年二月升甘肅中衛協中軍都司九月檄赴河南滑縣協勦教匪隨總兵楊芳攻克司寨山賊首李文成自焚死擒獲餘匪身受矛傷升固原提標後營遊擊十九年二月搜捕南山零匪於五郎廳之佛山峒鎮安之楊泗廟腰竹溝等處俱有俘獲八月以前由河南撤回攜帶難民子女事覺褫職道光二年效力陝西西甯軍營隨勦番賊被傷陣亡事 聞得 旨照守備例議卹 賞雲騎尉世職襲次完時以恩騎尉世襲罔替子未襲

右 國史館本傳

法里那 訥蘇鏗額等

法里那舒穆魯氏滿洲鑲黃旗人駐防伊犁由惠遠城印房筆帖式於道光元年升喀什噶爾印房主事職銜二年調補回務處主事職銜五年七月回部逆裔薩木薩克之子張格爾潛至薩雅克部落糾合布魯特等至喀什噶爾卡外窺伺經阿奇木遇瑪薩依特等稟報參贊大臣永芹令幫辦大臣巴彥巴圖帶兵二百餘名以查卡爲名迅速掩捕時法里那等隨同巴彥巴圖前往張格爾聞風先期竄匿八月巴彥巴圖行至都爾伯津縱兵剿殺夷目汰劣克家屬百餘人汰劣克遂與眾布魯特追圍官兵力戰一晝夜全軍陷歿法里那與筆帖式訥蘇鏗額景毓在阿克密依特地方

同時陣亡事 聞均 賜卹如例 賞雲騎尉世職法里那子舒  
堃襲訥蘇銓額子慶順襲景毓子訥爾精額襲訥蘇銓額額爾圖  
氏滿洲正紅旗人嘉慶二十二年由烏魯木齊馬甲派赴喀什噶  
爾換防道光元年委筆帖式三年補本職景毓李佳氏滿洲鑲紅  
旗人道光元年由伊犁馬甲派赴喀什噶爾換防三年委筆帖式  
四年補本職

右 國史館本傳

劉發恆 伍開江

劉發恆貴州黃平人嘉慶七年武進士由三等侍衛授陝西長武營都司十八年正月升甘肅洪廣營遊擊九月檄勦河南教匪擊賊於胡家營勝之時賊目踞道口負隅抗拒與滑縣匪徒相援應官兵克道口復破賊於桃源斬獲無算發恆在事有功十二月攻滑城發恆奮勇爭先城破奪門入受石傷擒首逆牛亮臣敘功以參將升用十九年陝西岐山郿縣匪徒滋事檄往勦捕賊屯柏楊嶺焚掠村墟發恆督兵抄上山梁殲賊目麻大旗劉二餘匪潰散由都督河佛爺坪躡至百花川首逆龔貴就擒並搜捕唐藏太渠一帶逸匪奏入 賞戴花翎道光元年赴喀什噶爾換防四年逆



同張格爾犯卡發恆率兵堵截戮數匪偵知由爾根溝內有布魯  
特賊匪潛藏發恆復搜獲旗幟器械縛賊目胡納克 上嘉其勇  
幹以副將升用五年隨幫辦大臣巴彥巴圖擊賊於阿克密依特  
戮賊多名誤入山險被圍發恆偕甘肅同心城守備伍開江俱戰  
歿事 聞均 賜卹如例 賞雲騎尉世職襲次完時以恩騎尉  
世襲罔替發恆子秀珠襲開江子騰蛟襲開江湖北興國州人由  
鄉勇於嘉慶二年入伍拔甘肅永安營額外委隨剿川楚教匪  
疊著戰績擢威遠營外委十年檄赴白塔五勝溝剿辦夷匪與有  
功十六年赴喀什噶爾換防十七年遷西甯鎮標右營把總二十  
年逆匪孜牙敦滋事奉檄剿捕道光二年升哈拉庫圖爾營千總



五年升是職

右 國史館本傳

國史館本傳



都友周 李文彥

都友周甘肅西甯人由行伍於嘉慶元年派剿川陝教匪殺賊受傷十一年補西甯鎮標左營額額外委十二年派剿貴德賊番升鎮海營經制外委十五年升大通營把總十六年派赴鄂倫布拉克安卡二十一年擢亦雜右營千總道光二年派赴喀什噶爾換防五年逆裔張格爾滋事隨幫辦大臣巴彥巴圖出卡剿捕行抵阿克密依特地方殺賊多名誤入山險被圍奮力衝擊於溝坡下遇賊戰歿奏聞與同時陣亡之西甯鎮標左營經制外委李文彥均賜卹如例賞雲騎尉世職友周子長楨襲文彥子澍襲文彥甘肅西甯人由行伍於嘉慶六年派赴喀什噶爾換防十三

年派勦貴德番賊出師漳纏溝甘壩一帶克之十八年從征豫省  
攻道口復滑城在事有功十九年正月南山零匪分竄太白山老  
林白雲峽及金牛坪金雞河地方官兵截擊復由棧道武關繞至  
漢口上游延及川界我師先扼入川之路盡殲其黨文彥與有戰  
績尋補外委道光元年喀什噶爾換防拔補本職

右 國史館本傳

馬良

馬良四川雷波廳人由行伍於嘉慶元年隨剿黔楚苗匪復乾州克平隴攻石隆寨誅首逆石柳鄧以功給外委頂帶二年二月隨征湖北教匪於長陽縣四方臺直搗賊巢受矛傷六月克大壩口賊卡九月槍斃首逆林之華於雪崖嶺三年克終報寨首逆覃加耀就擒進剿大鵬山四年正月克麻壩寨首逆羅其清冉文儔等以次擒獲三月戮首逆冷添祿於石頭堰十二月擒首逆王登廷於蒼谿縣貓兒壩拔四川城守右營額外外委五年正月追賊至甘肅階州之臨江廟直前衝擊全獲勝仗得旨遇有應升之缺先行奏補尋補四川普安營外委三月隨剿賊於林江鋪擒首逆



楊開甲龐學盛劉開玉陳傑九月擊賊於成縣之麻柳壩首先撲  
入身被矛傷殲首逆伍金柱六年追剿高二馬五等股匪於新集  
壩斬馘無算七年川匪苟文明竄陝西南山良率兵追至花石巖  
戮之奏入 賞戴藍翎尋搜捕餘匪斬獲甚眾擢陝西沔縣營把  
總十二年瓦石坪匪徒滋事首從俱獲升千總十九年岐山郿縣  
匪徒竄略陽圍攻縣城良率兵堵剿斬擒五十餘名餘匪奔散升  
漢中鎮標中軍守備道光四年升甘肅察漢俄博營都司五年赴  
葉爾羌換防六年逆回張格爾滋事竄河色爾布依岳坡爾湖一  
帶良以辦事大臣音登額檄率同四品伯克阿布拉帶領回兵赴  
庫爾鐵里木一帶堵剿遇賊力戰歿於陣事 聞均 賜卹如例

賞雲騎尉世職襲次完時以恩騎尉世襲罔替子如麟襲

右 國史館本傳

同治三年庚午歲正月二十一日

卷三十一

三

馬翰寶 赫福等

馬翰寶甘肅鎮番人由其祖父正元駐浪營把總出兵金川歿於陣嘉慶元年補廕恩騎尉世職十五年效力督標二十四年學習期滿以千總補用道光四年署理莊浪營把總六年派往喀什噶爾剿捕逆回行抵巴勒他克地方偵知有賊聚山溝我兵分道夾擊一賊騎馬持矛直前迎拒翰寶首先槍斃餘賊百餘持械抗拒翰寶復先搶上山梁中槍陣歿是年烏魯木齊提屬精河營千總赫福河州鎮標左營經制外委賈貴河州鎮標右營經制外委黃陞於逆回入卡滋事先後陣亡事 聞均 賜卹如例 賞雲騎尉世職翰寶子健襲福子朝棟襲貴子呈祥襲陞世職未襲福甘

肅迪化人由行伍於嘉慶十七年拔補提標中營外委十八年升  
補把總二十三年升補今職貴甘肅西甯人由行伍於道光二年  
拔補河州鎮標右營經制外委陞甘肅秦安人由行伍於嘉慶十  
三年拔補河州鎮標右營額外外委十七年准補經制外委二十  
二年派赴英吉沙爾換防道光五年調補今職

右 國史館本傳



吳亨佑 王友貴等

吳亨佑甘肅固原州人由行伍於嘉慶二年隨剿四川教匪在開縣之馬耳山洛陽壩接仗有功拔陝甘提標右營額額外委三年由馬超廟梧桐寺等處堵剿賊竄陝西西鄉界復追至西河關殲斃多匪奪獲旗械無算四年拔陝西西鳳營外委尋以張漢潮股匪屯鎮安之張家坪官兵奮擊之斬張漢潮並生擒賊目李兆五年正月擢陝甘提標前營把總賊眾西折入甘官兵追至龍山鎮牛蹶灣等處亨佑戰功最多六月擊賊於茅坪擒賊首逆陳傑六年遷右營千總七年二月苟文明股匪由石泉縣竄迎風壩亨佑冒雪窮追斬獲甚眾四月剿賊於雷壩廳鳳縣交界之汪家壩擒

首逆魏洪升五月拏獲僞先鋒伍金華僞元帥康二麻子八年追  
剿苟朝九於黃安壩大埡口屢著戰功十年參贊大臣德楞泰查  
明川陝文武員弁勞績奏請鼓勵 命加亨佑守備銜先換頂帶  
十三年補陝西略陽營守備十八年六月升洮岷協中軍都司八  
月河南教匪李文成滋事檄赴滑縣軍營十月隨攻道口並擊賊  
於源南湖俱克之十一月攻克輝縣之司寨山李文成自焚死餘  
匪剿除淨盡亨佑身中矛傷十二月攻克滑縣首逆牛亮臣徐安  
國等均就擒奏入 上命先換頂帶遇遊擊缺出卽行升補尋檄  
剿陝西南山逆匪十九年擊賊於蓋屋縣之寬溝老君嶺擒首逆  
萬五並按捕逸匪凱旋調西固營都司二十年補甘肅大馬營遊

擊二十四年署左營遊擊道光二年檄赴西甯青海剿辦賊番三  
年署平羅營參將尋赴葉爾羌駐防五年升陝西甯陝營參將六  
年送回張格爾滋事帶兵救援遇賊於單板橋全軍被陷亨佑力  
戰陣亡時陝西西甯鎮標右營把總王友貴外委朱全甘肅提標  
城守營額外外委孫如林喀喇巴爾噶遜營額外外委宋魁俱於  
喀什噶爾協剿陣歿先後事 聞均 賜卹如例 賞雲騎尉世  
職襲次完時以恩騎尉世襲罔替亨佑子元直襲友貴子受祿襲  
全子興智襲如林魁照馬兵例 賞卹友貴全俱甘肅西甯人友  
貴由行伍於嘉慶十年隨剿貴德番匪十八年隨剿河南教匪道  
口司寨山及滑縣城以次克復 賞戴藍翎游拔西甯鎮標左營

外委二十五年赴喀什噶爾換防擢是職全由行伍隨剿青海河  
北番匪於嘉慶十七年拔西甯鎮標中營額此外委道光四年升  
是職如林昌吉人魁綏來人俱由行伍拔是職

右 國史館本傳



烏凌阿

烏凌阿瓜爾佳氏滿洲鑲白旗人嘉慶元年由前鋒隨征川陝楚  
教匪有功七年授藍翎侍衛十三年升三等侍衛十五年升副護  
軍參領二十一年升護軍參領二十五年擢頭等侍衛在乾清門  
行走道光三年授伊犁領隊大臣五年八月授正紅旗蒙古副都  
統九月回部逆裔張格爾勾結布魯特等入卡劫掠旋復遠竄喀  
什噶爾幫辦大臣巴彥巴圖率兵出卡剿捕全軍陷歿參贊大臣  
永芹咨調伊犁官兵備勦將軍慶祥令領隊大臣穆克登布帶兵  
一千先行馳赴復備官兵一千令烏凌阿管帶繼進十一月上  
命慶祥以將軍銜爲喀什噶爾參贊大臣親往督辦 命烏凌阿



到彼後畱該處聽候調遣六年二月率兵至喀什噶爾與穆克登布等分營屯駐六月張逆復糾結布魯特等入卡滋事潛結各莊白帽回眾爲內應自率五百餘人由呼爾特哈過河至托雲山徑趨東北慶祥令烏凌阿偕幫辦大臣舒爾哈善督兵分剿張逆竄至伊斯里由開齊山突進屯於阿爾圖什回莊官軍合力攻擊烏凌阿領兵繞至賊後由山梁下壓殺賊四百餘名生擒四十餘名賊眾敗退烏凌阿等帶兵合圍會夜雷雨張逆突圍遁去而喀什各回子紛紛從亂張逆復由大河沿庫森塔斯渾合眾數萬直逼喀什噶爾慶祥檄烏凌阿等撤兵回救時臺路已斷烏凌阿等提兵轉戰與賊遇於渾河自晨至晡眾寡不敵遂死之事 聞

諭曰逆裔張格爾作亂慶祥派領隊大臣烏凌阿帶兵迎擊殺傷賊  
匪四百餘人已將該逆裔圍入回莊大瑪雜內因夜雨昏黑草深  
樹密張格爾舍死突出逃逸官兵正在追捕該逆回等聞風響應  
分路迎拒官兵腹背受敵烏凌阿竟被槍傷陣亡效命捐軀深堪  
憫惻著加恩晉贈都統銜照例賜卹尋 賜祭葬 予諡壯武入  
祀昭忠祠並於喀什噶爾建昭忠祠與慶祥等一體入祀 御製  
憫忠詩勒石廕騎都尉兼一雲騎尉世職八年張逆就擒俘解至  
京 上廷訊畢 命寸磔梟示 諭曰領隊大臣副都統烏凌阿  
因帶兵圍捕臨陣陷沒皆由該犯倡亂以致傷我大臣殊堪髮指  
著烏凌阿之子侍衛忠泰同往市曹看視俾紓積憤用慰忠魂子

忠山二等侍衛忠泰頭等侍衛伊犁領隊大臣孫穆克登額襲騎都尉又一雲騎尉兼公中佐領二等侍衛

右 國史館本傳

按傳內大瑪雜即回部先世和卓木之墓和卓木華言聖裔

穆克登布

穆克登布季氏滿洲鑲紅旗人伊犁駐防嘉慶五年由委前鋒校補驍騎校十年升防禦十三年升佐領二十年授協領二十五年回部逆裔張格爾句結布魯特潛入喀什噶爾卡倫滋事上命伊犁將軍慶祥往剿道光元年慶祥令穆克登布等分路偵探設法誘擒旋於托雲山內獲首逆蒙達拉克及喀什噶爾回子他賴莫洛斯底克二名命交部議敘二年授庫爾喀喇烏蘇領隊大臣三年調伊犁領隊大臣加副都統銜賞戴花翎五年九月張格爾復結布魯特等入卡滋事幫辦大臣巴彥巴圖追賊全軍陷歿參贊大臣永芹請調伊犁官兵時慶祥已令穆克登布帶兵前



進 上命慶祥充喀什噶爾參贊大臣親往督辦並 命穆克登布到彼後先署幫辦大臣俟新任舒爾哈善到時仍畱該處聽候調遣十月穆克登布赴圖舒克塔什一帶卡倫防堵六年張格爾潛結白帽回眾爲內應自率安集延布魯特數百人於呼爾特哈過河由阿克密依特至托雲山徑趨東北慶祥令穆克登布抄至東北堵剿遂偕幫辦大臣舒爾哈善領隊大臣烏凌阿等馳抵阿爾圖什回莊張逆出莊迎拒官軍合力攻擊賊眾敗退莊內我兵遂四面攻圍會夜雷雨張格爾突圍遁去而喀城各回子紛紛從亂張逆復由大河沿庫森塔斯渾合眾數萬直逼喀什噶爾慶祥檄穆克登布等撤兵回救時臺路已斷穆克登布等提兵轉戰眾



寡不敵與賊戰於七里河死之事 聞 諭曰逆裔張格爾作亂  
慶祥派領隊大臣穆克登布帶兵迎擊殺傷賊匪一千四百餘人  
已將該逆圍入回莊大瑪雜內因夜雨昏黑張格爾舍死突出逃  
逸官兵正在追捕該逆回等聞風響應分路迎拒官兵腹背受敵  
穆克登布竟被槍傷陣亡效命捐軀深堪憫惻著加恩晉贈都統  
銜照例賜卹尋 賜祭葬 予諡壯節入祀昭忠祠並於喀什噶  
爾建昭忠祠與慶祥等一體入祀 御製憫忠詩勒石磨騎都尉  
兼一雲騎尉世職子額勒互額襲

右 國史館本傳

